



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

Phys. 15



UNIVERSITEITSBIBLIOTHEEK GENT



JOHANNIS CLAUBERGII
OPERA PHYSICA,

Id est,

Physica Contracta, Disputationes Physicæ,
Theoria Viventium, & Conjunctionis
Animæ cum Corpore Descriptio.

Accedunt ejusdem

METAPHYSICA
DE ENTE.

THE UNIVERSITY OF CHICAGO

LIBRARY

1911

1911

JOHANNIS CLAUBERGII
P H Y S I C A,

Quibus

RERUM CORPOREARUM

Vis & natura, Mentis ad Corpus relatæ pro-
prietates, denique Corporis ac Mentis
arcta & admirabilis in Homine
conjunctio explicantur.



AMSTELODAMI,

Apud **DANIELEM ELZEVI-
RIUM,**
CLC LOC LXIV.

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

JOHANNI DE RAEI

*Philosopho & Medico in inclyta Batavorum
Academia Leydensi Celeberrimo*

JOHANNES CLAUBERGIIUS

S. P. D.



Agnam vim habet ad amicitias inter homines eruditos conjungendas morum studiorumque similitudo. Majorem etiam, si alter alteri ad virtutem aut scientiam viam præeundo monstraverit. Maximam denique, si studia, quorum inter eos communio est, minimè sint vulgaria. Tres ejusmodi causas simul operando nostræ, Vir Clarissime, amicitia & procreantes & conservantes existere nulli dubitamus. Etenim cùm initio anni abhinc decimi quinti ex Anglia rediit Herbornam Nassoviorum ab Illustrissimo Principe ad Philosophiam publicè tradendam vocatus essem, spectata in te rerum cùm Metaphysicarum tum Physicarum peritia, & qui ex familiari conversatione tua percipi poterant fructus id effecere, ad ferias usque Caniculares Lugduni Batavorum ut pedem figerem. Nam etsi triennio ante Elementa Philosophiæ de Ente, quæ me in Galliis peregrinante Groningæ Frisiorum in lucem edita, scripseram; solidiorem

tamen.

tamen Mentis pariter & Corporis scientiam , ponderatis
receptæ in Scholis doctrinæ defectibus , cum ratione opta-
bam. Hanc autem scientiam opportunitate locorum , ubi
vixeras , Deo prosperante , me prior attigeras. Absteigi-
tur , non ætate quidem , sed ingenio & profectu impar , in-
stauratæ hoc seculo Philosophiæ initiatus in Germaniam
superiorem appuli , ubi mihi prius , quàm tibi in Belgio ,
eam publicè docere singulari Numinis providentia datum
fuit. Memor verò meritorum erga me tuorum hæc de re-
bus naturalibus meditata nostra , quæ toto hoc anno in
manibus Typographi hæseret , tuo post Renatum Cartesium
inter Philosophos Batavos celeberrimo nomini inscribere
volui. Quod ipsum non solum officii , sed etiam commodi
inde percipiendi ratio facile persuasit. Quando enim cum
scientia Physica artem Medicam feliciter sociando , & re-
ctiorem philosophandi viam diutiùs ac frequentius , quàm
ego pluribus aliis rebus occupatus facere potui , terendo ,
particularia multa Naturæ arcana detexisti ; magnopere
mihi rogandus es , ea , quæ de Viventibus & Plantis nec
non Corporis cum Anima conjunctione scripsi , cum cura
expendere meque uberiùs de nonnullis erudire ne grave-
ris. Ita fiet , ut pergam ingenuè profiteri , plures quidem
libros meos manibus hominum versari vel proflare in bi-
bliopoliis ; te vero profundioris scrinio pectoris recondi-
tam habere sapientiam. Nec tamen valde reprehendes ,
opinor , illam scribendi seu consuetudinem seu sortem
meam , cum rationes hujusce instituti , quas subinde tibi
aliisque

aliisque amicis reddere soleo, non refellas. Quid? quod ipse mihi primæ pro hoc philosophandi genere scriptionis auctor omnino exististi? Ubi autem semel in publicum prodii, & spectatores inveni, bonæ causæ desertor esse non debui: præsertim, cum ad cognitam veritatem modestè tuendam, neglectis imperitorum obtreccionibus, vires mihi defuisse necdum senserim. At polemica quidem pauca, didactica verò plura è scriptis meis ut elucerent, hæc operam dedi. Jamque duodecim integros annos Clementissimi Principis auspiciis in hac Academia ita vixi ac docui, ut quæ vera esse putarem in omni Philosophiæ parte, tam publicè quàm in latenti cum auditoribus communicandi facultas nulla prorsus lege mihi ademta fuerit. Qua philosophandi libertate sic usus sum, ut neque dissentientium quenquam arroganter depressoerim, neque communem Præceptorem minùs opportunè extulerim. Nam, ut Philosophi non est dissimulare per quos profecerit: ita diversa sentientes acerbius exagitare & ingratum ipsorum auribus nomen perpetuò insonare, quasi auctoritate hominis niteretur Philosophia, contra humani & prudentis viri officium est. Cuncti sumus, esse certè debemus, studiosi veritatis, quam in libro Naturæ manifestavit omnium auctor Deus. Vastus admodum est liber iste, in quo si alius alio plura legat aut expeditius, vel si prior ad eum volvendum accesserit & alium postea ad idem studium invitârit, habet cur omnis luminis Datori gratias agat præ alio, non autem cur virum bonum & amicum vilipendat. Multifaria

ria Dei sapientia dona sua impertit quibus & quando vult,
nec omnibus idem largitur ingenium. Cujus mores emollit
utilium rerum notitia, eum ego Philosophum appellan-
dum; reliquos, quorum animos ne albescens quidem le-
nit capillus, utcunque docti sint plurima, in Eruditorum
numero haudquaquam habendos autumo. Tu verò, Eru-
ditissime Virorum, diu multumque vale bono publico, &
hanc inscriptionem, amiciriæ nostræ pignus, æqui boni-
que consule. Duisburgi Clivorum, decurrente anno post
Christum natum 1663.



LECTO-

LECTORI SALUTEM.

L Nscriptio Libri hujus tria tibi promittit. Primum est explicatio virium & natura rerum corporearum. Vires illas omnes in quantitate, figura, situ, motu & quiete totius & partium, quæ in cælestibus pariter ac subcælestibus mirum in modum variant, consistere ostendo. Alterum est explicatio proprietatum Mentis, non absolutè spectata, nam eo intuitu ad scientiam Physicam reduci non solet; sed relata ad corpus, quod proprium Naturalis Philosophia subjectum censetur. Mens autem triplex est, divina, angelica, & humana. Divina Mentis ad res materiales relata sapientia, bonitas, potentia, constantia, simplicitas multis locis demonstrantur. Angelica Mentis qua ratione corporibus jungi possint, alicubi etiam attingitur. Mens humana quomodo Corpori imperet agendo, quomodo item à corpore patiendi sentiat, imaginetur, appetat, irascatur, similesque functiones exerceat, ex instituto tractatur. Tertium est explicatio conjunctionis illius hypostatica, qua Mens & Corpus ad unum Hominem constituendum admirabili modo conveniunt. Quod quidem argumentum, utpote rarum & præclarum valde, fusius diduxi. Ita cum duplex rerum genus in Universo invenitur, materialium, & materia expertium, utrumque primò separatim quodammodo, ac deinde conjunctim in hoc opere nostro, nativo suo, ut opinor, depictum colore spectatur. Rogandus autem non es, amice Lector, hac ut judicio probes aut verbo defendas Antè quàm vera esse cognoveris. At neque laudandus, si carpas quod non capis: quæ perversa plurium consuetudo est, quos inter te esse nolim. Quoniam verò res magna sunt & pulchra, de quibus agitur in Physicis, ad scriptum hoc nostrum cum cura examinandum invitare te amica præfatione volui. Cernes ipse, utrum in laudem rerum omnium Creatoris & usum tuum nonnulla hinc addiscere detur, quæ antehac ignorasti. Aut certè, si nihil horum

* *

tibi

tibi est incognitum, num hac scribendi, nec tendi ac demonstrandi ratio erudiendis Naturalis Philosophia studiosis idonea sit, prudenter aestimabis. Erit qui omissa non pauca huc pertinentia obtendat. Cui respondeo, scientiam hanc adeo vastam esse, ut à mortalium nemine exauriri queat, nec me esse eum, qui ad systema quoddam disciplina, more pluribus scriptoribus recepto complendum, ea quoque in medium afferat, quae vel minus perspecta sunt vel ad captum discipulorum necdum elaborata. Hac res otium requirit & bonam valetudinem, quae ambo mihi haut rarò negantur. Non tamen eo inficias, magnam horum partem ut typis describendam offerrem, docendi quo fungor munus à me postulasse. Quod equidem Deo iuvante ad justam rationis libellam ea in posterum exigendi, ad augendi & perpoliendi, & mihi & auditoribus occasionem dabit. Sic nimirum scribendo proficimus ac docendo discimus. Hac vice quidem illud solum expende, quàm multa & quanti sint momenti, quorum hic promittitur explicatio. Quae unico quasi obtutu ut conspicias, en tibi cunctorum Indicem: qui non ad materiam ullam à precedentibus avulsam, citandi vel refutandi fortassis animo, inspiciendam; sed ad eorum, quae tractantur, summam atque ordinem praeibandum lectoris inserviet.

IN.

I N D E X

PHYSICORUM CONTRACTORUM.

<p>I. P <i>Rogetomena.</i> 1</p> <p>II. <i>Materia universè considerata, qua spatium nullum vacat.</i> 2</p> <p>III. <i>Corporum Forma intelligibiles & utiles: quantitas, figura, situs, motus, quies; in Physicis & Mathematicis, naturalibus & artificialibus spectanda.</i> 4</p> <p>IV. <i>Motus localis, deque eo Leges Naturæ trax.</i> 9</p> <p>V. <i>Via agendi & resistendi.</i> 14</p> <p>VI. <i>Corpora stabilia & fluida, dura & mollia.</i> 16</p> <p>VII. <i>Figura incerta, globosa, angulata.</i> 20</p> <p>VIII. <i>Asperum & leve.</i> 22</p> <p>IX. <i>Rarum ac densum.</i> 23</p> <p>X. <i>Pori corporum, tam liquidorum, quàm consistentium.</i> 24</p> <p>XI. <i>Mundus ejusque in partes sensiles & insensiles divisio.</i> 27</p> <p>XII. <i>Tripartita Mundi aspectabilis corpora, lumen existentia, transmittentia, remittentia.</i> 30</p> <p>XIII. <i>Tria Mundi Elementa, ad triplex corporum genus relata, septem argumentis demonstrata.</i> 33</p> <p>XIV. <i>Cælum & Sol. Lux in utroque.</i> 38</p> <p>XV. <i>Cæli & Fixæ; illorum numerus, figura, motus, situs, & ordo.</i> 41</p> <p>XVI. <i>Motus materia primi & secundi</i></p>	<p><i>elementi. Stellarum alimentum.</i> 44</p> <p>XVII. <i>Solis & Fixarum maculæ. Stella nova.</i> 46</p> <p>XVIII. <i>Cometa. Fixarum scintillatio.</i> 49</p> <p>XIX. <i>Planetarum orsus, situs, motus.</i> 51</p> <p>XX. <i>Sol, Luna, Terra specialius considerata.</i> 53</p> <p>XXI. <i>Terra origo generalis exposita.</i> 56</p> <p>XXII. <i>Actiones materia cælestis in terrestrem: ubi de pelluciditate, gravitate, calore, &c.</i> 58</p> <p>XXIII. <i>Particularis Terra, Aëris, & Aqua distinctio.</i> 61</p> <p>XXIV. <i>Aër, Vapor, Ventus, Nubes, Nebula, Color, Sensus, Odor.</i> 64</p> <p>XXV. <i>Aqua, Glacies, liquorum superficies: lavus, aqua perfectissimas & sonus, Spuma, Bullæ.</i> 70</p> <p>XXVI. <i>Mare, Fontes, Nix, Pluvia, Salina, Dulcia, Sapor.</i> 74</p> <p>XXVII. <i>Æstus maris.</i> 78</p> <p>XXVIII. <i>Ignis, Terra motus, Therma, Cinis, Carbo.</i> 79</p> <p>XXIX. <i>Ab Igne mollitio & induratio, liquefactio & exsiccatio, fumus. Ignis distinctio.</i> 82</p> <p>XXX. <i>Fossilia, Sal, Sulphur, & Mercurius, Lapides, Calx, Cinis, Virum, Metalla, Ferrum.</i> 84</p>
---	--

DISPUTATIONUM,

quibus principia Physica latius explicantur.

<p>I. Q <i>Visitas, quod Philosophia, & præsertim Physica, licet Jurisprudentia ac Medicina radix ac fundamen-</i></p>	<p><i>sum rectè judicetur, plerumque tamen minore sit in pretio.</i> 89</p> <p>II. <i>Physica definitio, certitudo, utilitas,</i></p>
---	---

** 2

INDEX CAPITUM.

<i>tas, jucunditas, divisio.</i>	91	<i>dem statu perseveret; sicque quod semel</i>	
III. Corpus esse, est extensum esse.	94	<i>movetur, semper moveri pergat.</i>	178
IV. Materia substantia servante Deo semper manens.	96	XX. De motu projectorum à jaciens preparatorum.	184
V. Spatium nunquam vacuum. Universum extensum tantum unum. Corpus omne dividuum.	99	XXI. Altera lex natura: quod omnis motus ex seipso sit rectus, & ideo qua circulariter moventur, tendere semper ut recedant à centro circuli quem describunt.	190
VI. Vera sententia de essentia rei corporea hactenus exposita, qua Universa Physica fundamentum est, à præjudicatis opinionibus accuratius vindicata ac defensa.	105	XXII. Tertia lex: quod unum corpus alteri fortiori occurrendo nihil amittat de suo motu, occurrendo verò minus forti, tantum amittat, quantum in illud transfert.	194
VII. Continuatio ejusdem defensionis, soluta objectione, qua à rarefactione & condensatione petitur.	112	XXIII. Corpora fluida ac dura respectu motus & quietis quomodo differunt.	200
VIII. Solvitur objectio à Spatio petita, unde Mundi plenitudo, indefinita extensio, denique unitas cognoscitur.	116	XXIV. De corporum naturalium figura, præsertim spherica.	204
IX. Mundi unitas confirmatur argumento Metaphysica à notione Universalitatis desumpto.	120	XXV. Mundus assestibilis dividitur in corpora lumen emittentia, transmittentia & remittentia.	209
X. Mundi unitas probatur argumento Physico, à notione corporis extensi petito.	127	XXVI. Stellarum fixarum ipsarumduco fulgere, ipsarumque & Solem flammam esse.	213
XI. Pacis expugnandi & Mundi unitatis asserenda gratia vindicatur notio illa communis: qua à se invicem distant, inter ea aliquid interjacere necesse est.	131	XXVII. Cæles esse corpora pellucida, & quidem fluida, non dura.	218
XII. Ab una & uniformi totius Universalis Materia hactenus pensitata ad examinandas Formas transitur, unde corporum varietas ac distinctio.	136	XXVIII. Luna corpus esse opacum. Trium mundi visibilis elementa temere à viro docto impugnata.	222
XIII. De Motus efficacia, & vulgari ejus tum divisione tum definitione.	144	XXIX. De Lucis natura ac definitione.	231
XIV. Motus Localis definitio Philosophica.	149	XXX. Ordo considerandi res naturales in Physicis, tanquam paulatim orientes, explicatur ac defenditur.	234
XV. De Motu localis terminis, à quo, & ad quem.	155	XXXI. Calorem esse motum varium partium corporis exiguarum, qui est major solito ac sensum tactus afficit.	246
XVI. De Motu communi & proprio, aliisque motuum differentiis.	159	XXXII. Frigus ejusmodi particularum quies est aut saltem tardior motus.	252
XVII. Quomodo in omni motu integer circulus corporum simul moveatur.	163	XXXIII. De Calore & Frigore quædam Problemata.	260
XVIII. Deum esse primariam motus causam: & eandem semper motus quantitatem in Universo conservare.	167	XXXIV. De Fontium origine, Aquæ, Vaporibus, Ventis.	265
XIX. Prima lex natura: quod unaquæque res quantum in se est, semper in eodem statu perseveret; sicque quod semel movetur, semper moveri pergat.	178	XXXV. Adversus eos, qui naturalem cognitionem & appetitum quendam plantis & corporibus imanimatis assignunt.	274

I N D E X

THEORIÆ CORPORUM VIVENTIUM.

I. P <i>Relogemena.</i>	283	XXII. <i>Animans rationis expert.</i>	316
II. <i>Viventium & non viventium differentia.</i>	ibid.	XXIII. <i>Animalium differentia.</i>	320
III. <i>Vita ac vegetatio in calido & humido temperato.</i>	284	XXIV. <i>HOMO.</i>	323
IV. <i>Viventium interitus & mors à causis contrariis.</i>	287	XXV. <i>Mentis humana natura.</i>	ibid.
V. <i>Ætatum differentia.</i>	289	XXVI. <i>Mentis immortalitas, propagatio & unitas.</i>	325
VI. <i>Viventium aliorumque quorundam corporum superficies durior.</i>	ibid.	XXVII. <i>Cogitationum genera.</i>	327
VII. <i>Caloris & fermenti in vivensibus varietas.</i>	291	XXVIII. <i>Quantitas corporis humani ejusque partium.</i>	329
VIII. <i>Natura alimentis in alio manens.</i>	ibid.	XXIX. <i>Figura & situs totius & partium.</i>	331
IX. <i>Mutatio in Viventibus ob loci vel temporis diversitatem.</i>	293	XXX. <i>Motus, vox, risus, flatus, sudor.</i>	332
X. <i>Figura Viventium variè rotunda in ipsis aut eorum partibus, fructu, semine.</i>	294	XXXI. <i>Hominis temperamentum, sexus, ætas ac tempus.</i>	339
XI. PLANTARUM <i>Calor. Certorum quorundam morborum ratio.</i>	298	XXXII. <i>Mentis conjunctio cum corpore, & præcipuè cum cerebro.</i>	335
XII. <i>Plantarum germen & fructus.</i>	300	XXXIII. <i>Generalia de sensibus, præsertim externis.</i>	337
XIII. <i>Plantarum pori & succus, & quomodo crescant.</i>	301	XXXIV. <i>Visus.</i>	338
XIV. <i>Plantarum varietas.</i>	303	XXXV. <i>Auditus & Loquela.</i>	339
XV. <i>Surculorum insusio, & eorum cum truncis, plantæ cum terra coalitio.</i>	304	XXXVI. <i>Olfactus.</i>	341
XVI. <i>Plantarum situs, & locus in terra, muris, sub nive.</i>	306	XXXVII. <i>Gustus.</i>	342
XVII. <i>Plantarum colores.</i>	309	XXXVIII. <i>Tactus.</i>	344
XVIII. <i>Plantarum saporis.</i>	310	XXXIX. <i>Sensus communis, Phantasia & Memoria.</i>	345
XIX. <i>Plantarum odores.</i>	311	XL. <i>Vigilia, Somnus & Insomnium.</i>	348
XX. <i>Mors plantarum.</i>	312	XLI. <i>Appetitus naturalis.</i>	349
XXI. ANIMAL.	313	XLII. <i>Affectus animi in genere.</i>	350
		XLIII. <i>Specialis Affectuum enumeratio.</i>	352
		XLIV. <i>Occulta certorum Hominum qualitates.</i>	356

I N D E X

C O R P O R I S E T A N I M Æ I N

H O M I N E C O N J U N C T I O N I S

pleniùs descriptæ.

- I.** *Quare natura conjunctionis hujus cognoscenda.* 359
- II.** *Vnde cognitio ista petenda.* 360
- III.** *Posse non modo res similes, verum etiam dissimiles ac diversi generis conjungi.* 361
- IV.** *Nullas dissimiliores magisque diversi generis conjunctas res in Univerſo reperiri, quàm Corpus & Animum.* 362
- V.** *Non igitur Hominem nimis unum concipiendum esse.* 364
- VI.** *Quomodo Corpora inter se conjungantur.* 365
- VII.** *Quomodo Mentes inter sese.* 366
- VIII.** *Neutro modo Corpus Mentis conjungi.* 367
- IX.** *Conjunctionem hanc non in Mentis & Corporis absoluta substantia, sed in relativis utriusque actionibus passionibusque consistere.* 368
- X.** *Conjunctionem itaque vitalem & actuosam esse.* 370
- XI.** *Actus hosce transeuntes esse, non immanentes.* 371
- XII.** *Mentem aliter atque arctius cum Corpore, in quod agit, à quo patitur, quàm cum objectis, de quibus cogitat, sociari.* 372
- XIII.** *Quin corpus etiam in Animam agat, minime dubitandum.* 373
- XIV.** *Actus Mentis & Corporis nulla cogitatione naturali, at sola Dei voluntate in Homine connecti.* 374
- XV.** *Nec tamen eò minùs arctam esse Corporis Animique conjunctionem.* 376
- XVI.** *Ad quod genus causa spectet tum Anima movens Corpus, tum Corpus movens Animam.* 377
- XVII.** *Quomodo Mens in loco esse localiterque moveri dicatur.* 379
- XVIII.** *Quomodo corpus anima sit instrumentum.* ibid.
- XIX.** *Conjunctionem Anima & Corporis in Homine esse mutuam & reciprocam.* 381
- XX.** *Aliam esse conjunctionem non mutuam, qua Mens divina vel angelica corpori nectatur.* 382
- XXI.** *Conjunctionem corporis & mentis humana consistere in multis & variis actibus, nonnullis etiam precipuis.* 383
- XXII.** *Non tantùm alternis vicibus, sed etiam simul & semel multis & varios corporis atque anima actus in Homine posse concurrere.* 387
- XXIII.** *Multitudine tamen & varietate actuum concurrentium, vim singulorum sæpius minui.* 388
- XXIV.** *Conjunctionem animæ & corporis non in quibuslibet, sed in certis ac definitis actibus esse fixam.* 389
- XXV.** *Animam & corpus per actus suos conjungi proximè atque immediatè.* 392
- XXVI.** *Animam aliis corporibus non tam propinquo nexu sociari: inde corporis humani prærogativam aliquam consistere.* 393
- XXVII.** *Corporis atque animi actus eodem tempore in Homine concurrere, adeo ut à multis hominibus ne quidem distinguantur.* 394
- XXVIII.** *Ex isto temporis concursu singularem Conjunctionis hujus excellentiam elucere.* 396
- XXIX.** *Quod conjunctio prima inter corporis animique actus cum altera inde or-*
ta.

- ta, & quandoque plures subordinata
tempore simul esse possint. 398
- XXX. Actus corporis atque animi omnes
non esse jugi exercitio copulatos, at sa-
pientis interruptos, aliosque alius succedere.
400
- XXXI. Hujusmodi mutationem in hu-
mana & creata natura quodammodo
esse perfectionem. 401
- XXXII. In illa mutatione constantiam
quandam elucere, quod actuum semel
conjunctorum aliter recurrente aliter si-
mul recurvat. 403
- XXXIII. Ex ista mentis cum corpore
conjunctionis proprietate Universalia
orta esse. 404
- XXXIV. Constantiam illam aliam rursus
inconstantiam limitari, quatenus corporis
animique functiones aut per naturam
aut per habitum & consuetudinem jun-
guntur. 405
- XXXV. De conjunctione prima, qua fit
in utero matris, quaestiones illustres re-
solvuntur. 408
- XXXVI. De conjunctione posteriore,
qua fit per habitum & consuetudinem,
quaestiones aliqua deciduntur. 410
- XXXVII. Quid & homo alius alio &
idem seipso, diverso tempore, magis mi-
nusve homo censeretur possit. 411
- XXXVIII. Animam non distinctam in-
tellectus, sed confusam, qua tribuitur sensi-
bus, perceptione corpori jungi. 413
- XXXIX. Proinde multum differre conjun-
ctionem hanc ab ea, qua mens objectis
vel navis navi adest. 415
- XL. Per istam sensuum confusionem, a-
nima corporisque vinculum multo artius
reddi, quam per intellectum purum. 417
- XLI. Ratione illius per confusos sensus
conjunctionis, Homo confertur cum An-
gelo, & quomodo ἰσχυροί futuri si-
mus, expenditur. 418
- XLII. Corporis animique conjugium esse
amicum ac delectabile. 421
- XLIII. Infantis, an adulti, docti an in-
docti anima sit artibus corpori alligata.
424
- XLIV. Ingenii doses ac differentias ex
conjunctione mentis cum corpore pendere.
425
- XLV. Animam unam uni tantum corpori
jungi. 428
- XLVI. Hinc iterum ostendi, mentis con-
junctionem cum objectis minus artam
esse. 429
- XLVII. Idem de conjunctione navis cum
navi, angeli cum corpore assumo intel-
legendum. Animam corporis formam
nec assistentem nec informantem esse.
430
- XLVIII. Animam esse junctam toti cor-
pori. 432
- XLIX. Soli tamen cerebro junctam esse
immediate. 433
- L. Reliquis membris animam non ita con-
jungi. 435
- LI. Actus animi simplices interdum repug-
nare actibus Hominis compositis, in qui-
bus conjunctio corporis & animi consistit.
436
- LII. Voluntatem sensibus, affectibus, mo-
tibus corporis saepe esse contrariam. 438
- LIII. Oppositionis illius distincta magis
explicatio. 440
- LIV. Actus etiam Hominis compositos
alios aliis interdum adversari. 441
- LV. In corporis animique consuetu victo-
riam sapius esse penes corpus. 442
- LVI. Qua causa sit illius in corporis ani-
mique conjunctione anomaliam. 444
- LVII. Conjunctionis anima & corporis quo-
modo dissolvatur. 446
- LVIII. In quo mors hominis consistat.
448
- LIX. Mortis causam proximam esse in cor-
pore. 450
- LX. An homo magis vivens aequè facile
moriatur, ac is qui minus vivit. 452
- LXI. Num anima possit esse in corpore ho-
minis mortui. ibid.
- LXII. Mentem aliquando adesse corpori
etiam


INDEX CAPITUM.

- cū putatur abesse. 453
 LXIII. Non illico mortuum censendum
 esse hominem, cum nulli corporis animi-
 que actus concurrunt. 455
 LXIV. Cur vel tantillā morā interpositā
 solvatur continuitas motus, vita hu-
 mana non item. 458
 LXV. Quomodo vita humana perpetua,
 aut certe longa & sana esse possit. 460
 LXVI. Cur hominum post diluvium
 vita quidem brevior; sed ingenium a-
 crius. 462
 LXVII. Conjunctionis anima cum cor-
 pore proprietates triginta quatuor à supe-
 rioribus repetita simul contemplanda oculis
 subiiciuntur. 463
 LXVIII. In Mentis & corporis conjun-
 ctione, partibus utriusque functionibus,
 quibus se invicem afficiunt, nihil esse
 prius quarendum. 466
 LXIX. Defensio totius de corporis & ani-
 mi conjunctione tractationis nostra,
 quantum ad comparationes à rebus mo-
 ralibus petitas. 468



PHYSICA CONTRACTA.

I. Prolegomena.

1.  Uotidie sensibus nostris res corporeæ, vel animo recusante, obveniunt,
2. Quarum & multis in omni vitæ parte egemus.
3. Ea propter ne ab ipsa quidem infantia illarum judicio supersedimus.
4. Quando verò ea ætate vis animi exigua est,
5. Judicium hoc, si non est omnino falsum, certi equidem nihil habet.
6. Cujusmodi est, de *quantitate*: rem quamlibet magnitudine sua sensui nostro respondere, ut Solem quasi pedalem esse.
7. De *qualitate*: rem sensui nostro dissimilem non esse, ut Lunam instar disci habere.
8. De *existentia* ipsa: non esse, quæ sensus nostros fugiunt, ut Aërem nihil rei esse.
9. Opiniones hæc intempestivè efficit *Philosophia naturalis* cum nobis eximat,
10. A veris principiis ad minimè dubia mentem ducendo,
11. Tantum abest ut *paradoxu*, hoc est, inopinatis vacet, ut iis majorem partem constet.
12. Proinde, ut rerum naturalium scientia paretur,
13. E re illud erit, ut veteri judicio, tanquam crudo ingenii fructu, deposito,
14. Ingenio validi ac sollertiores denuò judicemus.
15. Sed novum illud *judicium* à rebus, nisi antea fuerint perceptæ, obstinatè revocandum,
16. Neque iis, quæ *sensu* quodam *indice* accepisse videmur, acquiescendum est, nisi addito *rationis* omnia rite examinantis calculo.
17. Peropus itaque est rerum corporearum naturam tam genere quam speciebus noscere.

A

18. Quæ

18. Quæ res efficit, ut Physica partibus generali ac speciali absolvantur.

II. *Materia universè considerata, qua spatium nullum vacat.*

19. **C**orpus generaliter spectatum est res in longum, latum & profundum extensa.

20. Ea extensio *in re aliqua* inest. Nemo enim tria hæc, longum, latum & profundum attribuat non-enti. Neque eorum numerus accessionem, neque ordo mutationem admittit. Quin, si unumquodque illorum seorsum mente agitaveris, magnitudinem vides.

21. Deinde, *nulli rei nisi corpori* inest.

22. Nam res materiæ omnino expers, hoc est, res intelligens ac volens, sigillatim trutinata, hoc est, intellectu & voluntate, neque longi neque lati neque profundi quicquam habet.

23. Contrà, quæ longa, lata & profunda sunt, per se neque intelligunt neque volunt.

24. Si qua verò res intelligens dicatur extensa magnave, ut ecce, si Deum maximum, Virum quendam summum appellas;

25. Fit hoc *virtutis quantitate*, qua Davidi Goliatus multò inferior erat.

26. Igitur cave, *quantitatem molis*, quam spithamis, ulnis, pedibus in homine metiri licet, hic interpreteris.

27. Tum extensio hæc inest *in omni re corporea*: porro, *semper*, quo in cunqve statu.

28. Exemplis hanc rem edoceri cupis? En glaciei in undas redactæ durities evanescit. Figura iterum atque iterum immutatur. Undæ si in vapores extrema tenuitate dissipantur, nihil gravant, neque oculos non fugiunt. Vapores in undas rursus coacti calere atque exiles desinunt esse. Verum enimvero extensionem hanc seu molem corpoream, mutationum ejusmodi quasi sedem ac receptaculum, neque à glacie neque ab undis neque à vaporibus abesse deprehenderis unquam.

29. In promptu ideo est, quod esse visibile, durum, grave, rotundum atque ejus generis alia ad corporis generatim considerati essentiam non pertineant, contra vulgi opinionem §. 8.

30. Quandoquidem citra illa corpus aliquod existat, verùm citra extensionem haut ullum.

31. Denique in re corporea inter ejus propria, *ne minimum quod extensione hac sit prius*, rimando mens nostra excogitet.

32. Extensio hæc in corporibus definitis *prima* vocatur *dimensio*.

33. Ex quo tritum illud : *Dimensionum penetratio non datur*, hoc est, nihil extensi idem illud spatium, quo aliud extensum continetur, ingredi potest.

34. Quoniam corporis natura in extensione sita est, seu, quod idem valet, corpus omne partem habet *positam extra partem*.

35. At, quando ipsum quoque *Spatium* extensum est, in quaestione ponitur, quomodo illud à corpore differat.

36. Aut qua via dimensionum penetrationi locus negetur, si corpus sit in spatio, id est, extensum in extenso.

37. Resp. Propius rem ipsam intueri, nec extensionem spatii aliam ab extensione corporis, quod inibi teneri dicitur, unquam invenies.

38. Etenim una tantum perfecta seu trinè dimensa extensio est, accessionem admittens nullam §. 20.

39. Quæ in spatio generatim expenditur, ut eadem permanens accedente vel abeunte quocunque corpore :

40. Atqui in corpore speciatim, ut cum eo accedens atque abiens consideratur.

41. Ut res exemplo expediatur : in vase quodam extensio generaliter considerata æqua permanet, (Hæc spatium constituere intelligitur) quamvis nunc vini, nunc aëris, nunc alius corporis, quo per vices impletur ac depletur, extensio specialiter dicatur.

42. Eodem modo natura hominis à natura Petri non differt, licet illic universè, hic sigillatim spectetur.

43. Quocirca spatium *philosophica significatione vacuum* hoc est, ubi ne quicquam longi, lati & profundi existit, inveniri minimè potest.

44. Namque ut, exempli loco, vasculum quoddam uno atque item alio corpore evacuetur;

45. Nunquam tamen fiet, ut illud ipsum omni corpore atque extensione in eodem tempore exinaniatur : siquidem extensione pereunte concavi haur quicquam remanet, ac vasis forma destruitur.

46. Interea facilis largior è *vulgi mente* vacuum haberi, id est, spatium in quo nihil sensibile §. 8: 29. Ita vas vacuum dicitur, licet aëre plenum.

47. Et sæpenumero ais, ea esse vacua, ubi, quæ inesse debebant,

non sunt, veluti è piscina si pisces exesse comperiri. Sic dolium vacuum, quod vino exhaustum est.

48. Ex iis, quæ sunt depromta, planum est, vase quodam auri, plumbi, glaciæ pleno haut plus *materia prima* vel substantiæ corporeæ, id est, haut plus longi, lati, profundi contineri, quàm si illud superiori interpretatione pro vacuo habeatur.

49. Interim *materia secunda*, id est, hæc aut illa, nunc majori nunc minori copia in vasculum aliquod inditur.

50. Idem enim vasis de auro quàm de pumice plus capit: quoniam ob cavitatem pororum à solo pumice non impletur; sed illius plenitudinem aër poris lapidis divagans finit.

III. *Corporum forme intelligibiles & utiles: quantitas, figura, situs, motus, quies: in Physicis & Mathematicis, naturalibus & artificialibus spectanda.*

51. **S**atis opinor trutinata est ea res, qua omne genus corporum *convenit*; ac unum quid est, videlicet *Materia*.

52. Quæ indefinitè extensa nec sui usquam dissimilis pensanda est, quippe quæ regionibus carens quacunque continuatur, ac nullo intercedente hiatu replet universum.

53. Sequitur ut illud persequamur, quibus *Formis* corpora inter se *discernantur*,

54. Atque unde rerum multitudo ac varietas existat.

55. Ut verò nemini obscurum est, unum dividendo in multa abire:

56. Ita unumquodque corpus dividi posse modò demonstratum est §. 34.

57. Ea totius in partes divisio à solo motu pendet:

58. Nam sine motu nulla fit partium conjunctarum separatio.

59. Nec in ambiguo ponitur, quin diversitas in quantitate, figura, situ, motu & quiete sit mater varietatis rerum divisarum.

60. Quæ quidem ad unum omnia ab extensa materia recipi possunt; quin imò ab ea, cujus extensio suis terminis septa est, non recipi nequeunt.

61. Etenim *Corpus* ab alio divisum (*definitum* corpus §. 32 appellavimus) quia non continet omnem, quæ est, extensionem, cum portio tantum sit materiæ universè spectatæ,

62. Habet utique modum extensionis suæ vel mensuram definitam, quæ continua *Quantitas*; & partium, ex quibus constat numerum, quæ dicitur quantitas discreta.

63. Habet extremitatem sibi congruentem, quæ est *Figura*.

64. Habet ambitum aliorum corporum, unius pluriumve, inter quæ est, *situm* vel positum. Harum positionum sex numerantur differentiarum: sursum, deorsum, dextrorsum, lævorsum, prorsum ac retrorsum.

65. Ab hisce ambientibus corporibus illud non penetratur §. 33. attamen tangitur, quia vacuum nullum est §. 43. Hæc vocant *Impenetrabilitatem* & *Contactum*, quem opponimus *Distantia*. Quæ enim se tangunt, inter ea nihil omnino interponitur, adeo ut contactus omnis *immediatus* sit.

66. Præterea corpus situm suum aut mutat aut servat, unde *Motus* ejus aut *Quies*.

67. Eundem verò inter ambientia situm asservando, facile cum iis in unum rursus coit, quod ipsum *Continuum* appellatur.

68. Sicuti ante motum, quoad indivisa tota spectatur materia, universum extensione continuatum duntaxat unum animo concipimus.

69. *Locus* vel *Spatium* ab iis, quæ prolata sunt, ipsa re non differunt.

70. Nomina enim hæc nihil aliud indicant ac corporis, quod loco intelligitur contineri, inter alia corpora magnitudinem, figuram & situm.

71. Designamus autem rei cujusque locum respiciendo vel ad corpora contigua, id est, proximè ambientia & affinia;

72. Sic omnis corporis (veluti arboris, cujus radices tellure, truncus aquis, rami aëre circumdati sunt) *locus totalis*, *proximus* & *proprius* unicus est.

73. Vel ad corpora remota, non affinia,

74. Quorum varietas cum sit magna, distantia pariter nunc longior nunc brevior,

75. Uni rei varius locus adscribi potest. Sic pomum dicis esse repositum in sacco, cella, domo, urbe vel alibi locorum.

76. Respectu itaque ad diversa habito rem eandem eodem tempore locum mutare & non mutare ais: verbi gratiâ, in urbe obambulan locum, si illius partes respicis, mutas; at locum non mutas, quoad inde pedem non extuleris.

77. Quæ ambiguitas ut in localis Motus finitione tollatur, proximi loci ratio debet attendi, ita ut corpus quod movetur, à consimilibus eorum corporum, unde contingebatur, ad aliorum fines transferri intelligatur.

78. Et quando translatio isthæc ultro citroque fit (à mensa enim libro semoto, mensa quoque à libro sejungitur),

79. In accurata motus definitione *contingentia corpora pro quiescentibus sunt habenda*. Ita manifestum erit, quamobrem in mensæ & libri separatione quietem tribuamus mensæ, quippe quæ non juxta ac liber omnibus partibus transfertur.

80. Cui non absonum est illud: *Motus omnis fit super immobili*. Voluti si deambules in navi, ad pedes tuos navis eadem tibi quiescere videtur, quamvis reapse moveatur.

81. Ea quæ diximus, ut ecce, quantitas, figura, situs, quies & motus, Mathematicis quoque in demonstratione objecta sunt.

82. Unde liquet, eorum *contemplationem* omni dubio vacare.

83. Quamvis apud Mathematicos illa magis abstracta sit & latius patens:

84. Apud Physicos autem rerum particularium naturam propius attingat.

85. Mathematici enim numerum, ternarium, denarium, figuram, rotunditatem generatim pertractant: Physici speciatim quærent, quis elementorum numerus, quæ sit figura Solis, Lunæ, &c.

86. Porro eadem rerum corporalium principia opifices ac Mechanici versant.

87. Itaque rite cognita etiam in *faciundo* quàm maxime nos juvant.

88. Nimirum res naturales essentiâ conveniunt cum iis, quæ dicuntur arte factæ.

89. Enimvero materiam extensam atque in ea quantitatem, figuram, situm, quietem motumve utrobique videmus.

90. Sed distantia illarum in perfectionis gradibus ut plurimum nobis locanda est.

91. Quandoquidem formæ in corporibus naturalibus eorumque partibus, quæ & ipsæ multò plures ac subtiliores sunt, varietate aut nexus etiam constantia artificialium formas superant.

92. Unde palmam fabrefactis naturalia præripiunt. Marc. 9. 3.

93. Atque ut Solon gallum gallinaceum vesti segmentata Cræsi antevertit: ita Christus lilia pictæ Salomonis vesti. Matth. 6. 29.

94. Hinc

94. Hinc *ars naturam imitatur*, eam in faciundo sibi exemplar proponens.

95. Et quoties arte facta nobis notiora sunt (ut fit, quia vel ipsi ea elaboravimus, vel ab aliis elaborata crebrius versando perlustramus)

96. Naturalia ex iis scrutantes, ad scientiam physicam parandam non parum juvamus.

97. Ex. gr. Ex ea collatione apparet, qua ratione quantitas, figura, &c. licet materiæ seu corpori generaliter considerato §. 19. *accident* §. 29.

98. In re tamen unaquaque naturali §. 61. insunt *essentialia*.

99. Nempe ut figuræ variæ ferro quidem sunt accidentales; at cultro vel acui ipsius figuræ essentialiam absolvit:

100. Propterea quod citra eas ferrum permanet ferrum, culter vel acus non item.

101. Sic motus particularum celer & varius abesse potest à *corpore*; sed minimè ab eo corpore quod *flammam* nominamus.

102. Et quemadmodum in cultro substantia ferri certa quadam magnitudine, figura acuminata, extremitate polita & partium secundum se quiete (quæ est ipsa durities) totius denique motu omnem vim agendi exserit:

103. Ita moles corporea vel substantia extensa per se otiiatur, virtute autem modorum, quos diximus, rite junctorum operatur.

104. Hoc ipso in rebus naturalibus *materia principium est passionum, forma verò actionum*.

105. Adhæc, uti ad aptandum artificialia non unus, sed omnes, aut certè complures modi requiruntur,

106. Quos in fabrica (ex. gr. domo, horologio) non tantum extrema, verum etiam intima pernoscere decet:

107. Sic corporum naturalium forma, ubi cum extrema, tum penitissima quæque pensitanda sunt,

108. In modorum illorum omnium aut plurium ordine consistit.

109. Cujusmodi forma, *externa* pariter & *interna*, res ita ordinat,

110. Non equidem ut simpliciter *res sint*, hoc enim habent à materia; sed ut *res sint tales*, naturæ quadam proprietate & agendi viribus inter se distinctæ.

111. Veluti calamus ad usum accommodatus habet cavum, longum, amplum, firmum, crenam una cum rastello: post manum
autem

autem admotam ac directam, defluente in papyrum atramento, cuncta isthæc partibus suis funguntur.

112. Quod autem eadem in figuris, motibus, &c. dispositio uni rei congruit & alteri disconvenit,

113. Evidens illud efficit, *unius rei generationem, alterius esse corruptionem.*

114. Quoniam etiam in partium numero, magnitudine, figura, situ, motu, varii gradus inveniuntur §. 71. seqq. 91.

115. Quos progressu temporis natura vel ars impensè ordinar.

116. Cum nullus motus fiat in momento (instanti.)

117. Palam est, naturam cujusque rei corporeæ minimè in puncto consistere.

118. (Sicuti conditio essentia in corpore universè spectato ita est, ut ei nec addi nec demi quicquam possit)

119. Sed intra latitudinis regiones contineri;

120. Neque corporalis rei generationem aut corruptionem in momento, sed tractu temporis perfici.

121. Sic plantæ & animalia minutatim ad sui perfectionem excrescunt: aqua paulatim in vapores diminuitur, aut in glaciem coit.

122. Et quamvis vapor, aqua, glacies, res sint distinctæ §. 59.

123. Innumeri tamen in motu ac situ particularum aquæ gradus inveniuntur, quibus hæc nomen & essentiam aquæ haudquaquam amittit.

124. Fac illic aquam adeo frigere, ut gelu quàm proximè ad glaciem accedat; hîc verò ita fervescant esse, ut in vapores jam nunc discedat; adde totum denique statum aquæ intermedium. Et varietas, quæ in aqua inest, clarissimè tibi obversabitur.

125. Ita primordia cerasi vel poma putrefacta naturam cerasi vel pomi cujusdam omni parte non æquant: id est, non æquè cerasa vel poma sunt ac matura & integra.

126. Postremò *res aliqua destructa non semper dividitur in partes, quæ magnitudine, figura &c. respondent iis, unde antea generata sunt.* Resolutio enim & compositio uno tenore jugiter non perficiuntur. Id quod corrupta poma & parietes fracti illustrent: ut & vina atque olea, quæ in uvas & olivas nunquam remigrare queant.

I V. *Motus localis, deque eo Leges Naturæ tres.*

127. **I**Nter omnes corporum affectiones singularem quandam attentionem Motus localis meretur. §. 57.

128. Meditemur autem illum *absolute*, ut statum vel conditionem, qua corpus inter alia corpora nunc hac, nunc aliâ fertur, seu, quod idem est, qua diversis corporum ambientium partibus assidue aliter atque aliter applicatur.

129. Quamvis initio, si ad motorem *respicias*, Motus actio, si ad rem motam, passio dici queat.

130. Uti enim homo sedens in statu sessionis est, ita sagitta aëre volitans in motus statu est, qui tamen motus in principio respectu ad sagittam amittentem actio, respectu vero habito ad sagittam amissam passio fuit.

131. Porro *motus nisi per circulum vel circuitum quandam in mundo fieri nequit.*

132. Quando enim corporum ubique plenitudo est §. 43. nec dimensionum penetratio locum invenit. §. 33.

133. Nullum corpus loco movetur, nisi contiguum aliud loco propellat, hoc item aliud, & porro hoc aliud continenter ad extremum usque, quod in locum, unde primum cesserat, eo ipso momento, quo cessit, trudendo intrat.

134. Huic corporum successioni si qua res in mora est, retinetur motus. Sic è dolio vina non fluunt nisi aëre pedisequo.

135. *Motio verò in angustis quàm latius spatium magis celeratur.* Sic follis pederentim compressus immixtum aërem properatò reddit. Venti in angiporto magis fremunt quam in platea, in campo verò æquati spirant. Et ita undæ, aliàs lene currentes, cataractis accumulatae turbide ruunt: Et sæpenumero tantum in ejusmodi angustis, quorsum aquæ moventur, oculis cernimus.

136. Nam eo quod ampli spatii materia adurgendo procedit, nec dimensionum penetratio usquam existit.

137. Necessum est ut pro ratione angustiarum materiae motus festinet

138. Quoniam igitur in motu varii ut celeritatis, ita tarditatis gradus insunt, §. 114.

139. Certa quantitas, at virtutis, §. 25. ei competit.

B

140. Quæ

140. Quæ in *Vniuerso* hoc iugiter eadem esse potest, licet in ejus *partibus* variet;

141. Aut speciatim modò sonus, modò calor, modò frigus etc. denominetur.

142. Vti enim inter materiam primam & secundam, inter corpus generatim & specialiter consideratum, §. 19. 32. 48. 49. 61. 110. ita inter motum ac talem motum discrimen est.

143. Neque affirmares in machina totius mundi nunc majorem, nunc minorem esse motus copiam, nisi omnia sensu metiri assuescitus esses, §. 6. seqq.

144. At ratio monet, quod sentiendi sui copiam facere neque ad motus, §. 128. neque ad corporis essentiam pertineat. §. 29.

145. Deinde adjungit, motum neque à materia, §. 103. neque à semetipso augeri minuiue unquam posse: quoniam res existens per se non magis queat desinere, quàm non existens sine causa incipere.

146. Præterea sana ratio superaddit, injussu Dei motoris omnium primi, & accessionem & diminutionem motui negari.

147. Atqui Deus materiam & motum eadem voluntate conservat, qua creavit, quia semper idem est.

148. Et summæ ejus tum sapientiæ tum constantiæ magis decorum est, utriusque illorum æquabilitatem in *Vniuersi* fabrica jugem custodiri, quàm immutari. Job. 10: 3.

149. Sententiæ huic qui de Materia fidem habuerint, eam esse à generatione & corruptione tutam asseverantes, illis non est, quod motui & quieti idem attribuere dubitent.

150. Sanè *unumquodque*, siue corpus siue corporis affectio fuerit, *quatenus est simplex & indivisum*,

151. (Nam in composito atque in se diviso corpore partium alia aliud statum mutat, cujus rei humanum corpus argumento est)

152. *Permanet, quantum in se est*, constantia Dei illud non deserente, quantitatis, figuræ, situs, quietis, motus, celeritatis, tarditatis, etc. *statu immutatum*, verbo dicam, STAT.

153. *Nec mutationem recipit nisi à causis externis*. Confer §. 145.

154. Enimvero cùm sine causâ haur quicquam fieri possit, citra actionem causæ status demutari nequeat.

155. Unde *naturæ lex* enata est *prima*, à divinæ conservationis simplicitate & constantia pendens. Eadem hæc Dei perfectio *alteri* quoque naturæ legisons & origo est:

156. *Vnumquodque corpus, per se trutinatum, nec aliunde præpeditum, recta motari pergit.*

157. Adeo ut, quæ ab aliis causis orbiculatim aguntur, §. 131. à circulo, quem faciunt, recta linea recurrere intentent.

158. Ecce lapidem, qui funda rotatus quoquo versus funem extrahit, atque eò vehementius, quò lapis solidior aut rotatio celerior est.

159. Illud lapidi non à gravitate, cujus particulari vi corpora semper deorsum, nunquam sursum feruntur; sed à vi motus generalis, quam in naturæ lege altera ponimus, datum est.

160. Nimirum quæ opere quidem ipso ab eo statu, quo recta itur, declinando incurvescunt, recta tamen eundi nisum tutantur. Perpetuò servant *conatum*, licet persæpe destituantur *effectu*: hoc est, (ne conatum istum corporeum cum eo, qui in animo cogitante est, confundas §. 23.) ita sunt posita atque ad motum incitata, ut progressio esset recta, si aliud quicquam non obniteretur.

161. Itaque conatum, nulla re adversa, effectus insequitur: ex cõrro enim fundæ interrupto lapis evolat recta pergens.

162. Adhæc, *corpus, quod movetur, alii obvians* (ut fit, quia vacuum non datur, exemplum §. 1.)

163. *Si facultate recta itandi §. 156. alii resistenti cedat,*

164. *Aliorsum flectit §. 33. 64.*

165. *Et motum servando, ex §. 154. tantum determinationem motus perdit*

166. *Sin verò facultate hac alii obvio præponderet, unà secum illud transfert,*

167. *Ac tanto exhauritur, quantum de suo dedit.*

168. Ultimum hoc si omitteretur, motus citra metam adaugeri minuive posset, ex quo tandem eveniret, ut mundi, si ipse ab interitu prohiberetur, ordo turbaretur. Motu enim sic aucto, ut omnes mundi partes celerrimè agitentur, quid nisi una flamma essent omnia? Contrà, motu sic imminuto, ut omnia prorsus quiescant, quid nisi mera ubique glacies? Atque in illa motuum communicatione *lex tertia natura* sita est.

169. Tres hasce naturæ leges satis, arbitror, explanant ea, quæ manu, funda, arcu ac tormentis bellicis *projiciuntur*.

170. En illud, pueri ludentes globulis experimur eos quietis statum non prius deserere quàm motus indatur: motum verò acceptum ab iisdem custodiri, dum vel in alium globulum, vel in aërem, vel in

alia corpora missus fuerit. Veluti, meus in tuum verberatum translato motu omni, prorsus quiescit. At portione motus in tuum emissâ, meus pro ea portione itionem suam tardior continuat.

171. Idcirco *projecta*, ut lapis, telum, à jaculatore *separata*, non ab aëre moventur;

172. At semel mota motum eâdem viâ, nec minori velocitate persequuntur.

173. Donec eorum motus ab aëre aut aliis corporibus obviis vel augeatur, vel minuatur, vel aliò vertat. Motui enim in particularibus corporibus considerato, §. 148. triplex ejusmodi mutatio accidit.

174. Atqui in corpore mobili motus non *augeatur*, nisi quid aliunde sit additum: §. 145.

175. Nec *minuatur*, nisi qua pars excefferit: §. 167.

176. Nec item aliò *vertit*, nisi progressionis rectæ quid impedimento sit. §. 156.

177. Ut ecce, à pavimenti vel cujusdam parietis duritie pila resiliens, asservata motus celeritate (exceptum verò sit, quantum aëri datur) viam ejus mutat.

178. Corpora enim dura nobis nihil excipiunt, sed pilæ eum relinquunt integrum.

179. Quod ipsum efficit ut ipso flexionis initio pila non quiescat.

180. Enimvero, si vel momentum ita quiesceret, à quietis statu non recederet, nisi aliunde iterum mota.

181. Uti enim divisio vel sectio materiæ conjunctionem dissociat, §. 55.

182. Ita quies vel interjecta mora continuum motum dirimit.

183. Pilæ igitur contra parietem jactæ atque inde resultantis idem, non iteratus motus est.

184. Hujus autem rei, ut pila plumbea à summo mali demissa inter velocissimum navis cursum rectâ in imum cadat; aut ut illa ab equitante fursum jacta in ejus manum recidat,

185. Causa est motus ex progressu ac descensu constans, quorum uterque in statu suo manet. ex §. 152.

186. Quamvis enim unius corporis cujusque *proprius motus sit* unicus, uti etiam proprius locus unicus est: §. 72.

187. Qui motus alius est ab eo cujus communitas est inter illud & alia corpora simul mota; hac tamen ratione, ut motus *iste communis* pro *alieno* non sit habendus,

188. (Ex-

188. (Exemplo nobis erithorologium, quod in nave ab undis jactata deambulans aliquis gestat:)

189. Potest tamen unicus ille motus proprius ad instar plurium considerari, quatenus à diversis causis proficiscitur.

190. Uti pilæ motio, quæ modò tradebatur, existit & à vi gravitatis & ab aëre, dum navis aequore itat, prorsum agitato. Simili judicio utere de pila ab equite sursum missa.

191. Ita orbicum circa axem in curruum rotis motum à recto distinguit orbitæ longitudo.

192. Porro, quàm facile corpora, etiam dura & crassa, ab aliis moveantur, indicio sunt sequentia.

193. Curribus urbe tractis vici una cum adstructis ædificiis quassantur.

194. Ex tormentis bellicis ferrei ex arte globi ejusve generis alia ad fulminis instar flammis eluctantibus cum horrendo fragore missi aërem, humum & ædificia tantâ vi motant, ut sæpius hîc vitra dirumpantur.

195. A foribus impensè clausis ædes interdum omnibus partibus tremunt.

196. Si qua trabs longitudinis suæ extremitate altera vapulaverit, altera verberationem illam acturum audimus.

197. Terra adventantium pedibus calcata ita movetur, ut auribus terræ admotis eorum adventus à longinquo inaudiri queat.

198. Quæ autem aliorum corporum motioni *obstans*, vel aliquantum inde proferuntur, veluti aër & fluxa corpora, §. 177.

199. Vel nequaquam moventur, ut paries præ soliditate concedere ineptus; §. 178.

200. Vel non tantum ab illis non moventur, sed & suo ipsorum motu corpus obviam cursans repellunt, id quod *Reactio* vocatur.

201. Atque ita multum interest inter hæc, si qua res stando vel quiescendo obnitatur, ut paries obstans pilæ facit; alia verò movendo seu cundo adversetur, veluti, si datatim luditur. Illa *negativa*, hæc *positiva resistens* dicitur.

202. Etenim licet *motus* motui neutiquam *contrarius* sit, sed *quieti*; §. 66. Quemadmodum velocitas tarditati, naturam quietis attingenti;

203. Attamen *motus* *via* sursum versus repugnat *viz* deorsum versus. §. 64.

204. Nec parva distantia est inter viam hanc (*Determinationem motus* aliàs solemus appellare) & motum ipsum. Manente enim motu variat. §. 183.

205. Contis in solidiori loco fixis ocyus detruditur navis. §. 178. Corpora post humum calcitratam saliendo altius tolluntur.

206. Mensâ, si peripetasmatis caret, quàm si iisdem sit strata, celerius pilea decurrit; & jacta contrapannum, lutum, gramina, lanas ac his consimilia, si resiliat, certè humo altè non tollitur.

207. Per loca arenosa, lutulenta & mollia difficilior nobis incessus:

208. Tantum enim motus emissimus, quantum illa acceperunt, §. 167. quæ res lassitudinis causa est.

209. Quemadmodum denique à pavimento pilea resultat, ita pulveres ac luta calcata sese dant sursum, quando aliorum concedere non queant.

V. Vis agendi & resistendi.

210. **A** Gendi & obfistendi vis, seu positiva & negativa resistentia §. 201. hac sola in re vertitur, quod unumquodque statum suum naturâ sequitur: §. 152.

211. Exinde quæ alii quiete sunt juncta, vi separationem impediendi pollent; contra sejuncta conjunctionem avertunt.

212. Quæ res quiescunt, quietem suam rutantur motui resistendo. Idem judica de iis quæ moventur. §. 172.

213. Vis hæc referatur 1. ad *magnitudinem subjecti* cui inest. Nam corpus magnum, respectu ad partes habito, multum habet motus & quietis, cujusmodi quantitas *extensioni* corporis quodammodo respondet. Unde illud sermone tritum: *in majori quanto major est virtus*. Quæ virtus ponitur in totius motus vehementia totiusve quietis firmitudine. Ita, quò major est flamma, eò edacior.

214. Majori vi est corpus globosum in orbem actum loco à polis remotiore, quàm loco polis magis propinquo. Ovum ambabus longitudinis extremitatibus compressum palmis ægrè confringes; sed ad latitudinis, ubi minor est diameter, extrema vel paucillum ita pressum fragile est.

215. Ensis longior, nec non manubrio longior malleus, graviolem inferunt ictum.

216. Gla-

216. Gladii, acus, mucrones vim magnam habent, ubi omnium partium in unum quasi punctum coit : quem etiam ad modum in concavo quodam speculo Solis radii excipiuntur.

217. Vis agendi ac resistendi 2 pender à *magnitudine superficiei*, qua corporum aliud ab alio disjungitur. §. 61. Quò enim latiore superficiem corpus habet, cæteris paribus, eò facilius & majori copia motum admittit.

218. Ita moli §. 213. corporis sphaerici superficies magnitudine sua multum cedit, unde illud & majorem vim resistendi habet & motum diutius continuat. Idem procusum, aut multis foraminibus excavatum, aut trianguli formam induens superficie dilatatur, vi autem resistendi & motus persequendi minuitur.

219. Hujusmodi vis 3 metiunda est ex *motus celeritate*, quantitate ejus *intensiva*, cui §. 213. opposui *extensivam*. Corpori enim celerius moto facilius obsistit etiam parva vis. Ita currus rota, corpus tuum transvolando non læserit.

220. Vis illa 4 ponitur in *vario corporum*, quibus mutua actio inest, *occurso*, qui nunc magis nunc minus rectus vel obliquus est. Ex gr. lapis ad summas undas jactus, ita ut eis insiliat, superficiem illarum non æquè ac rectà incidens dividere valet.

221. Patet è superioribus, in pervagato illo, *virtus unita fortior*, fortitudinem quidem intelligi tam in agendo, quàm in resistendo; unitatem verò tum plurium in mobili *partium*, §. 213. tum plurium in motu *graduum*: §. 219. Adde continuum longi temporis tractum.

222. De utraque illa unitate loquitur hoc axioma : *Similia corpora in similes motus facile consensuum, dissimilia contra.*

223. Admove flammam flammæ, infunde aquam aquæ, etiam calidam frigidæ, vinum vino, etiam rubrum albo (similitudo enim hæc latitudinem aliquam habet §. 119.) & earum rerum conjunctio mox oculis tuis obversabitur.

224. Oleum aquæ, propter naturæ dissimilitudinem, confundendo per se jungi nequeat. Attamen eadem illa, quamdiu cochleari vel simili instrumento adhibito plus solito concitantur, propter externi hujus motus similitudinem in unum coeunt.

225. Contemplare buryri à reliquo lactis separationem, & quàm longè præ triticis aqua ventilatione è vanno paleæ evibrentur. Et illis quoque exemplis axioma §. 222. firmabis.

226. Quatuor hæc, ex quibus magnitudo virium æstimanda est, multi-

multifarium in corporibus naturalibus inter se temperati, opponi vel adæquari deprehendimus.

227. Ex gr. Motui corporis magni robur addit plurium in mobili partium convenientia, licet illi ipsi motui gradus insint pauci. Sic flumini lentè decurrenti corpora ingentis molis cedunt. Atque ita in aliis potest esse motus *validus*, licet non sit *celer*.

228. Contrà in minori corpore motus potest esse *velox*, quamvis *robore* careat, cujus rei index est virga celerius vibrata.

229. Ita, si duplo celerius corpus A movetur quàm B, & corpus B duplo majus est quàm A, tantundem in uno quantum in altero motus numeramus. Extensio enim, quæ est in mobili, intensiorem motus quantitate æquiparat. §. 135.

230. Semper autem in corporum occurſu hæc obtinet regula: *Quod viribus majus est, suum effectum sortitur*, seu agat in aliud, seu alterius actionem obnitendo repellat. §. 163. 166.

231. Ex multis igitur rebus ad eundem locum, angustiores quàm ut omnes capere queat, annitentibus, quæ robore & agilitate superant eò solæ perveniunt, exclusis inde debilioribus.

VI. Corpora Stabilis & Fluida, Dura & Mollia.

232. **Q**uæ oppositio est inter idem ac diversum, immutabile atque mutabile, stare & ire, ea est inter quietem & motum. §. 66. 128. 201.

233. Non magis igitur Quies est aut privatio aut perfectio Motus, quàm Motus Quietis.

234. Etiam si aliorum corporum, veluti Terræ, naturalis coagmentatio quietem; aliorum, veluti Fluminis, apta dispositio potius motum requirat, §. 109.

235. Hæc oppositio, quæ in Physicis familiam ducit (nam ex quinque illis formis §. 59. & alibi recensitis non nisi motus & quies sibi contraria sunt), enititur distinctionem inter *Consistentia* & *Fluxa* corpora: Pro quorum diversitate, agendi quoque & resistendi vires aliter atque aliter se habent.

236. Consistentia si manui aliæve ex membris nostris motanti obſtant, *Dura* vulgo appellantur.

237. Si etenim corpora, simul atque à nobis tanguntur, continuo cederent, ne durè quicquam sentiretur: uti nec ventum sentimus,

mus, quoties pari velocitate cum navi, quâ vehimur, currit. Ubi propriè quidem non movemur, quandoquidem ab aëre contiguo non separamur. §. 77.

238. Corporibus igitur durities, qua motui aliorum resistunt, non inest, nisi ipsa quiescant aut certè tardiùs procedant. §. 202.

239. Nec tamen necessum est, ut corpora dura *juxta alia* corpora ambientia *tota quiescant*. §. 80. 192. Globuli enim duritatem suam custodiant celerrimè rotati.

240. Sed ad corporis duritiem est, ut ejus *partes juxta se mutuo quiescant*, nec dilabantur. §. 211.

241. Partes ita intelligi volo, quatenus *tactum efficiunt*. Nam si quæ fortè iis particulæ sensum fugitantes mixtæ fuerint, duritiem hæ, sicut variis summæque celeritate motibus agitentur, non eximunt. §. 50. Efficiunt tamen ejusmodi particulæ ne corpus illud, cujus poris vagantur, omnino stabile queat existimari.

242. Ita verò dum partes juxta se mutuo quiescunt, etiam cohærent. Quid enim aliud est quiescere, achærere? Unde partium quies, per earum contactum, & duritiem & *cohærentiam* efficit. §. 58. 67. Confer glaciem cum aqua, præsertim servida.

243. Cohærentia autem hæc duri corporis eò firmior est, quò partes ejus ordine secundum se quiescentes extremitatibus, quibus hinc inde continguntur, ampliores sunt.

244. E contrario corpora ex partibus non adeò contiguis concreta, secundum ea loca, quibus se minus contingunt, minori negotio dirumpuntur.

245. Porro uti stabilia seu dura corpora obsistunt aliorum motioni, ita fluida & mollia cedunt.

246. Cedunt, quia jam moventur, saltem celeritate vincunt ea quæ adventant. Confer §. 238.

247. Sed cautio est, ne motum illum, in quo natura fluidi vertitur, *totius* corporis esse credas: quandoquidem ejusmodi motiomi etiam in duris locusest. §. 239.

248. Neque tibi persuadeas, *majorum partium*, quæ tactui stare solent obviam, hîc motum esse intelligendum;

249. Duritati quippe solvendæ & fluido congregando neuter illorum motuum sufficit.

250. Scias igitur, in fluido corpore exiguas motari *particulas*, in quas ipsum divisum est, quamdiu naturam tuetur fluidi;

251. Quibus ita fluentibus stabiles particulas plurimas sæpe permixtas esse nihil vetat, dummodo sensum fugiant.

252. Non enim ut corpus perpetuò in corpora, ita fluidum omne in fluida usque & usque dividi potest.

253. Utque corpus aliquod fluidum sit ac tale esse perseveret, necesse est particulas ejus *motibus à se mutuo diversis agitari*: §. 203. qui motus quodammodo circulares sunt, dum aliæ sursum, aliæ deorsum, &c. §. 64. 133. circa sua ipsarum centra volutantur.

254. Hac enim demum ratione efficiatur, ut fluentium corporum particulae alia corpora undecunque sibi occurrentia non remorentur, quemadmodum non remorari experimur.

255. Etenim si particulae istae omnes unà duntaxat viâ simul decurrant, nec proprium singulae motum habeant, mutuo contactu breviter cohærebunt ac fluidum corpus efficere desinent.

256. Additum est, *duntaxat*, quoniam nihil his officit, quod corpus fluxum simul totum, §. 187. motu vario in particulis custodito, §. 186. versus unum locum eat, non aliter ac durum. Ita sc flumen unà cum glacie in mare exonerat. Glacies tamen ob cohærentiam partium, §. 242. majore vi cursum suum persequitur fortiusque in riparum sinus impingit, quàm aqua, cujus partes variis disjunctæ motibus, §. 253. vires suas ita conjungere nequeunt. §. 221.

257. Hic motus *progressivus totius*, quia sæpius & apertius in sensus incurrit, vulgo innotuit præ altero illo *particularum vario*, in quo natura fluidi sita est.

258. Præterea non omne fluidum esse humidum siccitas Ignis declarat. Nec Aër semper humidus, quamvis perpetuò fluidus.

259. At quemadmodum inter summam celeritatem motus & omnimodam quietem varii gradus dantur, ita inter simpliciter fluxum & absolutè durum. §. 123. 235.

260. Sunt quæ utriusque illorum naturam participant, idque interdum magis, interdum minus: §. 202. Veluti *mollia*, lana, nix, &c. & *liquida varia*.

261. Sic atramentum, sanguis, lac, §. 225. non sunt liquores simplices, sed corporum durorum pulvere inspersi. §. 251.

262. Particularum fluentium copia vel agitatio major est in flamma, quàm in vaporibus aut aëre:

263. Major est in aëre, quàm in aqua, in calida major quàm in frigida. §. 242.

264. De-

264. Denique in aqua major est quàm in oleo, §. 224. sed minor ac in vino.

265. Distinctioris autem cognitionis ergo possumus flammæ nec non effervescentis aquæ particulas quasi *volantes* animo concipere :

266. Frigidæ aquæ atque olei minutias quasi *repentes*.

267. Hic locus est contemplationi *Lentoris*, qui in tardiore quadam fluxione consistit. Talis in viscoprehenditur.

268. Lentori opponitur in siccis corporibus *Friabilitas*, quam i rara partium coherentia ponimus, veluti in gleba sicca.

269. Gradus illi mollietiei ac duritatis etiam in eodem subiecto pro diversitate conditionis ac temporis sæpius ostenduntur.

270. Sic *multa ipsa sui generatione*, quam materiæ motus & confluxus efficit, *sunt molliora, ac progressu temporis indurescunt*. Considera panem recentem, plantam, bestiam, &c.

271. Sunt autem pleraque *corpora mollia*, quoniam eorum particulae sunt flexiles (ut ecce ceræ, butyri, olei concreti particulae plumarum instar molles sunt), vel quia desinunt in ramulos quosdam flexiles, qui sibi mutuò annexi eas jungunt, ut patet in massa farinæ subactæ.

272. Etiam si verò in fluxis particularum exilitas, §. 250. sæpenumero non permittat, ut earum motionem oculis cernamus; effectus tamen dux nobis est ad illum motum pernoscendum.

273. Quem effectum vel ipsa fluida nobis conspiciendum præbent, ut ebullitiones, evaporationes;

274. Vel alia corpora à fluidis in partes divisa luculentè monstrant. Motu enim divisio nunquam vacat. §. 57.

275. Ad hunc modum carnes ab aëris caloribus corrumpuntur. Liquoribus etiam, calentibus præsertim, corpora multa dissolvuntur.

276. Fac verò, liquorum partes à mutua quiete coherere: §. 242.

277. Ecquid inter aquas & glaciem, inter liquamina & coagulata (ceram, butyrum, plumbum, &c.) interesset?

278. Qua ratione vina & aquæ in uno vase confunderentur, an non iuxta ac sicca permanerent secreta?

279. Etenim illorum confundendi facilitas indicium est, celeritatis differentiam in particulis vini & aquæ non esse tantam, quanta est in particulis aquæ & olei. §. 223. seq. 264.

280. Corpus durum, quod unde libet fluida ambeunt, inibi tanquam in *æquilibrio sistitur*. Æquabilitas enim contrariorum motuum

illud efficit, ut inter eos stationem suam deferere nequeat. §. 64.
200. 253.

281. Idem evenit in duro corpore, quod ab omni parte alia dura æquabiliter premunt. Sic colluctatorum, dum æquis viribus inter se contendunt, neuter humi sternitur. Idem sit judicium de fluidis, quoad simili modo sibi obluantur.

282. At simul ac vel minima vis horum aut istorum præponderat, *æquilibrium evanuit.*

283. Dura etiam à fluidis progredientibus *deferuntur*, uti ab aëre & fluvio naves. Item dura à duris proferuntur, ut à nave homines.

284. Nec tamen dura semper fluentis ac deferentis motioni, sed alii sæpe eique vehementiori motui parent. Ita navis fortius remigata aliterve impulsæ vel tractæ transverso vel etiam adverso flumine ad ripas appellitur.

VII. *Figura incerta, globosa, angulata.*

285. **D**iversarum in corporibus figurarum causa & origo est motus varietas: id quod opifices nos edocent.

286. Quæ figurarum varietas hoc vicissim efficit, ut motus varient. Ita lapis triangularis minùs facilè movetur sphærico.

287. Fluentia quoque corpora iterum atque iterum alluendo rebus duris nunc hanc nunc aliam formam inferunt.

288. Verùm ad dura & consistentia multò facilius est conformatio fluxorum ac mollium, quæ illis cedant. §. 245. Ita quæ fluunt in vasculum indita ex capacitate ejus figurantur. Ferrum ad recipiendum multas formas ignis admotus parat; sed ubi refrigit, ad eam rem ineptum est. Idem in cera sigillari videmus. Quæ res hoc manifestum efficit, quod *jam ferme consistentia figuram, quam ad fluxionem novissimam habebant, tueantur.*

289. Quò igitur rerum motus ac fluxus faciliores sunt, eò facilius in iisdem est figuræ mutatio.

290. Proinde in mundo mobilitate summa ac maximè fluidum corpus omnimodè tum figurando tum dividendo est.

291. Tale autem ut hic detur, ipsa necessitas deposcit, ne vel minimum universi per momentum vacet. §. 43.

292. Nam dum corporum ab alio aliud protruditur, atque ad hunc modum continuus in aliis locum successus est, §. 133. nequaquam

quam fieri potest, ut omnia idem magnitudinis, figuræ ac situs ob-
tineant. Oportet igitur uti materia, quæ omnibus modis figurari ac
dividi sustinet, omnium complementum advolet.

293. Eadem hæc necessitas agnoscitur, quoties è spatiis amplio-
ribus ad innumeris gradibus minora prorsus implenda materia mobi-
lis excurrit. §. 137. (Jam si quis roget, quodnam sit illud corpus
fluidissimum, è superioribus quidem nil aliud quàm *Flammam* intelli-
get. §. 265. Nec sanè quicquam existit, quod alia corpora tantopere
dividat : dividere autem est movere.)

294. Verùm è corporibus, quæ sunt certa figura nec ad omnige-
nam assumendam idonea, *cæteri rotunda mobilitate sua antevertunt.* §. 218.
286.

295. Suntque minutissimi globuli, §. 250. proprium singuli gy-
rum facientes : §. 253. post materiam quibuscumlibet modis figurabilis
ad corpus fluidum constituendum maximè idonei.

296. Quando enim sic moventur, & in punctis duntaxat se con-
tingunt, §. 243. in corpus durum coalescere nequeant.

297. Præter mobilitatis istam prærogativam sphaerica figura hoc
habet, quod *uniformis est & simplicissima*, cum unico solum ter-
mino, còque à medio comprehensi spatii æqualiter distante conti-
neatur.

298. Nec linea recta, quæ linearum omnium simplicissima est,
potest magis æqualiter, & minùs in unoquoque puncto inflecti,
quàm cum in circulearem degenerat.

299. Hinc ea quæ à circumstantibus & obstantibus corporibus in
recto motu persequendo impediuntur, hunc in circulearem illico con-
vertunt (Sic enim à recta via minùs abeunt, quàm si motu suo recti-
lineos angulos describerent :) sicuti in globis parvis & magnis, inque
aëris & aquarum vorticibus apparet. Et habemus in aure digito o-
stenditur vorticem aëris, dum vapor ne recta via exeat impeditur : unde
murmur tremulum audimus.

300. Eadem figura globosa inter omnes *robustissima & capacissima*
est, §. 218. & ratione ambitus quodammodo *infinita*.

301. Has causas multi afferunt, quamobrem pleraque Universi
corpora, majora pariter & minora, sphaerica aut certè rotunda
quodammodo existant, vel motum quoque circulearem habeant. Sed
physicarum rerum studiosus generalibus illis causis. speciales addere
laborabit.

302. Nec tamen omnes mundi partes globosæ esse possunt, quia inter eas triangularia spatia darentur vacua.

303. Denique globosam corpora figuram induunt, cum diutius variis motibus cientur, exemplo eorum quæ tornantur. Unde iterum patet, corpus fluidum è globulis componi posse.

304. Quæcunque præter globosâ, & omnibus modis figurabilia, in mundo corpora inveniuntur, ratione figurarum, quæ sunt innumeræ, *angulata* licet in genere appellare, quoniam angulis pluribus aut paucioribus, aliquantisper saltem permanentibus, terminantur.

305. Horum esse motum tardiozem & magis impeditum, ex ante dictis claret. Et propter istam tum tarditatem, tum figuram, quæ permittit ut in aliqua superficiiei parte se contingant ejusmodi corpora, facile coherent. §. 243. Atque ita ad compositionem aliorum corporum apta nata sunt.

VIII. *Asperum & Læve.*

306. **R**atione figuræ & situs partium potissimum *exterioris*, §. 107. corpus distinguitur in asperum & læve.

307. *Asperum*, scabrum, partes habet in superficie prominentes alias, alias depressas.

308. *Læve*, politum, partes quibus terminatur habet æqualiter sitas.

309. Lævia igitur intuitu superficiiei, §. 217. ad agendum & resistendum aptiora sunt asperis. Confer ferrum & similia impolita vel ærugine obducta, cum politis & ab ærugine liberis. §. 102. Pila à lævi corporis duri superficie longius quàm ab aspera resilit. Corporum in glaciei quàm terræ superficie motus facilior.

310. Quomodo verò mutuo attritu corpora aspera lævigentur, ostendunt ferri aliorumque corporum politura, rasura panni, lapillorum in fluviis lævigatio. Ita cos acuit cultrum.

311. Particulæ, quæ ejusmodi attritu abraduntur, propemodum omnes valde tenues & minutæ sunt, ut in scobe & limatura ferri patet. Dum culter acuitur vel paulatim usu teritur, quemadmodum & calcei ac vestimenta reliqua, quod inde abraditur ob exilitatem sæpius non apparet. Quæ omnia *particularum insensilium* & ortum & existentiam probant. §. 241. 250. seqq.

312. Quorum corporum superficies quasi ramulos quosdam emittentes

nentes habet, cujusmodi sunt extremitates lanæ in panno, ea lævia evadunt, cum in unam partem ramuli isti inflectuntur, uti lanæ in superficie panni radendo, barbæ & capilli pectendo inflectuntur.

313. At si in contrariam partem stringantur, ramulorum illæ extremitates nonnihil assurgentes asperam superficiem reddunt motumque impediunt : quemadmodum non solum in panni verum etiam in bestiarum superficie deprehenditur, quarum corpora pilis aut plumis caudam versus inflexis teguntur.

IX. *Rarum ac Densum.*

314. **R**atione figuræ & situs partium *interioris* corpus est rarum vel densum.

315. *Rarum* est non quod expansum per majus spatium sine intervallis, quia corpus idem non potest magis extensum esse vel majus spatium occupare hoc tempore quam alio. §. 33. 38. 43.

316. Neque est ita divisum ut ejus intervalla sint vacua, §. 43.

317. Sed habet partes, inter quas intervalla existunt corporibus aliis repleta, uti videre licet in spongia & pumice, item in pane per lactis aut vini in poros ingressum dilatato.

318. Quicquid autem in rari corporis intervallis, quæ à partibus ejus non occupantur, extensionis continetur, id propriè ac physicè non ipsi, sed aliis corporibus replentibus est tribuendum. §. 50.

319. *Densum* redditur corpus, si partibus ad invicem accedentibus intervalla illa minuuntur (veluti cum spongia liquore turgida, item lana aut nix comprimitur) aut tolluntur.

320. Quod posterius non contingit nisi in omnimodè duris vel omnimodè fluidis.

321. Quemadmodum autem *Rarum* à *Molli* (nam pumex rarus est, & tamen durus) ita *Densum*, Germ. *dicht* / à *Duro* Ger. *hart* / distinguendum.

322. Nempe densa pluvia, densa flamma est, propter partium suarum propinquitatem, §. 319. Quod pertinet ad situm, & oppositam habet partium distantiam, cujusmodi est in raro. §. 317.

323. Sed lapis durus, ob partium *quietem*, cui opponitur motus. §. 66. 240. Sic ignis densior terrâ, non durior.

X. Pori corporum, tam liquidorum, quàm consistentium.

324. **I**ntervalla corporum appellantur *Pori*, meatus, rimæ, foramina, cavitates, &c. prout minora vel majora existunt.

§. 114.

325. Pori in corporibus omnibus compositis, exceptis iis de quibus §. 320. loquebamur, inveniuntur.

326. Nam oriuntur vel *per compositionem* corpusculorum, quæ vel ob convexa latera sua, §. 302. vel ob irregulares quascunque figuras, §. 304. vel propter fortuitos occursum, §. 220.

327. Vix unquam sic jungi possunt, ut omnino congruant, nec ullos angulos ab alia materia implendos relinquunt. §. 292. seqq.

328. Vel producuntur *per transitum* alicujus materiæ, quæ majore vi pollens corpuscula conjuncta locis suis exturbando sibi viam aperit. §. 166.

329. Quæ posterior causa cum in *mollibus, liquidis & fluidis*, quippe quæ facile cedunt, §. 245. potissimum locum habeat, meatus in talibus corporibus vel maxime sunt agnoscendi.

330. Verum & prior pororum causa in iisdem fluidis, excepto corpore fluidissimo, §. 290. locum invenit. Cuncta enim quæ sunt præter materiam omnibus modis figurabilem, determinatas necessario figuras obtinent.

331. Ita corpus fluidum ex particulis globosis compositum, §. 295. porosum esse demonstratur ex §. 302.

332. Utraque pororum causa datur etiam in *stabilibus*, dummodo non sint omnium quæ cogitari possunt stabilissima.

333. Qui dura quælibet corpora sine poris animo concipit, neque ex partibus ea composita putat, quasi facta sint ex materia prima, §. 48. ante quàm ulla partium inibi divisio præcesserit, §. 55.

334. Is inter æs, aurum, argentum, plumbum, crystallum, vitrum, glaciem, terram, lignum, abietem, quercum, marmor & saxum quodcunque, nullam interiorem differentiam relinquit. §. 68. 106. § 14. seqq.

335. Cum tamen experiamur, alia horum esse perspicua, alia opaca, alia sonora, alia non item, alia aliis duriora vel graviora, alia viventia, alia vitæ expertia, alia ærugini obnoxia, alia non item, &c. quæ omnia interiorem quandam diversitatem ostendunt.

336. Cum.

336. Cumque ligna, gladios & similia semel inflexa mox ad priorem figuram sponte quasi redire videamus, id primæ Naturæ legi prorsus repugnaret, §. 152. 180. nisi per eorum poros curreret materia, quæ incurvatis figuram pristinam restitueret.

337. Nos igitur ejusmodi absurda evitantes, Materiam totam primò quidem ut indivisam spectamus, deinde verò motu, quem Deus indidit, divisam judicamus in partes & particulas, ex quarum demum conjunctione majora corpora omnia sint composita. §. 305. Unde pori in plerisque orti, pro quorum multitudine vel paucitate, latitudine vel angustia, figura & situ, corporum denique permeantium infinita varietate mille formis distingui possunt. §. 59.

338. Quæ omnia considerantes rectè concludimus, *similium corporum similes esse poros, dissimilium contra*. Similitudinem ac dissimilitudinem intelligi in partium magnitudine, figura, situ, motu vel quiete.

339. Itaque materia diversa, id est, secundum exiguas particulas aliter formata, diversos etiam poros exigit, ut liberè moveatur, ac proinde partium situm turbare potest & solet, quoties ruit in corpus, cujus viæ non satis aptæ sunt.

340. Hinc pori unius corporis alterius è regione positi vel adjuncti corporis poris quantitate, figura, situ non respondent. Sic diversa industria simul nonnulli induunt, ut eò magis arceant aërem, qui per meatus panni simplicis, licet crassioris, facilius ad cutem penetrat.

341. Adhæc quæ de lævi & aspera superficie externa, §. 321. seq. & ante diximus, ea quoque ad internam pororum, seu, ad latera meatuum sunt applicanda. Unde iterum permagna eorum varietas.

342. Porro durorum corporum pori differunt ab iis qui sunt in fluidis, quòd illi ob firmiora latera magis *constantes*, hi contrà faciliè *mutabiles*. Idcirco materia in illis minùs à motu suo impeditur: quemadmodum fumus melius per caminum ascendit, globulus facilius per tubum movetur, quàm per liberum aëra.

343. Ex dictis §. 326. seqq. intelligitur, meatus alios esse corpori *congenitos*, ut qui in panno per texturam; alios postea *factos*, veluti in panno abacu, tinea, in ligno à terebra, vermibus, &c.

344. Ac sicuti in panno crasso pauciores, sed latiores; in subtili plures, sed angustiores pori sunt: ita sæpe in aliis corporibus *meatum angustia multitudinis quasi pensatur*. Nempe, ut in panno fila, sic

in corbe vimina conjuncta, quo majora & crassiora, ed majores & pauciores meatus relinquunt; contrà quò minora & subtiliora.

345. Non rarè per eundem porum currit multiplex materia, tunc præsertim, cùm ab una definitam figuram & magnitudinem habente prorsus impleri ñequit. §. 292.

346. Currit multiplex illa materia per poros in partes etiam contrarias. §. 203. Veluti in clepsammidio arena descendente aër ascendit. §. 133.

347. Quæ in poris continentur motum corporis porosi sequuntur ab eo delata: uti vinum sequitur motum dolii, aqua motum spongiæ, &c. Sic & figuram imitantur. §. 288.

348. Porosa corpora inserviunt ad partes alicujus totius dividendas ac separandas: ita pectine dividuntur capilli, carminatur lana & linum; siphone in varias partes ad modum pluvix dispergitur aqua.

349. Speciatim inserviunt ad crassiores compositi alicujus partes à subtilioribus secernendas: quoniam his per meatus transmissis, illa relinquuntur. Exempla occurrunt in iis, quæ cribro, colo, panno, corbe cribrantur aut percolantur. Reti separantur pisces ab aqua, pectine insecta à pilis, &c.

350. Corruptuntur pori 1. *fractione*, ut si ligna vermibus erosa rumpantur: vix enim contingat ut ejusmodi fractura non incidat in dimidiata foramina, secundùm ea quæ diximus §. 244.

351. Hic tamen è dimidiatis foraminibus ad invicem applicatis rursus integra fiunt: sicut apparet in illis instrumentis, quibus plumbum liquefactum in globulos cogitur.

352. 2. *Distorsione*, cùm eorum figura & situs mutantur, sicuti cernitur in reti vel panno in alteram partem vehementius tracto. Simile cogita fieri dum arcus intenditur.

353. 3. *Obstructione*, quando materia in iis quiescit, §. 67. vel tardiùs movetur, §. 202. & alteri mobiliori viam præcludit.

354. Sic aqua poros velorum obstruit, quatenus tardiùs movetur aëre, §. 263. Unde velis madefactis, ac proinde transitum minùs liberum vento concedentibus, §. 238. velociùs procedit navis; tardiùs iis exsiccatis. Confer §. 205.

355. *Obstrui* quoque dicuntur pori, cùm angustiores redduntur aut tolluntur per condensationem, §. 319.

356. Contrà dicuntur *aperiri*, quoties rarefactione dilatantur aut materia celerius percurrente replentur.

357. Ni-

357. Nimirum ut janua dicitur claudi & aperiri, licet foramen
 §. 324. vacuum existat nunquam.
 358. Distorsio pariter & obstructio meatuum esse videtur, cum
 particula ramulorum instar in ipsis eminentes inque unam partem se-
 mel inclinatae, in contrariam inflectuntur. §. 312. seq.
 359. Omnis ejusmodi pororum contemplatio Philosophum na-
 turalem à vulgo vel maximè segregat, & in speciali Physica passim
 eximium usum habet.

XI. *Mundus ejusque in partes sensiles & in- sensiles divisio.*

360. **H** Actenus Physicorum pars generalis fuit, sequitur spe-
 cialis. §. 18.
 361. In qua res naturales cum conjunctim, tum separatim con-
 templaturi sumus, tuentes ordinem partis generalis, ubi ab Unitate
 ad multitudinem procedebatur. §. 51. seqq.
 362. Naturalia in unum congregata *Mundum* concinnant:
 363. Qui, sive corporearum duntaxat rerum,
 364. Sive omnium creatarum *Universitatem* notet,
 365. Animo nisi unus concipi nequeat.
 366. Si plures existere perhibentur, singuli rerum universitates
 esse negantur.
 367. Nec multos existere affirmari queat, nisi intellectu distantia.
 §. 65.
 368. Distare autem non possunt, nisi spatio interjecto.
 369. Atqui spatium illud corporis est plenum. §. 43.
 370. Quod corpus minimè potest corporeæ Universitatis, hoc est,
 mundi, pars non esse.
 371. Adeò ut contingendo ex eo & cæteris mundi corporibus
 unum systema non existere nequeat.
 372. Cuncta ergo spatia, quæ mente unquam assequamur, ma-
 teria seu corpore oppleta esse, aientes,
 373. Majori laude *Vim Dei* extollimus,
 374. Quæ in unoquoque imaginabili reapse exercitata percipitur,
 §. 43. 147.
 375. Atque alii, qui plures à Deo mundos creati posse conten-
 dunt,

376. Immenſa ſibi extra mundum hunc vacua imaginantes,
 377. Ubi vires Dei exerceri demum queant.
 378. Enimvero magis eſt, quod reapse eſt, quàm quod eſſe poſſit.
 379. Interea eo *Mundum infinitum* non aſſerimus.
 380. Et, ſi illum ſola *extenſione vel molis quantitate*, §. 26. infinitum judicaremus,
 381. Num putas fore, ut Dei infinitas, quæ non in extenſionis corporeæ, ſed integræ *perfectionis* plenitudine & *Virtutis* magnitudine §. 25. vertitur, re quadam vel minima diminuat?r
 382. Quin etiam ea affirmatione infinitatem Dei confirmamus, Vim ejus in tanto Univerſo exſertari judicantes.
 383. Mundus igitur nobis *indefinitus* eſt. §. 52.
 384. Id eſt, neque extrema, neque medium, neque figura ei adſcribitur. §. 63.
 385. Neque tandem *forma* quicquam, eo quòd proſus nullam rem materialem, unde diſtinguatur, invenimus. §. 54. ſeqq. 365.
 386. Interea forma, id eſt, *pulchritudo*, quæ nomen ei indidit, ad partes habito reſpectu, Mundo tribuitur. §. 92.
 387. Iſthanc primò locamus in *Varietate*. §. 91.
 388. Quæ cum in rebus corporeis omni numero major, §. 59. perluſtrari nequeat, attentè quaqua (extrinſecus & intrinſecus, animi & corporis oculis) inſpici eſt digna.
 389. Tum in varietatis *conſtantia*,
 390. Non incerto divinæ immutabilitatis indice. §. 147. ſeqq.
 391. Deformia quoque & monſtroſa ſuum Mundo conciliant decus.
 392. Nec parum lucis eminentiam ipſæ tenebræ commendant. Contraria enim collata magis eluſcunt.
 393. Præterea Mundi pulchritudinem ponimus in rerum *Diſpoſitione*,
 394. Quæ ſe conſpicandam præbet non tantum in locorum,
 395. Verum etiam in temporis ratione. §. 115. ſeqq.
 396. Itemque in actionibus & paſſionibus mutuis. §. 133. ſeqq. 162. ſeqq.
 397. Denique Mundi formam ſeu pulchritudinem in *plenitudine* eſſe ſitam arbitramur.
 398. Hujus conſideratio in locis, §. 52. ac rerum generibus occurrit.

399. Mundo §. 364. enim continentur & puræ *mentes* & puræ *corpora*, & *Homo* è mente & corpore constans.

400. Corpora respectu motus & quietis sunt aut simpliciter *fluida*, aut simpliciter *stabilia* (consistentia), aut naturam & fluidi & stabiliis *participant*.

401. Itemque vel quavis ratione, vel ad globi, vel ad alterius incise formæ instar *figurari* possunt.

402. Nec, quando cuncta loca corporibus oppleta sunt, §. 48. quicquam materiæ vel è nihilo produci, vel in nihilum redigi, vel in spiritum seu mentem immutari potest. §. 21. seqq. 149. Et hoc pertinet ad Mundi constantiam. §. 389.

403. Contendis, à Deo fieri posse, ut corpus quoddam subito in nihilum occidat, atque eo ipse momento in idem loci aliud creando subdatur?

404. Resp. quid Deus possit, jam non queritur; at negatur naturæ corporeæ hujusmodi vim esse inditam, quippe quæ nihil præter motum ac divisionem præstare valet. §. 57.

405. *Moveri* autem corpora, est ea in mundo transferri, nequam ibi perdere. §. 77. 133.

406. *Divisio* quoque materiam sive molem corpoream nec facit nec tollit.

407. Etenim omni corpori natura hoc dedit, ut dividi queat. §. 34. (Sese autem procreando destruendove natura omnino impar est. §. 145.)

408. Adeò ut locus denegetur *Atomis*, id est, corpusculis naturæ suæ individuis, utpote quæ partem extra partem, veluti dextram ac sinistram, non habentia, extensa & corporea censeferi non possent.

409. Locum quidem inveniunt *minima naturalia*, hoc est, corpuscula quæ in sui generis minora dividi nequeant, veluti particulæ ex aquis minimæ ulterius dividendo in vapores abeunt. §. 122. seqq. 252.

410. Excepta indè sit materia ad omne genus figurarum ac divisionis apta, quæ indefinitæ parvitatæ est neque minima naturalia unquam admittit. §. 290.

411. Mundus corporeus dividitur in partes tum insensiles ac minores, tum sensiles ac majores.

412. *Insensilia* sunt minima, quæ modò exposui, naturalia, aliæque ex quibus corpora fluida construuntur. §. 311.

413. Ex insensibilibus pluribus conjunctis natura coagmentat sensibilia. Quæ enim exili magnitudine sensus non afficiunt, ea crassiora sæpenumero illud faciunt. §. 213.

414. Majora atque eo ipso sensibus obvia rerum omnium prima & propemodum sola apud homines pernoscentur suisque discernuntur nominibus. §. 1. seqq.

415. Idcirco eorum analogia sæpius nos ducit ad philosophandum & loquendum de minoribus atque insensibilibus. Cujus rei exempla vide §. 265. seq. 312. seq. 357. seq.

416. Ne vocum ac rerum novitatem inducere videamur.

417. Nam effectuum notæ semper, non ignotæ causæ statuendæ. §. 15.

418. Similiumque similes potius quam dissimiles. §. 96.

419. Incognitas ac dissimiles causas voco, quæ neque cum iis, quæ in mundo corporeo clarè sentiuntur, conveniunt, neque cum iis, quæ ibi distinctè intelliguntur, consentiunt. §. 16.

XII. *Tripartita Mundi aspectabilis corpora, lumen emittentia, transmittentia, remittentia.*

420. **S**pecialis Physica initium capit à corporibus illis majoribus & generali hujus Mundi visibilis coagmentatione, unde cætera pendent.

421. Ut ritè hic philosophemur, disci opus est, nullum quidem esse peccatum, si Dei operibus pulchritudinem & perfectionem omnibus numeris absolutas tribuis. §. 383. 386. seq.

422. Delictum autem esse, eadem illa terminis sine prævia ratione sic circumscribere, ut Dei Creatoris sapientia, bonitas & potentia, quas mentis suæ acie nemo quisquam emetiri sustineat, minoris à nobis æstimentur.

423. Corporum igitur magnitudinem ac multitudinem nimium quantum coangustare dedecet: quasi Deo solutum non fuerit majora plurave perficere, quam ut angustia captus nostri capiat.

424. Nec unquam tibi persuaseris, res omnes nobis tantum creatas esse, adeo ut omnem operam in cognoscendis eis, quibus prodesse aut obesse videantur, ponamus, mittentes earum propria & naturæ penitissima, cum horum notione minùs instructi ægrè illa pernoscamus.

425. Et

425. Et hæc opinatio excutienda est, nos acuminis ingenii nostri fines, quos in rebus singulis condendis sibi proposuit magnus Opifex, attingere valere, quasi ille sui consilii socios nos mortales legerit.

426. Sed potius è Dei, rerum omnium *causa efficiens*, perfectionibus, quantum naturæ lumine capiantur, de effectis ejus judicium merimur. Cujusmodi methodus suprâ adduberi *cepta* est. §. 148. 155. 422.

427. Nequaquam denique existimabimus, nos vel singularum rerum naturalium proprietates, quarum varietas infinita, §. 388. numero comprehendere, vel cujuscunque generis particularia definire posse. Universalium enim est scientia nostra.

428. Quando verò nulla res, quam mens nostra hic in corporeo mundo versat, *lumen* neque longitudine, qua pertendat, neque pulchritudine æquiparat, nec quisquam sensuum alius iisdem *Visum* anteit, à luminis natura observata primam Universi hujus in partes integrantes divisionem petimus.

429. Corporum enim alia lumen de se *emittunt*, quæ sunt lucida, uti Sol.

430. Alia lumen quæqua *transmittunt*, quæ sunt pellucida, uti Cælum.

431. Alia lumen *remittunt*, veluti terra.

432. Namque terra suo lumine non radiat & alieno transitum obvallat. Est igitur inter lucida & pellucida *negationis medium*.

433. Fons hujus divisionis est motus, cujus rei argumento est *mittendi* verbum ter iteratum. Corporum verò maxime præcipua conditio est motus. §. 127.

434. Lucida ad visum accommodata tantum agunt seu movent; pellucida recipiunt sive aguntur & moventur; terra atque id genus alia corpora neque verè movent, neque luminis motum, qua talis est, patiuntur, sed ei resistunt.

435. Quæ resistantia negativa, §. 201. per se neque actio, neque passio est, sed quoddam utriusque medium. §. 432.

436. Divisio hæc tam perfecta est, ut non modò rem visui *subjectam*, verum etiam videndi *organum* & *medium* comprehendat. Quæ tria corporis sensum absolvunt.

437. Si qua *participationis media* existant, veluti aqua, cujus coagmentatio talis est, ut altera parte lucem non immittat, altera pelluceat, ea pro respectus diversitate diversa ad genera referas. Neque enim

enim ed minùs genera sibi adverfantur. Exempla similia ex §. 399. seq. huc assumes.

438. Quid autem generis unicuique corporum sit tribuendum, phænomena, accedente proprietatum in eis comparatione, edocent. §. 16.

439. Ita ad *Solis & Luna à Terra* distantiam, eorum apparentem magnitudinem secum Astronomi metientes, Terrâ Solem multò majorem, Lunam verò multò minorem §. 427. judicant.

440. *Fixæ* stellæ an Soli magnitudine cedant, per immensitatem distantie rationi nostræ emetiri non licet.

441. Idcirco vulgi opinio à vero longissimè remota est, exili eas habentis parvitate. §. 6. 423.

442. Quando autem immensa locorum intercapedine radios tam lucidos spargunt,

443. Ad Solis instar sua ipsarum luce fulgere judicentur. §. 421.

444. Solem verò esse flammam, luminis & caloris sensus confirmat. §. 418.

445. Sed cum Luna nusquam refulgeat nisi ea parte, qua Soli est adversa, atque interdum omnino sit opacata, Lunæ eodem modo ut Terræ lumen Sol mutuatur.

446. Mercurius item, Venus, Mars, Jupiter ac Saturnus Fixis lumen minùs acutum habent. Et Soli tam sunt propinqui, ut nitore ejus facile coruscent. Confer §. 418. 442.

447. Hæ stellæ dicuntur erraticæ seu *Planeta*, quoniam incertis quasi sedibus vagantes ordinem suum deferere videntur.

448. *Fixæ* contrà situm atque ordinem suum tuentur.

449. *Cælum* verò esse fluidum nec durum corpus, §. 245. varii cum Planetarum tum Cometarum errores satis luculenter nunciant.

450. *Cometas* namque cælo, non aëre nostro, huc illuc vagari, nec non Planetas obscuritate æquiparare, à multis retrò annis cælorum phænomena docuerunt.

451. Præterea ad lumen qualibet transmittendum, nullius interventu umbræ, §. 430. præter fluidum corpus haut ullum sit idoneum.

452. Deinde in orbem itare cælum, constans hominum opinio tenet, quæ ipsa hypothesis tantisper habeatur, dum ratione probata fuerit.

453. Propter ejusmodi cælestis & materię & motus qualitatem Cælo Vorticis nomen inditur.

454. Etenim

454. Etenim *Vortex* est congregatio, §. 61. 250. fluentis materiæ, quæ circa medium punctum vel centrum orbiculato motu circumcurfat. §. 299.

455. Postremò tandem circa Solis extremitatem corpora quædam lumen obscurantia conspiciuntur, quæ *Solis macula* nuncupantur.

456. Hæ maculæ in cælestibus generationis & corruptionis argumento nobis sunt, quia disiectis aliis aliæ coarctatæ quotidie succedunt.

XIII. *Tria Mundi Elementa, ad triplex corporum genus relata, septem argumentis demonstrata.*

457. **I**ngentium illorum, quæ modò recensuimus, corporum naturam, principiorum in Physica generali traditorum auxilio, cognituris prædiscere convenit, cujusmodi primordia cum ipsa *Mundi*, rum *Cæli*, vastam Universi regionem tenentis, constitutio requirat. §. 420.

458. Mundi appellatione ut multitudo, ita varietas rerum elegantissima continetur. §. 362. seqq. 387. seqq.

459. Mundum igitur non intelligimus ullâ viâ confieri potuisse, nisi ut extensa materia à Deo motore omnium primo *in varias partes abierit*. §. 55. 59.

460. Nam ante divisionem omnem tota materia haut aliter ac una prorsus continua & lumine destituta moles concipiunda est. §. 68. Quæ moles aspectabilem hunc mundum, corporum lucidorum, pellucidorum & opacorum admiranda varietate condecoratum, §. 429. seqq. facere neutiquam potuit.

461. Præterea, quando Cælum, ut quaquæ lumen transmittat & stellis pro varietate motuum cedat, §. 449. 451. fluidum corpus est, divisio materiæ fieri debuit in *partículas admodum exiles*. §. 250.

462. Quæ *motibus diversis & quodammodo circularibus* agitentur. §. 253. Nam quia se ultro citroque particulæ confines obnixè repellunt atque omnigena rerum plenitudo habetur, singulæ motum suum rectâ persequi non potuerunt. §. 299.

463. Qui varius ac circularis particularum singularum motus ostendit, illas in figuram globi paulatim conformatas, §. 303. &

atterendo politas esse, §. 310. hoc est, factas esse superficie æquabiles, figurâ admodum pulchras, si oculis cerni possent.

464. Quamvis in primo divisionis momento cunctæ globi formam assumere non potuerint. §. 302.

465. Illius per varium ac circularem, aliquantisper continuatum, motum inducæ rotunditatis exemplum videre licet in iis, quæ affabrè torno fiunt. §. 285. 418.

466. Hujusmodi verò cæli particulæ cùm assiduissimo attritu in globulos detornarentur, *iniquâ materiâ sunt rarsa*, quæ detrita huc illuc quassata est.

467. Atque ex eo majorem partem admodum tenuis & minutissima existit, §. 311. dum primò quidem angulorum acutissimæ extremitates, tum minùs acutæ, denique obtusiores & obtusissimæ attritæ fuere.

468. Et quando ne minimum vacui usquam esse potest, §. 43. ejusmodi ramenta citissimè diffluendo, angusta, quæ inter conjunctos erant globulos, intervalla è vestigio occuparunt. §. 302.

469. Ac propter insignem tenuitatem suam quaquaversus cedere paratissima cunctos inter globulorum agmen intercurrentes angulos, quos motus varietas quovis momento variat, figurâ illis accommodatâ omnino replêrunt. Ita ut hîc ejusmodi cernas materiam, cujusmodi in mundo dari supra demonstratur. §. 291. seqq.

470. Exemplo, licet rudi & ad sensus accommodato, tibi erunt globi ligno facti, si undas innatent.

471. Neque ramenta tamen eâdem fuerunt subtilitate, neque pari celeritate fluxerunt. Apparet enim quantum inter se exilitate scobes ac limaturæ differant.

472. Idcirco sæpius ramentorum aliqua minus divisâ alicubi hæserunt, vel etiam plura minùs celeriter acta facile cohæserunt.

473. Eodem namque propendet natura : ut, ecce, vapores tenuitate diversi gelu minus acri stringuntur in aquam, acriori verò in glaciem. §. 242.

474. Quoniam verò prima hæc rerum corporearum elementa (quæ ita ferè se habent ad mundum, ut literæ ad magnum librum) superior ætas simili industria investigare superfedidit, vocibus ab ea satis distincta nusquam leguntur. §. 414.

475. Quocirca nobis placet *materiam primi elementi* appellare eam, quæ conflata est ex particulis indefinitæ parvitatæ, viâ quavis figurari aptis, ocyssimè semper agitatæ.

476. Nam

476. Nam ante globulorum perfectionem tenuissima illa ramenta exstiterunt.

477. Materiam verò *secundi elementi* vocamus ipsissimos illos definitæ parvitatæ globulos celeriter propulso.

478. *Definitæ parvitatæ* globulos aio, quia ex prima divisione materiæ fabricati sunt, §. 459. seqq. integerrimâ formâ, aded ut neque adimi neque addi quicquam possit. Etenim pororum, quibus frangantur, nihil habent §. 332. seq. 350. Deinde nequaquam ex aliis particulis se prioribus, ne quidem minimis, in quas rursus naturâ dissolvi queant, coarctati fuere. Præterea affabrè rotundati sunt, aded ut ulteriorem rasuram non admittant, quia extremitate suâ asperi esse desierunt. §. 307. Sunt igitur minimorum naturalium prima. §. 409.

479. *Materia tertiæ elementi* nobis vocatur ea, quæ constat ex partibus crassioribus, angularis, moveri parum aptis.

480. Cum enim inter globulos ex pluribus ferè ramentis coagmentatis enata concipiatur, ordinem hunc finit. Nec immeritò quierit motus, angularis rotunda anteponuntur.

481. Materiam hujusmodi in Universo existere nemo post inspectam corporum terrestrium fabricam diffitebitur; quamvis in demonstratione bipartitæ prioris materiæ, quam Philosophorum vulgo ignorat, major evidentia insit.

482. Atqui elementi hujus tripartiti materiam dari, non solum extensæ per totum Universum corporeæ molis prima divisio, sed & præcipua aspectabilis mundi in partes integrantes distributio locuples testis est. §. 428. seqq.

483. Enimvero quoniam tria genera corporum valde diversa in mundo visibili reperiuntur, veluti lucida, pellucida, & lucem remittentia, non quita fuerit eorum compositio non fieri ex totidem distinctis elementis vel partibus, iisque proximis.

484. Illud, *proximis*, adjunxi, quia ex prima, §. 48. sed remota materia omnia construi non est quod ambigatur. Sic diversarum plantarum diversa semina, etiam si à Tellure, ut communi matre, progigni omnes videantur.

485. Adhæc intellectu facile est, quæ ejusmodi particulæ visum nostrum fugientes visibilia mundi corpora constituent. Quod §. 413. expositum fuit.

486. Quoniam verò Soli & Fixis naturam flammæ citra erroris

metum tribuimus, §. 444. neque in ullo corpore ac in flamma celestiori agilitate particulas experimur. §. 262. Satis id causæ est, quamobrem lucida corpora ex materia primi elementi congregata esse judicemus.

487. Unde *Ignis* nomen ei indatur, si tanta copia convenit, ut & luce & calore sensum afficiat.

488. Hoc autem statuto atque asserto, *Lucida* corpora ex primi elementi materia esse facta, consequitur, *Pellucidum* cælum è secundi elementi globulis ordinatum, particulis tamen primi elementi interfusis, §. 468. quoniam ocysimè fluenti primi elementi materiæ, velocitate diffluendi & ad fluida congregandum dispositione proxima est ea quæ dicitur elementi alterius. §. 295.

489. Relinquitur ut corpora *lumen repellentia*, veluti Cometas, Planetas, nec non etiam Terram ex tertii elementi materia crassiore atque angulata composita esse putemus.

490. Ita verò, ut particulas tertii elementi corpora terrestria atque id genus alia coacervantes non parva copia elementorum primi & alterius interfluant. §. 326. seqq.

491. Perspicuum igitur ex eo evadit, Solem esse corpus simplex atque ex materia unius generis continuum. Cælum verò ex materia duùm, ac Terram ex materia trium generum quodammodo coivisse. Cujus ordinis ratio sanè illustis est.

492. Et eandem prorsus in tribus generibus corporum, quæ aspestabilem mundum concinnant, natura servavit. Nam quæ lumen emittunt, & à quibus initium radiatio capit, meritissimè primum; quæ transmittunt, alterum; quæ verò remittunt, infimum tenent locum.

493. Tertium argumentum materiæ triplicis elementi à figurarum contemplatione, quam tradidit generalis Physica, tractum est. §. 290. 294. 304.

494. Potest enim esse particula mundanæ materiæ formâ aut omnigenâ (materiæ primi elementi indice) aut non. Si non ita est, certum habet figuræ genus. Atque ea est aut angulis prædita aut iis destituta. Si destituta, erit spherica, quæ materiam secundi elementi facit. Sin angulis incisa est, ad materiam tertii elementi pertinet. Nec unquam fiet ut quartum superaddatur, aut tribus hisce unum derogetur.

495. Et, si Universi perfectio ac plenitudo aliquam partem in rebus

rebus omnium generum sita est, §. 398. seqq. utique in primis rerum principiis varietas hujusmodi figurarum considerari digna est.

496. Quarto argumento triplicis elementi materiæ nobis illud est: Unum ex illis admissum cætera duo sequuntur.

497. Nam si spectentur dum fiunt, constat ex ante dictis, neque elementi primi materiam absque materia secundi, neque illam elementi tertii absque utraque præcedente nasci potuisse.

498. Si spectentur *postquam facta sunt*, manifestum etiam est, neque globosas mundi particulas, neque angulosas ulla absque iis, quæ modis quibuslibet inflectuntur & figurantur, posse exister.

499. Tum, qui lucidis corporibus assignavit elementi primi materiam, uti par est, non potest non cælo perspicuo secundi, & opacis tertii elementi materiam assignare.

500. Quintum argumentum est, quod is qui unam agnoscit ex tribus illis proprietatibus, quas cuique elemento attribuimus, cogatur etiam duas agnoscere reliquas: v. g. quia elementi primi materia *quaslibet potest recipere figuras*, ad minutissimos ubique angulos quovis momento omnino replendos, necessum quoque est ut *moveatur celeritate*, atque *in infinitum dividatur*. Si tertium elementum *angulosas habet figuras*, *tardius movebitur*. §. 305.

501. Tantis omnium & singulorum concentus, numerusque & ordo tam pulcher & immutabilis locum in figmentis habere nequit, sed in iis duntaxat, quæ revera fundamentum habent in natura. §. 16. 20. 419.

502. Quæ consideratio attentior non modò cuncta præcedentia roborat, sed etiam sextum nobis parit argumentum: nimirum, quod ad elementa, quæ posuimus, enumeranda, distinguenda, ordinanda non sit opus ulla alias comminisci formas præter illas ipsas, quarum capacem esse materiam extensam, & unde omnem corporum oriri varietatem jam in principio docuimus. §. 59. seqq.

503. Nec sanè formas ejusmodi in rebus dari, & singulari naturâ affinitate inter se & cum materia devinciri, ullus unquam in dubium revocavit.

504. Septima, & ipsa quidem longè validissima, trium elementorum demonstratio à posteriori spectanda & expectanda est in sequentibus, ubi admiranda naturæ opera & arcana plurima nulli olim philosophorum, cujus quidem ad nos scripta devenerint, perspecta, è superioribus principiis ordine deduci perspicuè deprehendimus.

505. Hoc igitur agamus sedulò, & *quomodo* ex tribus, quæ statuimus, elementis, vasta mundi corpora fiant (nam *quod* indè facta, jam in antecessum docere instituimus §. 483.) quasnam indè *proprietates* nanciscantur, paulatim & quasi per gradus contemplemur, ordientes à cœlo, quo nihil in Universo patet latiùs. Ac sicuti volumen ingens evolventes (respice antiquum volvendi morem) initium faciunt ab exteriori, quod reliqua ambit, folio: ita nos in magno mundi libro explicando rectè incipimus à Cœlo, quod ambit omnia. Simili ordine jam supra ab exteriori corporum figura ad interiorum pororum progrediebamur. §. 306. 314.

XIV. *Cælum & Sol. Lux in utroque.*

506. **C**OElum, siquidem in orbem agitur, §. 452. à centro sui motus, quantum in ipso est, per lineas rectas abire nititur. §. 157.

507. Haut secus ac lapis in funda rotatus, versus omnes partes recedere conatur à manu, quæ in centro illius circuli est. §. 158.

508. Neque enim hoc *gravibus* corporibus peculiare esse, sed omnibus in orbem actis commune, patet ex §. 159. Nec potest esse à *duritie*, cum ea non in motu, sed quiete consistat. §. 238. Et si moveantur dura, non apparet, quomodo vi duritiei magis ad rectum, quàm ad obliquum motum impellantur.

509. Denique, si quid eò faciat durities, *stabilitas & consistentia*, quæ vel maximè est in globulis cœlestibus, §. 478. eo nomine intelligenda erit, quam ad sensum tactus referri nihil attinet. §. 251.

510. Quapropter non tantum omnes globuli cœlestes à medio Cœli versus exteriora recedere conantur; sed inferiores etiam necessariò premunt superiores, cum ob soliditatem summam alii ab aliis comminui vel à superficie sphærica introrsum cogendo deflecti nequeant.

511. Igitur in punctis mutuo se tangunt omnes, adeò ut pressis centro proximis simul premantur illi qui in peripheria.

512. Non aliter ac baculi, ejus etiam qui à summo cœlo ad terram usque porrigeretur, extremitas altera dum premitur, cõpse momento pressio est & sentitur in extremitate altera. §. 196.

513. *Pressionem* ejusmodi dico momento propagari, utpote quæ non tam est motus, qui omnis successivus, §. 116. quàm prima ad motum præparatio.

514. Quem-

§ 14. Quemadmodum verò incitatio illa lapidis in funda vel baculi impulsus sensum tactus afficit, cum crassa illa sint ac dura corpora, sicuti sensus ipse crassus :

§ 15. Ita globulorum cœlestium secundum lineas rectas pressio, si tam fortis sit, ut aliquem sensum afficiat, cum valde subtilem pro subiecto materiam habeat, non nisi visum, sensuum omnium subtilissimum, afficere poterit.

§ 16. Nec alias præter visum sensus à cœlestibus aut prius aut sæpius moveri deprehenditur.

§ 17. Movetur enim quotidie, nec aliter quam luminis interventu.

§ 18. *Luminis primaria proprietates*, ex quibus dependent reliquæ, sunt istæ tres :

§ 19. Quod 1. à sole in omnes partes æqualiter diffunditur.

§ 20. Quod 2. minimo temporis momento ad quamlibet distantiam extenditur.

§ 21. Et quidem 3. secundum lineas rectas, quæ radii nuncupantur.

§ 22. Quæ omnes cum non nisi per conatum illum recedendi a centro seu *pressionem globulorum cœlestium* intelligibili ratione explicari possint, Luminis per totum Universum propagationem in ea sola consistere nulli dubitamus.

§ 23. Sic minimè opus ad luminis naturam demonstrandam vel materiæ alicujus à sole effluxum atque inde ad nos descensum excogitare, quippe qui universalis & perpetuus, momentaneus & rectilineus esse non posset; vel aliud quidvis comminisci.

§ 24. Et pater è dictis, quomodo lumen non modò per totum cœlum, verum etiam per aquam, glaciem, vitrum & alia corpora, quorum pori sine interruptione recti à globulis cœlestibus occupantur, sine mora & offensione omni diffundatur. Hinc spongia licet millecuplo latiores poros habeat quam vitrum, pellucida tamen non est.

§ 25. Atque ea, quæ diximus, omnia ita in cœlo se habere cognoscimus, dum vel solum cœlestis materiæ à medio recedendi *conatum* attendimus.

§ 26. Num verò conatus ille *effectum* suum in cœlo sortitus unquam fuerit (ut eum sortitur in lapide ex funda egrediente, §. 161.) quærete licet.

§ 27. Resp.

527. Resp. Materiam cœli non potuisse non reapse à centro aliquando & aliquò usque recedere :

528. Quia globuli, ex quibus cœlum constat, §. 488. assidua gyratione, donec omnino Sphærici essent, magis magisque attriti, §. 463. propius ad invicem accessere.

529. Unde quantitas materiæ primi elementi ex ista abrasione ortæ, §. 466. major in universo existit, quàm ad spatiola inter globulos interjacentia implenda §. 468. requirebatur.

530. Quæ materia residua necessariò ad centrum vorticis §. 454. confluit.

531. Quoniam secundi elementi particulæ, quippe *maiores*, §. 477. seq. majorem indè recedendi vim habuerunt. §. 213. 231.

532. Et primi elementi minutæ, utpote *mobiles* & semper fluidæ, §. 410. faciliùs aliis istis, quæ singulæ stabiles & solidæ, §. 509. locum cesserunt. Conf. §. 469.

533. Nempe locus, quem crassiora corpora deserunt, à sublimioribus illico occupari solet, ut apud nos patet in Aëre.

534. Et similia sic in centro congregata facile in eisdem motus consensere, abeuntibus indè dissimilibus. §. 222.

535. Jam si per materiam illam, quæ ad centrum vorticis ita confluit, corpus solare intelligamus (nam aliud quàm Lucidum intelligere nullum possumus. §. 486.)

536. Quomodo *Sol in medio Cœlo* productus sit, nec alibi existere potuerit, cognoscemus.

537. Qui locus respectu totius vorticis revera *infimus* est. Unde superiores Cœli partes dicuntur quæ à Sole remotiores, inferiores quæ ei propinquiore.

538. Cognoscemus etiam, quomodo propter æqualem vorticis à centro ex omni parte recessum, *Sol totus sphericus* evaserit, §. 288. 301. nec aliam assumere figuram potuerit.

539. Discemus insuper, quomodo *Sol visibilis flamma* extiterit, licet materiæ solaris particulæ singulæ seorsum volitantes obrutum effugiant. §. 413.

540. Intelligemus denique, quomodo ad centrum initio confluens illa materia solaris vorticis *circularem motum* §. 432. secuta fuerit & non potuerit non sequi.

541. Atque hunc motum, quo turbinis instar in medio semper gyrat, Sol jam perfectus retinet, ex lege naturæ prima. §. 152.

542. Ita

542. Ita conatus recedendi à centro in materia cœlesti *lumen* produxit, quatenus ejus subiectum sunt globuli : sed actualis à centro recessus produxit ipsum *luminare*, quatenus est materia primi elementi magnâ copiâ in medio congregata.

543. Aded ut hac philosophandi methodo priùs luminis, quàm luminaris ortum animo concipiamus.

544. Cumque Sol, non minùs quàm vortex ambiens, à centro sui motus recedere nitatur. §. 506. seqq.

545. Undique premit, §. 510. circumjacentes sibi que mutud incumbentes Cœli globulos.

546. Multumque intendit istâ ratione vim illam, in qua lucem consistere diximus, §. 522. quia pressio pressioni additur. §. 221.

547. Imò nisi hæc Solis vis efficax accedat, cœlestis materia pressio non videtur sufficere ad oculos nostros afficiendos.

548. Aded ut Cœlum per se spectatum luminosum quidem sit absolutè, §. 430. at non ad sensum (est enim invisibile) nisi virtute Solis accedente.

549. Sicuti bacillus exiguus, duriori manui altera extremitate insistens, vi gravitatis quidem deorsum fertur, sed ita ut impulsus vix sentiat. At pressio satis fortis percipietur, si altera extremitas ab alia insuper vi prematur.

550. Propensio verò ad motum seu pressio, quam diximus, in Luminari ipso seu principio & fonte, hoc est, in materia primi elementi spectata, propriè vocatur *Lux*. At quatenus consideratur in progressu, nempe in Cœlo seu materia secundi elementi, distinctius loquentibus appellatur *Lumen* : quamvis hæc nomina persæpe confundantur.

XV. Cœli & Fixæ. Illorum numerus, figura, motus, situs & ordo.

551. **A**T inquis, si 1 Sol totus in medio Cœlo gyrans à centro sui motus recedere conatur, idemque 2 facit materia totius vorticis sive Cœli, præterea 3 Sol premit materiam vorticis circumpositam, denique 4 globuli inferiores premunt superiores à centro ad peripheriam usque :

552. Cur non avolat à centro Sol ac cœlestis omnis materia, §. 161. quid modum aut terminum vortici extrorsum tendenti ponit?

F

553. Resp.

553. Resp. Ut lapis impeditur à funda ne exeat : ita Sol à globulis circumpositis, inferiores globuli à superioribus, & ultimi tandem à vorticibus contiguis stellarum fixarum contraria pressione renitentibus, §. 281. intra certos limites cohibentur.

554. Atque ita à singulari Cœli & Solis contemplatione ad pluralem Cœlorum & stellarum numerum pervenimus. Conf. §. 361.

555. Nisi enim tot vortices statuamus, quot in Cœlo stellæ fixæ existunt, lux earum explicari nequit. §. 522.

556. Cumque similitum similis ratio sit, §. 418. Solis & Fixarum convenientiam etiam in hoc capite licet agnoscere. §. 443.

557. Dato autem proprio unicuique stellæ fixæ vortice, non modo 1, admirabiles *luxu proprietates*, §. 518. seqq. ex Physicæ generalis principiis deteguntur : animadverso, quod pressio vel propensio ad motum iisdem legibus obnoxia sit, quibus motus.

558. Et 2, fixarum *situs* & perpetuò æqualis à se invicem *distancia*. §. 448.

559. Omniumque 3 *figura prorsus spherica*, §. 538. explicantur ;

560. Verùm etiam 4 demonstratur, *Cœlos non esse perfectè sphaericos*, quia propter amplitudinem sui ambitus magna spatia triangularia inter se relinquerent, §. 302. materiâ primi vel tertii elementi, id est, corporibus lucidis aut opacis, replenda.

561. Atqui ejusmodi corpora inter Cœlos interjacentia nec ullo sensu percipimus, nec quomodo eò pervenire, aut ibi morari possint, ratione cognoscimus. §. 16.

562. Ulteriùs demonstratur 5 *Cœlos esse fluidos*, §. 449. 451. vel in illis ubique esse aliquid subtile, quod à stellæ cujusque corpore usque ad oculos nostros actu continuo & nusquam interrupto, §. 182. ad motum incitetur.

563. Demonstratur 6 *Cœlos moveri in orbem* (quod hætenus pro hypothesi solum habuimus, §. 452.) quia versus exteriora semper tendentes, alique in alios impingentes rectum motum in circularem vertere coguntur. §. 299.

564. Demonstratur 7 illos *Cœlorum motus esse sempiternos*, §. 152. quia dum circa proprium axem singuli moventur in orbem, non occurrunt corporibus quiescentibus aut tardius motis, quibus motum communicando moveri desinant, §. 175. 202. Determinationem verò motuum quod attinet, eam sic temperatam esse, ut vortices se invicem non facile destruant, postea videbimus.

565. De-

565. Demonstratur 8 etiam *stellarum motus & circulares esse & perpetuos*, quia consentiente cum Cælo ambiente determinatione *actæ* tantum abest ut in motu suo impediatur, ut potius in eo conserventur ab eodem Cælo, §. 540. seq.

566. Demonstratur 9 eo loco quodque *Cælum terminari & à vicinis seu contiguis distingui, ubi vires*, quibus vortices se invicem per lineas rectas premunt, §. 553. *in æquilibrio consistunt.*

567. Vis enim illa reciproca pressionis non tota deletur nisi in centro cujusque vorticis, ubi propter sideris lucidi prævalentem omnino nixum, §. 544. seqq. renixus aliorum vorticum evanescit, §. 230.

568. Unde sequitur tantò minus oculum videre posse stellas fixas, quantò Soli propinquior exstiterit, quoniam vires illarum eò magis languescunt ac debilitantur, quò Soli vicinior locus fuerit.

569. Et facile quoque è dictis intelligitur, cur interdum stellas fixas non conspiciamus (licet æquè tunc ac nocte in Cælo existant) quia Solis radii ad terram venientes atque inde reflexi majorem vim habent fixarum radiis obnitendi, quàm ut hi oculos nostros afficere possint, §. 230. Atque hoc est quod aiunt: *lumen majus offuscat minus.*

570. Quæ causa cùm cesset ubi oculi nostri tenebris undiquaque circumfusi sunt, apertum est, cur non solùm nocturno tempore, verùm etiam diurno, in profundo ac tenebricoso puteo existentes (quod sereno die, non tamen ipso meridie experiri licet) stellas conspiciamus.

571. Sed cùm Cælum unumquodque habeat *polos* suos, circa quos in orbem agitur, habeat etiam loca à polis remota, remotiora & remotissima, ubi *ecliptica* (quæ omnia in globo monstrare licet) quaeritur, quibus partibus se mutuo contingant Cælorum vortices.

572. Resp. Eorum circulares motus ita attemperatos esse debere, ut maneant quidem distincti vortices: id quod stellarum distinctio postulat. §. 555.

573. Nec tamen nimium sibi adversentur, ob determinationis contrarietatem, §. 203. sed potius occursum mutuo se quàm minimum in motu suo impédiant.

574. Utrumque ad mundanæ fabricæ constantiam & perfectionem facit, §. 389. Haut secus ac in republica distincta quidem civium officia esse convenit, sic tamen ne uno evertatur alterum.

575. Itaque vortices sic inter se dispositos esse convenit, ut polus unius non tangat polum alterius, sed locum aliquem à polis remotum,

576. Nam si duorum vorticum poli se mutuò tangerent, vel ambo in easdem partes fererentur, consentiente motuum determinatione.

577. Atque ita (cùm non dura, sed fluida corpora sint, §. 562. nec fluida diversæ, sed ejusdem naturæ, §. 534.) in unum vorticem coalescent ex §. 222.

578. Vel in contrarias partes fererentur, dissentiente motuum determinatione. §. 203.

579. Quæ ratione sibi mutuò quàm maximè repugnabunt, ita ut eorum motus perpetuari nequeant. §. 564.

XVI. *Motus materia primi & secundi elementi stellarum alimentum.*

580. **H**Actenus vidimus de conatu & motu non modò Cælorum, quatenus ex materia secundi elementi constant, verùm etiam Solis & Fixarum, quæ ex elemento primo.

581. Restat ut distinctiùs attendamus, quomodo *materia primi elementi* extra sidera lucida inter globulos secundi elementi agitetur.

582. Nam in Solis quidem aut Fixæ corpore *coacervata multum* habet virium, §. 213. propter consensum suarum omnium partium in eisdem celerissimos motus, §. 222. quibus *protrudit globulos* circumjacentes. §. 545.

583. At extra sidera inter globulos vis ejus *divisa debilis* adedò est, §. 539. ut singulæ ejus minutie à vicinis *globulis truantur* huc illuc, eorumque variis motibus obsequi cogantur.

584. Ibi ergo hæc materia habet 1 *motum proprium varium*, in minutiarum suarum figuris assiduè mutandis ad omnes quos transit angulos prorsus implendos. §. 469.

585. Habet 2 *motum circularem* toti vortici *communem*, §. 187. qui *progressivus*, §. 257. qualis est corporum, quæ in poris aliorum continentur & ab iis deferuntur. §. 347.

586. Habet 3 *motum rectum itidem proprium*, dum per vorticis circularem motum versus partes à polis remotas (ubi major vis, §. 214.) magnâ copiâ expellitur, ita ut conatus recedendi à centro, qui est in illis particulis cum vortice in gyrum ductis, effectum sortiatur. §. 161.

587. Ob-

587. Obtendes, cum unius rei unus tantum sit motus proprius, §. 186. non posse materiam primi elementi duplici motu proprio ferri, præsertim vario simul & recto. §. 584. 586.

588. Resp. Motum illius materiæ proprium unum quidem & eundem esse, à centro nimirum ad peripheriam, per lineam rectam: in quo tamen progressu vel egressu variis modis figuratur. Simile esset, si hinc rectà ad parietem per canalem alibi latiore, alibi angustiore, alibi quadratum, alibi rotundum, alibi triangularem liquor aliquis currat.

589. Nempe figurarum illa mutatio in materia primi elementi pendet à globulis, inter quos versatur; at rectus ejus progressus à Sole expellente procedit. §. 189.

590. Adhæc eodem impetu, quo materia primi elementi per eclipticam unius vorticis egreditur, eadem per contigui vorticis possum, §. 576. in illum ingreditur (cum in polis minor sit resistentia) & quidem per interstitia globulorum rectà pergens ad ejus centrum, ex §. 172.

591. Ad centrum verò appellens miscetur illa cum materia sideris lucidi, §. 582. ut flamma flammæ, flumen jungitur flumini.

592. Quod proinde sidus non magis *unum idemque* manet, quàm Oceanus, in quem alia continuò aqua ingreditur, dum alia ex eo egreditur.

593. Unde palam est, quodnam Solis aliorumque Ignium cælestium sit alimentum: de quo scrupulum plurimi movent ex illo principio: quod *omnis ignis requirat pabulum*.

594. Est nimirum hoc alimentum ipsissima primi elementi materia in locum similis abeuntis ad sidus continuò accedens.

595. Hoc sidera per vortices ultro citroque sibi mittunt, §. 396. dando quod per eclipticam egreditur, & recipiendo quod per polos ingreditur.

596. Et quis neget simile substitutione similis facillimè reparari? Rhenus noster ita semper idem esse judicatur; imò motus in toto mundo sic eadem semper quantitas. §. 140.

597. Oppones, non posse materiam primi elementi per vorticis polos ingrediendo à peripheria ad centrum currere, cum tota Siderum & Cæli materia determinatione contrariâ perpetuò tendat à centro ad peripheriam.

598. Resp. Possè facile materiam primi elementi per angustissimam

ma globulorum intervalla introrsum ire, dum globuli extrorsum feruntur, secundum ea quæ habuimus §. 346.

599. Tandem de *globulis* ipsis observa, quod sideri propinquiores circulum suum celerius absolvant, quàm remotiores, usque ad certum terminum.

600. Cum sidus medium celerrimè semper agitaturn Cœli partem sibi vicinam aliquò usque secum rapiat. §. 166.

601. Et hi ipsi celeriores etiam sunt minores aliis. Majores enim si essent, plus virium haberent à centro recedendi. §. 531.

602. Æquales autem cuncti globuli esse nequeant, propter inæqualitatem & spatiorum, quæ percurrunt, & motus, inde ortam. §. 135. 293.

603. Uti nec ipsos fixarum globos nec Cœlorum vortices magnitudine æquales omnes esse credimus. §. 114.

604. Quamvis non eamus inficias, vulgarem divisionem fixarum in stellas primæ, secundæ, tertiæ, quartæ, quintæ & sextæ magnitudinis à sensuum tantum apparentia desumptam esse.

XVII. *Solis & Fixarum macula. Stella nova.*

605. **Q**uemadmodum verò globuli secundi elementi: ita quoque primi elementi particulæ subtilitate ac celeritate differunt. §. 471. seqq.

606. Nam quæ in generatione globulorum tum in principio, cum à perfecta rotunditate multum distabant, tum in fine, quando ferè perfecti erant, tum intermedio tempore, §. 115. abraſæ sunt, omnes æquè atteri ac dividi non potuerunt.

607. Nec situs ac motus globulorum majorum ac minorum perpetuò varians ejusmodi æqualitatem permisit.

608. Potuerunt igitur aliquæ primi elementi particulæ inter tres globulos se mutuò contingentes indivisæ manere; vel etiam, si dividi cœpissent, spatiorum quæ transeunt lateribus compressæ & conclusæ rursus conjungi (uti pollinis aut scobis particulas compressas coherere cernimus. §. 243.)

609. Quæ licèt propter figuras angulosas & molem suam tantæ agitationis capaces non sint, §. 218. 305. ut motum illum *varium* recipiant, de quo §. 584.

610. Suffi-

610. Sufficiunt tamen ad motum *rectum* à polis, in quibus est minor motus, versus medium Cœli. §. 586. 590.

611. Has particulas, quamdiu inter globulos secundi elementi versantur, materiæ primi elementi annumeramus.

612. Quoniam ibi necdum proprium & novum earum effectum crassiores massas componendi, §. 472. sed communem duntaxat & primum spatia globulorum triangularia replendi, §. 468. animadvertimus.

613. Et, si tot nomina rebus imponere vellemus, quot in iis varietates dantur, ut sanè in hac materia primi elementi dantur innumeræ, nominandi finis aut modus esset nullus. Confer §. 117. seqq.

614. Sed quando ad corpus sideris accedunt crassiores ac tardiores istæ particule, quia non possunt cum reliqua subtiliore ac celeriore elementi primi materia in similes motus consentire. §. 582.

615. Illæ ab his separantur, quemadmodum spuma ab effervescente liquore, §. 222. ac tum, ob novum prorsus effectum, peculiare tertiæ elementi nomen adipiscuntur, §. 479.

616. Nam ob majorem quantitatem, tardiozem motum figuras denique angulosas faciliè sibi mutuò adhaerentes, §. 242. 305. moles ibi permagnas aliquando componunt.

617. Quæ intimæ Cœli superficiiei contiguæ, Sideri ex quo emerferunt adjunguntur, & in superficie quidem *Solis macula* appellantur. §. 455.

618. Quoniam resistunt pressioni luminis, §. 545. instar nubis aut fumi lucem & ignem obtenebrantis, vel etiam instar spumæ, quæ superficiem liquoris tegere & obumbrare solet.

619. *Permagnas* dico *moles*, utpote quæ latiorez etiam, quàm rota Germania est, circa Solem aut Fixas, §. 439. seq. tractum occupare possunt: quoniam ingentium ejusmodi corporum effluvia minimè parva cogitanda.

620. Quamvis autem ingentes aded sint maculæ, potest tamen à tenui orta principio tanta moles subito congregari, ac subito iterum dissolvi, exemplo nubium. 1 Reg. 18. fin.

621. Quemadmodum enim nubes & fumi aliquando à ventis dissipantur, & spuma à liquore diutius ebulliendo resorbetur & absorbitur: ita maculæ interdum partim attenuatæ refunduntur in Solem, partim per Cœlum vicinum disperguntur. Confer §. 126.

622. Hæ posteriores dissolutarum macularum particule, si crassiores

fiores fuerint quàm ut per angustos, qui sunt inter globulos, meatus transire possint, ipsa etiam globulorum loca subingrediuntur.

623. Et propter figuras suas valde irregulares & ramosas tardiùs motæ sibi mutuò nonnihil quidem adhærent, nec ullo tamen modo se premunt.

624. Quâ ratione molem quandam rarissimam circa Solem & Stellâ componunt, aëri nostro haut absimilem, quæ dicitur *Atmosphæra*.

625. E contrario sicuti nubes quandoque coguntur in pluviam, nivem vel glaciem, & fumus in fuliginem concrevit: ita maculæ nonnunquam condensantur & indurantur.

626. Nam cùm initio mollissimæ sint & rarissimæ, §. 270. (quippe ex ramentis primi elementi compositæ, quorum sibi mutuò adhærentium subtilissimæ extremitates quasi ramulos quosdam faciunt.)

627. Facile frangunt impetum plurium aliorum ejusdem primi elementi ramentorum, quæ deinceps in ipsas impingunt, & illa sibi adjungunt, exemplo eorum, quæ celeriter mota in lanam incidunt. §. 206. seqq.

628. Quæ materia recens adveniens poros earum occupat. §. 313.

629. Quos ipse etiam Sol perpetuò versùs exteriora tendens, §. 544. premendo angustiores facit: §. 319. Simili modo, quo nix condensatur & induratur pressione.

630. Unde maculæ, prout magis minusve densatæ & induratæ, vel etiam multiplicatæ aliæque aliis superinductæ sunt, possunt totum aliquod sidus obtegere,

631. Adeò ut vel minus appareat, §. 618.

632. Vel prorsus etiam disparcat. §. 547.

633. Rursus apparere subitò potest sidus antea non visum (quod *novam stellam* tunc appellant.)

634. Si vortex maculam ambiens vortices vicinos, fortiùs premendo, quàm ab iis prematur, fines suos latiùs extendat. §. 230.

635. Ita ut materia primi elementi solito copiosius ad sidus obscuratum affluens, §. 590.

636. Supra maculam, quâ regitur, se diffundat. §. 529. seqq.

637. Ut aqua se diffundit supra glaciem, quoties majore copiâ affluens infra eam contineri nequit.

638. Jam si crassior ista sit macula, quàm ut à materia primi elementi

elementi circumfluyente dissolvi queat, exterior ejus superficies densabitur & perpolietur, §. 310. ferè quemadmodum interior, §. 629.

639. Atque interim si prævaleant vicini vortices, §. 634. stella nova paulatim iterum disparebit.

640. Ita per vices eadem stella potest apparere ac disparere.

641. Talis enim *alternatio* naturæ valde familiaris est in iis quæ moventur, ut patet in libra, campana, vase liquorem continente ubi semel concussus fuit.

642. Sidus autem maculis omnino involutum cum nil juvet pressione, qua vortices determinantur, §. 566.

643. Contingere potest, ut à potentiore vortice, cujus sidus maculis non est obrutum,

644. Vortex macularum interventu debilitatus atque imminutus absorbeatur,

645. Præsertim is, cujus situs est minus conveniens. §. 578. seqq.

646. Quod in principio rerum, in mundo constituendo magis, quam nunc, in mundo constituto, evenire potuit.

647. Atque dum vortex alius ab alio sic destruitur, destructi sidus pariter cum ipso abripitur. §. 283.

648. Quod ea ratione degenerat in Planetam vel Cometam, (prout motum vorticis, à quo semel abreptum est, aut perpetuo sequitur, aut non, §. 284.) à primo corporum genere ad ultimum destrusum. §. 429. seqq.

649. Id est, cum antea fluidum & lucidum corpus fuerit, nunc durum est & opacum, ex plurium congerie macularum compositum. §. 630.

650. Nimirum, ut origo materiæ tertii elementi arcessitur è materia primi, §. 615. ita corpora tertiæ classis ex corporibus classis primæ, mutatione quam diximus interveniente, fieri cogitantur. Confer §. 492.

XVIII. *Cometa. Fixarum scintillatio.*

651. **C**ometa vocatur opacus iste globus, si adeò *solidus*, id est, magnus simul & compactus atque agitatus sit, ut ex alio vortice in alium transeat.

652. Sic navis major & validius mota, in aquæ vorticem incidens,

dens, solet quidem ejus motum aliquò usque sequi; sed antequam gyrum integrum fecerit, ex eo evadit.

653. Nempe Cometa initio quidem non potest non quodammodo sequi motum vorticis, à quo abripitur, §. 283.

654. Sed quia plus agitationis habet, mox indè abit. §. 230.

655. Ut navis fortiter impulsà motum quidem fluvii aliquò usque sequitur, attamen indè ad ripam evadit. §. 284.

656. Itaque Cometa modò hanc, modò illam Cœli regionem,

657. Ac sæpius ne mediam quidem Cœli partem percurrit,

658. Dum à centro remotior in extremitate ejus vagatur.

659. Et intra paucos menses vel dies à conspectu nostro ad alios Cœlos abit.

660. Ex quibus vel propter nimiam distantiam radios alienos, §. 450. ad nos reflectere nequit.

661. (Licet Fixæ stellæ propriâ luce fulgentes continuatâ vorticum pressione nos illuminare possint, §. 567.)

662. Vel etiam, quia partem illustratam sideri vorticis, in quo versatur, obvertit, (Confer §. 445.)

663. Non possunt indè radii Cometæ, utpote per corpus lucidi sideris, ad nos transmitti.

664. Quod enim suâ lucè radiat sidus, alièno lumine pellucidum esse nequit. §. 429. seqq.

665. Præterea *comam* vel *caudam* (unde nomen accepit) Cometa in parte à Sole magis averfa nobis exhibet,

666. Quam si in omnes partes dispergere videatur, Cometa indè *Rosa* dicitur.

667. Causa hujus phænomeni ex eo petitur, quod globuli cælestes, per quos radii transmittuntur, non æquales ubique sunt. §. 601. seqq.

668. Sed à certo quodam termino minuuntur usque ad Solem.

669. Nam indè sequitur, radios luminis, qui per majores globulos communicantur, cum ad minores deveniunt,

670. Non modò secundum lineas rectas progredi,

671. Quibus, utpote præcipuis, corpus seu caput Cometæ appareret;

672. Verùm etiam ex parte ad latera refringi ac dispergi,

673. Quibus ut secundariis radiis, crines Cometæ exhibentur,

aut

aut in omnes partes aut in unam tantum prætensi, prout radii aut perpendiculariter aut obliquè incidunt.

674. Ita si lapis ad perpendiculum incidat in aquam, illa undique æquabiliter dispergitur; sin obliquè incidat, contrà fit. §. 220.

675. Eadem refractionis ratio potest quoque causa esse cur *Fixæ scintillant.*

676. Quæ tamen scintillatio etiam à vaporum & halituum in aëre motu proficisci queat.

677. Simili namque modo lapilli in fundo quiescentes, ob rapidum superfluentis aquæ motum, tremere videntur.

678. Ex dictis constat, quomodo Cometæ differant à novis illis stellis, quæ cum in centro peculiaris vorticis adhuc versentur, fixarum loco necdum derubata sunt. §. 633.

679. Constat insuper, quomodo Luna privari lumine, stellæ de Cælo cadere seu in alium vorticem incidere, Cælorum virtutes, quibus se invicem premunt, commoveri possint. Matth. 24. 29.

680. Nempe si contingat, Solem, eâ quâ dictum est ratione, obscurari & in Cometam verti.

XIX. Planetarum ortus, situs, motus.

681. **P**lanetæ differunt à Cometis, quòd, cum sint minus solidi, in Solis vortice semper manent. Confer §. 651. seqq.

682. Quemadmodum parvæ vel minùs agitatæ naves facile detinentur in vortice aquæ vel fluvio, in quem semel inciderunt: ita ut cursum ejus perpetuò sequantur. §. 283.

683. Cogitare enim licet, tot vortices debiliores à fortiore Solis vortice in principio rerum paulatim abreptos. §. 643. seqq.

684. Quot nunc in Solis vortice Planetæ reperiuntur.

685. Et prout major minorve horum Planetarum est soliditas,

686. Ita magis aut minùs à Sole remotos fuisse.

687. Nempe *Saturnus* indè est remotissimus, qui si paulò plus agitationis & soliditatis habuisset, Cometa evasisset.

688. Sequitur *Jupiter* cum quatuor Planetis secundariis, quos versus eum delapsos judicamus, antequam à Solis vortice absorberetur is, qui Jovem in medio continebat.

689. Vicinior Soli *Mars* est, qui licet minor Terrâ, solidior tamen

tamen eâ esse potest, ob conjunctionem partium suarum arctiorem.

690. Adhuc vicinior Soli & peculiari vortice cincta *Terra* est,

691. Circa quam spatio mensis deferretur *Luna*.

692. Luna quippe versus Terram, ut Jovis Planetæ circa Jovem, confluisse videtur, priusquam hæc circa Jovem deferretur.

693. Propior, quàm Terra vel Luna, Soli est *Venus*.

694. Sed proximus illi est *Mercurius*.

695. Hic si inter Solem & Venerem interponatur, Venus eclipsin patitur.

696. Planetæ inferiores non modò citiùs periodum suam absol-
vunt,

697. Ob viæ centro propinquioris brevitate;

698. Sed motu quoque magis concitato moventur,

699. Quia Sol celerrimè gyrando vicina secum abripit. §. 600.

700. Ita Mercurius tribus, Venus octo mensibus, Terra cum Luna uno anno, Mars biennio, Jupiter duodecim, Saturnus tri-
ginta circiter annis, materiâ Cæli omnes deferente, Solem cir-
cumeunt.

701. Sic verò Solem circumeundo non in eodem semper plano
versantur; sed modò ascendunt, modò descendunt, ut globi lignei
in fluvio natantes.

702. Quæ vocatur aberratio in latitudinem.

703. Item à Sole aut longiùs recedunt, aut propiùs ad eum ac-
cedunt, sive Aphelia & Perihelia sua habent.

704. Quæ nominatur aberratio in longitudinem.

705. Hi Planetarum errores, unde *Stella errantes* dicuntur, §. 447.
à variis causis pendent.

706. Nam quia Cælum non est omnino sphæricum, §. 560. ne-
cessum est, ut materia Planetam deferens in spatio latiore fluat lentius,
in angustiore celerius. §. 135.

707. Adeo ut ibi longiùs, hîc minùs longè Planeta excurrat.
§. 703.

708. Adhæc materia primi elementi è vicinis Cælis versus no-
strum fluendo, & hinc ad alios refluendo, §. 590. globulos secun-
di elementi & Planetam inter ipsos libratum diversis modis potest
commovere:

709. Quemadmodum ventus & aquam fluminis variis modis
im.

impellit, & navem secundo flumine descendentem in transversum agit.

710. Eadem primi elementi materia, tum subtilior, tum minus subtilis, §. 608. seqq. quatenus per meatus Planetæ currit, §. 490. Versus has potius quam illas Cœli partes Planetam dirigit.

711. Sicuti ventus navem huc potius quam illuc flectit, prout velorum poros vel alia etiam navis foramina magis aut minus penetrat.

712. Præterea observandum, posse motum in prima mundi origine Planetæ impressum, etiamnum in eo perseverare. §. 152.

713. Uti turbo semel à puero intortus per aliquot horæ minuta sæpissime gyrando motum continuat, quamvis & aër circumjacens & terra, cui insistit, ejus motui adversentur. §. 173.

714. Nam brevius est tempus 6000 annorum, si cum Planetæ alicujus magnitudine comparetur, quam horæ minutum, cum exigui turbinis mole collatum. §. 213.

715. Adde denique, quòd vis ita perseverandi in suo motu sit firmior & constantior in Planeta, quam in materia cælesti ambiente: quandoquidem ejus globuli, corpus fluidum constituentes, non ita in eundem motum simul conspirant, ut faciant particulæ tertii elementi, Planetam, qui corpus durum est, componentes, §. 256. fine.

716. Ideo mutationibus, quæ accidunt motui globulorum cælestium, §. 173. minùs obnoxius est Planeta, præsertim si magnus & solidus fuerit. §. 651.

XX. *Sol, Luna, Terra specialius considerata.*

717. **I**nter corpora lucida & opaca, de quibus egimus, magis ad nos spectant Sol & Luna (quæ Luminaria magna Genes. 1. 16.) maximè verò Terra, quam nobis inhabitandam Creator dedit.

718. Quamobrem operæ precium erit ut examinemus, quænam in tribus hisce corporibus, ob modò demonstratam situm in Planetis variationem, mutatio contingat.

719. Nempe quoties inter Solem & Terram opacum Lunæ corpus interponitur, existit *eclipsis Solis* quæ vocatur;

720. Veriùs autem eclipsis seu defectus luminis in Terra dicere-tur: quia Sol propter illam Lunæ interpositionem luce sua non

privatur, licet ad nos terricolas directè radios suos tunc projicere nequeat.

721. Sin Terra inter Solem & Lunam interjacent, *eclipsis Lune* oritur. Nam Luna in umbram Terræ incidens lumine, quod à Sole accipit, privatur.

722. Quamcunque Terræ partem Sol incipit illuminare, in ea dicitur *oriri*:

723. Quam illuminare desinit, in ea dicitur *occidere*.

724. Cumque nulla sit pars Terræ, in qua tali modo non aliquando oriri, aliquando occidere queat,

725. Dicere liceat, Solem ubique posse oriri, ubique occidere, vel, nulla certa ortus aut occasus puncta inveniri.

726. Et *dies* quidem est in illa parte Terræ, quæ Soli obversa radios ejus excipit:

727. *Nox* in ea, quæ à Sole averfa radios ejus immediatè excipere nequit.

728. Et quæ Telluris pars Solis radios directiores, §. 220. in se magis reflexos, §. 221. & proinde vehementiores & calidiores habet, in ea *Æstas*.

729. Quæ autem obliquiores, magis diffilientes ac proinde minus agitados & frigidiores habet, in ea *Hiemus*.

730. Et quæ pluribus horis in Solis lumine versatur, longiores; quæ paucioribus, breviores habet dies.

731. Oriuntur autem diei ac noctis differentiæ à particulari conversione vorticis Terræ circa proprium centrum, §. 690. seqq. Quem motum vortex ille, §. 563. non amisit, quamvis à potentiore Solis vortice absorptus fuerit. §. 644.

732. Hæc est *conversio diurna*, quæ distinguitur ab *annua*, quæ vortex Terræ cum aliis Planetis circa Solem defertur. §. 700.

733. In utraque conversione Terra immota Cœli ambientis motibus obsequitur, dum ab eo portatur seu defertur.

734. Si non ita deferretur, necessum foret ut recederet ac separaretur simul & semel à toto Cœlo ambiente: quo ipso revera moveretur, ex §. 128. sicuti respectu loci *proprii*, §. 77. movetur is qui adverso flumine natat, licet manere dicatur in eodem loco, intellige *remoto*. §. 73.

735. Ita qui immotus in angulo navis jacet, ab ipsa defertur ex Anglia in Galliam, atque interim propriè loquendo quiescit: moveretur,

veretur, si in nave obambulet, hoc est, ab alia navis parte ad aliam accederet. Confer §. 237.

736. Quomodo verò Terræ vortex simul proprium quotidie gyrum facere, simul anno integro communem circa Solem circum peragere possit, facile intelligimus exemplo vorticis aquæ majoris, in quo aliquando minor vortex cernitur. Sic potest turbo insistentis palmæ circa proprium converti centrum interimque à me circa arborem, ut commune centrum, deferri.

737. Insuper, quia Sol oriens vel occidens propinquior Terræ, sed remotior à nobis esse videtur, quàm cum est in Cœli medio,

738. (Quod *medium* ita vocatur, quia Cælum instar fornicis concipimus, cujus extremitates ibi sint, ubi & fines Terræ esse ab infantia judicavimus. Confer §. 8.)

739. Ideo etiam Sol oriens vel occidens major esse putatur, quàm meridianus:

740. Quia magnitudinem corporis æstimamus è distantia, hanc verò per comparisonem cum aliis corporibus intermediis cognoscimus.

741. Cujusmodi corpora ab horizonte usque ad oculos nostros varia in terris occurrunt, non item in cœlis inter meridianum Solem & nos.

742. (Ipsum quippe Cælum & Aërem ab ineunte ætate non habuimus pro corpore, §. 8. cum visibilis aliqua materiæ massa, lucida vel opaca, non sit.)

743. Adhæc cum Sol multò sit major Lunâ. §. 439. (Secus enim Luna à Terra primum, deinde cum Terra à Sole absorpta non esset. §. 692.)

744. Et sphaera major semper majorem sphaeræ minoris partem irradiet. §. 213.

745. Plus semper dimidia Lunæ parte illuminatur.

746. At nunquam tota (directè à Sole) illuminatur.

747. Et nunquam minus illuminatur, quàm *plena* cum dicitur.

748. Nunquam magis, quàm cum *nova* vocatur.

749. Quando enim plena est, una solùm ejus facies nobis, obversa lumine Solis illustratur, altera densissimis involvitur tenebris.

750. At quando nova est, tota Luna illustrata est, secundum partem nobis obversam à Terra, secundum partem averSAM à Sole.

751. Ita-

751. Itaque Luna non à Sole tantum immediate illustratur; verum etiam à Terra, radios Solis ad ipsam reflectente.

752. Cumque Terrâ major sit Lunâ, §. 743.

753. Plus luminis ab ea ad Lunam, quam contrâ à Luna ad Terram reflectitur. §. 744.

754. Denique Lunam pariter ac Terram non disci, sed globi habere figuram, §. 301. & quomodo nascendo eam acceperint, constat è superioribus.

755. Liquet etiam inde, quod sua ipsius luce non fulgeat Luna, uti nec Terra.

656. Et quemadmodum Terra non est Mathematicè rotunda :

757. Ita quoque in Luna inæqualitates adinstar montium & vallium observantur,

758. Ea nimirum superficiei parte, qua semper Tellurem respicit,

759. Quæque non solum lumen directè à Sole missum excipit, sed etiam illud quod à Terra reflectitur. §. 750.

760. Unde hæc Lunæ facies lumine magis agitata & rarefacta minus solida est alterâ, quæ nunquam in conspectum nostrum venit,

761. Ac Terram circumeundo majorem ambitum percurrit, §. 651.

762. Nec ratio dari potest cur oporteat credere, ullum in mundo existere corpus magnum, globosum ac durum, Cometam intellige vel Planetam, quod prorsus æquale sit in sua superficie.

763. Potius in contrarium ratio datur, petita ab analogia Telluris, §. 418. ac generationis illius, qua terrestria corpora producta & perfecta esse docebimus in sequentibus.

XXI. *Terræ origo generalis exposita.*

764. **N**isi plura de hoc Mundi corpore quàm de alio cognoscenda nobis essent, possemus in superioribus quodammodo subsistere, & compendiosè hujus Physicæ contemplationis hîc finem facere.

765. At quoniam Terram non eminus, uti reliqua, sed cominus intuemur, & magnam rerum varietatem plurimorumque corporum distinctionem in ea observamus, §. 59. 387. varietatis illius ac distinctionis originem & causas investigare cum per se jucundum, tum ad vitam utile erit. §. 2.

766. Ge-

766. Generalem autem Terræ originem non aliam atque Planetæ alicujus, è superioribus principiis Physicis assignare liceat.

767. Nempe ut ponamus, eam initio è materia primi elementi sola conflata, Sole tamen minorem fuisse. §. 684.

768. Et peculiarem circa se vorticem satis magnum habuisse, cuius in centro consistebat.

769. At minùs subtilibus illius materiæ primi elementi minutiis cohærentibus, atque ita in materiam tertii elementi conversis, maculas opacas in ejus superficie genitas esse. §. 617. seqq.

770. Ex quarum continua dissolutione remanentes tertii elementi particule per cælum vicinum diffusæ magnam ibi molem ætheris progressû temporis composuerunt.

771. Et postquam iste æther auctus admodum fuit, densiores maculas circa Terram genitas eam totam contexisse atque obtenebrasse.

772. Quæ cùm ampliùs dissolvi non possent, ac fortè permultæ sibi mutuò incumberent, simulque vis vorticis Terram continentis minueretur,

773. Tandem ipsam Terram unà cum maculis & toto, quo involvebatur, aëre in majorem Solis vorticem delapsam, ad eum locum, in quo nunc versatur.

774. Hac Terræ generatione posita *treis ejus regiones* distinguuntur.

775. Quarum *intima* ignem potiùs impurum, quàm puram terram videretur continere.

776. Impurum dico ignem, quoniam instar solaris ignis per maculas non expurgatur.

777. Ignis autem ille cùm in Terra non aliter ac in Sole moveatur, diurnam illius cum vortice suo conversionem promovet. §. 731.

778. Ac nisi talem in Terra cavitatem igneam esse statuamus, unde tantorum ignium subterraneorum originem arcessemus?

779. Et quomodo non remotiorem à Sole locum Terra occupasset, si tali cavitata destituta tota solida esset? Confer 218. 687. 689.

780. *Mediam* Terræ regionem valde opacam & densam esse, nullos ut meatus, nisi materiæ primi elementi pervios, habeat. §. 344.

781. Ipsius ex particulis minutissimis compositio docet.

782. Sed istæ duæ interiores Terræ regiones parum ad nos spectant, quia nemo ad eas vivus unquam accessit.

783. Superest *tertia* regio ex crassioribus & incertas figuras habentibus

bentibus tertii elementi particulis, quippe è macularum dissolutione ortis, §. 622. coagmentata.

784. Ex hac omnia, quæ circa nos reperiuntur corpora, vario contritionis, separationis & conjunctionis motu oriri posse, deinceps ostendemus.

785. Et quidem vi atque efficacia *materia calestis*, hoc est, primi & secundi elementi, quæ particulas tertii elementi minùs firmiter connexas, ex quibus exterior Terra constat, fluminis in modum pervadit. §. 326. seqq.

786. Materia namque *terrestriu*, ex tertii elementi particulis composita, per se otiosa existit. §. 479.

XXII. *Actiones materia calestis in terrestrem: ubi de pelluciditate, gravitate, calore, &c.*

787. **E**T primò quidem hoc loco motus globulorum cælestium generaliter considerandus est.

788. Illi enim, præterquam quod Terram, quam partim ambiunt, partim pervadunt, *junctim* deferunt, in orbem *communi* motu progredientes. 257, 563.

789. *Separatim* etiam *propriis* & variis motibus quaqua versus feruntur. §. 253.

790. Quaecunque verò motus illius initium fuerit, globuli quantum possunt, eum continuant secundùm lineam rectam. §. 156.

791. Atque ita *pellucida* reddunt corpora liquida, dummodo & pura fuerint & particulis tertii elementi tenuibus consent. §. 261.

792. Nam facile per ejusmodi corpora assiduo motu sibi in omnes partes vias parant, §. 329. uti currus per arenam, lutum aut nivem nullo negotio huc illuc trahitur.

793. Et, si concrecant ista liquida, eundem partium retinendo situm, quem à globulis accepere cælestibus, diaphana manent, §. 288. Sicuti currus movetur per orbitas in nive indurata aut luto exsiccatore relictas.

794. Exemplo sit aqua, quæ pellucere congelata pergit.

795. Igitur pellucida terrestria lumini transitum non præbent ubique, uti Cælum purum facit; sed respectu solidæ, qua constant, substantiæ partem sui luminis reflectunt.

796. Hinc pulvis vitri non pellucet: diversa sibi invicem imposita

posita vitra, cum pori hujus poris illius non ubique respondeant, §. 340. minùs perspicua sunt: denique vitrum omne projicit umbram.

797. Nec radii per vitrum aliudve instrumentum congregari & archius jungi possent nisi ex poris quodammodo distantibus venirent.

798. Sin globuli cœlestes impuros liquores offendant (confer §. 791.) veluti mustum aut cerevisiam recentem, eos expurgant.

799. Segregatis partibus heterogeneis & congregatis homogeneis. §. 222. 338.

800. Inde *Homogeneous* vocamus liquorem, cujus *particula*, etiam si vel maximè dissimiles, §. 261. ita sunt permixtæ & ordinatæ, ut alia non magis quàm alia globulorum cœlestium moribus obstitat, & quælibet *guttula* aliis omnibus prorsus similis existat, quemadmodum in vino puro & claro, etiam absinthite apparet.

801. Præterea quia pori aquæ poris aëris non respondent, §. 340. 263. cum particulæ aquæ propius quàm aëris junctæ sint,

802. (Similisque ratio est liquoris cujuslibet respectu alterius diversi.)

803. Globuli cœlestes guttam faciunt rotundam partes ejus versus centrum æqualiter premendo.

804. Sic enim à motu suo recto quaquaversus continuando, §. 789. seq. minus impediuntur. §. 299.

805. Eodemque modo globuli cœlestes totius Terræ objectu (neque enim omnes hanc ingredi & pervadere possunt, §. 788.) ne secundum lineas rectas ferantur impediti, cunctas ejus partes versus medium propellunt.

806. In quo *gravitas* corporum terrestrium consistit.

807. Nam ut fumus liberè ascendere nequit per caminum, quoties aëris in locum ab eo relictum successio impeditur. §. 131. seqq.

808. Ita materiæ cœlestis partes (quo nomine in præsentia non modò primi & secundi elementi materiam, sed etiam omne illud quod cursum ejus celeriores sequitur, intelliges) nisi partes terrestres in earum locum descendant, à Terra ascendere nequeunt.

809. Non possunt autem à Terra non ascendere, si quidem eam ingredi nequeant, §. 209. quia natura sua indefinenter agitantur. §. 477.

810. Ista vis gravitatis nisi obstarer, lapis sursum projectus moveretur usque in cælum, & quoties corpus nostrum saltando

tollitur in altum, pergeremus ascendere, nec descendere-
mus. §. 152.

811. Qui gravitatem corporibus terrestribus innatam qualita-
tem esse putant, qua ferantur ad terram vel eam appetant,

812. Item, qui guttam fieri globosam existimant, ut ab aëre aliove
contrario se tueatur.

813. Illi rebus merè corporeis intellectum & voluntatem affin-
gunt, contra §. 23. 160. aut certè tertio elemento ea tribuunt, quæ
sunt primi & secundi, contra §. 785. seq.

814. Denique cælestia *luminis* interventu *calorem* in terrestribus
producent.

815. Id est, pressio globulorum licet secundùm lineas rectas, à
Sole in terram extensas, propagetur. §. 524.

816. Non tamen æqualiter particulis tertii elementi applicatur,
ob harum intervalla & figuras inordinatas, aut etiam majorem mi-
noremve à superficie illa extima, ad quam radii primùm appellant,
distantiam.

817. Unde varia in terrestribus agitatio. §. 253. quam *Caloris* vo-
cabulo in iis designare licet.

818. Præsertim, cùm est major solito ac sensum tactus afficit.
§. 414.

819. Neque mirabimur quomodo à motu recto dependeat mo-
tus varius, cùm globos à via recta deturbatos multos sæpe gyros fa-
cere videamus. §. 299.

820. Atque ita sublato lumine, id est, pressione globulorum cæ-
lestium rectilinea, calor, id est, agitatio terrestrium particularum va-
ria, perseverare potest & solet.

821. Et quamvis lumen in opaca superficie subsistat, calor tamen
ad profundiora Terræ penetrat.

822. Quemadmodum intercedente pileo satis alto caput quidem
à radiis Solis non illuminatur, attamen calefit, & calidum manet
etiam cùm Solis radiis non amplius exponitur.

823. Vario illo partium motu corpora plerumque *rarefiunt*, ut
aqua dum in vapores resolvitur. §. 801.

824. Quandoque tamen *condensantur*, uti nix aëre calidiore sub-
sidit & facile comprimitur. §. 319.

XXIII. *Particularis Terra, Aëris & Aqua distinctio.*

825. **J** Am si exteriorem Terram ut chaos concipiamus, in quo confusa initio fuerint ea, quæ nunc Terræ, Aëris, Aquæ, &c. nominibus discernimus, quomodo hæc motu cælestis materiæ sic distincta fuerint, è superioribus colligere licebit. (Confer similem ordinem, §. 554.

826. Nam globuli cælestes exteriorem Terram, cujus partes sibi quidem incumbunt, non tamen firmiter cohærent, §. 785. pervadentes quia minores sunt,

827. Quàm illi globuli, per quos Terra in Solis vorticem delabens transit vel ad quos delapsa venit,

828. Cùm illi Terrâ propinquiores, hi à Sole remotiores existant. §. 601. 687. seqq.

829. Minores loca, quæ ad mensuram suæ magnitudinis percurrendo accommodaverant, cedere coguntur majoribus. §. 213.

830. In quæ loca angustiora cum impetu dum ruunt globuli majores.

831. In multas tertii elementi particulas simul impingunt, præsertim in crassiores.

832. Easque infra cæteras tenuiores, quas disjunctas facile movere possunt, detrudunt & compingunt. §. 789. seq. adjuvante vi gravitatis. §. 805.

833. Atque ita superius aliquod corpus, intellige rudimentum *Aëris*, rarum, fluidum & pellucidum. §. 791. seqq.

834. A corpore quodam inferiore, intellige rudimentum *Terræ inferioris*, magis denso, duro & opaco dividi cœpit.

835. Sed reliquorum distinctionem ac productionem, ut eò promptius inveniamus, Confer §. 493. seqq.

836. Particulas tertii elementi sive terrestres ratione figurarum, quæ variæ sunt, quamvis omnes angulatæ. §. 479. 493. seq. in tria præcipua genera distribuimus.

837. Nam aliæ sunt in varia quasi brachia divisæ, atque hinc inde expansæ, tanquam *rami* arborum.

838. Aliæ sunt solidiores & quadantenus rotundæ vel ut fragmenta lapidum *angulosa*.

839. Aliæ *oblonga* ac ramis destitutæ, instar bacillorum.

840. Cùm autem ramosæ terræ particulæ primùm sibi mutuò cœperunt implicari. §. 834.

841. Utpote quæ priùs & faciliùs reliquis angulosis & oblongis cohærere potuerunt.

842. Plæræque ex oblongis & angulosis (exceptis majusculis, quæ statim infra cæteras vi gravitatis descenderunt) ipsis fuerunt interjectæ.

843. At ramosis paulatim magis pressis arctiusque junctis, §. 115. oblongæ supra eas facilius ascenderunt angulosis.

844. Et ibi corpus aliquod composuere à prioribus duobus, §. 833. seq. valde diversum, quod aliud esse non potest quàm *Aquæ* rudimentum.

845. Nam simili ratione in locis paludosis ex terra calcata videmus exprimi aquam, quæ postea ejus superficiem regit.

846. Nempe particulæ istæ oblongæ transversim supra terram jacentes, §. 220. non tam facile rursus descenderunt, quàm angulosæ solidiores.

847. Omnibusque illis commune fuit, quod nec sibi mutuò, nec aliis tertii elementi particulis facile adhærerent, & à materia cœlesti assiduè ipsas circumfluente moverentur.

848. Unde variis motibus citarum aliæ in aliarum loca transmi-grarunt, ideoque paulatim teretes ac lævès omnes evaserè. §. 310.

849. Sic tamen ut earum aliæ tenuiores à materia cœlesti flecti possent; aliæ paulò crassiores non item: ut bacilli §. 839. molles alii sunt, alii duri.

850. Quemadmodum verò mustum (respice §. 798.) non repente totum simul in vinum omnino clarum vertitur, sed gradatim, ita ut primùm crassissimæ particulæ ad fundum detrudantur, tum minùs crassæ, &c. & sœx vini partim mollior, initio præsertim, existit, partim lapidis aut crustæ instar tandem concrescit:

851. Sic ex Aëre necdum satis purificato (quamvis crassissimæ & maximè ponderosæ jam essent delapsæ §. 833. seq.) plures paulatim delapsæ particulæ, pro minori majorive soliditate sua, molem aquæ §. 844. & terræ §. 834. auxerunt.

852. Quarum particularum nonnullæ minùs solidæ & ramosæ in aquæ superficie hæserunt (unde initium *Terræ superioris*. §. 834.)

853. Et ibi paulatim sibi mutuò annexæ, §. 841. crustæ vel corticis instar, aquam contexerunt, ut nunc alicubi fit in paludibus.

854. Imò

854. Imò crustarum ejusmodi aquæ innantium exempla habemus in insulis natantibus atque in multis Hollandiæ locis, ubi cæspites bituminosi effoduntur.

855. At crusta illa progressu temporis crassior evasit, novis ex aëre vel etiam ex aqua particulis ei se adjungentibus.

856. Nam Sol tempore diei & æstatis, §. 726. seqq. alteram aquæ medietatem, qua terram ubique rectam intelligimus, dilatans & rarefaciens §. 823.

857. Multas ejus partes per crustæ illius poros, §. 326, 852. sursum evexit.

858. Quæ tempore noctis & hiemis, cessante rarefactione, vi gravitatis rursus descenderunt.

859. Uti ros & pruina noctu in superficiem terræ relabuntur. De simili alternatione diximus §. 641.

860. Quoniam verò partes istæ, per crustam impetu caloris majore egressæ, in aquam omnes reverti non potuerunt, cum vis gravitatis in iis minor sit,

861. Crustam auxerunt, poris ejus descendendo (quod aliquibus etiam ascendentibus contigit) impactæ,

862. Ut aqua quotidie in plantarum & lignorum poros impingitur, §. 353. seq.

863. Atque ita quidem ipsa crusta densior ac durior reddita est, §. 628. seq.

864. Spatium verò inter aquam mole imminutam & crustam intercedens *Aëre* impletum fuit, §. 345. seq. quem *subterraneum* dicimus.

865. Et crusta seu terra hæc superior, utpote dura & cohærens, fornicis instar supra aërem illum & aquam, quæ similiter omnis nunc infra terram superiorem existit, aliquamdiu suspensa mansit.

866. Quandoquidem autem progressu temporis multæ magnæque fissuræ in ea ortæ sunt, §. 856. Calore meatus alios diducente, alios contrahente,

867. Eadem planè ratione, qua æstate in terra pingui & lutosa rimæ aperiuntur, dum à Sole exsiccat, & quidem eò majores, quò siccitas diutius perseverat.

868. Tandem superior ista terra tota contracta, §. 350. vi gravitatis in Terram, quæ sub Aqua est, decidit.

869. Cumque terræ hujus inferioris superficies ad omnia illius supe-

superioris fragmenta , sibi mutuò adjacentia , & situm quem prius habuerant servantia, capienda non satis lata foret ,

870. Quædam ex ipsis in latus inclinata sunt aliaque in alia recubere.

871. Et aqua sub aliis quidem terræ superioris fragmentis mansit , at supra alia ascendit.

872. Hinc in terra exstiterunt alibi maria magis minusve profunda , alibi camporum planities, alibi montes, saxa, scopuli , &c. aded ut perfectè sphærica tellus esse non potuerit.

873. Num verò descriptus hæcenus atque ad Terram solam accommodatus generationis modus , etiam ad Planetas , inprimis ad Jovem (qui haut secus ac Terra motu vorticis sui diurno circa axem suum convertitur dierumque proinde & noctium vicissitudinem habet , §. 688.) æquè applicari debeat , id aliis considerandum relinquo , §. 756. seqq.

XXIV. *Aër, Vapor, Ventus, Nubes, Nebula, Color, Sonus, Odor.*

874. **E** Dictis intelligitur , *Aërem* esse congeriem particularum tertii elementi aded tenuium & à se mutuò disjunctarum,

875. (Nisi enim *disjunctæ* essent , exteriori Terræ crustæ jam dudum adhæsisserent , §. 851.)

876. Ut moribus quibuslibet globulorum cœlestium , quorum ingens in aëre copia , obsequantur (Aliàs enim depressæ fuissent , §. 831. seq.)

877. Atque è minutiis cūjusslibet figuræ posse componi , §. 836. seqq.

878. Quamquam *ramose* ad aërem componendum aptissimæ , cūm levissimæ sint & in materia cœlesti plumularum instar volare possint. §. 265.

879. Distingui mustamen inter *nativam* & primitivam aëris substantiam , quæ à principio mundi exstitit , estque tenuissima & purissima ,

880. Et *adventitiam* , quæ ex effluviis aliorum corporum variis & alio atque alio loco vel tempore aliis constat. Exempla habes , §. 299.

881. Hinc aër *purus* censetur primò *absolutè* , cūm effluvia illa tam

tam crassa non sunt, ut facile sibi mutuò adhæreant & formam aëris deponant, §. 874.

882. Deinde *respectu* nostri, cùm ejusmodi effluvia corpus nostrum non lædunt, ut faciunt contagiosis morbis grassantibus.

883. *Aër differt ab Igne*, quatenus utrumque corpus terrestre est, primò in eo, quòd hujus particulæ multò celerius agitantur, quàm illius.

884. Quandoquidem hæ motum materiæ primi elementi sequuntur, illæ secundi.

885. Deinde differunt in eo, quòd Ignis apud nos esse non potest sine crassiusculis corporum terrestrium particulis, quibus alitur & renovatur.

886. Aër contrà eò purior, hoc est, magis pellucidus, rarus & fluidus existit,

887. Et *corruptioni*, id est, particularum suarum connexioni & in majores massulas coitioni, minus obnoxius,

888. Quò tenuioribus ac mollioribus tertii elementi particulis constat, §. 878.

889. Crassiores enim, nisi calore continuo agitentur, pondere suo deorsum labentes, formam aëris exuunt.

890. Hinc aër ignibus accensis, quibus crassiores partes comburuntur, purgari solet.

891. Proinde aër purior in Gallia & Germania superiore, quàm Belgio invenitur :

892. Hic enim, quando ex humidior solo ascendens ei miscetur vapor, sæpe calore minus agitur,

893. Vasa deorsum labendo & adhærendo inficit.

894. Omnis interim aër corpus est *mixtum* è variis cœlestibus ac terrestribus corpusculis, cùm ad ejus compositionem omnis generis particulæ satis tenues concurrere possint (Tantum abest ut sit corpus simplex. Confer §. 491.)

895. Quæ cùm in vario semper motu sint, §. 876. adeoque corpus fluidum efficiant, §. 253.

896. Aër perpetuò est *calidus*, si non respectu ad sensum habito, saltè absolute, §. 817.

897. Tantò autem calidior, quantò major est ejus agitatio varia.

898. Ut, ecce, noctes autumnales calidiores, ob impressos terrestribus particulis æstate præcedente motus, §. 820.

899. Vernæ frigidiores, quod hiemale frigus motum in iisdem partibus retardârit.

900. Absolutum enim *frigus*, id est, exiguorum corpusculorum omnimoda quies, in aëre non invenitur.

901. Pro differentia caloris & frigoris non modò annum in æstatem & hiemem antiquissimi mortalium distinxere, §. 728. seq.

902. Verùm etiam aërem in *tres regiones* multi philosophi diviserunt. Confer §. 774. seqq.

903. Quarum *prima* eò usque se extendit, quousque radii à terra reflexi calorem sensibili modo augment.

904. *Media* est, ubi vapores è terra educti rursus concresecunt.

905. *Suprema* est, quæ inde ad cælum porrigitur.

906. Præterea ex caloris & frigoris, pro anni tempore, diversitate liquet, cur halitus oris & sudor calentium equorum magis hieme quàm æstate conspiciatur.

907. Item, cur plures in aëre sint vapores æstate, cùm nimis calore attenuati non videntur; quàm hieme, quando propter crassitiam videntur maximè. (Quo ipso præjudicata illa infantis opinio, quam tetigit §. 8. refellitur.)

908. Utique enim Sol æstivis diebus plures è locis humidis vapores elevat quàm hibernis, quoniam aquas subsidere magis ac decrefcere tunc temporis experimur.

909. Attenuati autem vapores, quia celerem globulorum celestium motum unà cum aliis aëris particulis sequuntur, adeo transparent, §. 791. seq. ut à reliquo aëre visu discerni nequeant. Contrarium iis accidit, qui specie densi & obscuri fumi crassescunt.

910. Attamen vapores illi valde rari, à Sole aliisve stellis illuminati, *cæruleum* in aëre colorem producunt, qui cælo sereno apparet & vulgò cælo stellato perperam adscribitur.

911. Vapores moti *Ventum* in aëre faciunt, cujus generatio bene explicatur exemplo ejus, quem in Æolipylis aqua in vaporem resoluta excitat.

912. Quamvis generaliter quoque Ventus dicatur omnis aëris in unam partem agitatio, quæ tactu percipitur.

913. Sic aëre tranquillo placidi quidam venti majorum, §. 213. fluminum cursum sequuntur.

914. Et sæpe venti juxta maris litora cum ejus fluxu & refluxu mutantur. Confer §. 641.

915. Dum

915. Dum aër aquæ proximus ejus motum quodammodo sequitur. Confer §. 600.

916. Vapores ex aqua ascendentes humidiores & crassiores sunt iis qui ex terra : cùm sicciore ac tenuiores , veluti aëriæ , huic sint junctæ particulæ.

917. Unde eadem tempestates gravius in mari quàm in terra sæviunt. §. 213.

918. Similiter molæ ventosæ æstivo vento difficiliùs aguntur , quàm æquali hiberno : quo tempore crassiores aëri partes sunt immistæ. Hanc etiam inter alias causam esse dixeris , cur ignis hieme luculentius ardeat , quòd aër tunc crassior existens fortiùs inflare valeat.

919. Plures vapores è mari tempore diurno , §. 908. è terra nocturno plerumque ascendunt. Nam tellus quidem calorem sibi impressum diutiùs retinet : at mare plus materię vaporibus suppeditat.

920. Hinc sæpius in litoribus venti interdium à mari , noctu à terra spirant.

921. Porro qua ratione efficiat calor ut vapores , absque ulla ad ascendendum singulari inclinatione aut vi Solis attrahente , in sublime tollantur , præsertim cùm terræ hemisphærium simul ab innumeris Solis radiis integro die premitur ,

922. Id non minus facile intellectu est , quàm pulveris à terra ascensus. Ejus enim grana licet multò majora & graviora sint vaporum particulis , assurgit tamen ingente copia , quoties tellus pedibus animalium calcatur , & maximè quidè , cùm vasta planities ab integro exercitu simul toto die premitur , §. 209.

923. Cumque in liquidis corporibus , quæ igni admota in vapores ascendunt , Ignis vim nullam attrahendi , sed pellendi tantum animadvertamus ; ecurr cælestibus ignibus aliud asstringimus ? §. 418.

924. Effectus ventorum sunt , aërem calore , frigore , siccitate , humiditate , &c. variè temperare.

925. Corruptionem aëris impedire (Confer §. 887.) quemadmodum & aqua agitata minùs corrumpitur.

926. Nubes è mari elevatas ad terram propellere , sicuti etiam paleas , folia & alia secum rapit.

927. Molitoribus & nautis ad opera sua inservire , §. 354. 918.

928. Sicuti autem vapores dilatati ventos , ita coacti nebulas & nubes efficiunt. Confer §. 621. seqq.

929. Quamprimum enim notabili modo aëre puro minus pellucet, si ad terram descendant, *Nebula*;

930. Sin mancant in aëre suspensi, *Nubes* appellantur.

931. Lumen enim per aquam totam singulaeque ejus guttas transiens, non ita transit per nebulam & nubem, quæ tamen ex aqua rarefacta & guttis constant, adeoque poros habent majores, §. 317. seqq.

932. Quia licet aquæ guttæ sint pellucidæ, tamen cum singulæ earum superficies aliquot radios reflectant, facile tam numerosæ ibi superficies occurrunt, ut radios omnes aut propemodum omnes aliò reflectant.

933. Et eadem prorsus ratio est, cur vitrum, crystallus, glacies in particulas comminuta pellucida esse desinant, §. 796.

934. Hoc itaque modo aëris vaporibus infecti particulæ globulis cælestibus resistunt, quibus aliàs facile cedunt, §. 876. Similiterque aër quamvis promptè tactui cedat, utpote fluidus, §. 245.

935. Flabello tamen percussus nonnihil resistit, quoniam flabellum celerius agitur, quàm illa congeries aëris, quam attingit. §. 202.

936. Et vesicæ inclusus valde resistit, quia non habet quò cedat, §. 134.

937. Ex jam dictis corrigenda infantia nostræ de aëre, ut *spatio vacuo* cogitatio, §. 8. 46.

938. Non enim potest esse nihil vel non corpus, in quo totuplex motus, aliquando & quies, non modò intelligitur, verùm etiam sentitur, §. 16. 20.

939. Nempè *sactus* in aëre percipit. 1. Varium ejus partium motum, qui acceleratus *calor*, imminutus *frigus* appellatur: 2. Motum totius in unam partem, qui *Ventus* dicitur: 3. Resistentiam & quasi *duritiem* quandam, §. 935. seqq.

940. *Visus* percipit 1. globulorum cælestium, qui magna copia in aëre sunt, pressionem secundum lineam rectam, id est, *lumen*. 2. Varios illius pressionis à terrestribus corporibus receptæ aut re-percussæ modos, id est, *colores*, §. 910.

941. *Colorum* verò *naturam & originem* ut percipiamus, cogitandum est globulos cælestes, qui luminis sunt subiectum, variis modis à terrestribus corporibus reflecti, aliquando etiam non reflecti. Hæc enim generalis est eorum, quæ moventur, conditio, §. 162. seqq.

Exem-

Exemplum cernitur in pila, prout in durum aut molle, asperum aut læve, liquidum aut fixum corpus incidit.

942. Et quia pressionem luminis cum pressione baculi contulimus, §. 512. observandum est, quod in tenebris ambulantes intermedio baculo sentire ac dignoscere soleamus, lapidem, arenam, aquam, herbam, lutum, an aliud quid attingamus: nempe propter varietatem quæ est in superficie corporis, quod baculo tangitur.

943. Cumque effectus ejusmodi in tactu, omnium sensuum infimo, cujus perceptiones minùs distinctæ sunt, deprehendatur; quidni credamus, multò faciliùs in sensuum præstantissimo Visu, qui plurimas rerum differentias nobis manifestat, subtilis materiæ celestis interventu, simile quid locum invenire? Adeo ut propter varietatem illam, quæ accidit lumini, ob diversitatem superficiæ, in quam incidit, colorum sensus in nobis oriatur.

944. Considera quomodo pomum dissectum primò album, tum flavum, postea sæpe nigrum appareat, prout superficies ejus paulatim aliter atque aliter disponitur & magis exsiccat.

945. Etenim, quando Visus ipsam pressionem sentit, cur non & varietatem, quæ in ea est, sentiat? cur minùs ab illa afficiatur, quam tactus ab ea, quæ cum pressione baculi conjuncta est?

946. Utque specialia quædam attingamus, cogita dari corpora alia, quæ dum luminis radiis percutiuntur, eisdem suffocant & omne illorum robur frangunt (ut pilæ in lanam incidentis motus sistitur, §. 206.) quæ *nigra* appellamus.

947. Dari alia quæ reverberant, & quidem vel eodem, quo recipiunt, ordine, veluti specula nitidè polita; vel confusè huc & illuc. Rursus alia ex his radios percutere actione luminis haudquaquam immutata, ut *alba*; alia mutationem inducere, uti *rubra*, *flava*, *caerulea*.

948. *Auditus* in aëre percipit tremulum & vibratum ejus motum, qui *Sonus* dicitur, §. 193. seqq. 299.

949. Et ille quidem sic producitur à causa sonante, veluti campana, lingua, &c. in aëre, ut circuli à lapide vel gutta incidente formantur in aqua, §. 674. quando pars aquæ impulsæ impellit aliam, hæc porro sequentem, §. 133.

950. Ac differt à vento, sicuti cursus fluvii ab istis circulis, id est, ut motus rectus in unam partem, à motu circulari in omnes partes flexo, vel, quo corpus ultrò citroque impellitur: id enim est *tremere*.

951. Quemadmodum tamen hi circuli magis protenduntur versus eam partem qua flumen progreditur : ita & ventus defert sonum versus eam partem, qua aërem impellit.

952. Imò quoties ipsi vento tremulus & vibratus motus accedit, veluti cùm in parietes & arbores irruit, sonus ejus auditur. Quod fit ubi à recta via impeditus circulum quendam facere cogitur, cundo ac redeundo, eodém modo quo aqua à recto progressu deturbata vorticem facit. §. 299. & præsertim in angustis angulis, ubi motus acceleratur.

953. Ac sicuti plures circuli in eadem aquæ portione simul esse possunt : ita etiam plures in aëre soni, licet utrobique circuli sint minùs distincti. Et quemadmodum circuli non in momento, sed progressu temporis post immissum lapidem in aqua propagantur : ita sonus in aëre vicinis partibus communicatur, postquam ille percuti & vibrari cœpit.

954. Denique *olfactus* percipit in aëre volantes particulas terrestres subtiles ac vividas, §. 916. qui sensus *Odorum* vocatur. Huc pertinent effluvia §. 880. tenuia rosarum, excrementorum, transpiratio corporis humani, leporini &c.

XXV. *Aqua, Glacies, liquorum superficies lavis, aqua perspicuitas & sonus, Spuma, Bulla.*

955. **A**qua omnis quamvis non ad sensum, absolutè tamen est *calida* : quoniam 1. fluida est §. 895. seq. 2. refrigerari potest.

956. Quoties autem calidior solito est, ab igne remota ad pristinum frigus redit, quatenus motum particularum suarum varium aëri aliisque corporibus ambientibus communicat, §. 167.

957. Sed intensiore frigore congelata *Glacies* nuncupatur, dum partibus juxta se mutuo quiescentibus fluida esse desinit, secus ac aër §. 900. Dico, juxta se mutuo, quia sola quies, quæ hic frigus est, non sufficit ad corpus durum efficiendum, nisi partes etiam se contingant §. 242.

958. Et quoniam ista congelatio non accidit, nisi materia cælestis, quæ partes aquæ interlabitur, solito subtilior existat,

959. Inde fit, ut pori glaciei ad mensuram istius materiæ particularum arctati, paulò majores prorsus excludant.

960. Hinc glacies frigidissima manet, licet in æstatem reservetur, semperque duritiem suam retinet :

961. Nec paulatim instar ceræ mollescit, quoniam propter meatum angustiam calor ad interiora non penetrat, nisi quatenus exteriora liquefunt.

962. Adhæc inter tenuitatem & crassitiem particularum aëris & aquæ, item inter istas particulas & vim, qua globuli secundi elementi eas movent §. 832. 847. talis est proportio,

963. Ut vis eodem loco & tempore sufficiens ad aquam in glaciem vertendam, sufficiat etiam ad particulas aëris seu vapores §. 880. mutandos in aquam.

964. Utrumque fit cum globuli isti paulò minùs solito agunt, ut hieme §. 729. ex gr. quo tempore halitus oris nostri in aquam vertitur, aqua illa prolixioribus barbis adhærens in glaciem abit.

965. At cum paulò fortiùs agunt globuli, ut æstate §. 728. tenuiores aquæ particulas in aërem seu vapores mutant.

966. Vehementius à ventis dum agitur aqua vel aër, *Tempestas* oritur.

967. Huic opponitur *Tranquillitas*, quæ in iis non est negatio motus omnis vel proprii vel communis; sed tantùm alieni seu externi, præsertim vehementioris §. 913.

968. Aqua resistit manui, quoties hujus percutientis celeritas major est in accedendo, quàm illius percussæ in recedendo §. 913.

969. Resistit navibus, lignis, glaciæ, aliisque ipsi innatantibus, quatenus illis *gravior & solidior est*,

970. Dum vires omnium particularum aquæ simul conjunctæ, quod *singulæ* non possent, corporibus innatantibus opponuntur §. 213.

971. Sed alia corpora graviora ac solidiora ipsamque terram aqua infra se habet, secundum ea quæ diximus §. 843. seqq.

972. Utque intelligas, quomodo aqua aëre, terra aqua inferiori locum, cælesti materia premente §. 832. nata sit,

973. Cogita, simili de causa pennatam sagittæ partem, quia nempe minùs est solida, aliâ superiorem esse, cum per aërem descendit:

974. Quamvis initio contrarius sagittæ ascendenti partium situs fuerit, quamdiu particularis motus impressus universalem cæli pressionem §. 805. superabat §. 230.

975. Patet etiam è dictis, cur vesica aëre plena, nisi manu validiùs depri-

deprimatur, sub aqua existere nequeat. Sic bullæ undis supernant.

976. Tametsi autem ventus doceat (respice §. 966. seq.) quod & aqua persæpe aëris & contra aër aquæ motum sequatur: qui est *communis* utriusque, quatenus *tota* eorum corpora in unum consentiunt;

977. *Partes* tamen aquæ *propriæ* sibi motum habeant, quemadmodum & partes aëris:

978. Qui motus non consentiunt: secus enim aër & aqua non duo, sed unum corpus fluidum constituerent. Vide §. 222. 801. 844. 877.

979. Dum igitur extremitatibus suis contigua aër & aqua secundum partes aliter atque aliter moventur.

980. Aliterque materia cælestis partibus aëris circumfusa, aliter ea, quæ partes aquæ interfluit, agitur §. 801. seqq.

981. Superficies aëris & aquæ poliuntur & lævigantur, ut in attritu durorum corporum contingit §. 310.

982. Quæ lævigatio in fluidis propter mobilitatem partium §. 245. seqq. multò facilius est & ferè momentanea §. 116.

983. Atque ita aquæ (& similis est aliorum liquorum ratio) *superficies valde levis*, quam glacies retinet. Si vento flante crispetur aqua, etiam illam figuram custodit glacies §. 288.

984. Hinc aquæ superficies difficilius dividitur, quàm ejus interiora.

985. Sic exigua acus chalybea transversim jacens (confer §. 846) innatat summæ aquæ, quamdiu superficies ejus non divulsa §. 211.

986. At simul atque ea divellitur, acus usque ad fundum descendit.

987. Quòd autem bombardarum globi versus aquam displosi eam aliquando non ingrediuntur; sed aërem versus reflectuntur,

988. Id fit, quia ipsi lævem habentes superficiem, obliquè in aquam lævem, & quidem celeriter §. 968. impingunt.

989. Simile observatur in lapillis teretibus & politis, obliquè in eam missis, propter easdem causas concurrentes.

990. Globuli verò cælestes, cum sint numero plurimi & magnitudine valde exigui, licet sæpe etiam obliquè in aquam incendant §. 729.

991. Non tamen omnes ab aquæ superficie *reflectuntur* §. 795.

992. Sed plurimi poros ejus, qui sunt innumeri, ingrediuntur §. 321. seq.

993. Et motu suo vario fluidum ibi corpus conservant §. 847. seqq.

994. Glo-

994. Globuli tamen obliquè aquam ingressi, ob diversitatem pororum, qui in aqua & aëre sunt §. 801. *refringuntur*.

995. Unde remus vel baculus partim in aqua, partim in aëre existens, fractus apparet §. 181.

996. Hac globulorum secundum rectas lineas pressione aqua fit clara & pellucida; dummodo aliorum corporum permixtione non inquinetur. §. 791.

997. Cujusmodi tamen heterogeneous commixtionem, saltem aliquam, etiam in aqua valde limpida inveniri, ex eo planum est,

998. Quod sedimentum aliquod terrenum sæpe relinquit, ob causam §. 799. expressam, sicuti quoque topi thermarum canalibus accrescunt.

999. Ne jam dicam de terra, qualis in fundo vasis cernitur, in quo pluvia vel nivalis aqua resedit: quæ crassiores exhalationes continet,

1000. Quamvis autem aqua *luminis*, hoc est, pressionis rectilineæ, respectu globulorum poros ejus assidue permeantium, non minus idoneum subiectum sit quàm aër,

1001. Vel magis etiam idoneum, quia meatus habet stabiliores: quo nominæ radii facilius quoque vitrum, quàm ipsam aquam trajiciunt.

1002. (Nam quantò firmiores & solidiores exiguæ partes corporis alicujus perspicui sunt, tantò facilius, intuitu pororum, lumini transitum permittunt §. 342. licèt ratione partium solidarum plurimis radiis aditum non præbeant §. 795.)

1003. Minus tamen aptum subiectum est recipiendo *sono*, hoc est, tremulo & vibrato motui §. 948.

1004. Quoniam crassiores ac tardiores ejus partes sunt partibus aëris, ut ipsa horum corporum productio nos docuit §. 833. 844. 851. Vide & §. 263. 881.

1005. Vibratio autem, quæ sonum efficit, sine celeritate non est, cum sonus non tam à quantitate subiecti mobilis, quàm à quantitate graduum ipsius motus pendeat §. 221. Nimirum aëris motus, quatenus ventus dicitur, validior, quatenus sonus, celerior §. 227. seqq.

1006. Hinc venti, quamvis multò latiore aëris moveant regionem, quàm lingua canentis aut vociferantis, non tamen sonitum tantum cient. Et sensus docet, sonum in aëre celerius, quàm circulos in aqua propagari.

1007. Cum igitur aqua soni sit minus capax quàm aër, manifestum

stum est, cur vasa vacua, id est, aëro plena §. 46. multum tinniant, vino plena non item.

1008. Similiter, cur ligna sicca ad suscipiendum sonum aptiora viridibus.

1009. Ut enim vas vacuum se habet ad plenum: ita pori lignorum siccorum se habent ad poros viridium: quorum illi magis aperti, hi obstructi sunt §. 353. 356.

1010. Hæc etiam causa est cur hieme, dum aër vaporibus aquæ crassioribus plenus §. 907. 918. sonus tam longè non exaudiat.

1011. Quemadmodum & per nivem ac pluviam obtusius auditur, quàm per liberum ab ejusmodi crassis & humidis corporibus aërem.

1012. Nec solum aqua aëri, verùm aër vicissim aquæ quodammodo permiscetur, unde *spuma*, corpus ex aëre & aqua mixtum.

1013. Quomodo verò ista mixtio contingat, tum perspicitur eum ex altiore loco in vas inferius vinum aliisque liquor infunditur. Facile enim tunc aër intercipitur, qui tamen liquoris particulis ob vim gravitatis descendentes paulatim inde solutus ascendit.

1014. Huc pertinent quoque *bullæ* in liquidis, quarum pelliculæ viscosæ §. 267. aërem inclusum aliquamdiu detinent, perinde ferè ut in vesica fit. Ita lactis cremor agitato valde inflari & in bullas plurimas attolli solet.

1015. Imò *spuma* ex plurimis exiguis bullis componitur. Cumque ea ratione multas habeat superficies, quarum prima partem luminis aliquam reflectit, secunda aliam, atque ita deinceps, vix ac sæpe ne vix quidem aliquid superest quod ulteriùs pergat §. 932.

1016. Quæ causa est ut lumen faciliùs ad trium hastarum altitudinem in aquam penetrat, quàm per paucillum *spumæ*.

1017. *Spuma* eadem de causa alba est, quia vitrum aut glacies contrusa, nix item & grando alba esse solent.

XXVI. *Mare, Fontes, Nix, Pluvia, Salsa, Dulcia, Sapor.*

1018. **E**X antecedentibus abundè liquet, aquam tam in aliis fluidis, quàm in duris corporibus, tam infra quàm supra terram reperiri.

1019. Quo intuitu plùsne in mundo terræ an aquæ detur, vix dicere queas.

1020. Maxi-

1020. Maxima tamen aquæ copia in *Mari* congregata, quod commune quasi aquarum omnium receptaculum est.

1021. Et isthic locum aquæ naturalem potissimum esse dixeris, uti materiæ primi elementi locus naturalis in Sole & stellis fixis ponitur, quod ibi maxima ejus copia coacervata sit.

1022. Ac sicuti calorem & ignem reliquum præcipuè à Sole similibusque principiis arcessimus §. 778. & alibi minora à majoribus in universo jam constituto derivamus: ita hîc à mari fontium & fluviorum originem petimus.

1023. Maris enim aqua suo & pondere & motu multiplici ad terræ profunditates impellitur,

1024. Atque infra montes & campos magnæ cavitates aquis plenæ inveniuntur. §. 871.

1025. Inde verò aqua sursum, vel ad ipsa montium juga elevatur,

2026. Vi caloris subterranei in vapores resoluta §. 778. 821. 921. seqq.

1027. Qui *vapores*, hoc est, aquæ particulæ, vi caloris ab invicem disjunctæ ac celeriter motæ, interdum ad nubes attolluntur,

1028. Ubi frigore, id est, tardiore motu concrecentes §. 904.

1029. Pluvias, nivem aut alia *meteora aquea* producunt,

1030. Pro vario concretionis modo & æris regione frigidior aut calidior.

1031. Nam aliquando in altioribus locis *nix* est, quod in humilioribus *pluvia*. Confer §. 963.

1032. Facilius autem per terræ meatus quàm per ærem isti vapores ascendunt,

1033. Quoniam durioribus terræ particulis suffulti non dissipantur, ut fit inter fluidi æris particulas mobiliores §. 1002.

1034. At frigore succedente circa exteriorem terræ superficiem torpescunt, & amissa vaporis forma in aquam revertuntur §. 859.

1035. Quod frigus quò majus, eò copiosior aqua (Nisi tantum sit, ut gelu constringantur omnia):

1036. Itaque hieme plures esse pluvix solent quàm æstate (dummodo satis multi vapores in aëre congregentur §. 919. quod quia æstate fit, dum illi in frigida æris regione concrescunt, neque tunc temporis pluvix defunt.)

1037. Ac licet etiam hieme non pluat, tamen largior tunc aqua ex terris effusio cernitur.

1038. Et largior maturino tempore quàm pomeridiano, æstate præfertim.

1039. Porrò quemadmodum exigua in itinere mora sufficit ut alius qui sequitur tecum conjungatur: ita aliquantilla retardatio particulas jungere potest, hoc est, remissius frigus satis est potens ad vapores in aquam cogendos.

1040. Et contra exigua acceleratio satis est valida ad particulas magis disjungendas, id est, parvus calor aquam in vapores redigere potest.

1041. Ita vapores ex eo quod in olla coquitur ascendentes in concava operculi superficie in aquæ guttulas abeunt §. 1031. Nempe gradus omnino varios & hic & alibi agnoscere licet §. 123.

1042. Quamvis autem non magna inter particulas vaporis & aquæ, ratione situs & motus, interdum distantia sit §. 1027.

1043. Longè tamen sunt tenuiores vaporum particulæ (secus enim ad aërem referri non possent §. 894.) quàm aquæ guttulæ, quæ ex pluribus minoribus aquæ particulis constant (adeo ut guttula pro minimo naturali aquæ nequeat haberi §. 410.)

1044. Proinde aquæ guttulæ per angustos meatus, quibus vapores ascenderunt §. 348. Vicissim descendere non possunt.

1045. Sed aliquantò latiores vias in crustis exterioris terræ inveniunt §. 865. seqq.

1046. Quibus aqua obliquè secundum declivitatem vallium & camporum deducitur.

1047. Atque ubi istæ subterraneæ aquarum viæ in superficie montis, vallis aut campi terminantur, *fontes* scaturiunt,

1048. Quorum *rivi* multi simul congregati *flumina* componunt,

1049. Et per decliviores terræ partes in mare labuntur. *Lacus* tamen oritur ubi talis declivitas non invenitur. (Sic gradatim ex pluribus vaporum particulis guttula, è pluribus guttis rivulus, ex pluribus rivis fluvius, qui mari aggregatur)

1050. Atque ita *mare terra continente*, cujus alveis continetur, extrema illa parte ubi flumina ingrediuntur, *humilius est*, licet instar arcus postmodum assurgens *altius* evadat, unum cum terra globum coniciens.

1051. Quamvis autem indefinenter multæ ex montibus aquæ versus mare fluant, terræ tamen cavitates §. 1024. non exhaustiuntur, nec mare augetur.

1052. Quo-

1052. Quoniam tanta circiter aquæ quantitas è mari versus radices montium perpetuò redit, quanta ex montibus egreditur. Confer §. 592. seqq. Hinc in profundissimis fodinis, quò pluvia nunquam descendit, fontes oriri fossiores, ibi sæpe ab aqua obruti, experiuntur.

1053. Ab hac circulari aquæ è mari egressu & in mare regressu etiam *perennitas fontium & fluviorum* pendet: quos aqua pluvialis, & quæ è nivium resolutione venit, auget.

1054. Et quamvis mare sit salsum, solæ tamen *aqua dulcis* particulæ in fontes ascendunt:

1055. Quia molles & flexiles §. 849. Unde & molliter supra linguam fluitant. Adeo ut necesse sit cogitare, eas instar funiculorum ex particulis minoribus esse compositas.

1056. *Salsa* verò cùm sint, duræ & inflexiles, unde in cuspides erectæ pungunt §. 251.

1057. Nec facile in vapores mutari, nec ullo modo per obliquos & angustos terræ meatus transire possunt.

1058. Hinc est quod maris aqua arena percolata dulcescit §. 348.

1059. Quamvis denique assiduè dulcis aqua per flumina in mare revertatur, mare tamen non dulcescit,

1060. Quoniam æqualis copia salis in eo semper manet.

1061. Si tamen in remotioribus à mari pureis aqua salsa reperitur,

1062. Aut per terræ rimas non percolata eò pervenit,

1063. Quòd superficies maris æquè sit alta ac puteorum fundus (Confer §. 1050. initio).

1064. Aut per latiores ejusmodi vias, aquæ dulcis particulæ salas per duri corporis acclivitatem sursum elevarunt §. 283.

1065. Sic enim non modò aër (ut patet in vento §. 926.) verum etiam aqua duriora corpuscula secum defert) ut patet in iis quæ aqua abluuntur, & in distillationibus quibusdam.)

1066. Ita cùm in Armenia terra minio abundet, vapores illius terræ particulas in sublime secum vehunt §. 999. Unde nix ibi quandoque rubra delabatur §. 1029. Simile fieri cogitabis ubi sanguine aut lacte plueri videtur.

1067. Jam qui *dulcis aqua flexilitatem & inflexilitatem salis* attendere, aliarumque aquæ particularum tenuitatem cum aliarum crassitie conferre voluerit, is absque ulla difficultate videbit,

1068. Cur sal in poros carniū impactum eas induret & conser-

vet §. 861. seqq. (Nempe ut alicubi palis in terram defixis solum firmius redditur);

1069. Dulcis autem aqua eas emolliat & corrumpat §. 275.

1070. Cur naves, quas mare sustinuit, quandoque mergantur in flumine.

1071. Cur non tam altè immergantur ibi, quàm hîc (confer §. 969.) Nimirum ut pila longiùs à corpore duro resilit, à molli aut non resilit aut minus longè §. 205. seqq.

1072. Cur æstate mare salius, item sub zona torrida.

1073. Cur Ægyptii ad potum diurnum noctu è Nilo potissimum aquam hauserint, antequam Sol subtiliores partes in vapores rede-gisset.

1074. Cur aqua cruda tardius congeletur eâ, quæ diu bulliit antea, nunc autem frigida est. Nempe quia tenuiores & mobiliiores partes, congelationem impedièntes, evaporârunt.

1075. Cur vinum & cerevisia in vappam conversâ odorem saporisque genuinum exuant, nisi vasis bene custodita aut operculis tecta fuerint.

1076. Denique ut rigidæ salis, ita flexiles aquæ particulæ magnitudine admodum variant: sicuti baculi longiores, breviores, crassiores ac tenuiores esse solent §. 839. seqq.

1077. Obiter ex iis, quæ de salis ac dulcibus habuimus, colliges in quo consistat natura *Saporum*, nempe in eo, quod corporum terrestrium particulæ ab invicem disjunctæ & simul cum saliva in ore natantes linguam diversimode movent, prout ipsarum figuræ sunt diversæ §. 286.

1078. Adeo ut particulæ humidæ vel humectatæ in ore natantes gustum, sicciiores autem in aëre ac naribus volantes odoratum potissimum afficiant §. 954. 265. seqq.

XXVII. *Æstus maris.*

1079. **S**uperest explicandus *maris ille motus, quo bis in die singulis locis attollitur ac deprimitur*, aëre inferiore sæpe motum ejus imitante §. 915.

1080. Nimirum ut liquor aliquis, in poculum aut vas, cujus labra sicca, majore copia infusus, non pressus in medio protuberat, pressus ad labra copiosius affluit:

1081. Ita

1081. Ita mare (quod similiter à terra sicca continetur §. 1050.) altius est in medio , quoties non premitur : at quoties ibi deprimitur , ad littora affluit.

1082. Pressio illa maris ibi existit , ubi materia cælestis , terram & lunam peculiari vortice deferens §. 690 seqq. 788. Celerius fluit.

1083. Celerius fluit ubi spatium Cœli redditur angustius §. 706.

1084. Spatium illud inter terram & vorticis terræ extremitatem (seu , in illa terræ vorticis diametro) redditur angustius à Lunæ præsentia.

1085. Et quoniam terræ circa proprium centrum delatio viginti quatuor horis absolvitur ,

1086. Si ipsius superficies in quatuor partes divisa intelligatur A , B , C , D.

1087. Luna nunc eminens supra A , post sex horas existet supra B , atque ita deinceps.

1088. Unde sequitur necessum esse , ut maris aqua singulis duodecim horis in uno & eodem loco fluat ac refluat.

1089. Et hunc effectum non à peculiari aliqua *Lune qualitate* vel influentia , qua humoribus dominetur , proficisci ; sed à solo Lunaris corporis , quod satis magnæ molis est , *præsentia* & interpositione.

1090. Sic platea fit angustior eo loco ubi crassum aliquod corpus ponitur : unde porro contingit , ut ventus in latera plateæ ibidem fortius impingens obvia corpora , nisi dura vel aliis alligata sint , sibi cedere faciat.

XXVIII. *Ignis , Terræ motus , Thermae , Cinis , Curbo.*

1091. **I**gnis & aqua maxime quidem sibi adversari videntur :

1092. Conveniunt tamen in eo , quod ignis instar fluminis perpetuò gignitur & fluit ,

1093. Quanquam id præ celeritate vel etiam distantia , ut in stellis seu ignibus cælestibus , nos lateat.

1094. Sed ignis apud nos (qui non est purus , ut in Sole , sed particulas tertii elementi admixtas habet , quod vel *color* docet) originem & naturam jam investigemus : cum non solum eò nos invitet ista , quam modò diximus , aquæ tum oppositio tum similitudo ; verùm etiam consideratio superiorum , ubi præter Solis calorem docuimus Ignem in terris reperiri , qui vapores attollat §. 1026.

1095.

1095. Et planum quidem est ex antecedentibus, quod globuli secundi elementi poros omnes terrestrium corporum occupant,

1096. Ita tamen ut exiguos angulos à globulis relictos sola materia primi elementi repleat.

1097. At quamdiu tantum in minimis illis angustiis hæc continetur, nec visum afficere, nec particulas terrestres secum rapere valet §. 583.

1098. Nec proinde appellatur *Ignis* §. 414. 487. 818. uti nec Aqua nominatur, nisi hujus particulæ in guttam sensibilem concreverint §. 1049.

1099. Ut igitur Ignis alicubi primum excitetur, id est, ut tanta materia primi elementi copia congregetur, quæ luceat & ardeat,

1100. Globuli cælestes expelli debent ab intervallis quarundam particularum terrestrium §. 533. seqq.

1101. At simul ac globuli cælestes loca illa denuò occupant, ignis vires franguntur, & minora cedunt majoribus, mobilia minus mobilibus §. 246.

1102. Considera quantum vires ignis frangantur, si radiis Solis exponatur.

1103. Quapropter Ignis corporum collisione, veluti silicis & chalybis, non tam generatur quàm congregatur.

1104. Ejusque *extinctio* est particularum antè conjunctarum segregatio, non annihilatio §. 43. (Similis est aquæ evaporatio)

1105. Ita leniore oris flatu candela exstinguitur, quia materia primi elementi facilius cedit, vehementiorè rursus accenditur §. 640.

1106. Nec tantum ignis oritur, cum terrestres particulæ globulos secundi elementi undique repellunt, ut particulæ primi elementi confluant;

1107. Verum etiam cum globulorum ipsorum pressiones multæ hoc est radii Solis ope speculi concavi, versus unum locum diriguntur.

1108. Sic enim junctis viribus ac denso quasi agmine globuli agunt, atque etiam se mutuò interfecando variam & vehementiorem agitationem faciunt §. 216. 221. 817.

1109. Qua ratione idem præstant in excitando igne & secum rapiendis tertii elementi particulis; quod materia primi elementi :

1110. Nec refert à qua causa particulæ terrestres scelerimè mo-
veri

veri primùm incipiant (Sæpe quidem sufficit *diversorum corporum mistura*, uti videmus in calce aqua adpersa):

1111. Nam si tantùm materiæ primi elementi tota innatent, propterea celerrimam agitationem acquirunt seu ignescunt.

1112. Ita dum culter super ligno aut lapide acuitur, id est, ultrò citroque diutius agitur, varius ille motus calorem c. 817. quandoque etiam Ignis scintillas producit.

1113. Nec obstat quod exigua solùm quantitas hujus materiæ circa terrestres particulas sæpe reperitur,

1114. Namque uti navis non minùs facile cursum fluminis sequitur §. 284. ubi tam angustum est ut ripas utrinque ferè attingat, quàm ubi est latissimum: ita particulæ terrestres sequuntur cursum primi elementi, dummodo cingantur ab eo.

1115. Nec tantùm collisione & motu in terræ superficie, sed etiam in ejus cavitatibus ignis potest accendi, ut cùm saxorum vel silicium fragmenta ex cavitatum fornicibus in substratum solum decidunt &c.

1116. Et hinc oriuntur *Terræ motus*, quoties nimirum pingues ibi & crassi fumi ab ignis aliqua scintilla accenduntur. Nam ita subito rarefacti omnes carceris sui parietes magna vi concutuntur.

1117. Illustrantur hæc & firmantur cuniculis militaribus, quibus immixtus pulvis tormentarius atque accensus, propugnacula & arces & maximas montium rupes disjicit.

1118. Contingit etiam aliquando, cùm terræ motus fiunt, ut parte terræ disjecta & aperta, flamma per juga montium §. 870. seqq. cælum versus erumpat.

1119. Ab ignibus quoque subterraneis fontes calidi seu *therma* oriuntur, dum per canales igne æstuant aqua transiens incalescit. Mistura heterogeneous corporum, per fermentationem quandam, eundem in aquis effectum producere potest. Repete §. 1110.

1120. Porro in agitandis corporibus terrestribus, pro eorum diversitate, Ignis ordinem & gradus hosce sequitur §. 114.

1121. I. Si corpora constant particulis crassitie ac tenuitate multum differentibus & plerisque ramosis, inter quas amplius meatus interjaceant.

1122. Uti ligna, cæspites & similia, quibus vulgo ignis alitur,

1123. Commoventur & abripiuntur primò partes tenuissimæ, deinde mediocres earumque ope crassiores, relinquuntur tandem crassissimæ, id est, *ciperes*.

1124. Ita cùm incenditur cæspes, primò tenuis & quasi fa-

L

gax

gax aliqua flamma exoritur, quæ postea in maiorem adolescit.

1125. Cineres autem cum potuerint resistere actioni ignis, possunt etiam obistere actioni luminis ipsumque reflectere.

1126. Cumque nulla corpora reflectendis radiis magis apta sint quam alba, nulla minus quam nigra §. 946. seq. *Cineres* quidem *albi*,

1127. *Carbones* autem *nigri* sunt: omnis enim eorum superficies particulis terrestribus mollioribus contexta est,

1128. Quæ propter suam teneritudinem tam parum obistunt radiis luminis, ut eos suffocent §. 206.

1129. Mollities illarum particularum inde probatur, quod carbonem tam facile ignescunt, utpote quorum partes jam ante fuerunt commotæ. Conf. §. 1123.

1130. Atqui præcedente ustione particulæ istæ non sunt absumptæ, quia longis & multiplicibus ramis impleæ §. 1121.

1131. Et quemadmodum carbonem nigri, postquam molliores illæ particulæ separatæ sunt, in cineres albos rediguntur:

1132. Sic pannus lineus radiis solis expositus dealbatur, separatim particulis tenuioribus, quæ nigroris similisve coloris causæ erant.

XXIX. *Ab Igne emollitio & induratio, liquefactio & exsiccatio, fumus. Ignis distinctio.*

1133. II. **S**I corpora conflata sunt ex particulis, quarum hæ non multò difficilius quam illæ à vicinis separantur, ut glacies, cera, plumbum;

1134. Igne primò quidem pleraque *emolliuntur*, dum particulæ eorum agitantur quidem, non separantur tamen, ut in cera, manu calida, ferro ignito apparet.

1135. Deinde verò igne fortiùs agente *liquefunt*, hoc est, particulæ eorum non solum in aliquo *motu* constituuntur, verum etiam separantur, quod pertinet ad litum. Confer §. 1027.

1136. Atque si tantus est illarum particularum motus, ut quædam ex iis in aërem vel ignem vertantur, sicque plus solito spatii ad motum suum continuandum exigentes alias expellant,

1137. Corpora ista liquida effervescent & bulliunt.

1138. *Effervescent* æquabili ratione sine magna perturbatione, ubi materia non est valde heterogenea, ut in aqua pura, vino.

1139. At *bulliunt* insuper, ubi materia valde heterogenea est, & partim volatilis ac spiritiuosa, partim viscosa: ubi è volatili materia spiritus

spiritus aërius bullarum cavitates replens, è viscosa autem bullarum particulæ generantur. Confer §. 1014.

1140. At si motus ille caloris non superet gravitatem, materia non dilatatur nec rarefit.

1141. Hinc particulæ metalli aut vitri liquefacti non avolant in amplius spatium, quoniam vis gravitatis in iis major est.

1142. III. Corpora quibus insunt multæ particulæ tenues, flexiles, lubricæ, aliis crassioribus aut ramosis intertextæ, sed non valde firmiter annexæ, veluti lutum vel pannus aqua madidus,

1143. Igni admota priores particulas exhalant §. 1122. & hoc ipso *siccantur*, id est, liberantur fluidis illis particulis, quæ cum simul sunt congregatæ §. 1049. aquam aliumve liquorem componunt. Hinc etiam corpora *indurantur*, ut patet in luto, & pori multi arctantur, aliis contra dilatatis §. 866.

1144. Cum verò pingues liquores non tam facile è panno aliisque id genus corporibus, vel igne vel vento exeuntur, manifestum est, olei particulas non esse instar aquæ particularum lubricas & læves, at potius ramosas & implicantes.

1145. Unde etiam oleum commune frigore citius coagulatur quàm aqua: quod est consentaneum iis quæ habuimus §. 264. 841.

1146. Signum aut certè effectus ignis est *Fumus*, sensibilis aut insensibilis §. 411.

1147. Oritur ille dum excussæ ab Igne particulæ, ad motum minus aptæ, per aërem tardius volant §. 265. 909. 954.

1148. Sic terra quoque fumat hiberno effossâ tempore, propter calorem inhærentem. Unde nix citò liquefit, quæ agro cadit recens inarato.

1149. Tandem *Ignis* (voce latius accepta) est vel *tantum lucidus*, ut in lignis putridis;

1150. Vel *tantum calidus*, ut in fimo aut fœno putrescente, item in sanguine animalium; (Confer §. 1110. 1119.)

1151. Vel calidus & lucidus simul, qui demum perfectus Ignis censeretur debet. §. 1098. seq.

1152. Ignis hujus visibilis & ardentis pars minima vocatur *scintilla*, quæ ita componitur ex plurimis particulis materiæ primi vel etiam tertii elementi, ut gutta ex plurimis vaporum particulis §. 1049.

1153. Hic ignis vel spatium aliquod aëris solus occupat, expulsis inde globulis cælestibus, ac dicitur *Flamma*; vel in poris tantum & meatibus corporum continetur.

1154. Ubi vel materiam aliquam sensim depascit, ut in funibus bombardicis, aut ea quidem destitutus tempore tamen aliquo eget, ut inde egrediatur; quod fit in *ferro candente & prunis*.

1155. Ferrum candens per ingressum particularum ignis dilatatur (haut secus ac panis per ingressum lactis aut vini in ejus poros), & ab igne remotum iterum ad priorem quantitatem redit.

XXX. *Fossilia, Sal, Sulphur & Mercurius, Lapides, Calx, Cinis, Vitrum, Metalla, Ferrum.*

1156. **H**Atenus de Terra, Aëre, Aqua, Igne, quæ mundi sublunaris *Elementa* vulgo censentur, eaque occasione etiam de *Meteoris* quibusdam, veluti nubibus, vento, nive &c. quæ parum à prioribus diversa sunt, egimus.

1157. Nunc dicendum nonnihil est de iis corporibus, quæ ex terra effodiuntur, atque inde *Fossilia* appellantur, cujusmodi sunt lapides & metalla & alia quædam molliora.

1158. Huc primò pertinent activa *Chymicorum principia*, Sal, Sulphur & Mercurius.

1159. Ubi nomine *Salis* intelligimus succum acrem, ex salis particulis teretibus & rigidis §. 1056. terræ interioris §. 8069. meatibus interceptis & vi caloris gladiolorum instar contusis factum:

1160. Perinde ut virga ferri candentis rorunda crebris malleorum ictibus in laminam oblongam complanatur. Quod enim hîc malleus præstat; id in particulis istis faciunt dura crassissimæ terræ meatuum latera, quibus hinc inde alliduntur atque affricantur §. 287. seq.

1161. Nomine *Sulphuris* intelligimus mollissimos & minutissimos ramulos pinguis vel oleagineæ materiæ.

1162. Tales esse Sulphuris particulas satis constat, quia maximè est inflammabile. Hinc enim sequitur ejus particulas valde tenues & molles esse §. 1123.

1163. Nomine *Mercurii* intelligimus argentum vivum liquorem valde ponderosum & opacum, ex particulis crassis, lubricis ac lævibus constantem §. 791.

1164. *Pulveris tormentarii*, è sulphure, nitro (vulgo Sal petræ vocant) & carbone confecti, vis è dictis intelligitur, eo quod Sulphur quidem citissimè inflammatur, carbones etiam facilè ignescunt §. 1129.

1165. Salis autem particulæ rigidæ & oblongæ spiculorum instas
in.

in flamma vibrantur, & in alia corpora impingentes magnam vim habent ad eorum minutias concutiendas.

1166. Salis moles in montibus quibusdam instar lapidum aliquando concrefcunt, quoniam aqua maris eò ascendente §. 1064. flexilibus ejus particulis ulterius pergentibus inflexiles cohærent.

1167. Simili modo Sal à particulis dulcibus separatur, dum aquâ marinâ fossulis minimè profundis exceptâ, illæ aëre calido & sicco in vapores attolluntur.

1168. Qui hæc & similia §. 850. attendit, ac pariter illa quæ de corporum durorum cohærentia generatim diximus §. 242. memoriâ repetit, is haud difficulter intelliget, quomodo *Lapis* ex pluribus arenæ particulis concrefcatur.

1169. Sic enim quandoque contingit, ut fontes secum vehant saxorum, per quæ fluunt, exiguas particulas, talibus præditas figuris, ut aquâ illâ tardiùs postea alicubi morâ cohærentes lapidem componant.

1170. Itaque fontes existunt in quibus lapides producuntur. Nec dissimilis est *calculi* in corpore humano generatio.

1171. Et quoniam non modò lapidum, sed aliorum quoque fossilium particulæ variæ fontibus per terræ meatus currentibus misceri solent §. 1119. inde *minerales* seu *medicata aqua* diversæ proveniunt.

1172. Lapidés ab *ossibus* & *lignis duris* eo distinguuntur, quòd hæc beneficio succi alicujus per eorum poros in omnes partes distributi crescunt. Lapidés autem crescunt solùm per additionem aliquam partium, quæ vel exteriori superfici ei adhærent vel interiori pororum impinguntur.

1173. Lapidés differunt à *metallis*, quòd hæc malleo duci & igne fundi possunt, adeo ut refrigerata pristinam figuram recuperent. Lapidés non item.

1174. Lapis tamen malleo friari ac vehementiore igne sic dissolvi potest, ut abeat in calcem, quemadmodum ossa & ligna in cineres resolvuntur.

1175. Hæc duo sic differunt, quòd *cineres* sunt reliquiæ illorum corporum, quorum pars magna igne consumpta est. *Calx* autem eorum, quæ ferè tota, ustione absoluta, manent.

1176. Conveniunt in eo, quòd particulas tam solidas & crassas habent, ut ignis vi ordinaria sursum instar vaporum attolli non possint.

1177. (Soliditatem eorum & crassitiem vel inde probes, quòd veluti coticulæ quædam ad acuenda & polienda alia cor-

pora dura, veluti cultros, gladios, adhibentur, quem usum quoque præstant arena, & *smiris* comminutus, quo integro vitrum finditur.)

1178. Et figuras habent ut plurimum irregulares & angulosas, unde fit ut aliæ quidem aliis incumbant, sibi tamen mutuò non adhæreant, nec etiam nisi fortè in minutissimis quibusdam punctis verè se contingant.

1179. (Unde colliges, quod inter cinerum particulas, quibus vas aliquod impletur, pori dentur quàm plurimi. Est simili modo particulas arenæ sibi incumbentes ær vel aqua intercipit.)

1180. Cum autem postea validus ac diuturnus ignis, id est, particulæ tertiæ elementi, tenuiores illis crassioribus, cum globulis secundi elementi à materia primi abreptæ, circa ipsas celerrimè quaquaversus moveri pergunt,

1181. Paulatim earum anguli atteruntur & superficies lævigantur §. 310. & forte etiam nonnullæ inflectuntur, sicuti de salis particulis antea diximus §. 1159. seq.

1182. Atque ita aliæ supra alias obliquè repentes & fluentes non punctis duntaxat, sed exiguis quibusdam superficiebus sese contingere incipiunt.

1183. Adeo ut nec æris, nec aquæ, nec alterius cujuscunque materiæ tertiæ elementi particulæ inter tales cinerum & calcis particulas intercipientur, quemadmodum aliàs contingit §. 1179.

1184. Atque hinc existit corpus liquidum, quod ab igne remotum & frigore concretum *Vitrum* appellatur. Similiter aquæ particulæ, quoties à materia cælesti agitari desinunt, in *Glaciem* convertuntur §. 964.

1185. Cum verò aquæ particulæ minùs crassæ sint particulis cinerum, non tanta vis ad illas, quanta ad has agitandas requiritur. Nec proinde tam remisso frigore aqua consistit.

1186. Vitrum igitur valde *durum* est, quia particulis constat tantùm crassis & inflexibilibus, quæ non ramulorum intextu, quemadmodum in mollibus contingit; sed contactu solo junguntur §. 242.

1187. At quia superficies, secundùm quas ejus particulæ se invicem tangunt, sunt admodum breves, vitrum quoque valde *fragile* est. Multaque mollia difficilius franguntur, quia partes habent sic intertextas, ut separari nequeant nisi pluribus earum ramulis ruptis atque evulsis. Sic annuli in catena id efficiunt, ut facile quidem huc illuc inflectatur, non autem divellatur.

1188. Porro vitrum, quando liquidum, varias induere potest figuras, & postea concretum retinet eam quam ultimò induit §. 288.

1189. Ea-

1189. Eademque ratione poros servat, per quos globuli secundi clementi quaque versus pergunt secundum lineas rectas moveri, uti prius movebantur in liquefacto §. 793. Unde vitrum *pellucidum*.

1190. Denique vitrum *rigidum* est. Nam quoties externa vi aliquantillum inflectitur, illico pororum ejus figura nonnihil mutatur §. 353. Unde particulæ materiæ per illos transire assuetæ, viasibi solito minus commodas inventientes, ac nihilominus quoad possunt in motu suo perseverantes §. 152. impetum faciunt in eorum parietes, ad priorem ipsis figuram reddendam §. 336.

1191. Et proprietas hoc pacto *resiliendi* insignis est in omnibus corporibus duris, quorum exiguæ superficies mutuo contactu, non ramulorum intextu coherent.

1192. Sicuti autem vitrum, propter suam perspicuitatem, in lumine deferendo visui nostro inservit: ita metalla commodant auditui in efficiendo sono.

1193. Valde enim sonora sunt ea ex quibus campanæ, nolæ ac tinnabula parantur: quod signum est evidens, in eorum poris aëris divagari plurimum.

1194. Et instrumenta ista *cava*, præcipuè si *pendula* fuerint, semel *perculsa* aliquamdiu resonant: quoniam ex percussione *tremorem* concipiunt, quo aër intra cavitatem contentus hinc inde alliditur.

1195. Qui tremor appositione manus aut alia quacunque de causa dum impeditur, confestim sonus perit.

1196. Adeò ut mirificè hinc roborentur quæ de natura Soni docuimus §. 948. seqq.

1197. Originem metallorum quod attinet, cum adeo solida sint & gravia §. 1141. ut ex crusta terræ superioris, quæ mollior, vix oriri possè videantur, verosimile est, illa in terra interiore delitescere §. 834. 843. 852. seqq.

1198. Inde autem ad nos pervenire, quod acres succi per meatus inferioris terræ fluentes quasdam illorum particulas ab aliis disjungant. (Nam & aquæ metallicæ eorum particulas secum vehunt §. 1171).

1199. Quæ deinde materia oleagineæ involutæ atque vestitæ facile ab argento vivo, calore rarefacto, sursum rapiuntur, & pro diversitate suarum magnitudinum & figurarum diversa metalla constituunt.

1200. Et quando sic ascendere vix possunt metalla, nisi ex illis partibus terræ inferioris, quibus exterioris fragmenta, nulla intercurrente aqua, conjuncta sunt, inde patet, cur non in omnibus terræ locis inveniantur.

1201. At-

1201. Attolluntur autem per terræ venas versus montium radices : ubi cum pluribus rimis terra fatiscat , metalla potissimum congregantur ; & quidem in iis montium partibus , quæ Sole magis incallescunt.

1202. Itaque nobiliora metalla , ut & lapides pretiosi , ex. gr. adamas , in regionibus tantum calidis reperiuntur , quia prius quam ad ejusmodi puritatem §. 798. materia perducatur , permultum actionis & motus requiritur.

1203. Quamvis autem ista ratione aurum inter metalla sit pretiosissimum , Ferrum tamen cum sit maxime vulgaris usus inter homines , & præ cæteris corporibus à magnete afficiatur , in hac epitome , quæ magis obvia & communia persequitur , potius attingendum est.

1204. Primò nullum metallum absque ignis adminiculo tam difficulter malleo flectitur. 2. nullum adeò difficulter igne liquefit. 3. nec ullum tam durum sine alterius corporis mistura reddi potest , veluti cum fusione fit chalybs.

1205. Quæ tria indicio sunt , ejus ramenta §. 1198. magis ramosa sive angulosa esse quam cæterorum metallorum , atque ideo sibi invicem firmitus annecti.

1206. Utcunque autem Ferrum aliis metallis durius & minus fusile deprehenditur , est tamen ex minimè ponderosis , & facile rubigine corrumpitur , aut aquis fortibus eroditur.

1207. Quæ omnia docent , ejus particulas non esse aliorum metallorum particulis solidiores , uti sunt crassiores ; sed multos in iis meatibus contineri.

1208. Utque de rubigine verbum addamus , ea constare videtur exhalationibus ac spiritibus vel partibus sulphureis , quæ ex ramentis ferri efflorescunt ejusque meatuum orificia occludunt.

1209. Ejus initia sunt aëris humiditas & situs. Usu verò atque attritu , item inunctione olei tollitur aut præcaveretur.


1210. Qualis autem ratio est æruginis , atque rubiginis , talem etiam propemodum esse cogitabis mucoris. Sic panis , vestimenta , fructus quidam , caro aliaque id genus mucescunt.

Qui latiore Principiorum Physicorum explicationem desiderat , in adjunctis XXXV Disputationibus eam inveniet. Attentus interim Lector , meditando atque alia cum aliis conferendo , Physica Contracta demonstrationibus suis minimè carere animadvertet. Quæ præterea in Philosophia Naturali vel maxime quæ requiratur , ex Theoria Corporum Viventium secutura petere liceat.

DISPUTATIONES P H Y S I C Æ.

DISPUTATIO I.

Qui fiat, quod Philosophia, & præsertim Physica, licet Iurisprudentia ac Medicina radix ac fundamentum recte judicetur, plerumque tamen minore sit in pretio.

1.  Adix arboris in terra plerumque latet abscondita, infimum locum, qui pedibus nostris substernitur, tenens calcatur, neque in hominum conspectum assurgit. Interim totius arboris vita & incrementum ab ea tanquam à prima origine dependet, quodque rami, folia, fructus lætè proveniunt humanos in usus, & visum non parum oblectant, id totum sua tum firmitate tum sæcunditate præstat ipsa.

2. Pari ratione *fundamenta* ædificiorum, ima in terris sede locata, minùs vulgò incurrunt in sensus, minùs spectantur. At quæ superstructa sunt atque inædificata, & oculorum & admirationis objecta ferè sunt potissima. Et quamvis absque fundamenti soliditate erecta stare & cohærere firmiter non possint, ipso tamen solent ut plurimum magis à spectatoribus celebrari.

3. Quemadmodum se radix habet ad cacumen arboris & fructus ejus, quemadmodum item fundamentum ad altiores contignationes ædium & ipsum tectum: ita Philosophiam se ad Juridicam & Medicam habere facultatem existimare convenit. Neque hoc putem ullo modo paradoxum apparere posse iis, qui vel tritissima intelligunt ac probant effata, quibus Medicina & Jurisprudentia ibi, ubi Physica & Politica desinunt, inchoari pronunciantur.

4. Quamvis enim illæ disciplinæ sine Philosophia tractari soleant à multis, quatenus Jurisprudentia leges à principis voluntate pendentes, Medicina observationes & experientiam sequitur; nemo tamen præclarum & solidum quid in iis præstare novit, nisi Philosophiæ præceptis imbutus ante fuerit. Nam facile est ostendere, veram Juris-

M

pru-

prudentiam in morali doctrina, doctrinam moralem una cum Medicina in Physica, Physicam denique in Metaphysica vel prima Philosophia radicari ac fundari. Sed jam illud non ago. Solum doceo, quomodo Jurisprudentia & Medicina magis quam Philosophia in humana societate sint conspicuæ, sæpiusque nobilitent ac nobilitentur, & propter uberiores aut certe propiores utilitatem pleniori quasi ore laudentur, etiamsi vitalem succum & alimentum omne à Philosophia primitus hauriant ac mutuuntur.

5. Eadem etiam similitudine demonstro, quomodo Facultates istæ *Superiores* appellentur. Nempe eo tantum sensu, quo altiores arborum atque ædium partes, quia magis in sublime attolluntur, radice & fundamento superiores dicuntur; non autem, quod talis omnino istarum disciplinarum sit ordo ad Philosophiam, qualis est capitis humani ad pedes: cum radix in arbore, capiti & ori in homine, secundum vulgarem plantæ inversæ atque hominis comparisonem, respondeat.

6. Quod si forte alia de causa, veluti regiminis civilis intuitu, eamput Philosophiæ Jurisprudentia censeatur, id non magis in ipsam Jurisprudentiam, quam in Politicam, quæ pars est Philosophiæ, quadrare certum est: cum plures legum civilium, quatenus à politica distinguuntur prudentia, imperiti summa cum laude respublicas olim gubernarint atque etiamnum gubernent.

7. Porro *Philosophiam* cum radicem & fundamentum Jurisprudentiæ & Medicinæ affirmo, veram & sanam intelligo, quæ solius rectæ rationis lumen sequitur, quod neque prudentia Juris neque sanandi ars repudiare velit, nec si velit, possit. Nam si doctrina illa Philosophiæ titulo ornetur, quæ Aristotelis, Thomæ, Scoti alteriusve scholastici hominis testimonio fulcitur; quis ita nominatæ non infinitis modis civiles leges anteponat, non privata alicujus ethnici aut monachi, sed publica Christiani Imperatoris auctoritate subnixas?

8. Et ne justum veræ Philosophiæ pretium statuendo, minoris quam par est, æstimare videar duas illas nobilissimas disciplinas, dissimulare nolim, quod philosophicis scientiis *dignitatis* ordine soleant non sine causa anteferri. Quod ipsum ut dextrè accipiatur, dignitatis quædam distinctio est adhibenda. Alia quippe ipsius naturæ perfectionem, alia usum in vita & societate humana magis respicit. Priori consideratione homo, utpote ad imaginem & similitudinem Dei factus, dignior est equo; posteriori respectu equus sæpe præfertur homini,

mini, ut cum dominus quispiam pluris facit equum suum quam servum, & hunc mavult quam illum perdere, quod ille majorem ipsi utilitatem aut voluptatem præster.

9. Atque posterior hæc dignitas commoda vitæ quotidianæ spectans, intelligenda venit, cum Jurisprudencia & Medicina digniores Philosophia judicantur. Homines enim majus in terris nihil habent vita, sanitate ac bonis externis, quibus ea licet conservare. Atqui eò maximè pertinent istæ facultates, ut hæc facta tecta nobis maneant, & ab injuriis quibuscunque commoda & justa ratione defendantur.

10. At enim, inquit aliquis, quæ possunt hæc disciplinæ commodum humanæ societati ullum conferre, quod non debeant iis, in quibus radicem ac stipitem habent, acceptum referre? Respondeo, hunc esse morem hominibus familiarem, ut illud potissimum considerent & in pretio habeant, à quo proximè & nullius alterius interventu rei manat utilitas. Ita flores & fructus amant magnique faciunt, de radice, de succo, quem terra largitur, de solis luce & efficacia, utpote remotioribus florum & fructuum, ac proinde commodorum & voluptatum inde provenientium causis, & principiis magis generalibus, parum cogitantes.

11. Postremò tandem, si vera naturalis Philosophia ante hæc tempora minùs cognita atque exulta fuit, & si Medicina quodcunque boni habuit non ex illis, quæ in Scholis Physicis frequentabantur, disputationibus hausit; sed potiùs ab experientia & observatione, nec non eorum scriptis, qui ejusmodi philosophandi viam nunquam trivere; quid mirum, si Philosophia naturalis minoris hæcenus æstimatione, neque ita, ut oportet, cum arte Medica copulata fuit?

12. Ubi inceperimus in rerum corporearum viribus & natura indagandis clarioribus uti principiis, quorum & veritatem ratio Mathematica probet, & efficaciam artes Mechanicæ demonstrent, alia & meliora omnia speranda erunt.

DISP. II.

Physica definitio, certitudo, utilitas, jucunditas, divisio.

1. **P**hysica est scientia rerum naturalium. Unde & Philosophia naturalis dicitur: distincta à *supernaturali* seu Metaphysica, & à *rationali* seu Logica, nec non à *moralis* seu practica.

2. *Natura* verò à nascendo cum appelletur, res naturales propriè dicuntur,

dicentur, quæ generationi & corruptioni sunt obnoxia; adeoque mutabiles.

3. Nec tamen ideo Physica desinit esse *scientia*, quod agat de re mutabili. Quemadmodum enim de corpore incorporea, de re immutabili mutabilis cognitio datur: ita potest rerum valde mutabilium notitia esse immutabilis; cum æternæ veritatis esset de iis dentur, cujuscumque vel illud ipsum est, *omne corporeum est mutabile*.

4. Si quæras, cur tam pauci semper fuerint qui ad scientiam hanc pervenerint, cur pauci adeo sapientes etiamnum evadant; hanc illius raritatis causam præcipuam esse noveris, quod nullus infans erroneas de rebus naturalibus cogitationes evitare, nec ullus adultus eas facile deponere atque emendare possit.

5. Si ulterius roges, cur Arithmetica & Geometria dudum fuerint ad majorem perfectionem deductæ, quàm Physica; similis est responsio: quod de rebus Physicis multa ab ineunte ætate hausimus præjudicia; de rebus Arithmeticis & Geometricis non item. Vide quæ de Errorum origine & progressu in Prolegomenis Logicis tradidi.

6. At inquis, quare potius de rebus Physicis, quàm de Mathematicis erroneas opiniones à teneris annis hausimus? Resp. De rebus Physicis, terra, sole, stellis, aqua, dulci, amaro, sonis &c. varia judicia infantes tulimus, 1. quoniam in sensus nostros quotidie incurrebant; nam *objecta*, quemadmodum dici solet, *movens sensus*, atque ad operandum excitant: 2. quia res naturales ad vitæ, quam infantes ingredimur, conservationem faciunt. Ad corporis autem nostri utilitatem ista ætate referimus omnia. Adi citata Prolegomena.

7. At res ad Mathesin puram spectantes, ex. gr. novenarius, denarius in abstracto, triangulum, octogonum, rhombus & similia, non ita sensus afficiunt, nec primæ ætati necessarium usum præstant. Ideoque de ejuscumque rebus nihil ante judicavimus, quàm ad judicandum apri essemus. Si nihil judicavimus, ergo nec erroneas opiniones hausimus.

8. Quæ verò de Geometricis & Arithmeticis dixi respectu rerum Physicarum, eadem applicabis ad Chronologica & Historica, si cum Physicis conferantur. Alias imperfectæ hæctenus Physicæ causas jam prætergo, ac de usu ejus aliquid addo.

9. Certè enim, accurato studio si tractetur, Naturæ nos veluti *dominos* facit, ostendendo, quomodo res creatæ nobis inservire aptæ natæ sint: unde *Medicina* aliæque plures artes nascuntur.

10. Ad.

10. Ad *Creatoris* etiam sapientiam, bonitatem & potentiam agnoscendam eadem scientia plurimum confert. Psal. 19. Rom. 1. 20.

11. Sed præstantia & *jucunditas* naturalis Philosophiæ vix satis prædicari potest: Non illa hominum manu constructas machinas, non linguas & loquendi modos à rudi populo introductos; sed Res à sapientissimo Conditore factas contemplatur. Non morum & rituum & vagæ consuetudinis; sed Naturæ immotis gubernatæ legibus arcana rimatur.

12. Antiquitates arident? habemus hîc æterni Dei externa opera antiquissima. Novitatis amor animos tenet? inveniemus in scientia Physica haut paucas à majoribus ignoratas, nostro autem seculo primum detectas veritates. Inveniemus quam plurima contra opinionem vulgi militancia (*paradoxa*).

13. Peregrinationis sumus amantes, & urbes, aulas, regiones lustrandi studio capimur? toto terrarum orbe innumeris modis ampliora & splendidiora in hac scientia spectanda nobis exhibentur, immensum Cælorum expansum ac cælestia sidera universa.

14. Multa in his cunctisque adeo rebus naturalibus ab ineunte ætate, ut modò dictum, erravimus omnes, dum augusta Dei opera nimis angusta nobis repræsentavimus, & pleraque iis, quæ circa terram quotidie nobis occurrunt, quàm par est similiora credidimus.

15. Multa circa eadem errare Gentium antiqui dum certis principis aut necessariis experimentis destituti, & superstitione abrepti opus ferè cum opifice confuderunt.

16. Multa denique in iis allucinati qui à *Schola* nomen ducunt Philosophi, dum ea quæ extra scholam nec sunt nec visuntur usquam, nobis obtruserunt.

17. Præcipuis cunctorum istorum errorum fundamentis rejectis, novæ Physices principia stabilire & illustrare cura nobis erit: ex quibus veriores de rebus naturalibus sententias facile percipere ac demonstrare naturæ studiose liceat.

18. Hoc fine rem corpoream seu corpus naturale non modò generaliter & universè contemplabimur; verùm etiam speciatim de natura cælestium ac terrestrium corporum, ac hominis denique illorum omnium spectatoris, proprietatibus atque actionibus, quantum permittet otium, agemus.

19. Solet enim Physica in partem generalem & specialem *dividi*, cujus quidem specialis, ob rerum contemplandarum copiam ac varietatem,

tatem, latitudo est amplissima. Quæ cum nullo humano ingenio adæquari vel exauriri possit, Physicam ea ratione perfectam nec nobis nec aliis promittere audemus.

DISP. III.

Corpus esse, est extensum esse.

1. **R**es corporea generaliter considerata est res longa, lata & profunda. Cumque & longitudini extensio quædam insit, & latitudo & profunditas extensionem sonent, uno etiam verbo corpus describi potest, *res extensa*.

2. Nam 1. hujusmodi extensio necessariò *alicui Rei* existenti convenit. Quod enim non est, id utique nec longum, latum aut profundum est. Et quomodo, quæso, illa tria, quorum neque numerum augere, neque ordinem mutare animus humanus potest (Confer paraphras. Med. V. 117. 121. seqq.), & quæ singula magnum quid sonant, in eo, quod nullum est, inveniri nobis persuadere possumus? entis nullæ sunt qualitates.

3. Atqui 2. extensio non convenit ulli rei incorporeæ seu spiritali, sed *corporeæ soli*. Quicquid enim in re spiritali cognoscimus, id totum ad intellectum & voluntatem refertur. At neque intellectus neque voluntas ullam longitudinem aut latitudinem aut profunditatem habere cognoscitur. *Quantitas virtutis* rebus spiritalibus attribuitur, quæ in singulari vi intelligendi & efficacia voluntatis consistit; non *quantitas molis*, quæ in longitudine, latitudine & profunditate sita est.

4. Extensio inest 3. *omni corpori*. Extensum quippe & magnum hic non accipiuntur comparatè ad contractum & parvum; sed absolute, sine certæ quantitatis & mensuræ intuitu. Nempe muscæ æquè ac elephantis sua magnitudo competit. Sic Metaphysici docent, omne ens esse perfectum, licet multa sint quæ aliis collata haut immeritò imperfecta dicuntur.

5. Quod si rebus aliquibus longitudo sola sine latitudine, aut latitudo sine profunditate tribui videretur, id similiter fieri putabis vel ob comparisonem cum rebus aliis, vel quod aliquando alterum illorum sine altero considerare soleamus. Ex gr. quia fila, pili, acus plus habent longitudinis, quàm latitudinis, plerumque solam illis longitudinem assignamus. Et quamvis ulna satis crassa sit, habita tamen ratione usus solam in ea longitudinem attendimus. In jugero longitudinem

tudinem & latitudinem dimetimur, de profunditate terræ non cogitantes.

6. Itaque magnitudo, quæ in corpore revera invenitur, completa & perfecta est, quam in rebus certa mensura definitis *trinam dimensionem* vocamus, philosophis etiam *Corpus* dicitur, barbarè corporeitas. Incompleta verò magnitudo, cum sola longitudo attenditur, *Linea*; cum longitudo & latitudo sine profunditate spectatur, *Superficies* nuncupatur. Hæc mentis abstractio tres in corpore dimensiones non separat, nec ulliearum realitatem suam adimit.

7. Extensio talis 4. *semper* convenit corpori, quasunque etiam formas recipiat aut varietates admittat. Quod exemplo guttæ primo destillantis, deinde gelu concretæ, postea in aquam, tandemque in vaporem resolutæ facile declaratur.

8. Denique 5. *extensione nihil in re corporea prius*, quod quidem proprium ei ac positivum sit, intelligimus. Communia enim illa, substantiam, unum, verum esse; aut negativa, non esse aquam vel ignem &c. hic in considerationem non veniunt.

9. Ita, licet omne corpus concipiatur *dividuum* esse in partes, prius tamen cogitatur habere partem extra partem. Hoc autem est, extensum esse. Imò hoc absolutum, extensum esse, prius est illo respectivo, quod in relatione partis ad partem consistit. Extensio fundat esse corporis, Zach. 12. 1. Divisio tendit ad non esse, Luc. 11. 17.

10. Idem judicandum est de *impenetrabilitate*, quæ corporis quidem propria est, sed negativa potius quàm positiva affectio, dependens ab extensione. Quia enim corpori essentielle est, extensum esse, hoc est, partem habere positam extra partem, fieri nequit ut pars una sit ubi alia, vel ut hæc sit in illa, vel (quod eodem recidit) hæc sit illa. Certè non potest intelligi, quod altera pars rei extensæ alteram sibi æqualem penetret, quin hoc ipso intelligatur, mediam partem illius extensionis tolli vel in nihilum redigi. Quod autem in nihilum abit, non penetrat aliud.

11. Facile equidem in extensione habitudinem partium ad invicem percipimus, easque modò negativa divisibilitatis aut impenetrabilitatis, modò affirmativa continuitatis aut contiguitatis relatione afficimus. Possumus tamen etiam extensionem in longum, latum & profundum solam & absolutam optimè concipere, de partium habitudine & relatione non cogitando.

12. Quoniam igitur extensio in longum, latum & profundum ali-

quid

quid reale & positivum est, quod soli & omni rei corporeæ perpetuò convenit, quo nihil prius in contemplatione rei corporeæ menti nostræ occurrit, jure extensio ista censetur *propria essentia seu natura rei corporeæ*. Certè si nihil aliud prius & potius in rebus merè corporeis Deus nobis indagantibus notum fecit, Physicæ nostræ principium inde meritiò arcessimus.

13. Contra, ad essentiam corporis generaliter spectati haudquam pertinet, uti vulgus existimat (quia per sensus corpora nobis innotescunt atque inde nomina accipiunt) *durum vel grave* esse, aliove modo in sensus incurrere. Quia 1. talia non insunt omni rei corporeæ. 2. si insunt, non semper conveniunt: nam res dura potest emolliri, mollis indurari &c. 3. non sunt primum illud & potissimum, quod in corpore intelligitur. Nam posse sensus afficere præsupponit existere aliquid extensum, estque respectus quidam ac denominatio externa, quæ fundatur in priore aliquo attributo interno & absoluto. Corpora vera dari possunt, etiã si nulli dentur sensus, imò illa creata sunt antequam hi crearentur. Vide Genes. 1.

DISP. IV.

Materia substantia servante Deo semper manens.

1. **R**es corporea *Materialis* quoque appellatur, suntque Materia & Corpus, si generaliter consideres, revera unum quid, nempe extensum in longum, latum & profundum. Hoc dico, materia si spectetur non ut hujus aut illius rei, mensæ, vestis materia, sed generatim ut materia, nil aliud est quàm extensum aliquid.

2. Distinguuntur tamen in eo corpus & materia, quod *Materia* vox sit magis Logica & respectiva, significans extensum ex quo aliquid fit. Ita lignum dicitur materia ædificii.

3. Materia seu moles corporea tamen si omnino aliquid reale sit, non tamen ea illius est perfectio, ut nullâ ad existendum causâ indigeat. Solus *Deus* est ens independens, à quo omnia pendent: adeoque etiam materia & quicquid est materiale, quam diu sunt, ab ipso pendeant necesse est.

4. Cum ergo Materia seu res extensa per se existere dicitur & *Substantia* appellatur, non denotatur ejus independentia à causa, sed à subiecto tantum, hoc est, quod nullo indigeat subiecto ad existendum, sicuti figura, motus & similia subiectum requirunt, cui insint.

5. Qui

5. Qui dicunt aliud esse substantiam corpoream, aliud (intellige rem vel modum rei) esse extensionem, illi aut nihil intelligunt voce *Substantia*, aut cogitant de Substantia corporea tam confusè, ac si de incorporea nescio quid cogitarent, in communi Substantiæ conceptu persistentes.

6. Nos autem in hoc Physicarum contemplationum exordio essentia corporeæ vocabulo positivum & reale quid intelligere, idque ab essentia substantiæ incorporeæ, quæ tanquam res intelligens & volens, positivè concipitur, accuratè discernere debemus.

7. Sæpius item ad animum revocabimus, non esse cur extensioni aliud subiectum, in quo existat, ullum assignemus: quia 1. nullo tale animo concipere licet, ut patet ex ante dictis. 2. entia temerè multiplicanda non sunt. 3. extensio sola sufficiens est fundamentum ad sustentandum motum, figuram, situm & alia accidentia omnia.

8. Causa verò quamobrem hoc adeo difficulter initio animus sibi persuaderi patiatur, hæc esse videtur, quod ab ineunte ætate non vidimus extensum ullum, quin peculiari aliqua proprietate distinctum & proprio nomine insignitum foret. Nempe longitudinem, latitudinem & profunditatem consideravimus in igne, aëre, aqua, terra, mensa, cera, atque ita semper in definito aliquo subiecto: nunquam simpliciter extensum existere conspeximus.

9. Sed observandum 1. humanam naturam non desinere esse quid substantiale, licet ea nusquam nisi in Adamo, Eva eorumque liberis existat. Similiter enim extensio non desinit aliquid esse constituens substantiam, licet ea mundo jam constituto ac disposito in terra, mari, cælo, & nusquam absque certa determinatione reperiatur.

10. Obs. 2. non esse confundendum *accidens* propriè dictum cum *attributo* quocunque. Multa enim attribuuntur rebus ac de iis dicuntur, quæ ipsis essentialia, non accidentalia sunt. Inter prædicabilia non modò accidentia recensentur, verum etiam propria, genera ac differentia. Ita nimirum hoc loco extensum, seu longum, latum & profundum esse, non prædicatur, de cælo, terra &c. ut accidens de subiecto, ut sapientia vel calor de homine; sed ut genus vel differentia de specie vel individuo, ut substantia universalis de singulari vel minùs universali, ut animal de ave, homo de Petro.

11. Obs. 3. vulgo à nobis inverti rerum naturam, & rectum cogitandi ordinem negligi. Perpetuò namque cogitandum est, extensum

seu longum, latum & profundum, idipsum esse quod sustinet omnes illos modos & formas, quibus fit, ut res talis aut talis esse dicatur, ut aqua, glacies, vapor; quemadmodum in specialiiori contemplatione physica apparebit. Vulgo autem contrarium cogitamus, dum formas & modos illos, unde res quælibet suas denominationes accipiunt, habemus pro fundamento, quod longitudinem, latitudinem & profunditatem sustentet.

12. Stat igitur servante Deo & substat accidentibus materia seu extensum, quod, per semetipsum si spectetur sine ullis formis, iners & otiosa quædam moles est; sed quæ nec minuitur, nec augetur, cum à Deo, qui constans, sapiens & bonus est, nec proinde destruit opus manuum suarum Job. 10: 3. in eadem semper quantitate conserveatur. Unde *Materiam generationis & corruptionis expertem* uno ore docent Philosophi.

13. Quod vulgo non animadvertimus, dum ex. gr. perperam existimamus, ignem, sic exstingui, ut prorsus esse desinat, quasi levi oris flatu destruere possemus, quod omnipotentia sua Deus creavit, aut quasi illico abiret è mundo quod abiret ex oculis nostris. Sed fundamentum hujus erroris est, quod omne corpus sensibile esse debere putamus. Quod in fine disp. 3. refutavimus. Dividere quidem ac separare possumus partes materiæ ex. gr. ignis, quæ conjunctæ visibilem flammam faciunt. Verùm *divisio ut non facit, ita nec tollit materiam*, sed factam & extensam consequitur, disp. 3, th. 9. Divisione sæpe contingit ut desinat esse tale corpus, sed ut corpus esse desinat, fieri nunquam potest.

14. Quoniam verò nobis in mundo nusquam occurrit materia nisi modificata & ad certam formam restricta, hinc præter *causam primam*, Deum, alias etiam consideramus, quæ *secunda* appellantur. Et hæc quidem non conservant materiam, quatenus aliquid extensum est (id enim à solo Deo); sed concurrunt tamen ad efficiendum, ut res materialis eo modo esse pergat quo est, eandem speciem, idem nomen retineat. *Non conservant*, id est porro existere faciunt; sed perditam ex parte entitatem restituunt, ut alimenta; vel causas corrumpentes remonent, uti sal à carne arcet putredinem efficientes causas.

15. Itaque distinguendum est inter *Materiam primam*, hoc est extensum simpliciter & universè consideratum, quod mera substantia est, à solo Deo pendens; & *Materiam secundam*, hoc est aliquid hoc illòve modo extensum, hac illàve forma præditum, in certo

rerum

rerum genere collocatum. Nam inde existit aliquid concretum ex substantia & modo uno vel pluribus, quibus talis constituitur substantia. Materia prima ad primam & generalem, materia secunda ad secundam & specialem Physicæ partem spectat, disp. 2, fine.

16. Materia prima nec magis nec minus recipit, cum nec plures nec pauciores tribus dimensiones in corporea mole concipere liceat. Atque ita *substantia corporea verè in indivisibili consistit*. (ex. gr. corpus visibile non magis est corpus quàm invisibile, durum non magis corporeum quàm molle, non magis participat naturam corpoream terra quàm ignis.) sicuti neque augeri aut minui potest, neque generatur aut corrumpitur, uti diximus th. 12.

17. At materia secunda vel substantia hæc aut illa modò magis, modò minus talis esse dicitur, ejusque essentia aliquam latitudinem habet, potestque & minui & multiplicari. Verbi causâ, pomum minus est ac dicitur pomum in primo suo rudimento, quàm ubi maturuit, & magis pomum quamdiu integrum, quàm ubi computruit. Poma item aut plura aut pauciora existere possunt in universo; imò vel nulla vel aliqua.

18. Atque hæc talium corporum generationi & corruptioni obnoxia natura cum specialis Physicæ objectum sit (cujus intuitu universalis pars valde exigua est, disp. 3, fin.) inde tanquam à potiori Physica tota *naturalis scientia* nomen adepta est, disp. 3, initio.

19. Sed nostrum est aliquantisper adhuc generali primæ Materiæ theoriæ immorari, quo solidius universæ Physicæ constet fundamentum. Et meritò contemplamur prius corpus extensum, prout unum intelligitur atque indivisum, quàm prout in multa ac varia corporum genera divisum ac distributum cognoscitur.

DISP. V.

Spatium nunquam vacuum. Universum extensum tantum unum. Corpus omne dividuum.

1. **Q**Uod in longum, latum & profundum extensum est, *Spatium* quoque appellatur. Saltem spatium nullum sine extensione animo concipere valemus.

2. Corpus igitur generaliter spectatum & Spatium, quia eandem definitionem habent, revera non differunt. Rationis tamen distinctio est, quando extensum generaliter animo conceptum spatii nomine

mine appellamus, eandemque extensionem in specie consideratam huic aut illi corpori, quod in spatio esse dicimus, attribuimus.

3. Et quemadmodum Materia universè spectata idem est quod corpus in genere, licet concipiatur ut aliquid *ex quo* corpus hoc aut illud: ita spatium reipsa non differt à corpore, quamvis consideretur ut aliquid *in quo* corpus hoc aut illud. Species & individuum dicuntur esse in genere, ut Petrus in homine, homo in animali, nec tamen ideo differt revera Petrus ab homine vel animali. Partes omnes simul junctæ dicuntur esse in toto, & tamen idem prorsus sunt quod totum.

4. At inquis, compositum non potest deferere suam materiam, nec individuum suum genus abdicare, nec partes totum suum relinquere. Corpus verò spatium suum deserit, & manet nihilominus idem corpus, manet idem spatium. Ergo major inter spatium & corpus spatium contentum differentia esse videtur, quàm inter illa præcedentia.

5. Resp. Corpora sua spatia secum afferunt & auferunt, ac si nulla essent corpora, id est, si nulla daretur extensio, nulla etiam forent spatia. Sive igitur dicas, corpus aliquod hoc spatium occupare, sive affirmes, illud *tantam mundi partem esse*, prorsus idem significas. Corpus relinquere spatium seu locum aliquem deferere dicitur, quoties magnitudinem, figuram & situm suum inter certa quædam corpora non servat. Neque enim diversum quid ab his nomina loci & spatii in ista phrasi designant.

6. Nullum proinde corpus absolute loquendo relinquit spatium suum, hoc est, extensum esse definit: at solummodo, quoties locum mutat, definit eundem ordinem & relationem habere ad alia quædam corpora circumstantia, per quæ locum ejus definimus, quoties illud hic aut ibi esse, huc aut illuc venire, hinc aut illinc abire dicimus.

7. Extensionem spatii in vase eandem semper manere dicimus, quamdiu nempe vas idem manet; hoc est, affirmamus extensionem semper esse æqualem, licet jam aer, jam aqua, jam arena, jam plumbum in vase contineatur, hoc est licet ista extensio jam hoc jam alio modo determinata ac formata sit, modò hoc, modò illo nomine appelletur.

8. Quamobrem si spatium omne ipsummet extensum est & à corpore non differt, aut certè si spatium absque extensione cogitari nullum potest (hoc enim nobis in præsentia sufficit) apertum omnino est, non posse dari spatium philosophicè loquendo *vacuum*, hoc est in quo

in quo nihil sit longitudinis, latitudinis aut profunditatis. Nec refert quod longum, latum & profundum illud, quod spatio semper inesse statuimus, sæpe certo nomine insignire nesciamus. Nam & persæpe contingit, ut certi simus adesse hominem, licet proprium ejus nomen & individualia, quas vocant, differentias ignoremus.

9. Potest quidem è valè modò hoc, modò illud, modò istud corpus auferri; sed nunquam potest vas ullum omni corpore destitui. Quod enim nullum includit corpus, id neque includit extensionem; quod non includit extensionem, id neque habet cavitatem; quod cavitatem non habet, vas esse non potest. Itaque si quis cogitet 1. omne corpus ex aliquo vase tolli, 2. nullum aliud in ablati locum venire; is 3. cogitare non potest vas remanere vas. Quoniam duobus prioribus positis vasis latera erunt contigua, nec distabunt amplius vel tantillum, quoniam nihil omnino interjacet.

10. Non datur igitur nec dari potest vacuum eo sensu, quo Physicus nomen illud accipit, intelligens omnis corporis vel extensi absentiam (quia in Physica generali, ubi quæstio de Vacuo movetur, agitur de corpore in genere). At cum vulgi sensu esse corporis in duritie vel alia sensibili qualitate ponatur, ista ratione vacuum posse dari (id est, spatium in quo nihil sit quod sensus nostros afficiat), nemo inficias iverit. Ita vas vacuum appellant, quod tamen aëre plenum, quoniam vulgus hunc pro vero corpore non habet.

11. Quemadmodum autem vulgus generatim judicat, corpus omne sensibile esse debere, atque inde vacuum pronunciat spatium, in quo nihil est sensibile: ita quoque speciatim propter absentiam hujus aut illius corporis sensibilis, quod alicubi esse debere cogitamus, vacuum locum dicimus, ex. gr. piscinam vacuum, in qua non sunt pisces, licet aquis abundet; poculum vacuum, in quo non est vinum.

12. Obtendat aliquis iis quæ demonstravimus; si non datur vacuum, tum nulla erit inter plenum & vacuum differentia, quoniam omnis locus perpetuò plenus erit, nullus unquam corpore aliquo repleti poterit. Resp. Uti vacuum vulgo accipitur non absolute pro omnis absentia corporis, sed relatè, pro absentia certi corporis: ita plenum vulgo non absolute, sed comparatè sumitur. Ex. gr. vas absolute loquendo semper plenum est, at si aliquid vini infundas, ais posse magis impleri, vel nondum esse plenum, nempe vino.

13. Quoniam igitur spatium vacuum, ubicunque statuatur, nul-

lum possumus animo concipere, sed omnia reali materia plena, seu, in longum, latum & profundum extensa esse percipimus, manifestum est, nos non posse Universum corporeum nisi *unum* intelligere.

14. Percipimusque hoc unum ita extensum, ut ad fines ac terminos extensionis animo & cogitatione pervenire minimè valeamus. Unde Mundum ratione magnitudinis, hoc est longitudinis, latitudinis, profunditatis suæ, indefinitum hoc est respectu nostri infinitum dicimus.

15. Et quamvis hæc mundi infinitas, quæ in corporea tantum extensione consistit, & cum relatione ad nostrum intellectum ita nominatur, non habeat affinitatem cum infinitate Dei, quæ in absoluta scientiæ, potentiæ, durationis omniumque perfectionum possessione vertitur, negari tamen non potest, quin operis illius magnitudo magni opificis sit argumentum.

16. Quemadmodum etiam universi creati unitas, quamvis à simplicissima Dei unitate prorsus differat, unum nobis Creatorem demonstrat.

17. Nec sanè potest universum indefinitè extensum ad aliud quid melius referri, quàm ad Deum, qui sic unus est, ut simul sit omnia, Siracid. 43. 29 : & à quo solo pender & conservatur Materia universè spectata, quam primam vocant, disp. 4. th. 15.

18. Est igitur unum continuum extensum, nullo vel minimo vacuo usquam interruptum, nullo, quem imaginatione assequi valeamus, termino circumscriptum vel externo quasi vacuo cinctum, totum ubique plenum, plenitudinem perfectionis, quæ est in Opifice, testans & nostrum implens intellectum, adeo ut mundanæ extensionis fines ullos attingere nequeamus.

19. Ex dictis etiam liquet unam eandemque esse cœli ac terræ omniumque adeò mundi corporum materiam (intellige ipsam illam primam) utpote cujus essentia, ubi ubi ponatur, in extensione sola consistit. Nec aliud nomine Materiæ generaliter consideratæ, quàm extensum aliquid intelligere possumus.

20. Quoniam verò materia omnis naturâ suâ extensa est, omnis etiam natura sive extensione suâ dividua est, cum extensum esse, sit partem habere positam extra partem, adeo ut *Atomis* hoc est corpuscula simpliciter individua nulla dentur.

21. Ac sicuti non possumus imaginari mundum corporeum tam magnum, quin indefinitè majorem esse intelligamus : ita particulam corpo-

corpoream non possumus imaginari tam parvam, quin ulteriùs in duas partes, v. g. dextram & sinistram, cogitatione dividere queamus. Quod autem sic cogitatione clara ac distincta dividere possumus, id etiam à causa aliqua, certè à Deo dividi potest. Hoc ergo sensu dari maximum & minimum in Physica generali negamus.

22. Unde tamen non sequitur, quod negemus dari corpuscula tam parva, ut à creatura dividi amplius nequeant; aut negemus dari talia, quæ, si dividantur, in plura ejusdem generis & naturæ corpuscula non abeant. Dantur utique hoc sensu *minima naturalia*, ex. gr. minima pars aquæ, quæ si dividatur ulteriùs, desinat esse & appellari aqua. Equidem indefinita materiæ divisio nemini videbitur improbabilis, qui vel ad innumera plantarum bestiarumque genera & individua, in quæ jam distributa est mundi hujus materia, animum advertert.

23. Opponit aliquis iis quæ diximus hujusmodi argumentum: Si terra est in infinitum dividua, pars quoque terræ minima (minimum naturale) est in infinitum dividua, tum divisibilitas in parte tanta erit, quanta in toto. Atqui absurdum est divisibilitatem tantam esse in parte, præsertim minima, quanta est in toto valde magno. Probatur major, quia in quavis particula terræ divisibilitas in infinitum æquè intelligenda est ac in tota terra, si vera sunt, quæ ex corporis natura sequi affirmavimus. Probatur minor eo quod totum magis utique dividuum sit existimandum, quàm pars ejus forte millies millefima, quoniam antequam ad hanc partem dividendo sit deveniendum, multiplex divisio præcedere debuit. Vel ita: Si divisione multiplici jam facta in toto, in parte manet adhuc tanta, sequitur illam præcedentem nullam fuisse vel nihil effecisse, nullas partes abstulisse; quod absurdum.

24. Resp. Divisibilitatem in infinitum esse aliquid corpori, quatenus corpus est, essentialiter. Cum autem essentialitæ communi definitione explicatæ non recipiant magis & minus, nec quantitas iis attribui debeat, male in proposito argumento adhiberi voculam *tantum*, perperam in quantitate comparisonem institui. Ita nec dicere liceat commodè, si proprietates maris est humectare, est & proprietates guttulæ, ergo tanta in guttula erit, quanta in mari. *Esse in infinitum divisibile* non sunt verba quantitatem notantia, sed proprietatem, qua corpus aptum natum est ad divisionem usque & usque admittendi.

25. Præterea etiam responderi queat; divisibilitatem in parte millesima terræ non esse tantam, quanta est in tota terra, hoc est quod portio

portio millesima telluris non possit in partes æquæ magnas dividi ac tota terra (hoc pertinet ad quantitatem continuam) licet fortassis dividua sit in partes æquæ multas (quod spectat ad quantitatem discretam) : Ex. gr. si millesima pars terræ possit iterum dividi in mille partes; atque ita deinceps.

26. Denique sicuti non amittitur vis generandi , loquendi , &c. etiam si jam ante sit aliquoties in actum deducta , nec potentia varias figuras recipiendi in cera minuitur propterea quod jam ante innumeras receperit : ita nec minuitur vel tollitur divisibilitas in corpore eo quod aliquoties jam prius sit exercita. Neque obstat quod aliàs majora , aliàs minora corpora facilius à nobis dividi possint , quædam etiam ab his illisve causis dividi prorsus nequeant. Satis enim est quod omne corpus natura sua dividuum esse percipimus : unde concludimus nullum dari corpusculum quin saltem à causâ aliqua , vel à Deo , dividi possit.

27. Diu est quod superiora ista scripsi , quibus nunc attexo , quæ nuper legi apud Cl. If. Vossium de Natura & Prop. Lucis cap. 9. ubi ostendere conatur , dari vacuum , & post alia sic scribit : *Faceſſant itaque trivialia ista commenta , qualia vulgo ad destruendum vacuum adducuntur , cujusmodi est hoc quod dicunt , ubi nullum est corpus ibi nullam esse dimensionem : ac si sublato corpore ex aliquo vase tam firmiter fabrefacto , ut latera non confluant ab externa aëris pressione , non tamen idem quod prius laterum & parietum maneat intervallum.* At quis tam parum est Metaphysicus , ut communem illam notionem , *Non entis nulla esse accidentia* , comprehendere nequeat ? In hac enim fundatur argumentum illud quo vacuum expugnatur , ut antea docuimus. Ipse Vossius cap. 13 , fatetur , *absurdum esse motum statuere , ubi nihil est quod movetur.* Igitur absurdum quoque esse judicet , longitudinem , latitudinem & profunditatem dari , ubi longum , latum & profundum nullum existit. Absurdum judicet , longum , latum & profundum reperiri in non corpore , non ente , disp. 3. th. 2. seqq. Phys. Cont. §. 20.

28. Discamus à Viro Anglo , Physico docto & modesto , frustra illud impugnari experimentis Physicis , quod Metaphysica demonstratione fultum est. Anglus ille est Excellentissimus Robertus Bôyle , qui in Novis Experimentis Physico-Mechanicis pag. 80 , sic scribit : *Ratio , cur Vacuum esse non possit , cum non ab experimentis derivetur aut Natura phenomenis , quæ ad hypothesin eorum (Plenistarum) clarè & distinctè probandam facerent , sed ex notione quam de Corpore conceperunt ; quod existi-*

stere

stere in extensione sola imaginantibus (qua sane proprietas maxime videtur essentialis esse quod à corpore semper indijuncta sit) spatium dicere corpore destitutum (ut phrasi scholasticorum utar) contradictionem in adjecto implicet; Ratio, inquam, hæc cum, sic deducta, hanc de Vacuo controversiam in Metaphysica potius speculatione quam Physica constituat, ei proinde hic loci disceptanda non immorabimur. Ibidem, quantum ego quidem sensum ejus percipio, ait, se factū difficillimum reperire, vel ostendere ubi Cartesiana de corpore notio peccet, vel meliorem in locum ejus sufficere.

DISP. VI.

Vera sententia de essentia rei corporeæ hætenus exposita, quæ universa Physica fundamentum est, à præjudicatis opinionibus accuratius vindicata ac defensa.

I. **H**ætenus magis didacticè & leniore sermone naturam rei corporeæ & quæ cum ea proximè cohærent demonstravimus. Nunc videtur dignitas & necessitas rei exigere (quoniam hic omnes fere à janua aberrant) ut eadem elencticè magis & paulò vehementiore oratione tractemus. Etenim Physica pro objecto habet substantiam corpoream seu materialem, hujusque essentiæ recte explicatio primum illius fundamentum est, quam si à præjudicatis doctorum atque indoctorum opinionibus liberaverimus, scientiarum amplissimæ pulcherrimæque sacrarium recentioribus naturæ mystis reserasse videbimur.

Quæstio de essentia Corporis.

2. Multa sunt quæ rebus naturalibus inesse aut ratio judicat, aut sensus indicat, aut credunt Philosophi. Nam primò in iis agnoscitur *extensio* in longum, latum & profundum; *figura* quæ ex terminatione extensionis illius exsurgit, *situs* quem diversis prædita figuris inter se habent; *motus* vel mutatio situs; & *quies* vel permanio in eodem situ. Ad quæ facile referuntur partis alterius extra alteram positio, divisibilitas, continuitas, quantitas & magnitudo; raritas item ac densitas, porositas & soliditas; locus, distantia & similia. Deinde percipiuntur in substantiis corporeis variæ *qualitates sensiles* (quæ an forte etiam ad prius enarrata referri debeant, jam non disquiro), ut lumen & colores, soni, sapor, odores, calor & frigus, gravitas & levitas, durities & mollietates, aliæque tactiles qualitates. Denique Philosophi

superioribus addunt *qualitates occultas*, easque unà cum sensibilibus seu manifestis plerumque à *forma substantiali*, quam cuique rei natural tribuunt; originem habere decernunt.

3. Jam quæritur, in quonam ex istis omnibus formalis corporeitatis ratio consistat, quodnam sit internum illud principium per quod substantia verè est ac dicitur corporea seu materialis, quo posito ipsa ponitur, ablato ipsa tollitur, variato ipsa variatur: hoc est, quænam sit positiva atque absoluta corporis *essentia* seu natura. Et quæritur hoc non de aëre, terra, auro, lapide aliave re corporea speciatim; sed de *corpore generaliter* atque universè: seu parvum illud seu magnum, seu terrestre seu cæleste, seu finitum seu infinitum fuerit, nihil interest.

In quo non consistat essentia Corporis.

4. Facile autem liquet frustra cum fore, qui pro essentia corporis *formam substantialem* hoc loco voluerit assignare. Nam illa forma, quælibet tandem esse putetur, aut materialis aut immaterialis sit necesse est. Si immaterialis, non potest rem materialem, quæ talis est, internè constituere. Si materialis, remanet quæstio, in quo consistat rei materialis essentia, cui quæstioni formæ substantialis nomine ac notione nunquam satisfiet. Præterea si formæ nomine illud venit, cujus beneficio corpus aliud ab alio distinguitur, ea quoque prorsus aliena erit à præsentī instituto. Non enim de eo nunc laboratur, quo corpora inter se differunt, sed in quo omnia unum sunt, vel, quo inter se ita conveniunt, ut ab omni eo quod est immateriale differant. Postremò si non substantialis, sed *accidentalis forma* intelligatur, perspicuum est, eam pro rei subsistentis essentia sumi haudquaquam posse. Verùm quid de formis accidentalibus, id est, accidentibus & qualitatibus corporis statuendum sit, speciatim nunc videamus.

5. *Occultas* quidem *qualitates* nemo ad essentiam corporis constituendam facere dixerit, qui eas pro certis agendi viribus ac proprietatibus substantiam ipsam consequentibus haberi noverit. Sed velim hîc diligenter attendi, quid in quæstione versetur, quam orî sumus; nempe hoc unum quæritur, in quo nos possimus ac debeamus judicare, naturam corporis consistere, quodnam pro maxime fundamentali & primo substantiæ corporeæ attributo sit habendum. Quare, cum Philosophi hæc debeat esse perpetua regula, nihil ut iudicet unquam, nisi de re clarè distincteque percepta, vitio nobis verti nequit, quod occultas qualitates ipsasque formas substantiales, quæ
ipsimet

ipsimet earum assertores etiam incognitas esse perhibent, hac vice deferamus. Adde quod explicatio naturæ corporeæ primum est Physicæ principium, & quod principii hæc prima conditio, ut quàm maxime clarum sit, cum ex principio non evidenti conclusio deduci evidens possit nulla. Equidem si essentia rei corporeæ in ignoto quodam ponenda est, Physicam humanam consistere posse nego.

6. Ut igitur ab occultis & obscuris ad eas qualitates progrediamur, quæ *manifesta sensibilesque* appellantur, duo nobis præjudicia evertenda veniunt, generale & speciale. Generale est quod ab ineunte ætate cuncti existimavimus, corpus omne sensile esse debere, ita quidem, ut ubi nihil esset quod sensus nostros afficeret, nullum etiam corpus esse putaremus. Inde est quod multi etiam ex adultis & doctis credunt, ad corporis naturam omnino pertinere, esse sensile, neque illud aliter definiri oportere. Speciale est, quod præcipuè duritiam & gravitatem ad corpus quæ corpus requiri, infantes arbitrati sumus. Unde matura etiamnum ætate plerique omnes opinamur, plus esse corporèitatis in saxis & metallis, quàm in aqua aut aëre, & generatim ubicunque plus duritiei ac ponderis experimur, plus etiam corporeæ substantiæ reperiri.

7. Jam verò ut opiniones illas deponamus, consideremus imprimis tantum abesse, ut omne corpus sensile sit, ut ne quidem ullum existat, quin planè sit insensile, dummodò in particulas nervorum nostrorum partibus multò minores, & singulas seorsim satis celeriter agitas divisum fuerit. Nihil quippe sensum in nobis efficere potest, quin moveat nervos membrorum nostrorum. At nervi non sunt minutissimi, sed funiculorum instar è multis particulis minoribus conflati: nec proinde à minutis admodum corporibus moveri possunt. Ergo valde minuta corpora non sunt sensilia. Quis tamen corpora ea esse neget? Qui demonstrationem istam non capit, eandem veritatem experimento discet, si filum sericum rubrum aliòve colore tinctum in quocunque potest tenuia filamenta dividat: sic enim nullus in iis color amplius apparebit. Quod autem hic de colore advertis, si mili pacto ad alias sensiles qualitates accommodabis.

8. Et quotidiana experientia docet, non modò rem coloratam colorem posse perdere, sed etiam odoratam odore posse destitui, sapidam sapore posse privari, atque ita de cæteris, adeoque corpus posse retinere veram naturam corporis, quamvis non sit ad sensum molle, nec durum, nec frigidum, nec calidum, nec denique habeat

ullam sensibilem qualitatem. Et quantum in specie ad duritiem attinet, nihil de duris corporibus sensus nobis indicat, quàm quod resistunt tactui, sicut è contrario molle tactui cedit. Jam si manus aliudve membrum nostrum versus aliquam partem moveretur, & corpora interim omnia ibi existentia recederent eadem celeritate, qua manus nostra accedit, duritiem certè nullam sentiremus. Sed an ideo corpora sic recedentia naturam corporis amisisse cogitare liceret? Et quid est manifestius; quàm rem mollem posse indurari, duram emolli, non amisâ nec propter hoc nec propter illud corporis essentiâ? Si molle est quod facile cedit tactui, quid mollius aëre? At includatur vesicæ, durus erit, resistet enim tactui, haut secus ac saxum aliquod; quia vesicæ quasi carcere coërcitus recedere nequit. Frumentum durum est, conteratur in farinam, erit molle. Farina compingatur in saccum, erit durior, dispergatur postea per aërem, erit molliissima.

9. At ponamus, corpus omne esse sensile, nec posse sensibiles omnes qualitates simul à corpore tolli, quamvis hæc aut illa auferatur, natura ejus integra remanente, an inde efficietur, corporis essentiam in sensibilitate consistere? Nullo modo. Nam quid aliud est sensibilitas quàm externa corporis ab habitudine ad sensus humanos petita denominatio? Quid autem respectus ille ad positivam atque absolutam, quam solam quærimus, corporis essentiam? Quasi verò corpus esse nullum posset, nisi homo, nisi sensus essent. Corporis vel, quod idem est, Materiæ essentiam quærimus. Hæc in formis & qualitatibus consistere nequit, quoniam hæc omnia principia activa sunt. At Materia est aliquid passivum, ut loquuntur.

10. Postquam ita cognovimus, nullum sensibile quatenus tale, ut corpus verè sit corpus, efficere; examinemus porro, num quid intellectu clarè ac distinctè queat percipi, quod corporis essentiam constituat. Certe quæ 2. th. in primo ordine recensuimus, clara sunt ac manifesta omnia, nihilque amplius inquirendum restat, quàm quid ex illis primum sit & potissimum & quasi radix cæterorum.

11. *Situs* autem adeoque locus, distantia & *motus* ponunt esse figuram in corporibus, quæ jam in mundo divisa sunt ac distincta. Si ipsam cunctarum rerum divisionem primò per motum factam esse contendas, utique etiam ille corpus dividuum & extensum præsupponebat. Ad figuram pertinent raritas ac densitas, porositas ac soliditas. Namque ut ratione exterioris figurationis corpori tribuitur levi-

tas

tas vel asperitas: ita ratione interioris schematismi & configurationis partium porosum dicitur aut sine poris, hoc est, solidum. Adhæc raritas ac densitas non nisi in pororum dilatatione & imminutione vel omnimoda sublatione vertitur, ut postea uberius explanabitur. Quapropter hæc & similia ad figuram pertinent.

12. *Figura* verò ipsa ponit esse extensionem, ex cuius terminatione oritur. Nam si extensum interminatum cogitemus, nullam ejus figuram agnosceremus. Concipere enim possumus figuram omnem auferri ab aliquo corpore, nempe sublato illius & contiguorum corporum motu. Sic enim nulli extensionis termini adeoque nec figuræ relinquuntur. Considera globum prorsus densum simili substantia undiqueque ambiri, quæ mox cum eo prorsus coalescat in unum corpus, & figuram globi illius sublatam cernes. Percipere quoque possumus, figuram tolli ab omni corpore, siquidem posita interminata totius universi extensione (vide disp. 5. th. 14.) universalem ei quietem attribuamus, aut nullum in eo motum esse vel fuisse cogitemus. Sicque duplici argumento discimus, in figura non esse sitam corporis essentiam, tum quia tolli ab eo potest, tum quia, ut ut tolli non posset, extensionem præsupponit.

13. Ad extensionem referebamus partium extra partes positionem, continuitatem, divisibilitatem, quantitatem, magnitudinem. Nunc penitiùs inspiciamus, quidnam sit in conceptu nostro, quid in corpore intimum, quid denique maxime positivum atque absolutum. Illud enim solum essentiam corporis vocare liceat.

14. Equidem si quis tria ista, extensionem, quantitatem, magnitudinem pro re eadem velit sumere, neque aliud hoc vocabulo, aliud illis designari pertendat, nolim cum eo contentionis ferram diu reciprocare. Attamen si lubeat rem pènsiculare subtilius, non videtur omnino negari posse, extensum esse quid in corpore magis absolutum, quantum verò & magnum esse magis respectiva, quandoquidem uti quantum ad tantum, ita magnum ad parvum refertur. Neque ipsa quantitatis appellatio aliud menti exhibet, quam certam determinationem & mensuram extensionis. Hoc enim sibi vult quæstio, qua rogamus, quantum est? ~~wie groß?~~ Ubi ponis veluti notum, esse aliquod magnum seu extensum, nec aliud quæris quàm illius magnitudinis vel extensionis mensuram. Confer Ontosoph. §. 102. Ideoque prior est & potior extensionis quàm quantitatis conceptus.

Quod multò magis de magnitudine etiam dabunt Philosophi, qui eam speciem quantitatis faciunt.

15. Porro divisibilitas præsupponit extensionem, estque corpus divisibile quia extensum: non verò extensum, quia divisibile. Divisionis quoque conceptus negativus, extensionis non item. Quod autem corpus habet partes, quarum alia est extra aliam posita, ita ut hæc illam penetrare non possit, sed cum ea per extremitatem suam juncta continuum faciat &c. id totum in relatione positum est, atque insuper divisionis ac terminationis conceptum, utrumque negativum, præstruit. Canon Logicus est: *divisio non fit nisi in ea que insunt*. Antequam igitur res dividatur, ponitur esse, ponitur aliquid ei inesse. Hoc autem in corpore est, extensum esse.

Extensio vera essentia Corporis.

16. Quid ergo remanet præ cæteris positivi atque absoluti? Resp. *Extensio*. Extensio est quæ essentiam corporis constituit, quæ sola à corpore divelli nequit. Quamvis enim in extensio habitudinem partium ad invicem facile comprehendamus, possumus tamen extensionem optime mente concipere, etiamsi de illa habitudine nequaquam cogitemus, & possumus concipere corpus indefinitum atque interminatum, in quo nil nisi extensio consideretur. Extensio igitur essentia corporis est, à quo ne cogitatione quidem separari potest.

17. Qualis verò extensio? nam & scientia, & vita, aliaque extendi dicuntur. Resp. Extensio corporis est in longum, latum & profundum, quam ex fluxu superficiei provenire cogitat Geometra. Neque alia extensio corporea sub cogitationem humanam cadit præter eam quæ in longitudine, latitudine & profunditate consistit, tametsi modò unam ex istis dimensionibus *solam*, modò duas, modò omnes tres pariter attendamus. Tandem extensionem intelligimus, cui divisibilitas, figura, situs & aliæ corporum proprietates insunt, quo tanquam idoneo subjecto sustentantur omnia quæ sunt in corpore.

18. Sed adhuc videtur hominibus conceptus ille corporis nimis esse Mathematicus, nimis abstractus; vellent Physicum quid, magisque reale & substantiale. Ecquid verò desiderant, quid petunt amplius? An durum quid, & palpabile & ponderosum? Nempe assidue recurrunt consuetæ opiniones tantamque à teneris annis nobiscum familiaritatem contraxere, ut ipsi demonstratæ cedere veritati recusent. At rejectæ jam sunt, refutatæ sunt. Quid ergo restat nisi ut manus
dent

dent adversarii, & extensionem pro vera essentia corporis agnoscant? Putantne, sicuti vulpes elusa à ciconia, se lambere vas vitreum, pultem non attingere? Habent pultem, quâ saturari possunt ac debent, refrenent aliquando cupiditates immodicas, quod appetant reliquum est nihil. Omnia enumeravi, omnia ordine perlustravi. Inveni tandem extensionem, eam realem, substantialem, denique essentiam corporis esse contendendo.

19. An tenue nimis aut reale minus illis est, quod divinus Moses in creationis historia, & rex Psaltes Psal. 19, *Extensi* seu *Expansi* nomine describit? Atqui ego quidem illud ut potentissimi Creatoris amplissimum opus cum Davide admirabar (utpote quod *gloriam Dei narrat* &c.) & aptissime sic appellari arbitrabar. Sol, terra, luna, stellæ cæteræ sua acceperunt nomina, magnitudinem verò tantam non accipere, ut cum immensa cælorum machina comparari possent. Hanc itaque (quippe quod præcipuo jure meretur) *extensi* seu *expansi*, id est universali Corporis nomine ac notione sacræ paginæ denotare voluerunt.

Objeçtio à distinctione corporis Physici & Mathematici.

20. Sed usque oggeritur, aliud esse corpus *Physicum*, de Categoria Substantiæ, aliud *Mathematicum*, de Categoria Quantitatis, meque fucum facere, hoc pro illo obtrudendo. Ecce novum præjudicium, in quod tamen non tam cæco judicandi impetu sponte prolapsi, quàm à præceptoribus pueritiæ nostræ inducti fuimus. Nimirum simul ac primis Lycæi sacris initiati sumus, decem esse rerum Classes audivimus; ex illis Substantiæ primam, Quantitatis esse secundam; duo illa distincta esse rerum genera; extensionem corpori convenire non ratione substantiæ suæ, sed ratione quantitatis &c. Sic docebant præceptores nostri, nec raro illud accinebant, *discentem oportet credere*.

21. Nunc verò posteaquam non quidem è discentium, sed tamen ex eorum numero, quos oportet non intellecta credere, esse desuimus, proprio uti judicio licere nobis existimamus. Quæro igitur ex illis & percunctor, quid per Substantiam intelligant, quam à quantitate & extensione distinguunt? Ecquænam ista est substantia, à qua extensionem cogitatione divulserunt? An corporea? Nihil minus. Quid enim in ea concipi potest quod corpus redoleat? Motus abest, figura, situs, locus, magnitudo; ablata sunt raritas, densitas, longitudo.

ginitudo, latitudo, profunditas, denique omnia desunt, quæ à Deo materiali substantiæ fuerunt attributa quæque voluit conditor optimus percipi ab homine Sapientiæ ac perfectionis suæ spectatore. Respondeant jam illi quid animo concipiant? Profectò id vel nihil omnino est, vel si aliquid est, præter confusum substantiæ incorporeæ conceptum, quem falsò tum corporeæ tribuunt, nihil esse potest.

22. Dicam quod res est, habent verum substantiæ corporeæ conceptum, quo extensionem apprehendunt; sed eam deserunt tanquam ignobile accidens (nam qualitates multoque magis formas substantiales quantitati præferunt) stabilius aliud & solidius & essentialius magis (quod revera tamen subest nullum) expetentes, similes cani Æsopico, qui carnem ore ferebat; sed umbram captans non modò nihil novi acquisivit, verùm etiam quod habebat perdidit.

DISP. VII.

Continuatio ejusdem defensionis, soluta objectione, quæ à rarefactione & condensatione petitur.

1. **V**erum enimvero nondum id effecimus ut quiescant adversarii, quin potius à Categoriis, tanquam è vestibulo Philosophiæ suæ depulsi ad naturalis scientiæ castra se recipiunt, ut Physiçæ nostræ fundamentum evertant, è Physica petitis armis pugnaturi. Obten-
dunt igitur rarefactionis & condensationis experimenta. Si substantiæ materialis, inquiunt, essentia in extensione consisteret, quæ fieri posset, ut corpus aliquod absque novæ materiæ appositione plus extensionis acquireret? At cernimus, verbi causâ, aquam resolvi in vaporem, augetur extensio, novæ substantiæ ne hilum quidem accedit. Iterum vapor in aquam cogitur, extensio minuitur, substantiæ tamen ipsi nihil materiæ detrahitur. Variatur igitur & mutatur extensio, substantia manet eadem, neque proinde substantia est extensio. Laudo conatum, quo φυσικῶν nonnulla explicandi nobis occasio datur.

2. Principio repetendum est memoriaque semper tenendum quod supra monebamus, philosophi non esse de rebus naturali lumine cognoscendis quicquam pronunciare, nisi quod clare priùs distincteque perceperit. Atqui nihil in rarefactione & condensatione aliud contingere percipimus, quàm figuræ mutationem, ita nimirum, ut rara corpora sint inter quorum partes multa intervalla existunt corporibus

ribus aliis repleta, & eo tantum densiora reddantur, quod ipsorum partes ad invicem accedentes intervalla ista imminuunt vel planè tollunt. Quod ultimum si contingat, corpus tam densum evadit, uti densius reddi nequeat. Atqui non ideo minus tunc extensum est, quam cum partes habens à se mutuo remotas majus spatium amplectitur. Quoniam quicquid extensionis in poris vel intervallis à partibus ejus relictis continetur, nullo modo ipsi tribui debet, sed aliis quibusvis corporibus, à quibus intervalla ista replentur. Ut cum videmus *spongiam* aqua vel alio liquore turgentem, non putamus ipsam secundum singulas suas partes magis extensam, quam dum compressa est & sicca; sed tantummodo poros habere magis patentes atque ideo per majus spatium esse diffusam.

3. Quid verò causæ sit, cur de hoc spongiæ experimento aliisque similibus (ut panni, lanæ &c.) rectè ab ineunte ætate judicaverimus, de aliis verò multis rarefactionibus opiniones foveamus erroneas, facile est intelligere ex iis quæ de Causis Errorum alibi diximus. Nempe in spongia videbamus poros, videbamus eos ampliores reddi; videbamus novum corpus ad eos replendos accedere. Quæ tria cum in cæteris non ita observaremus, ideo nec esse credebamus. Adeo sensibus eramus mancipati, ut ab eorum solo testimonio aientia pariter & negantia argumenta confidentissimè duceremus: Video tale, tantum; ergo est tale, tantum: non video, ergo non est &c.

4. Sed pudeat viros supra vulgus sapere cupientes, adeo etiamnum anticipatis infantia suæ opinionibus adhærere, ut iisdem, quibus oculi corporis, rationis oculum angustius terminari opinentur. Considerent, si placet, rarefactionem & condensationem se perspicere modo explicato, non autem ullo alio fieri posse percipere.

5. Considerent etiam, non tam esse rationi consentaneum, aliquid non intelligibile effingere ad corporum rarefactionem verbottenus explicandam, quam ex eo quod rarefiunt concludere, in iis esse poros seu intervalla, quæ ampliora fiant, novumque corpus accedere quod ipsa impleat, etsi hoc sensu non percipiamus, ut nec sensu deprehendimus quid quantumque crescenti arbori singulis horis adjiciatur, cui tamen continuo aliquid adjungi, quo major fiat, dubitare nequimus.

6. Considerent denique quantum melius sit, ad exemplum eorum, quæ in majoribus corporibus accidere sensu percipimus, judicare de iis quæ accidunt in minutis corpusculis, ob solam parvitatem suam

omnem sensum fugientibus, quàm ad hæc explicanda nova quædam, nulla cum iis quæ sentiuntur similitudinem habentia, excogitare.

7. Quò autem diligentius animadvertant quid in rarefactione majorum corporum contingat, atque exinde paulatim de minoribus judicare assuescant, age jam in medium experimenta quædam obvia & facilia producamus, ut si qui sensibus nimium confusi nondum rationem audire velint, ipsis etiam sensibus quodammodo redarguantur.

8. *Panis* bis coctus, qui magis compactus reliquo pane, vino aut lacti intritus quantopere per horum corporum in poros suos admissionem dilatetur nemo non potuit deprehendere quàm sæpissime. Nec tamen qui attendet majorem hîc ipsi pani extensionem tribuet; sed potius ex pane cum humido corpore, quod in poris latet, composito tertium quid ortum esse judicabit, cujus extensio major sit, quàm panis erat ab illo humido liberi. Quod autem hoc majus extensum, ex pane & lacte compositum, panis serè nomen retinet, id neminem movere potest, nisi qui sermonis usum à rei veritate distinguendum esse incipias iverit, & subjectum denominationis Logicæ à subjecto in hæzationis Physicæ discernere nesciverit.

9. *Lignum* pane licet durius sit, simili tamen modo cum aqua vel aëre vaporibus aquæ pleno, qui in poros ejus se insinuans partes ejus distendit, majus quoddam extensum componit. Unde januæ & valvæ in aëre humido interdum aperiri & claudi non possunt. Et doliorum asseres, quibus exsiccatis dolia rimosa evaserant, aquæ immersi dilatantur. Panis triticeus, quia mollior est humido cælo quàm sicco, eundem aquearum particularum in poros ingressum confirmat.

10. Durissimum *ferrum* est, ignis autem minimè, & tamen ab hoc illius pori adeo augentur, ut partibus à se invicem recedentibus ipsum non modò ductile fiat, sed etiam in majorem locum protendatur. Accipe enim ferrum oblongum eique bacillum ligneum adæqua quàm potes accuratissimè. Tum ferrum in validum ignem conjice, ut totum incandescat. Denique forcipe extemum ligneo illi bacillo vicissim applica. Videbis notabili ratione ferrum excrevisse, & bacillo longius evalisse ipso sensu deprehendes. Fac idem ferrum refrigeretur, ad pristinam quantitatem redibit. Quodque de longitudine hîc observasti, in latitudine quoque & profunditate fieri cogitabis, par enim hac in parte dimensionum omnium est ratio; nisi quod in exemplo allato, cum plus longitudinis sit, quàm profunditatis aut latitudinis, melius etiam in longitudine rarefactio innotescat. Et nota, quamvis
ferrum

ferrum jam longius evasisse, jam ad pristinam quantitatem rediisse vulgari loquendi consuetudine dicamus, non tamen intelligi revera quicquam ei magnitudinis vel accessisse vel decessisse.

11. Quantum ad vapores attinet, quorum exemplo nitebatur objectio, in iis non perspicitur major extensio majorve quantitas, quàm fuerat aquæ non resolutæ; cum nihil aliud hic fiat, quàm partium aquæ propius antè conjunctarum solutio, divisio, remotio, sicuti ipsum *resolutionis* vocabulum aperte indicat. Adspice vapores ex aqua ad ignem calefacta adscendentes aut fumos è pice vel ligno accenso ortos. Procul remotus continua vel contigua corpora existimabis: at propius accedens diligentiusque intuens vix ullam in iis continuitatem vel contiguitatem notabis. Nempe vapores fumi, nebulae, nubes, denique exhalationes omnes nil aliud sunt quàm innumerorum certi aliqujus generis corpusculorum congeries, multis heterogeneis corporibus intercurrentibus atque illa à se mutuo separantibus.

12. Quamobrem per hæc & similia exempla non magis probatur, majorem esse corporis rarefacti quàm ejusdem condensati propriam extensionem; quàm probatur rete, quod prius erat convolutum, nunc autem in aqua est expansum, eo ipso majorem extensionem acquisivisse. Id quod erat demonstrandum.

13. Firmiter igitur statuatur, planè fieri non posse, ut aliquid nova quantitate vel nova extensione augeatur, quin simul etiam nova substantia extensa, hoc est, novum corpus accedat; neque fieri posse, ut vel minimum quid ex quantitate aut extensione tollatur, quin tantundem quoque de substantia detrahatur.

14. Utque omnis de possibili extensionis mutatione non mutata substantia dubitandi occasio præcidatur, notandum est, quod *extensio duobus modis spectari* possit: 1. ut constituens naturam substantiæ corporeæ, tuncque non aliter concipi debet quàm ipsa substantia extensa; 2. ut modus substantiæ, quatenus nempe unum idemque corpus, v. g. cera, retinendo eandem suam quantitatem substantialemque extensionem, pluribus diversis modis potest extendi, nunc magis secundum longitudinem minusque secundum latitudinem vel profunditatem, nunc è contrario magis secundum latitudinem minusque secundum longitudinem; nunc poros recipiendo majores, nunc minores &c.

DISP. VIII.

Solvitur objectio à Spatio petita, unde mundi plenitudo, indefinita extensio, denique unitas cognoscitur.

1. **E** Versis hunc ad modum præjudicatis de rarefactione & condensatione opinionibus, aliæ succedunt, quæ non minores in agnoscenda essentia corporis difficultates pariunt. Talis est consueta hominum de *spatio*, seu vero seu imaginario, cogitatio atque oratio, quæ contra nostram de corporis extensione doctrinam hujusmodi insurgit argumento: ubicunque nihil aliud esse intelligitur quàm extensio in longum, latum & profundum, non corpus, sed spatium concipitur, adeoque posita extensione solum ponitur spatium. Atqui spatium non est corpus (secus enim corpus in spatio esse, spatio contineri &c. dici non posset) sed vel res à corpore diversa est, vel potius (ut plerorumque est opinio) merum nihil est, fictum planè & imaginarium. Si ergo non corpori, si mero rationis enti, imò non enti extensio tribuitur; non poterit ea pro genuina corporeæ rei essentia venditari.

2. *Resp.* Quasi verò Phylax meus non esset verus canis eo quod naturam canis per fictionem intellectus Cerbero Poëtæ tribuant. Ita fortassis responderet aliquis. Nos ut metam præstitutam assequamur, in alia omnia abeuntes negamus, ullum spatium concipi posse, nisi reale & verum & corpore plenum, dicimusque non magis fictum vel imaginarium esse spatium, quàm est corpus ipsum, imò spatium & corpus idem esse.

3. Quod ut manifestum evadat, *inter entia realia & rationis signenta quid intersit* videamus. Nimirum conceptus illi qui non continent veras & immutabiles rerum naturas, sed ficticias duntaxat & ab intellectu compositas, ab eodem intellectu non per *abstractionem* tantum, sed per claram ac distinctam operationem (*exclusionem* aliqui vocant) dividi possunt, adeo ut quæ intellectus sic dividere non potest, non debeant judicari ab ipso esse composita. Ut, exempli causa, dum cogito equum alatum vel montem aureum, facile intelligo, me etiam ex adverso posse cogitare equum non alatum, montem non aureum, nec proinde illa veras & immutabiles naturas exhibere. Sin de spatio cogitem, attendendo ad id quod cogito, non possum non intelligere illud esse extensum, & omnino oppositum in appposito statuam, si quidem

dem illud non extensum cogitavero. Ac proinde extensio non per figmentum intellectus nostri Spatio tribuitur, sed vera illius est & immutabilis natura, eademque prorsus est natura corporis, veluti abundè est ostensum. Sed homines ob perpetuam circa ea quæ non sunt mentis agitationem adeo sunt figmentis assueti, ut non rarò etiam ea figmentis suis accenseant, quæ vera sunt & realia, sicut illi qui crebrò somnare solent, interdum etiam quod vigilantes cogitant, somnium esse sibi persuadent.

4. An ergo nulla planè *inter spatium & corpus differentia*? Resp. In re certè nulla, sed *in modo tantum concipiendi*. Nam extensionem spatii consideramus, ut communem & genericam, extensionem verò corporis, quod in spatio esse dicimus, spectamus ut singularem & individuum: v. g. sublato lapide è spatio vel loco in quo est, putamus etiam ejus extensionem esse sublatam, utpote quam ut singularem & ab ipso inseparabilem spectamus; sed interim extensionem loci, in quo erat lapis, remanere arbitramur, eandemque esse, quamvis jam ille locus lapidis à ligno, vel aëre, vel alio quovis corpore occupetur: quia hîc extensio consideratur in genere, censeturque eadem esse lapidis, ligni, aëris, alteriusve corporis, dummodò sit ejusdem magnitudinis & figuræ, servetque eundem situm inter corpora externa, quæ spatium illud determinant.

5. Quare eadem est extensio, quæ naturam corporis & naturam spatii constituit, nec magis hæc duo (duo inquam, respectu mentis distinguere ea volentis) à se mutuò differunt, quàm natura generis aut speciei differt à natura individui, ex. gr. natura equi à natura Bucephali. Et quemadmodum totum dicitur continere partes, & partes omnes conjunctæ dicuntur esse in toto, etsi totum & partes omnes simul junctæ unum & idem sint (quemadmodum mundus & omnia quæ sunt in mundo verbo quidem diversa, re verò ipsa idem sunt) ita quamvis spatium dicatur continere corpus, & corpus esse dicatur in spatio, non tamen idcirco spatium & corpus revera differre constans veritatis indagator existimabit, neque à loquendi usu, cujus ignorantia tenebris obseptum vulgus autor & magister est, imponi sibi patietur.

6. Burgesdicius Metaph. lib. 1. cap. 21. quamvis de Spatio non philosophetur ut oportet, meo quidem judicio; hæc tamen th. 5. quæ profert, illustrare valent eam, quam modò institui, comparationem. *Spatium*, inquit, *rem locatam continet, non quidem possivè, atque*

ita ut vas continet aquam vel vinum; sed negativè, quomodo totum dicitur continere suas partes. Ut enim totum partes continere dicitur, quia nulla pars extra totum est: ita etiam spatium dicitur continere illud locatum, quia nec totum nec ulla illius pars extra spatium locale est. Hoc est, ut ego interpretor, extensione locali nunquam destitui potest, utpote quæ essentia corporis est. Nec aliud significatur dum corpus dicitur hoc spatium occupare, quàm si diceretur, illud tantam mundi partem esse.

7. Cæterum si diverso philosophandi modo assueti hætenus proposita voluerint examinare & quæ ex iis consequuntur indagare, facile opponent nobis, miras & novas è sententia nostra consequentias fluere. Nam si res ita se habet, ut spatium & corpus & extensio sint idem, si quodcunque potest concipi spatium, reale est & verum & corpore plenum, conficietur inde I. planè *repugnare, dari Vacuum* seu spatium sine corpore: cum tamen philosophi ad hunc usque diem sat egisse se putaverint, quod ostenderint naturam in mundo vacuum non admittere. Qui verò eo usque processerit, ut vacuum, ubi ubi statuatur, contradictionem putaverit implicare, repertus quod sciam in Scholis fuit nemo.

8. II. Colligetur inde, in Mundo sive in hac substantiæ corporeæ universitate nullos extensionis fines posse à nobis agnosci: quoniam ultra quoslibet assignatos fines semper spatia occurrunt extensa adeoque corpore plena: cum tamen philosophi de terminis & figura mundi (sitnè quadratus an rotundus &c.) deque spatiis extra mundi fines imaginariis differere consueverint.

9. III. Concludetur, universum continuò extensum non nisi unum cogitari posse, adeoque *plures esse mundos* itidem *contradictionem implicare*. Nam substantiam extensam & corpoream omnia omnino spatia imaginabilia, in quibus plures illi mundi fingi possent, jam occupare ex antè dictis intelligimus. Neque possunt plura cogitari extensa à se invicem separata, nisi inter ea concipiatur spatium intermedium quo distent. Atqui spatium, uti dictum, est extensum, & distantia est modus extensionis, cui modo prorsus adversatur extra subiectum quod extensum sit reperiri, sicuti ipsi extensioni repugnat esse in non corpore, cum sit essentia corporis.

10. Hæc verò de Mundorum impossibili multitudine sententia nondum audita fuit in Scholis nostris philosophicis. Quin imò sapientiores, Aristotelicarum rationum imbecillitatem agnoscetes, neque alias in Naturæ libro scriptas invenientes, semper existimâ-

runt,

runt, Mundi unitatem non nisi è sacro codice demonstrari posse. Deoque & esse & fuisse possibile, plures uno Mundo condere, cum tamen quæ contradictionem involvunt neutiquam divinæ omnipotentis objectis annumerentur.

11. Quid ego ad ista omnia? Agnosco illas consequentias adeo necessarias, adeo evidentes, uti vix ullam demonstrationem Mathematicam certiorẽ dari posse confidam. Quod equidem plenius planiusque exponere esset in proclivi. Sed vix opus esse judico, cum animum ad ea quæ hæcenus tradita sunt advertenti cuncta ista sint perspicua; iis verò qui attendere ac meditari aut non possunt aut non volunt, nihil unquam satis fieri potest.

12. Unum dico, non esse cur ullo pacto succenseant nobis alii philosophi, quod ea vel ex uno Physicæ nostræ principio luculenter adeo videant esse demonstrata, quæ ipsi per sua principia, ut ut omnes eorum copias explicarent, demonstrare satis necdum valuerẽ.

13. Deinde considerandum iis propono, satisne sibi contenti, satis de Deo magnificè, satis de semetipsis demissè sentiant, quando ex una parte de Mundi termino ac figura aliquid definire audent, & fines eorum quæ Deus creavit, suo quidem iudicio, egredientes, quasi jam universa animo complexi essent, infinitum vacuum, in quo mille mundi collocari possint, sibi repræsentant. Ex altera verò parte essentias & formas rerum homini incognitas asseverant. Videant autem ibi, ne superbæ forsitan arrogantis insimulentur, quando limitatam valde intellectus sui potentiam ad plura & majora extendere volunt, quàm suam extendere voluit omnipotentiam Creator maximus. Caveant etiam hîc, ne demissos præ se animos ferentes optimi Conditoris bonitati detractum eant, quasi ille formas & quod pulcherrimum in rebus est absconderit, sola accidentia & umbras rerum locarit in propatulo.

14. Retorquebunt illi, nos multò magis divinæ infinitati derogare in secundo nostro corollario, atque in tercio Dei omnipotentis limites ponere, quasi illa sit unius Mundi creatione sic exhausta, ut plures non valeat efficere.

15. Quantum ad prius attinet, observent boni viri, nos si mundum indefinitum diceremus extensione sola, non ideo Deum facere, quẽ solum perfectione novimus infinitum. Sed nego aliud è sententia nostra sequi, quàm Mundum esse indefinitum. Deum simpliciter *infinitum* intelligimus, siquidem ad naturam summi gloriosissimi que

Entis

Entis pertinet infinitas, & omni ratione talem prædicamus, intellectui, voluntate, potentia, duratione &c. Mundus verò num ulla ratione infinitus sit nec ne, profiteamur nos nescire. Scimus tantum, nos in illo sub aliqua ratione, nimirum quatenus est extensus, finem non invenire, atque idcirco respectu nostri dicimus *indefinitum*. Ita quamvis Philosophi sibi permiserint, ut appellationem infiniti aliis etiam rebus impertirentur (ut quando de numero infinito, de linea infinita &c. disputant,) nos tamen ut de supremo Numine quàm possumus religiosissimè loquamur pariter & sentiamus, Infiniti nomen ipsi soli reservamus.

16. Quantum ad posterius, cùm sciamus intellectum nostrum esse finitum, Dei verò potentiam infinitam, nobis quidem in more positum non est quicquam de hac definire. Consideramus duntaxat, quid possit à nobis percipi vel non possit, & cavemus diligenter, ne iudicium ullum nostrum à perceptione dissentiat. Quapropter audacter affirmamus, Deum posse id omne, quod possibile esse percipimus; non autem è contrario audacter negamus, illum posse id quod conceptui nostro repugnat, sed dicimus tantum, contradictionem implicare.

17. Superest ad essentiam corporis asserendam, ut opinionem, quæ rebus incorporeis & intellectualibus extensionem attribuit, resellamus. Sed alibi hac de re fusiùs agendi dabitur occasio. Nunc quæstionem de Mundi unitate ex iis, quæ de essentia Corporis disputavimus, sponte natam, cumque iis individuo nexu cohærentem, in gratiam eorum, quibus nimium paradoxa videtur sententia nostra, uberiùs tractabimus.

DISP. IX.

*Mundi unitas confirmatur argumento Metaphysico
à notione Universitatis desumpto.*

1. **P** Rincipio dispiciendum est, quid in quæstione positum, quoties an plures mundi esse possint, disputatur. Hoc ut appareat, quid *Mundi* nomine intelligatur, antè cognoscendum. Cùm autem varios ea vox habeat significatus, sufficit ad propositum nostrum tres sequentes annotasse. Significat igitur 1. rerum creaturarum, tam corporalium, quàm intellectualium universitatem. 2. universitatem rerum tantum corporearum. 3. solam terram & quæ ei cohærent.

2. Prima

2. Prima significatio rationi congruit. Nam cùm illud omne, quod præter Deum est, unam quandam communem habeat rationem (v.g. quod à Deo ut causa efficiente & conservante pendet, & ad ipsum uti finem suum ordinatur, item ab ipso differt ut finitum ab infinito, creatum ab increato &c.) meritò etiam uno communi nomine appellabitur, & vel Universitas creata vel Mundus dicetur.

3. Nec secunda significatio ratione solida destituitur. Nam cùm omnes res corporeæ unam eandemque sortiantur communem rationem & magis etiam inter se conveniant quàm res creatæ in genere, (sunt enim omnes extensæ in longum, latum & profundum, atque exinde mobiles ac dividuæ in partes, omnes inter se cohærent tam arctè, ut ne minimo quidem vacuo se divelli patiantur &c.) possunt utique una Mundi vel Universitatis corporeæ appellatione rectissimè comprehendi.

4. Tertia verò significatio non tam natura ipsarum rerum, quàm hominum conceptu & opinione vulgari nititur. Homines namque *Terram* considerant ut corpus maximum & potissimum, alia ut multò minora & secundaria, in usum terræ ac terricolarum tantùm nata. Nempe *air* & *calum* & quicquid est invisibile, mundique adeo pars longè maxima, pro nihilo æstimatur. Cælestia *sidera* etiam si plurima sint numero, quia tamen magnitudine putantur esse perexigua, & sæpius visum fugiunt, tanquam parvæ faculæ aut lampades accensæ ad Terram referuntur, nec magis partibus Mundi annumerantur, quàm exiguæ aliquæ lucernæ partibus accensentur augusti palatii. *Sol* quoque ipse (& similis ferme *Luna* ratio est) vel tanquam Deus spectatur & à Mundo distinguitur, ut sit à barbaris nationibus; vel instar aliarum stellarum consideratur ut lucerna Terræ, unde & Orpheus æternum Mundi oculum Solem appellavit. Hujusmodi cogitationibus indulgenti vulgo nihil relinquitur præter Terram, quod Mundi nomine insigniri mereatur.

5. Priores duæ significationes magis non solùm naturæ rei, verùm etiam etymo vocis conveniunt. *Mundus* quippe tam Græcis quàm Latinis ab ornatu, elegantia & pulchritudine nomen accepit, quæ pulchritudo & elegantia, consistens in rerum delectabili varietate, ordinata dispositione, absoluta plenitudine, indissolubili connexione &c. rectius utique ad creata omnia aut saltem ad res omnes corporeas extenditur, quàm ad Terram & terrestria sola restringitur.

6. Consentiant insuper priores illæ significationes cum aliis appellationibus

Q

lationibus, quibus Mundus denotari consuevit, quando vocatur τὸ πᾶν *omne*, τὸ ὅλον *totum*, *universum*, *rerum universitas*: quæ nomina Terræ soli aut Terræ imprimis (quæ intuitu reliquorum corporum exigui puncti rationem habet) non applicabit nisi præjudicatis infantia opinionibus immerfus intellectus; sapiens toti corporum rerum systemati à Deo creato aptissimeque disposito accommodabit.

7. Denique priores duæ significationes conformes sunt Mundi definitionibus, quas præclari scriptores afferre consueverunt. Instar omnium sit illa in libro de Mundo cap. 2. *Mundus est ordo & digestio universorum, quæ à Deo & per Deum asservatur.*

8. Jam quæritur de Mundo, ea significatione qua vocabulum hoc sumi debet & à sapientibus solet, nempe vel in prima, *an possint dari plures rerum creaturarum universitates*; vel in secunda, *an possint dari plures corporum universitates*. Sive autem hoc sive illo modo Mundi nomen acceperis, sententia nostra negativa est.

9. Non autem quæritur de Mundo in tertia significatione accepto, hoc est *an possint dari plures Terra*. Quis enim hoc in dubium revocet? Quicumque igitur nos deserit apud populum, quasi negemus Deum posse plures Mundos efficere, is magna nos injuria afficit. Neque enim loquimur de Mundo, in ea significatione sumto vocabulo, qua sumi consuevit à vulgo, cui opiniones nostras recensent adversarii. Ita cum Physicus negat posse dari vacuum, cavillator sit qui vulgi ludibrio id propter eum exponat. Nam vulgus hominum alio sensu vacui nomine utitur ac Philosophus, cumque sic crumenam, arcam, cellam & alia vacua persæpe experiatur, meritò deridendum putet qui vacuum existere posse inficias iverit.

10. Sententia nostra, *non posse dari plures Mundos*, duobus præcipuis argumentis demonstratur, quorum alterum Physicum disputatione quinta & proximè antecedente octava fuit expressum, alterum Metaphysicum in Schola Platonis jam olim prolatum. Hoc Marsilius Ficinus compendio in Timæum capitis 16 initio brevissimè sic effert: *quod continet omnia nihil relinquit extra se ipsum, ideoque est necessarium unicum*. Similem in modum ratiocinantur, quando negant plura testamenta unius hominis esse posse, quod unumquodque testamentum universam successionem contineat. Vide quæ solent ad fin. lib. 2. Institur. annorari.

11. Plenius efferre Platonis argumentum si voles, tale erit: id præter

præter & extra quod nulla res creata existit, necessario statuendum est unicum, uti Creator unicus, à quo opus illud universum distinguitur. Atqui Mundus est id præter & extra quod nulla res creata existit. Ergo.

12. *Major* probatur è notione seu definitione *Vnici*; *Vnicum* quippe dicitur, præter quod aliud ejusdem generis, naturæ, nominis, conditionis nullum reperitur. Estque propositio illa ex terminis adeo notior, ut notior reddi nequeat.

13. *Minor* itidem perspectis terminis è definitione Mundi innoscitur. Mundus enim est rerum creaturarum universum. At qui universum dicit, nihil excludit. Est Mundus τὸ πᾶν. At qui omne dicit, nihil excipit. Qui totam rerum corporearum congeriem, quanta quanta est, Mundi nomine & notione complectitur, uti facimus rectam rationem & sapientes viros imitati, nihil omittit eorum quæ Deus creavit, sed omnia unius appellationis ambitu designat. Plato in Theæt. *Omne nonne ex eo omne quod nihil deest? Totum quoque nonne eadem ratione totum quia nihil abest?*

14. Plures rerum universitates absque manifesta contradictionis in adjecto admissione statui non possunt. Qui enim rerum universitatem ponit, multitudinem illius universitatis tollit, & vice versa. Nam si in uno sunt omnia, quid erit in reliquis? Si mundi plures sunt, non erunt prospecto plures rerum universitates, verum, ut sic dicam, particularitates vel partialitates, adeoque nec mundi erunt, eo quidem sensu quo in præsentia de mundo disputamus.

15. Obtendar aliquis, 1. non posse tantopere urgeri universitatis appellationem, cum vis hujusce nominis ac notionis non sit ejusmodi, quæ omnem necessario multiplicationem eorum, quæ universa dicuntur, perpetuo excludere videatur. Nam cum exempli causâ Lutetia Parisiorum dividitur in Universitatem, *l'université*, Civitatem, *la cité*, & Urbem, *la ville*, non omnia sub universitate concludi manifestum est. Et quid notius est quam dari plures universitates Academicas, hoc est, in quibus omnes liberales artes, omnes disciplinae & facultates docentur? Colonienſis universitas non tollit Lipsienſem, nec Lipsienſis Wittebergenſem, neque hæc nostram Duisburgenſem &c. In Politicis subditi respectu gubernationis dividuntur in tribus & societates: societates iterum in collegia, corpora, universitates. Collegium est societas subditorum ejusdem vel similis professionis. Corpus est societas ex collegiis diversis collecta & instituta. Universitas

est societas è collegiorum & corporum conjunctione concreta. Si talis subjectorum universitas datur in Germania, quis ideo inficietur, similem in Anglia dari posse, imo dari, similem in Gallia, similem in Hispania? Quin imò palam est in una eademque rep. plures, quas dixi, universitates inveniri. Quare, ut ad propositum revertamur, non repugnabit etiam plures simul Mundos existere, quamvis universitates & sint & habeantur, neque una corporum naturalium universitas, eo quod universitas est, excludet aliam similem universitatem.

16. Resp. 1. quemadmodum dari quidem potest universitas talium hominum, v. g. Europæorum, Germanorum, Colonienſium; alia universitas aliorum hominum, v. g. Afrorum, Ægyptiorum; sed non ideo dari potest universitas hominum absolute, nisi una: ita existere potest alia universitas talium corporum, alia talium; sed nulla ideo erit universitas corporum absolute & simpliciter, nisi una. Nul- lum censerī queat rerum à Deo creatarum universum, quin omnia omnino creata includat. Jam verò notandum est, Mundum, de cu- jus unitate disputamus, non considerari à nobis neque definiri, tan- quam universitatem horum aut illorum corporum, v. g. hujus terræ quam incolimus, hujus cæli, horum siderum quæ videmus, sed uni- versitatem corporum simpliciter. Distinguatür itaque inter universi- tatem simpliciter ita dictam, & universitatem secundum quid; inter universitatem Metaphysicè acceptam (argumentum enim nostrum Metaphysicum esse monuimus) & universitatem politicè aut morali- ter sumtam; inter universitatem rerum genericè dictam, & universi- tatem talium rerum, specificè sic appellatam.

17. Resp. 2. quando Academiæ universitates appellantur (& si- milis est similitum exemplorum ratio) quod omnes in iis tradantur li-iberales artes & facultates, tum voces illæ, *omne, universum*, sumuntur distributivè in genera singulorum, nempe quod omnia disciplinarum genera ibidem proponantur, eodem modo quo cuncta animalia in arca Noë fuisse perhibentur, id est, omnia animalium genera. Quan- do autem Mundus universum nuncupatur, eo quod res naturales omnes contineat, voces illæ, *omne, universum*, non distributivè, sed collectivè accipiuntur, quo sensu omnes Apostoli duodecim, omnes partes idem quod totum esse dicuntur. Est enim apud Philosophos in confesso, Mundum esse ens quod vocant collectivum seu aggrega- tivum Mundi formam in ordinata collectione, congerie, aggrega- tione cunctarum rerum naturalium consistere.

18. Ob-

18. Obducatur quispian 2. si Deus omnipotens mundum hunc augere potest, si corpora quæ fecit multiplicare valet in infinitum, si mille terras, mille soles condere, poterit utique plures mundos efficere. At verum prius. Ergo & posterius. Minor probatur, quia antea concessum th. 9, Deum plures terras posse condere.

19. Resp. De minore non est necesse ut in præsentia laborem. satis est maiorem esse falsam, connexionem ejus esse infirmam. Negamus enim si vel mille terras, mille soles Deus crearet omnipotens, plures ideo mundos vel rerum universitates fore. Negamus, inquam, plures simul & semel existere posse. Hæc enim quæstio est. Nam cum Origene, ante hunc Mundum alios fuisse, & post hunc alterum fore, & ei semper successurum alium atque alium, rem nobis hoc loco esse nolumus. Quare affirmamus, plures illas terras, plures soles, sint quotcumque & quantoscunque esse velis, unicam rerum corporearum universitatem conficere, ab unico Domino factam & gubernatam.

20. Veritas hujusce assertionis ex jam dictis per se cuivis innotescit. Ad cuius tamen uberiorem explicationem notari velim quod modò diximus, Mundum esse ens collectivum, totum aggregatum, quale est exercitus, respublica, ecclesia. His enim exemplis utuntur philosophi. Jam si cogites, ad rempublicam ex. gr. Belgicam accedere plures cives, plures urbes, regiones, provincias, Belgici imperii fines usque & usque dilatari ac protendi, non tamen ideo judicabis, multiplicari respublicas Belgicas; sed unam eandemque remanere existimabis, quoniam retinet ejusdem reip. formam & leges, eadem rectorum capita, eundem regiminis atque administrationis modum. Ita si possis cogitare, de quo jam non ago, mundi terminos usque & usque protendi, corpora quæ videmus & cognoscimus usque & usque multiplicari, non tamen ea propter judicare poteris, plures oriri rerum creaturarum universitates; sed potiùs corpora illa omnia unum idemque conficere universum, quia retinent idem caput, eundem gubernatorem, eandem formam, quæ forma, ut sæpe dictum, in ordinata cunctarum rerum à Deo pendantium collectione & congregatione omnimoda consistit.

21. Contradicitur 3, Mundum esse universitatem rerum aut creaturarum aut creandarum, aut saltem creabilium: Cum igitur plures res sint creabiles, plures quoque mundos esse *possibiles*, utcumque *actualis* mundus, res jam creatas continens, existat unicus. Resp. Quod in quæstione versatur, illud est, an plures mundi dari, hoc est simul ac

semel existere possint. Si possunt existere, plures rerum existent universitates: (rerum, inquam, creatarum. Non enim existunt nisi creatæ fuerint, & quamdiu creabiles tantum appellantur, ut dici nequeunt existere: ita nec aliquæ, nec multæ, nec universæ nominari queunt.) quod impossibile & contradictorium esse toties nunc evicimus. Neque hic ullum argumentum produci, sed id quod in principio quæsitum fuit duntaxat peti aut quod aliis antea verbis expressum erat reperi video.

22. Opponatur 4. Si ex ipso nomine & notione Mundi, utpote rerum *Universitatis*, tam est manifestum, non posse plures dari: qui fit igitur, quod adeo pauci hoc videre hætenus potuerint, quod Mundi unitatem è Naturæ lumine demonstrare nequiverint, imò indemonstrabilem plerique omnes crediderint, quod possibilem Mundorum pluralitatem tot tantique Philosophi ac Theologi defenderint? Adhuc evidentibus obistere queant viri multum eruditi?

23. Resp. 1. Etiam quæ per se nota sunt attendenti, in dubium revocari possunt ab iis, qui minus attendunt & levius rem considerant. Vir sapiens facile demonstraverit attendenti ad id quod Deus est accitur, nimirum Ens summè perfectum, plures esse Deos contradictionem involvere manifestissimam. Et tamen qui plures Deos coluerint in cultissimis etiam nationibus fuisse. Quid? quod inter ipsos Christianos existere, sicuti de Okkamo, Gabriele & Guilielmo Var. accepimus, qui etsi consenserunt unum tantum esse Deum, existimarent tamen id non posse naturali ratione ostendi, at solum ex revelatione scripturarum cognosci. Cum tamen revera non actualis modò Dei unitas, sed plurium quoque impossibilitas, naturali rationis lumine demonstrari queat. Ut tandem cum Boëtio fateri cogamur: *communes esse nonnullas animi conceptiones & per se notas apud sapientes tantum.* Profectò enim plurimæ veritates sola attentione diligenti indagatori, clarissime innotescunt, quæ ab aliis negligentioribus minusque attentis nulla unquam ratiocinatione satis cognoscuntur.

24. Resp. 2. Cur plures Mundos existere posse viri etiam pii ac docti sibi persuaferint, causa præcipua est, quod non satis attendentes ad vim & notionem Mundi, quatenus vere notat rerum universum à Deo conditum, in hac quæstione ad Terram potissimum respexerint. Nam utcumque initio tractationis suæ veram Mundi definitionem attulissent, postea tamen de unitate Mundi agentes in vera Mundi notione immota mente non perstiterunt, sed ad vulgarem & à præjudi-

cata

cata infantiae opinione ortam notionem animo rursus inclinantes, plures uno Mundos dari posse pronunciarunt. Haud secus atque Astronomus aliquis licet antea demonstraverit stellas esse quam maximas, postea tamen dum eas intuetur vix aliter imaginatur, quam ab infantia assuetus.

DISP. X.

Mundi unitas probatur argumento Physico, à notione corporis extensi petito.

1. **H**Actenus de argumento Platonico, quod impossibile esse Mundorum multitudinem evincit, sive Mundi vocem in prima, sive in secunda significatione capias. Nunc sequitur argumentum Cartesianum à natura & notione Corporis desumptum, quod probat unitatem Mundi in secunda tantum significatione accepti. Nam apud Physicos, quippe qui circa res corporeas ut Philosophiae naturalis objectum versantur, talis acceptio hujus vocis maxime trita est. Ita cum in definitione Mundi, *universitas corporum*, duo habeantur, 1. universitas, 2. corpus; & ex priori termino generaliori & Metaphysico ductum argumentum satis, opinor, explanatum sit: superest ut ex altero termino specialiori & Physico petitam rationem accuratius expendamus.

2. Si plures Mundi dantur, illi vel distabunt à se invicem vel non distabunt, sed erunt contigui. At neutrum dici potest. Ergo nec plures mundi possunt dari.

3. Nam si plures illi mundi se contingunt & non distant, certe unum tantum, non plures componunt. Nisi enim contiguitas unitatem facere judicaretur, terra cum aqua, aqua cum aëre, sol cum cælo Mundum unum constituere non posset. Quamobrem & ipsa nostra de pluribus Mundis controversia non interrogat nisi de Mundis discretis, à se mutuo separatis, disjunctis ac remotis, nempe an tales possint esse plures.

4. Si ergo distant plures illi Mundi à se invicem, necessum est ut inter eos aliquid interjaceat. Nam si nihil omnino interjacet, nihil interpositum est, quo separantur ac dividuntur à se mutuo, profecto intelligi nequit ulla distantia. Ecquid enim notius est naturali lumine, quam ea non distare quæ inter nihil interjacet? Quare si distant plu-

res.

res illo Mundi, qui dicuntur, omnino requiritur, ut aliquid interjaceat. Secus enim non distabuit.

5. Illud aliquid quod interjacet, eritne corpus an spiritus? Spiritus sive Mens esse non potest, seu creatam seu increatam dixeris, quoniam extensionis ac dimensionis omnis expers est. Nec fieri proinde potest, uti subiectum sit distantiae, ut intervallum longitudinemque alterius Mundi ab altero vel constituat vel determinet, quia longum esse, remotum & propinquum esse, extendi, distare & contingere, affectiones sunt rerum corporearum propriae.

6. Illud igitur aliquid quod interjacet, unumque Mundum ab altero dividere ac disterminare dicitur, erit corpus, erit res extensa, longa, lata & profunda, & continget ambos illos mundos quos separare dicitur, & utrumque contingendo, non duos, sed unicum efficiet, utrumque, verbo & cogitatione aberrante duplicem, re vero ipsa, & cogitatione in rectam viam reducta, unum & simplicem componet. Quippe Mundus eò usque unus & idem continuò censendus est, quousque res extensæ se contingunt, sibi cohaerent, sibi proximè conjunguntur. Nec proinde plures Mundi esse possunt.

7. Nunc ad objectiones veniamus, quarum prior est, è nostra opinione sequi, Deum non esse omnipotentem, hæc enim vulgaris est calumnia potius quam ratio. Huc etiam redeunt quæ doctor aliquis adversus opinionem nostram protulit. Nam ratio ipsius 1. est: *si apud Deum omnia sunt possibilia & ab eo omnia fieri possunt; sequitur Deum plures Mundos simul efficere posse. Atqui prius verum. Ergo & posterius.* Rat. 2. *Si Deus uno Mundo condito plures condere non potest, sequitur eum viribus defectum & defatigatum esse, seu ad plures Mundos viribus defecisse. At falsum consequens. E. & antecedens.* Rat. 3. *Quicquid non implicat contradictionem, id Deus potest efficere. Plures uno Mundos esse non implicat contradictionem. E. plures uno Mundos Deus potest efficere.*

8. Has quidem obiectiunculas recitalse refutasse est. Sed in tiro-num gratiam earum vitia indicemus: 1. petitur id quod in principio quaesitum fuit. Evidentissimè enim demonstratum erat disp. 8, quam legerat rationum autor, plures uno Mundos esse contradictionem implicare. Nunc ipse assumit non implicare contradictionem. 2. Ostensum erat, & nunc quidem pluribus iterum ostensum est, pluralitatem Mundorum à parte rei & in conceptu nostro contradictionem involvere. Nunc ipse sumit, à parte Dei impotentiam & virium defectum argui per assertionem nostram, quod plures mundi fieri

ne-

nequeant; hoc est, quod universum simpliciter non possit dici, nisi contineat omnia & singula; quod distare non possint mundi atque ita nec mundi plures censerī, quoniam nihil interjacet inter extensa non extensum, non contiguū, non cohærens. 3. disputator ille sicuri contendit Deum posse plures mundos facere cum tamen reapse non nisi unus esse queat: ita rationes suas tanquam multas & varias proponit, quæ tamen omnes ad unam recidunt, non dico rationem, sed unam principii petitionem. At pene oblitus eram rationis tertię, quæ talis est cum limitatione nostra: *Quicquid est effectum vel objectum infinita potentia Dei, illud à Deo in infinitum multiplicari potest*, si nempe ista multiplicatio contradictionem non implicet: *Mundus est effectum infinita potentia Dei. E. Mundus à Deo in infinitum multiplicari potest.*

9. Jam sapientes compello futuros judices atque arbitros, utra pars philosophorum in hac materia dissidentium, de potentia Dei subtilius ac magnificentius sentiat: nosne, qui vacuum nullum agnoscimus, omnia spacia imaginabilia materia à Deo repleta asserimus, jam in sua plenitudine cuncta regi, conservari, moveri ab eodem illo potentissimo rerum Conditorē statuimus? an verò adversarii, qui immensum extra Mundum volunt imaginari vacuum, ubi corpora non sint, sed esse possint innumera; ubi mundus non sit, sed esse possit alius atque alius, imò mundi infiniti; ubi se non amplius exlerat creatio divina, conservatio, gubernatio Cuncti potentis, sed excutere tantum se possit quandocunque id ei placuerit?

10. Si quis diceret, vir ille non est doctissimus, quia jam cunctas artes perdidicit, nulla scientia est quam non penitus imbiberit; doctior esset si necdum didicisset omnia, si plurima adhuc restarent quæ ubi & quando vellent posset addiscere: si quis, inquam, hæc diceret, rideretur, opinor, ab omnibus. Præterea si quis affirmaret, Rex ille non est satis potens, quia jam totum terrarum orbem sibi subjecit, quia nullus in terra, nullus in mari locus est, ubi non dominetur; multò potentior foret, si multa regna, multas provincias nondum expugnasset, nondum occupasset, nondum imperio suo subjecisset, at posset adhuc expugnare, occupare, subjicere: si quis, inquam, talia proferret, infantibus esset ludibrio. Atqui simile prorsus in hac controversia de Mundi unitate dicunt adversarii, & ingenti clamore dicunt, quando contendunt multò ampliorem Dei potentiam eo demonstrari, quod reali materia nondum impleverit omnia, quæ nos imaginari & concipere mente valemus; sed plurima adhuc spacia va-

qua & à nullo corpore occupata reliquerit, ubi non creator, non rector, non conservator ullius rei sit, sed esse possit.

11. Posterior objectio est, è nostra de Mundi unitate sententia sequi, Mundum nullos habere limites ac terminos adeoque esse infinitum. Resp. 1. mens nostra attentè cogitando deprehendit se non posse ad Mundi seu Universi extensi fines aut terminos ullos pervenire. Nam usque & usque occurrunt ipsi spatia extensa, nec potest ad eum locum devenire attentio nostra, ultra quem extensa nulla collocari percipiantur. Et quoniam iudicium perceptioni conforme esse debet, cavebimus ne mundo certos ullos extensionis fines assignemus, quippe cum nullos percipere queamus. Sed inde perperam inferitur, nullos revera mundi esse fines, nullos planè ejus terminos dari posse. Nam quænam ista est consequentia: nulli extensionis fines in Mundo à nobis agnoscuntur, ergo nulli etiam dantur. Quasi finitus noster intellectus omnia quæ sunt aut posset aut deberet comprehendere. Mundi igitur fines, si qui sint, non definimus, terminos si qui sint Deo vel angelis noti, quia tamen nobis ignoti, non determinamus; atque ea propter nostri respectu Mundum indefinitum atque interminatum dicimus, re autem ipsa infinitum esse non asseveramus.

12. Resp. 2. At si affirmaremus Mundum revera esse infinitum, quid inde periculi vel incommodi? Respondent: *Vnum tantum est infinitum, Deus: sic autem duo darentur infinita.* Ut nugari tandem & ineptire desistant, scire oportet, quo sensu Deus sit ac dicatur infinitus, quo item sensu Mundus diceretur infinitus, si quidem dicendus esset.

13. Quod ipsum ut evidenter cognoscatur, trium generum distinguenda sunt attributa. Alia quippe soli Deo conveniunt, Mundo autem corporeo neutiquam; cujusmodi sunt intellectus, voluntas, benignitas, justitia. Alia soli Mundo, Deo autem nequaquam insunt, ut extensio in longum, latum & profundum, motus localis. Alia denique Deo & Mundo communiter quodammodo attribuuntur, veluti duratio, unitas, perfectio, qualia Metaphysici omni enti assignant.

14. Jam Deus quo sensu dicitur infinitus? Resp. Infinitus dicitur 1. ratione attributorum primi generis, quæ rerum intellectualium propria sunt: sic infinita Dei est justitia, immensa sapientia, summè verax est, summè benignus. 2. ratione attributorum tertii generis, quæ generaliter spectata Mundo corporeo quodammodo communia sunt. Ita ratione durationis infinitus est Deus, quod vocamus æternum

æternum esse; perfectione infinitus est, quoniam *Ens* est summè perfectum. Adeoque omnia quæ in Deo sunt infinita, immensa, summa, maxima. Et hoc Theologi volunt quando infinitatem Dei per cætera ejus attributa æqualiter fufam esse aiunt. Verùm ratione attributorum secundi generis Deus nullo modo dicitur infinitus, quoniam extensionem, morum localem & quæ sunt ejusmodi nullo pacto recipit essentiâ divina. Non est formalitèr longa, lata vel profunda vel mobilis essentia Dei, licet eminenter omnes rerum corporearum perfectiones contineat.

15. Quo autem sensu Mundus dicetur infinitus, si dicatur? Resp. 1. non ratione primi generis proprietatum, utpote quæ nullo modo cadunt in corporeum rerum universum. Neque enim intelligentia Mundus corporeus præditus est, neque voluntate; non est verax aut sapiens aut justus, multò minùs infinitæ intelligentiæ, summè sapiens, &c. 2. non ratione attributorum tertii generis. Non enim æternus est mundus, non potentissimus, non perfectione summa præditus. Relinquitur ergo 3; si Mundus dicatur infinitus, id solùm esse intelligendum ratione aliquorum secundi generis attributorum, nempe ratione longitudinis, latitudinis & profunditatis, adæbque extensionis illimitatæ. Cujusmodi extensio infinita in Deum nullo modo cadit. Sicut enim Deus unus est tali unitate, cui par aut similis non invenitur: ita infinitus est tali infinitate, cui par aut similis dari nequit. Contrà Mundus unus est tali unitate, qualem Deus non admittit; infinitus est (si est) tali infinitate, à qua divina natura est alienissima.

16. Ex quibus omnibus cùm apertissimè sit, Deum non posse ullo modo dici infinitum, quo sensu Mundus dici posset, nec Mundum ulla ratione infinitum appellandum, quo sensu Deus verè talis ac tantus prædicatur, ridiculus sit qui amplius objectionem de duobus infinitis moverit. Perinde enim est ac si quis ita argutetur: Plato Materiam vocat Infinitum: Deus est infinitus: Ergo duo existunt infinita.

D I S P. XI.

Vacui expugnandi & Mundi unitatis asserenda gratiâ vindicatur notio illa communis: qua à se invicem distant, inter ea aliquid interjacere necesse est.

1. **A**xioma illud Physicum, *qua à se invicem distant, inter ea aliquid interjacere necesse est*, maximo nobis usui est tum ad Vacui impossibi-

possibilitatem, tum ad Mundi unitatem demonstrandam. Neque dubitare licet, quin omnes scholastica institutione non corrupti homines illud pro notionem communi habeant, & per se verum esse fateantur. Quando enim Galli *l'entredeux*, Latini *intervallum*, *interstitium*, Græci *Διάστημα* dixerunt, non sanè nihil, sed aliquid esse putaverunt, quod inter duo à se invicem distantia corpora interstaret eademque separaret. At quoniam communis ista notio adversatur præjudicatis quorundam de Vacuo & Mundorum multitudine opinionibus, hoc animadverso omnes ingenii nervos intendunt, ut fundamentum illud nostræ demonstrationis labefactent, quibus occurrere hac disputatione stat sententia.

2. Sic autem aliquis scribit: *Falsum est, distantiam esse aliquid reale, cum sufficiat ad concipiendam distantiam duorum corporum, concipere negationem contactus utriusque: enim autem cum non sint multiplicanda cura necessitatem, utique nec necessum erit aliquid reale, quod inter corpora interjectum, ea à se invicem distantia per modum causa efficientis aut formalis faciat: scilicet suffecerit si producat corpora ea non unita fecerit. Non magis igitur ad distantiam faciendam requiritur aliqua causa formalis realis, quam ad constituendam cecitatem, ad quam sufficit agentem produxisse subjectum non tribuendo ei visum, quæ privatio, non forma realis est.*

3. Resp. Distantia non potest esse nisi inter plura, ac proinde est aliquid relativum; cuiusque relationum summa generat tria sint, originis, negationis, affirmationis, ad relationem vero negationis pertineat, omnis rerum distinctio, oppositio, diversitas (quemadmodum in Ontologia docui) manifestum est sub eadem negationis, vel distinctionis relatione contineri distantiam, unde etiam distantia vox interdum pro voce distinctionis adhibetur, ut cum Ens infinitum à finito, aliquid à nihilo *distare* dicitur in infinitum, quibus verbis denotatur differentia ac distinctio multo maxima.

4. Quemadmodum autem omnis distinctio formaliter in negatione dicitur consistere, hoc est, in eo quod alterum *non est* alterum: ita facile damus, quod distantia etiam negationem, & quidem contactus, includat. Estque huiusmodi negativa ratio & relatio rebus omnibus communis, quatenus affirmari de se invicem nequeunt, neque originis, aut convenientia relatione efficiuntur.

5. Attamen, sicuti nulla distinctio, ita ne relatio quidem peculiaris ulla datur, quin habeat fundamentum. Et quidem fundamenta carentes distinctiones, ut humani cerebri fragmenta, nemo non rejici-

certe

cere solet, certè debet); ita nulla vera distantia censeri queat, quin suum habeat *fundamentum*. Hoc fundamentum non potest esse nihilum, quia cum non entis nullæ sint affectiones vel operationes, efficere vel constituere realem corporum distantiam non potest.

6. Si ergo fundamentum distantiae revera aliquid est, aut in ipsis corporibus distantibus aut extra ea quaerendum erit. At non reperitur in ipsis corporibus distantibus istud fundamentum, quoniam inde sequeretur, dari eorum distantiam, quocunque modo posita fuerint, etiam si proximè atque immediatè se contingant. Quare fundamentum & ratio distantiae consistit in aliqua re, à corporibus distantibus diversa. Quæ res diversa cum non possit esse spiritualis, utpote extensionis omnis expers, necessariò erit corporea.

7. Atqui res ea corporea à corporibus distantibus diversa, quæ ratio & fundamentum proximum distantiae est, cum necessariò locum aliquem & situm in mundo habeat, aut inter corpora distantia, aut alibi sita & posita sit necesse est. Nec putem sana ratione prædictum quenkam affirmaturum hoc posterius, sed prius. Atque ita constat, nihil esse quod corporum duorum aut plurium à se invicem distantiam fundare queat, præter id corpus vel ea corpora quæ interposita sunt. Utrùm verò illud, quod interpositum est, causæ efficientis, an formalisationem habeat, parum nostra refert, dummodo sit verum, reale & corporeum quid. Hoc enim est quod asserimus.

8. Quod si interrogem, cur hæc corpora, uti sol & terra, dicantur à se invicem distare; illa verò, uti mare & terra, non dicantur; tuque respondeas, ideo hæc distare, quia se *non contingunt*, nec præter hanc *negationem* aliam esse rationem distantiae quaerendam; perinde facies, ac si rogatus, quare corpora quædam à tuo corpore remota sint, respondeas, quia non propinqua; vel rogatus, quamobrem in hac controversia à me dissentias, respondeas, quia non consentias; nec aliam causam esse petendam. Hoc autem nihil aliud esse, quàm ignotum per æquè ignotum, idem per idem explicare, vel cæco appareret. Itaque ratio distantiae alia reddenda est.

9. At *sufficit*, inquis, ad rationem distantiae inter corpora reddendam, quod causa *producens ea non unita fecerit* seu conjunxerit. Ita scilicet generalis tibi ratio sufficit, cujusmodi plurimis omnino quaestionibus applicari potest. Nam si quæram, cur solem à terra distare asseras, nihil aliud respondendum putabis, quàm quod Creator ea non conjunxerit. Alienum autem, opinione quidem tua erit, specia-

tim addere, quia inter solem & terram cælum interjacet. Si quæram, cur litus Anglicum distat à Gallico, satis erit respondisse, quia Deus ea non conjunxit; alienum verò erit adjicere, quia mare intercurrit. Nempe præter Dei, ut causæ externæ & universalis voluntatem & ordinationem, datur in rebus ipsis internum & speciale aliquid, quod in assignandis rerum causis & rationibus sententiarum explicandis minimè est insuper habendum. Vide Log. I V. 150. seqq.

10. *Causa* remota distat ab effectu, sed inter illam & hunc interponitur causa propinqua. *Genus* remotum distat à specie, sed per interjectum genus proximum. Ternarius distat à denario, per intermedios, quaternarium & reliquos *numeros*. Exordium distat ab epilogo, intercurrentibus propositione cæterisque *orationis* partibus. *Tempus* matutinum distat à vespertino, intercedente meridie. Atque ita inter alia quælibet distantia perpetuò aliquid ejusdem generis rerum interponitur. Eccur non simili ratione inter corpora quælibet distantia corpus omnino aliquod interponi statuamus? præsertim quia distantia primò & maximè propriè in rerum corporearum situ spectatur. Situs autem quemadmodum sine respectu ad alia corpora adjacentia intelligi non potest, ita & distantia sine respectu ad interjacentes aut interjacentia corpora percipi nequit.

11. Si *negationem contactus* animo concepisse satis est ad intelligendum quid sit Distantia, tum hæc non positivum, sed negativum quid erit, neque contrariè aut relatè, sed contradictoriè aut privativè opponetur contactui. Atqui non esse *contradictoria* patet, quoniam inter distare & contingere non apparet talis oppositio, qualis inter hominem & non hominem, inter corpus & non corpus. Et si non contingens, corporeo nempe modo, idem est quod distans, distabit etiam à nobis Deus, distabit ipsa Petri anima ab ejusdem viventis corpore. *Tangere vel tangi nisi corpus nulla potest res*, inquit poëta. Ita nec distare propriè ab alio corpore quid potest nisi corpus.

12. Sed adversarius eò videtur inclinare, ut *negationem contactus* ad certum subjectum (quod in contradictoriis nullum attenditur) referat, & *privativum* quid esse contendat, dum eam cum privatione confert. Itaque distantia se habebit ad contactum, uti privatio ad habitum, uti *cacitas* ad visum, quo exemplo ipse utitur, quando negat *magis ad distantiam faciendam requiri aliquam causam formalem realem, quam ad constituendam cacitatem, ad quam sufficit agentem produxisse subjectum non tribuendo ei visum, qua privatio, non forma realis est.*

13. Quæ

13. Quæ sententia si vera est, consequitur nulla dari in rerum universo corpora, quæ non destituta sint perfectione aliqua sibi debita (id enim *privationis* nomine cuncti intelligunt quoties eam habitui opponunt) quia nullum est quin ab alio quodam distet. Sequitur, inquam, quod omnia quæ distant, si natura & ordo rerum rectè habeat, debeant se contingere. Quæ opinio vix in sani hominis mentem veniat. Nam philosophos quidem audimus dicentes, quod res omnes creatæ imperfectæ sint negative, quatenus non habent omnes perfectiones, uti Deus; item, quod res corporeæ negative sint imperfectæ, quoniam intelligentis naturæ perfectionibus destituuntur. At qui affirmaret res omnes corporeas privative imperfectas esse, quasi cunctæ se debeant contingere, hætenus, quod sciam, repertus fuit nemo. Ut jam præteream plura alia absurda, quæ istam opinionem comitantur.

14. Concludamus igitur, Distantiam in conceptu suo præter negationem contactus necessàriò involvere extensionem, id est, longitudinem, latitudinem & profunditatem, unde valde remota corpora *longè latèque* distare perhibentur. Hæc autem longitudo, latitudo & profunditas esse non potest nisi in longo, lato & profundo. At nihil est longum, latum & profundum nisi corpus seu materia. Ergo omnis distantia corpus sive materiam in se continet. Quod quidem Aristoteli adeo visum est manifestum, ut 4 Phys. cap. 2, *Materiam* defini- verit *ἄστημα τῆ μετέδης*, hoc est, distantiam sive intervallum sive dimensionem magnitudinis. Et recte adversarius, *admitto*, inquit, *vacuo non competere extensionem, nec idem distantiam mensurare posse*. At perperam attexit: *sufficit quippe mihi corpora, inter quæ vacuum est, distare, quamvis non dixi per vacuum*.

15. Sunt etiam alii qui putant, ut corpora distare à se invicem judicentur, satis esse si corpus aliud vel corpora alia inter ea poni & locari possint, licet actu nulla sint interposita. Quibus respondeo, si affirmare liceat, corpora actu distare, inter quæ tamen actu nihil interponitur, sed interponi tantum aliquid potest; tum etiam posse statui, me ac te jam actu inimicos esse, non quod jam ulla sit inter nos offensio, sed quia possit aliquando esse aliqua. Profectò actualis distantia requirit fundamentum actu existens: aut si nullum inter corpora remota medium actu interjicitur, ergo actu erunt immediata, hoc est, se contingent, & non distabunt.

16. Contrarii unius definitio qualis esse debeat, ostendit definitio
con-

contrarii alterius. Contigua vero ac distantia sunt contraria. Et *contigua* dicuntur inter quæ medium nullum interjacet, Ergo è contrario distabunt, inter quæ aliquid interjacet. Contigui illam definitionem Plato in Parmenide his verbis expressit: *quod tacturum aliquid est, seorsum positum, proximum illi, quod tanguendum est, esse oportet; tertium verò præter hæc intermedium nullum.*

17. Postremò notetur quæ causa sit cur homines putent, corpora posse à se invicem distare, licet interjaceat revera nihil. Nempe quia hoc & illud corpus inter ea quæ distant tolli potest, ideo corpus omne aliquando tolli posse opinantur. Sed eadem firmitate colligere liceat, hominem aliquando sine omni loco existere posse, quia nullus est, à quo non interdum corpore separari queat. Confer disp. V. 9.

DISP. XII.

*Ab una & uniformi totius Universi Materia hæcenus
pensitata ad examinandas Formas transitur,
unde corporum varietas ac distinctio.*

1. **A** Dhuc unum consideravimus extensum seu corpus in genere & in numero singulari, dividuum quidem, sed nondum divisum. Jam videamus, quomodo dividatur illud unum in multas ac varias partes, quarum proprietates & operationes diversæ Universo illi, quod Mundum appellamus, decus & elegantiam omnem conciliant.

2. Certè Creator multitudinem & varietatem rerum delectatus esse deprehenditur. Quippe cum res nulla toticipet Infinitum, omnes quodam modo & gradu participant, in rerum distinctione & ordine, multifaria Dei sapientia, bonitas & potentia multò clariùs innotescunt creaturis rationalibus, quàm fieret, si omne quod est corpus, non nisi unum quid & homogeneum esset.

3. Ut igitur de Formis corporum naturalium agere incipiamus, unde omnis rerum varietas ac distinctio pendet, observandum nobis est, nihil ut Formæ nomine hîc admittamus, nisi quod, 1. sit naturæ Materiæ, de qua egimus, proportionatum eique determinandæ ac definiendæ, vulgo dicunt actuandæ, aptum. 2. quod ad cælestia pariter ac subcælestia adeoque ad omnia corpora distinguenda se extendat, quemadmodum Materia una omnibus eademque est, disp. V. 19. 3. cujus existentia sit certa, & si fieri potest, etiam à nemine negata, licuti

sicuti cunctis hominibus manifestum est, dari Materiam extensam ac divisibilem. 4. Cujus tam clara detur definitio, tam distinctus conceptus, quam ipsius Materię. Principiorum quippe hæc est prima virtus, ut clara sint ac perspicua. Obscura enim & occulta si fuerint, ad alia ignota cognoscenda nos ducere nequeunt.

4. Itaque si quis Physicus hîc nobis loquatur de *Formis* quibusdam *substantialibus* vel *occultis qualitatibus* aut similibus, quorum propria natura sensus nostros, imò intellectum fugit, aures ei accommodare non possumus, quod etiamnum incerti sumus, num ejusmodi principiis ulla ex quatuor jam recensitis conditionibus conveniat. Neque tamen ideo reprehendimus illos, quibus talia arrident; quin etiam spondemus, nos eadem recepturos principia, si fortassis in progressu contemplationum nostrarum virtutes earum clariùs nobis innotescant.

5. Si quis etiam in scholis non institutus, non ista abstrusa & sensum fugientia, sed è contrario alia manifesta & sensibilia, lucem videlicet & colorem, sonum, odorem, saporem, calorem, frigus reliquasque tactiles qualitates, veluti genuinas rerum corporearum formas nobis commendet, equidem non loquetur absque ratione. Istis enim qualitatibus considerandis ab ineunte ætate delectati sumus maximè, inde corporum varietatem præcipuè æstimavimus, inde nomina rebus imposuimus.

6. Nos tamen non quid sensibus nostris imprimis arrideat, sed quid maturæ probeatur rationi unicè consecrantes, veremur istas, quas diximus, qualitates pro facillimis & primis principiis formalibus (talìa enim nunc in corporibus quærimus) amplecti.

7. Nam 1. cum Materię mundanæ immensa portio in sensus minime incurrat, sensibiles qualitates, utpote quæ non reperiuntur ubique, ejus distinguendæ principia haberi non possunt. 2. etiam si rebus omnibus vel actu vel potentiâ saltem inessent, quia tamen in relatione ad sensus consistunt, priora quædam absoluta & magis in rebus ipsis existentia quærere oportebit. Disp. III. fine. Et 3. quamvis manifesta dicantur sensibus, intellectui tamen haudquaquam evidentiā esseprehenduntur. Ecquid enim luce meridiana (quod etiam in proverbium abiit) clariùs, si ad oculum referatur? Quid autem obscurius menti, si genuinam lucis naturam explicare jubeamur?

8. Ergo qualitates illas minime quidem negamus, quin iis etiam, detectis priùs earum naturis, usuti sumus, ubi deinceps occasio tulerit.

rit. At hîc in generali Physica principia quædam communiora & faciliora haut immeritò quærimus.

9. Hæc autem cùm non à vulgo indocto, neque à Philosophis nimium fortassis in Schola doctis desumi possint (valde enim timidi sumus ad ea quæ non satis capimus recipienda) à Mathematicis peti posse videntur. Nam cùm Physici hæctenus ferè usi sint formis substantialibus, qualitatibus manifestis & occultis, quas vocant, perfectionem suam scientia naturalis tot seculis haudquaquam assecuta est. Contra Mathematicæ disciplinæ innumeris iisque certissimis demonstrationibus jam dudum gavisæ ad optatum finem pervenere.

10. At quibus usi sunt Mathematici principiis? Resp. primò quidem usi sunt eodem illo in longum, latum & profundum extenso subiecto, quod licet corpus Mathematicum vocetur ab aliis, nobis etiam pro vero corpore in Physica saltem generali habendum esse docuimus, disp. VI. 20. seqq. Deinde in illo subiecto extenso considerant 1. quantitatem continuam & discretam, hoc est certam magnitudinis & multitudinis, quæ in partibus, mensuram. 2. Figuras seu modos varios quibus extensio terminatur. 3. Situm seu dispositionem partis unius inter alias. 4. Motum seu mutationem situs. 5. Quietem seu permanſionem in eodem situ.

11. Quid igitur verat, quò minùs & nos in Physicæ principio iisdem utamur? Quidni speremus ea nobis profutura, quæ profuerunt illis? At inquis, Mathematici abstractè de talibus agunt, prout in animo sunt: Physici est versari in rebus concretis atque ad verum hujus mundi statum omnia applicare.

12. Resp. Id minimè quidem inficias imus: tantùm affirmamus, nos nihil eorum, quæ ab aliis admittuntur, præfraçte negando, his solis initio usuros & nixuros, ut quonam nos ducere valeant rebus accommodata concretis addiscamus.

13. Spei de felici eventu conceptæ has inter alias causas habemus: 1. quod idem subiectum sit Physices quod Matheseos. Nec refert quod Physicus ad magis specialia descendit quàm purus Mathematicus. Satis est, quod in eodem rerum genere persistit. Constans enim est ille disciplinarum ordo, quo de subiecto aliquo generaliter atque universe cognita vel dicta, particularibus sub eo contentis applicantur, non sine fructu singulari.

14. 2. Quod enarratis corporum affectionibus omnes conditiones, quas in Formis desideravimus, apprimè conveniant. Nam primò

mò qui attendet, quàm intimè magnitudo, figura, motus &c. Materiam afficiant, & quantopere cum illa naturæ affinitate colligata sint, quodque innumeris modis singula variari eorumque vel plura vel pauciora & inter se & cum materia conjungi possint; is minimè dubitabit, quin hæc ipsa sint aptissima Materiæ extensæ variandæ ac distinguendæ principia. Certè multò aptiora magisque congrua, quàm alia nescio quæ, naturam spirituales potius quàm materiales, cogitationem animi potius quàm extensionem corporis redolentia.

15. Deinde eadem affectiones in cunctis omnino rebus corporeis, cujuscunque nominis & naturæ sint, inveniuntur, & æquè in materia insensibili, ac sensibili intelliguntur. Adeo ut verè sint communia cæli ac terræ corporibus, visibilibus ac invisibilibus Extensi hujus creaturis. Formas substantiales, quas vocant, à cælestibus multi philosophi excluderunt.

16. Ad hæc dari in corporibus hujus mundi certas magnitudines, partium numerum, dari figuras, positiones, motus, quietem, nemo è vulgo, nemo inter philosophos unquam in dubium revocavit. Eorum certe existentiam non sola ratio, non unus aliquis sensus homines docuit, sed ratio simul & sensus, internus pariter & externus. Nec uno solùm, uti calor, color, lux aliæque per se sensibiles qualitates, sed pluribus sensibus cognoscuntur. Contra de formis substantialibus negant, quod in sensus incurrant.

17. Nimirum hæc nostra principia 1. non solùm universalia sunt respectu mundi corporei; verùm etiam 2. respectu hominum, qui ea admittunt, seu idiotæ sint, seu Mathematici, seu Physici, seu Mechanici. Ac 3. communia sunt intuitu sensuum nostrorum & facultatum, quas Deus nobis ad cognoscendum dedit.

18. Proinde hæc nostra ex ejusmodi principiis, quæ proposita nobis est, demonstrandi ratio non magis rustica (uti nonnullis per contemptum appellatur) quàm philosophica dici meretur. In eo solùm differentia est, quod vulgus hominum laudatas corporum affectiones ferè in exteriori tantùm corporum superficie & prout sensus afficiunt, contemplatur: nos autem in Physicis maxime quoque in corporum interiori fabrica & particulis sensum omnem fugientibus eadem consideramus.

19. Denique illorum corporis modorum perspicuæ definitiones dantur, ut th. 10 patuit. Nec fieri potest aliter, cum pluribus sensibus & intellectui, rationi & experientiæ, ut modò diximus, eviden-

dentes sint. Eorum & cum materia nexus & inter se invicem ordè clarè distinctèque percipitur. Simile neque de formis substantialibus, neque de qualitatibus occultis aut manifestis prædicare liceat.

20. Erunt fortè qui hæc omnia facilè nobis largiantur, ut sanè non habent magnam difficultatè; sed contendant, haudquaquam sufficere pauca illa & obvia ad infinita naturæ passim admirandæ arcana evolvenda. Quibus respondemus 1. hanc verorum esse principiorum indolem, ut pauca sint & nota, nec ideo spernenda, sed vel maximè usurpanda esse. 2. ipsos non posse inficiari, quin multa existis principiis solis explicari in rebus naturalibus possint. Si plura alia non possint, id quod nondum ostensum est, non sequitur eadècirco statim abjicienda esse. Accuratiùs investiganti profundiusque in abdita naturæ penetranti apparebit, plura ex iis posse explicari, quàm initio putârat.

21. 3. Non video quo jure quis nostrum institutum queat reprehendere, cùm nec molestè aliis, quibus alia Physices principia placeant, contradicere studeamus, neque tam ipsorum domos destruere, quàm nostras exstruere laboremus. Nil magni promittimus, verùm tentabimus duntaxat, quousque detur laudatis superstruere fundamentis. Fortassis alii plura intelligunt, quàm nos, fortassis non videntur ea pro principiis assumere, quæ non satis intelligunt, quod nobis piaculum & crimen in philosophando maximum est. Dabunt igitur aliquid benevoli viri timori nostro, qui metuiamus plura venditare, quàm nostra esse novimus.

22. Nemo culpât mercatorem, qui cùm non abundet opibus, exigua pecuniæ summa vulgarique moneta honestè negotiando studet aliquid lucrifacere. Laudatur potiùs qui suo & paucò negotiari solers incipit, quàm qui multo & alieno ære obrutus molitur incerta. Exiguus persæpe facultatibus magnæ opes acquisitæ & parva manu innumerabiles hostium copiarum fusæ.

23. Vir prudens expectabit studii nostri physici eventum, neque nos carpet quod, cùm plura in rebus merè corporeis nondum habeamus perspecta, quàm ea quæ diximus, solis iis utamur, utpote quæ sola nostra dicere audemus. His diligenter aliquantisper insisterendo spes est eò posse deveniri, ut quæ nunc ignoramus specialiora sortè principia detegamus.

24. Superioribus accedit nova de Physicæ nostræ fundamentis bene sperandi causa, quod circa eadem omnia, quibus Mathesis opti-

mo successu nititur, Mechanici & artifices plurimi simili felicitate versantur. Cum enim nullus artifex novam possit in mundum materiam introducere. (vide Disp. IV. 20.) omnis illius in eo vertitur industria, ut materiam datam atque acceptam variè disponat, quantum ad totius & partium magnitudines, figuras, situs, motus, quietem. Hac ratione varia producit opera, naturam imitantia, quandoque etiam cum naturæ effectibus externa sua specie certantia & similem præ se ferentia perfectionem.

25. Hoc spei nostræ argumentum 1 situm est in eo, quod inde discimus, principia nostra non modò in *theoria* Mathematica esse certa & vera; sed etiam in *praxi* Mechanica valida & utilia. Unde & nova petitur responsio ad objectionem th. 11, quod principia hæc nostra abstracta tantum sint & in mente consistent.

26. Præclaræ spei argumentum 2 situm in eo, quod opera artis, cum ut plurimum notiora nobis sint, per methodum à posteriori commodè ad opera naturæ cognoscenda nos ducere possunt. Notiora illa dicimus, quoniam 1. pleraque valde nobis familiaria sunt, & quotidie oculis nostris obversantur, manibus tanguntur, nocte etiam in culinis, cubiculis, Musæis nostris, dum non adspicimus opera naturæ quæ foris, vel de die cum non egredimur. 2. opera nostra sunt, quæ notiora alienis, cujusmodi sunt naturæ pleraque. 3. principia nostra in illis artificialibus majora magisque notabilia, cum è contrario naturæ opera sæpe in minore mole plurà occultent quàm ostendunt. Vel nimis magna & vasta sunt longè absunt ista naturalia, ut in re minore artificiali præsentè ad captum nostrum accommodatiùs representari queant.

27. Quomodo igitur ex imaginis intuitu in cognitionem exemplaris provehimur: ita ex operibus artis, quippe quæ naturam ut exemplar suum imitantur, ipsa discemus naturæ opera. Exemplis oculari inspectione probatis, quàm regulis generalibus, multa facilius addisci vidimus Log. 11. 87.

28. At multum de spe nostra, ex comparatione rerum naturalium artificialiumque in Phisicis proficiendi, decedet, si vera est quæ vulgo inter eas ponitur differentia. Nempè quod res naturales habeant ingenitum essentiale principium, quo semetipsas sponte sua tanquam vivæ movent ad agendum; artificiales autem nullum insitum principium, nec in seipsis impetum ad agendum possideant, verum ex se quasi mortuæ sint & torpidæ, atque ab externo solum principio impellantur.

29. Sed resp. 1. sic rebus merè corporeis affingi quasi intelle ctum & voluntatem quandam, adeo ut confundantur cum rebus spiritualibus, contra disp. III. 3. IV. 6. quarum proprium est, ab ejusmodi interno principio commoveri & sponte ad agendum prorumpere.

30. 2. Fatemur illud operandi principium quod in opifice ars est, extra opera quæ fabricat existere. Atqui eodem modo divina virtus, quæ naturalibus in rebus faciendis se exserit omnique humana arte excellentior est, extra essentiam rerum naturalium manet.

31. 3. Interna in rebus naturalibus principia, quæ quidem clarè ac distinctè cognoscuntur, docuimus esse extensionem, certam extensionis cujuslibet, seu pars seu totum sit, quantitatem, figuram, situm, motum, quietem. Eadem verò interna sunt istis operibus quæ artificialia vocantur, v. g. horologio æque internum sui motus principium inest ac animali.

32. Quibus argumentis doctissimi viri Formas substantiales expugnaverint, quomodo adversariorum argumenta refutaverint, nolo jam repetere. Speciminis tantum gratià unum & alterum attingam, quod cramben centies coctam reponentes quidam hodie urgere non dubitant.

33. *Quia datur, inquit, materia prima actuanda in substantiam physicam, ideo & formas dari substantiales necesse est. Nam ista actuatio ab accidentibus esse nequit, etiamsi omnia simul concurrant. Quia enim accidentia non inducuntur nisi in substantiam constitutam, manifestum est ea substantiam constituere non posse.*

34. Resp. Verum est primò, accidentia non posse constituere substantiam; verum deinde etiam est, nihil substantiale inveniri in rebus corporeis præter materiam; denique verum est, illos modos, qui respectu materiæ generaliter consideratæ accidentia vocantur, id posse efficere, ut substantia sit ac dicatur *talis*, judicetur esse hæc res naturalis & non alia. Vide quæ jam olim scripsi defens. Cartes. p. 476. & seqq. & quæ nunc Phyl. Contr. §. 97. & seqq. ubi etiam cognosces, quomodo generatio & corruptio fiant absque ullius formæ substantialis adminiculo.

35. *Specificam rerum naturalium differentiam accidentia constituere nequeunt, cum nullum detur accidens materiale, quin possit pluribus speciebus esse commune, nec ulla species qua non possit habere accidentia diversa in suis individuis.*

36. Resp. Nullum quidem accidens materiale existit, quin uni-

ver-

versaliter atque indefinitè acceptum & per se solum spectatum possit esse commune pluribus speciebus: exempla sunt figura, motus &c. Sed talis ac tanta modorum certo numero, certis gradibus definitorum comprehensio pluribus speciebus communis esse nequeat. Atqui in tali tot modorum certis gradibus ad materiæ mundanæ partem aliquam ejusque particulas omnes definiendas concurrentium comprehensione Formam cujusque rei naturalis collocamus, uti ex citatis locis atque aliunde claret. Pete exemplum à Materia primi elementi; quam descripsimus Phys. Contr. §. 466. & seqq. Unde discas, quælibet figuras induendi proprietatem, indefinitam in particulas usque & usque minores divisibilitatem & motum celerrimum, hæc tria, inquam, talia, tali modo conjuncta nulli rei naturali nisi elemento Ignis convenire: quamvis interim figura, divisibilitas & motus generaliter spectata cunctis rebus naturalibus communia sint. Quòd species diversa accidentia in suis individuis habet, hoc pertinet ad individuales horum differentias.

37. *Modificationis in partium numero, partium ac totius magnitudine, figura, situ, motu vel quiete, quæ extrinsecus & intrinsecus in rebus naturalibus considerata, diversitas diversitatem specierum inducit, atque è contrario illius talis modificationis identitas arguit identitatem speciei.* Inde autem nequaquam sequitur sub eodem genere univoco contineri hominem vivum & cereum. Nam 1. in homine vivo præter corpus & ejus modos rationalis anima vel maximè spectanda est, quæ cum formis corporeis nihil commune habet, ut suo loco videbimus. 2. corpus humanum & cera licet quoad aspectum exteriore figura quodammodo convenire videantur, partium tamen similarium dissimilariumque tanto numero, figura, magnitudine, situ & nexu, motu & quiete haudquaquam conveniunt.

38. *Agensium naturalium limitata & propria functiones formam substantialem requirunt. Canis latrat, ignis calefacit. Accidentia nihil agunt, sed actionis instrumenta sunt, ipsa verò actiones sunt suppositorum.* Resp. Peculiaris etiam & propria functio est clavis, calami item scriptorii: utrobique sola dispositio in figura, motu &c. id præstat. Quomodo forma substantialis præterea requiratur vel quomodo hæc, si adsit, talia præstare valeat, ne intelligi quidem potest. Simile cogita de rebus corporeis, quæ naturales dicuntur. Materia istis modis aptata agit ut suppositum. Sed adi Physicam Contractam. Indigna sunt hujusmodi merè Logica argumenta, quibus refellendis Physicus inhæreat. Fons

erroris

erroris unus hîc est, quod considerationes Logicæ, quæ sola mente versantur, finguntur in rebus extra mentem consistere. Si nescis quomodo unum idemque ut essentialè & accidentalè diverso respectu considerari possit, id discere ex Logicæ part. 1. quæst. 95. & applica ad formas rerum corporeas.

DISP. XIII.

*De Motus efficacia, & vulgari ejus tum
divisione tum definitione.*

1. **Q**uemadmodum in Politica doctrina primò agitur de *Civitate*, quæ rudis ac indigestæ molis instar se habet; deinde de *Republica*, veluti forma à qua status civitati imponitur: ita in scientia naturali initio quidem corporea *rerum universitas* consideratur, tanquam informis materia, quæ in longum, latum & profundum est extensa; postea vero spectatur quomodo variis induta atque exornata formis *Mundi* nomine & notione insignienda & intelligenda veniat.

2. Nec tamen propterea necesse est, ut universum hoc aliquando omnibus nudatum formis fuisse existimemus, ut neque opus est putare, aliquam revera civitatem existere, quæ non habeat suos imperantes ac parentes, quæ nullo ordine, nullis legibus contineatur, hoc est, quæ simul non sit respublica. Tantum hæc ita tractantur, ut ordo observeretur qui clariori distinctiorque rerum inservit intelligentiæ.

3. Et secundum priorem quidem considerationem, *materiam unam* in toto existere universo affirmamus: quod ita volumus intellectum, ac si quis diceret, cunctorum hominum, qui sunt in orbe terrarum, unam & eandem esse naturam, quandoquidem nullus datur, quin sit ex mente & corpore organico compositus.

4. Nempe sic etiam à nobis nulla statuitur materia, quin sit extensum quid in longitudinem, latitudinem & profunditatem, cum nihil aliud, quod substantiam materialem constituat, in rebus Physicis percipere queamus. Et hoc *idem specie* in scholis appellant.

5. At enim, inquit aliquis, si rudis illa & indigesta moles universum constituit, unde ergo oritur hæc, quam videmus, tam varia rerum naturalium elegantia, unde decus istud eximium, unde admirabilis ille cælestium ac terrestrium corporum ornatus, quem Græci & Latini dum considerant, universitatem hanc κόσμον & mundum nominavere?

6. Re-

6. Respondeo, duum generum, si quidem eas respectu mentis nostræ distinguamus, à nobis in materia intelligi qualitates sive dispositiones; alias clarè & distinctè; cujusmodi sunt exempli causâ figuræ, situs, determinatæ magnitudines; alias obscurè tantum & confusè, cujusmodi sunt colores, gravitas, levitas, & similes.

7. De posterioribus, unde proveniant, non licet philosopho judicare, antequam clariùs eas perceperit. Priorum tota multitudo ac diversitas generatim ad hoc unum caput referri potest, quod materia sit divisibilis in partes, sive mobilis.

8. Unde affirmamus, omnem universi hujus varietatem, omnem corporum naturalium pulchritudinem, quam animo & cogitatione assequi valemus, primò & proximè à motu proficisci, qui est in mundi partibus.

9. Quam originis rationem ut eò faciliùs capias, hoc tibi simile propone: cogita te esse, ubi tacente aëre circumfundaris, nihil ut audias, nihil percipias: statue deinde Musicum quendam modulante lingua ac fidibus pulsatis aërem percutiendo tremulum ac vibratum in ejus partibus motum excitare, statim ut pulcherrima auribus tuis insonet harmonia.

10. Eodem modo, si consideres totum hoc universum, quod Deus ex nihilo creavit, primò quidem ut informe & inornatum; mox tamen animadvertes, eodem Deo partibus illius inspirante motum, delectabilem rerum in mundo extitisse varietatem.

11. Mobilem verò materiam *secundum partes* suas esse necessum est, ut omnis inde, quæ in mundo percipitur, diversitas oriatur. Totam quippe materiam seu totum universum simul uno aliquo motu *recto* ferri posse, non intelligimus, quoniam indefinitam ejus extensionem attendentes, locum, quò feratur, invenire nullum possumus. At si *circulari* motu totum simul circumferri ponamus, haudquaquam ista, quam in mundo admirabili cum voluptate cernimus, inde deduci queat corporum naturalium varietas.

12. Ita, ut in proposito simili persistamus, si aër vento agitatus versus unam regionem totus moveatur, vel in se volutatus vorticem faciat, nulla efficietur harmonia: at si linguæ humanæ pleetro ac fidibus tensis nunc major, nunc minor aëris portio, aliter hæc, aliter illa concutiat, una fortius, altera remissius pulsetur, vocum discors nascetur concordia.

13. Dum itaque materiam secundum partes mobilem dicimus,

T

quod

quod idem est ac si divisibilem vocaremus, simul docemus, eam aptam natam esse, ad omnes illas qualitates sive affectiones suscipiendas, quas ex partium transpositione in eo, quod partes extra partes habet, oriri posse, philosophando licet animadvertere.

14. Ac duobus quidem modis possumus de divisione materiæ loqui: nam alia fit sola cogitatione mentis, alia reali ipsarum partium motu perficitur: illa in mente & à mente est, hæc extra mentem in corpore reperitur.

15. Prior divisio nullam rebus infert varietatem: sic mens humana quæ nihil nisi cogitando agit, nullam possidet facultatem, qua cibum coquere in ventriculo eumve dividere ac distribuere valet, ut neque sollicitè quantumvis cogitando ad staturam corporis sui potest vel tantillum adjicere.

16. Talis est sectio corporum *Mathematica*, qua mens Geometræ in Sphæra ex. gr. aliove corpore duas aut plures partes æquales aut inæquales concipit & imaginatur. Talis etiam est divisio materiæ sive corporis *Logica*, ut si aliquis scriptor Anatomicus humanum corpus distinguat in truncum & artus, truncum in caput, &c.

17. Posterior divisio, verè *Physica*, hujus tantum loci est, & non nisi motu peragitur, ut si Anatomicus in theatro cadaver humanum secet, aut si aquæ, ceræ, nivis vel glaciæ particulas ignis commoveat, ac dissolvat bullientes, aut si villica, crebriore quassatione, buryrum secernat ab oxygala, atque illi postea varias figuras indat.

18. Hinc omnes illæ materiæ mundanæ varietates, ut quod alia glacies, alia aqua, alia vapor, alia dura, alia mollis, alia frigida, alia calida, alia rotunda, alia quadrata sit ac dicatur, hoc est, omnes diversæ corporum facies ac formæ, tam exteriores quam interiores (de anima rationali hic non agitur) à motu in certis partibus nunc præfente, nunc ab iisdem ablente dependent.

19. Atque hæc nostra est de motus efficacia & valore sententia, quam quidem, ut & omnes alias opiniones nostras, cum philosophorum qui olim fuerunt, sententiis amicè conspirare, quam adversa fronte pugnare malimus; adeo sumus à novitatis & partium studio alieni.

20. Et videtur sanè Philosophorum cohors quodam modo idem nobiscum sentire, quando *Naturam* definit, ut vulgo facit, principium motus & quietis.

21. Nam si per naturam intelligatur id ipsum, per quod omnes

res.

res corporeæ tales evadunt, quales esse observantur, nempe calidæ, frigidæ, aqua, glacies &c. (Quid enim aliud verè hic possit intelligi, non video) illud omnino in motu & quiete ortum suum & principium invenit.

22. Et cur motum ac quietem præ reliquis corporum attributis nominare in tali definitione placuisset, nisi potiores his in natura constituenda partes dandas esse Philosophi judicassent? Sed nolim hac de re contentionis serram cum quoquam ducere: tantum occasione data semel ostendere lubuit, nobis non deesse voluntatem propria dogmata cum aliorum inventis, quantum salva veritate fieri potest, in concordiam redigendi, aut saltem nos studio nolle vulgo receptis contradicere.

23. At nunc fusiùs & accuratiùs natura & essentia motus explicanda erit, ut, quidnam sit, recte intelligatur; ac deinde agendum de causa ejus à qua pender.

24. In primo propositæ tractationis capite initio vulgarem motus descriptionem examinabimus; quæ si forte non satisfaciât, accuratiorẽ aliam investigabimus.

25. Descripturi autem sumus motum *localem*: quod epitheton non foret opus addere, nisi alii alios ab hoc motu diversos sibi in Physicam inducendos putassent. Atqui intellectus meus, sedulò attendendo multiplices rerum variationes, non nisi unum motum potuit unquam deprehendere.

26. Quemadmodum enim non possumus intelligere nisi unum corporeum rerum universum, & non nisi unam materiam ex qua constat, adhuc non nisi unum Deum qui fecit & gubernat: ita non nisi unum motum, per quem varietas pulcherrima in mundo, auctore Deo, producitur percipere valemus.

27. Et hæc de motus unitate videtur omnium antiquissima sententia, quia nullum nomen extra Scholas, quod sciam, exstat, quo homines alium designent in re corporea motum, quam localem (considerentur nomina *κίνησις*, *moveto*, *bewegen*) / sicuti quoque vetustissima de Dei & mundi unitate opinio.

28. Sed ut paulatim descitum est ab unitate veri Dei ad multitudinem Deorum: ita motus genera primò quidem duo, deinde tria, tandem plura sunt à male philosophantibus introducta.

29. Nam Platonis quidem tempore duo soli motus numerabantur, latio seu localis motus, & alteratio; quo faciunt illa in Parmenide:

quod movetur, vel fertur, vel alteratur, hi quippe soli sunt motus: & ista in Theæteto: ex his necessarium est geminas species motus existere, alterationem sc. motumque localem.

30. Aristoteles tres ponit, sicutamen, ut localem ex omnibus motibus primum faciat, quod reliqui sine hoc esse nequeant, 8 Physic. 7. Cum itaque tres sint motus, in magnitudine, in affectu, atque in loco, quem quidem lationem consuevimus appellare: hunc primum motum esse necesse est &c.

31. Verum de opinionibus aliorum quidquid sit, jam dudum in scholis generatio, corruptio, augmentatio, diminutio, rarefactio, condensatio, alteratio, latio (ne jam dicam de moribus magneticis, sympatheticis aliisque) pro motibus, aut saltem mutationibus inter se diversis habentur: quoniam Philosophi non potuerunt perspicere, quomodo fieri queat, hæc omnia ut uno eodemque motus genere perficiantur.

32. At nos omnia ad res corporeas pertinentia, quæ hæctenus in scientia Physica occurrerunt, vi localis motus posse evidenter explicari didicimus; ideoque si plures alios ab hoc omnino distinctos in naturæ censum vellemus introducere, temerè multiplicaremus entia, & judicium nostrum à perceptione dissentiet, quod est ἀφιλίστοφον.

33. Sed describamus tandem localem motum: & primò quidem secundum sensum vulgarem, ac deinde secundum ἀκριβειαν philosophicam, ut ex oppositione ista clariùs ejus natura eluceat.

34. Vulgò quidem de motu locali dum cogitatur, animus sibi repræsentat actionem, qua corpus aliquod ex uno loco in alium migrat. Hujusmodi actionem cuncti homines motum putant esse localem, nec aliud quidquam vocabulo motus in vita quotidiana designant.

35. In qua descriptione primò notari velim, quòd à consideratione motus, qui in corpore nostro est, desumpta sit, atque inde ad motum generatim spectatum traducta, quoniam homo se gerit pro mensura & speculo universi, quod inter errorum fontes retulimus Log. IV. 33.

36. Nam quod per motum semper intelligamus actionem, inde est, quod conatum illum respicimus, quo utimur ad membra nostra & illorum ope alia corpora permovenda: cujusmodi conatum in aliis quoque rebus, quæ moventur, inesse absque ratione fingimus. Et migrare propriè notat domicilium mutare; quod hominibus familiare est.

37. Deinde vel maxime in eadem descriptione observandum, quod

quod propter adhibitum *loci* vocabulum nimia ambiguitate laboret; quod clariùs ut appareat, nonnulla de loco hîc repetemus.

38. Loci nomen nihil aliud designat, quam magnitudinem, figuram & situm unius corporis inter alia: qui situs ut determinetur, respicere nos oportet ad alia aliqua corpora, quæ consideramus veluti immota: & prout ad diversa respicimus (uti solemus nunc hæc, nunc illa pro lubitu respicere) dicere possumus, unam eandemque rem locum mutare & non mutare, seu moveri & non moveri, (& hinc proficiscitur ea quam dixi in loci vocabulo ambiguitas.)

39. Exempli gratiâ, qui sedet in navi, dum ea solvit è portu, putat quidem se moveri, si respiciat ad litora, eaque ut immota consideret, non autem si ad ipsam navim, inter cujus partes eundem situm servat. Imo etiam, quoniam vulgo existimamus, ut modò dictum, omnem motum in actione, quietem contrâ in cessatione actionis consistere, ille ipse sedens in navi, cum nullam in se actionem animadvertat, & sermo cogitationum sit interpret, magis propriè dicitur quiescere quàm moveri.

40. Idem judicandum est de omni corpore duro, quod ab alio vel duro (v.g. navi, curru) vel fluido (ex gr. aëre, cælo, aqua) deferatur, quod nempe vulgarem motus significationem si attendamus, potius dicatur quiescere quàm moveri.

41. Ex quibus intelligitur, si in tali persistamus motus definitione (quæ è loco ad locum nos ablegat, nulla majore addita restrictione) incertum sæpius relinqui, utrùm quid moveri an quiescere dicendum sit, cum interna natura motus tali ratione non exprimitur, sed respectus duntaxat indicetur unius corporis, ad alia, qui à mentis nostræ pendens arbitrio extra res ipsas est.

42. Ne nunc dicam, quòd *localis* motus incommodè definiatur *loci* facta mentione, ob legem logicam, quæ vetat ne definitum, vel totum, vel ex parte, ingrediatur definitionem. Ne etiam memorem, non satis expressè denotari, quid *corporis*, quod in ista definitione ponitur, nomine hîc propriè sit intelligendum. Satis enim ex dictis apparet, aliam esse motus definitionem quærendam.

D I S P. XIV.

Motus Localis definitio philosophica.

1. **Q**Uoniam à doctrina de Motu tota Physica præcipuè dependet, necessarium omnino est, ut, missâ vulgari & incertâ eius de-

scriptione , accuratior & philosophica definitio assignetur , quæ sic ejus naturam nobis declaret , ut nulla in parte ambiguitas relinquatur.

2. Definitio autem explicans , quid per motum oporteat intelligi , talis est, *Motus est translatio unius partis materiae, sive unius corporis, ex vicinia eorum corporum, quæ illud immediatè contingunt, & tanquam quiescentia spectantur, in viciniam aliorum.*

3. Quæ definitio ut perfectè intelligatur , partes ejus singulas interpretabimur , ita ut quatuor ista ad motum concurrentia distinctè pensitemus: 1. terminum, à quo incipit motus. 2. terminum, ad quem tendit. 3. subiectum, quod ab uno termino ad alium transducitur. 4. ipsam illam translationem, in qua ratio formalis motus consistit.

4. Incipientes à tertio dicimus; motum esse in uno aliquo corpore, seu in una aliqua parte materiæ mundanæ, ob causas th. 1 & 1 differtat. præced. allatas. Et *corporis* nomine hic significamus portionem universæ materiæ, quæ certa & peculiari superficie coërcetur.

5. Et quidem per *unum* corpus intelligimus id omne quod simul transfertur, atque ita velut indivisum spectatur, etiamsi hoc ipsum rursus constare possit ex multis minoribus partibus, quæ alios in se motus habent, præter communem illum, quem cunctæ participant, sibi proprios. Ex. gr. dum corpus hominis movetur, simul cum eo sanguis, spiritus, oculi, lingua, manus moventur, quæ partes omnes peculiares interim motus habent, aut certe habere possunt, præter eum quem cum toto corpore, cujus partes sunt, communem obtinent.

6. Atque ita accuratiùs explicuimus illud, quod vulgaris motus descriptio, *corpus aliquod* nominando, confusius proponebat. Vide thesin ult. superioris disp. & ut intelligas, quare *partem unam materiae* hoc loco appellemus illud corpus, attende, nos adhuc versari in Physica generali, ubi materia, veluti unum & indivisum quid, tantisper considerata fuit, dum ad contemplationem motus perveniretur. Confer th. 3 & seq. disp. præced.

7. Jam ad quartum accedimus, ubi quæritur, quidnam illud sit in corpore mobili, propter quod moveri dicitur, seu, in quo motus ipse revera consistit? Resp. id esse ipsam *translationem*, non actum transferentis, nec transferendi facultatem.

8. Hoc duas ob causas inculco: primò, ut hoc ipso doceam, motum non in corpore ~~movente~~, quatenus tale est, sed in mobili, tanquam

quam in subiecto suo, semper esse quærendum & ponendum. Solent enim per sepe movens & mobile à Philosophis confundi, ut, quando putant lapidem aliudve corpus grave deorsum ferri, activè terram appetendo.

9. Deinde, ut ostendam motum non esse substantiam, seu *rem strictè* appellatam; sed esse *modum* rei quæ movetur, quemadmodum figura est modus rei quadratæ vel rotundæ, & quies rei quiescentis, cubatus cubantis, statio stantis. Namque per motum, quietem & figuram res corporeæ variantur, ut aliter atque aliter se habeant, quod in scholis vocant *modificari*.

10. Sed obducatur aliquis, motum localem, translationem, lationem, Græc. *φωσιν*, esse Philosophis vocabula synonyma, & per consequens in definitione motus localis translationem non posse loco generis poni, ut hîc fieri videtur, cùm genus debeat latius patere specie.

11. Resp. definitionem aliam esse *essentialem*, quæ genere & differentia constat, aliam *causalem*, quæ à causis ad rem constituendam concurrentibus desumitur. Atqui motus definitionem esse posterioris generis ex th. 3. liquet. Essentialis definitio, quæ motum, veluti speciem sub eodem proximo cum aliis rebus genere collocatam, à specie vel speciebus oppositis discerneret, hîc non desiderabatur, quia motus tale quid est, cui non invenitur simile quidquam in toto rerum universo. Philosophi ens *successivum* nominant, alias res omnes vocant *permanentes*.

12. At misso istiusmodi dubio, quod scholasticus quis movere possit, qui ad Logicæ suæ præconceptas regulas omnia assuetus est revocare, videamus potiùs, quomodo liberare liceat animum ab illa opinione, qua sumus omnes à teneris imbuti, quod plus actionis ad motum, quàm ad quietem requiratur. Nam inde est, quòd putemus, in definiendo motu actionis mentionem omnino faciendam esse, nec possimus eum satis ceu passionem, affectionem vel modum rei, quæ movetur, considerare.

13. Ut igitur omnibus difficultatibus, quæ hîc possunt occurrere, nos extricemus, tria ista sunt observanda: 1. Distinguere oportet inter actum hominis, qui mente & corpore præditus; & motum alicujus rei quæ nil nisi corpus est. 2. Dispicendum est, an in comparatione plurium actuum, ad omnes eos, inter quos instituitur comparatio, æquè animum advertamus. 3. Initium motus cum initio
quie-

quietis, continuatio motus cum continuatione quietis conferenda.

14. Jam si attentius examinemus, quæ causa sit, cur ab ineunte ætate nobis persuaserimus, plus actionis ad motum, quàm ad quietem requiri, non aliam inveniemus, quàm eam, quæ à consideratione motûs, qui in corpore nostro est, desumitur. Confer th. 35. disp. præcedentis.

15. Animadvertebamus enim jam ab infantia sensuum ope, quoties corpus nostrum ex uno loco in alium translatum vellemus, oportere id nos efficere per actionem aliquam nostram, quoniam sponte sua non movebatur quò vellemus: è contrario, cum illud quiescere cuperemus, animadvertebamus id sponte sua fieri per gravitatem, quam sine ulla actione concipiebamus.

16. Nempe dum corpus nostrum movetur, voluntatis nostræ imperio regitur, cujus actionis (intellige, ipsius voluntatis) sensus in anima nostra manifestissimus est: sed quando corpus nostrum quiescit, non percipimus similem à voluntate nostra, aut ab alia causa prodeuntem agendi efficaciam, ac proinde minore vi tunc opus esse arbitramur.

17. Verùm ista ratione primò quidem contra observationem primam th. 13 confundimus conatum voluntatis seu actionem mentis, quæ huc planè non spectat, cum actione corporis, quæ sola pertinet ad hunc Physicæ locum, ubi res merè corporeæ considerantur, adeò ut quæstio sit, an plus actionis *Corporeæ* ad motum, quàm ad quietem requiratur. Nihil jam dicam de alio errore, qui in opinione, quam in præsentia examinamus, inest, quasi voluntas propriè efficiat motum in membris nostris, cum tantùm gubernet motum, qui jam est in spiritibus, eò ferè modo, quo auriga currum regit. Sed hæc è Physica speciali petenda sunt, nunc vide tantùm th. 15 præced. disp.

18. Deinde, observatione secundâ non consideratâ, negligimus animadvertere ipsam genuinam causam quietis in corpore nostro, dum non attendimus *vim gravitatis*, quæ facit, ut corpus nostrum terræ adiaceat, imò quæ tanta est, ut totam terram sustineat.

19. Nec tantùm illam gravitatem à cælesti pressione (ut in speciali Physica demonstratur) pendentem insuper habemus, verùm etiam plures alias causas, motibus, quos in membris nostris ciere volumus, resistentes, & fatigationem ac consequenter quietem inducentes pro solita nostra oscitantia omittimus.

20. Sed

20. Sed largiamur semel animis præjudicio occupatis, ut actionem mentis & corporis sentiendo & loquendo confundant, atque illud omne quod sensibus non percipiunt pro nihilo ducant, refutabimus tamen ipsos, dummodo à proprio suo corpore ad corpora externa & aliena mentis aciem paulisper velint convertere, non omissa observatione tertia th. 13.

21. Exemplo ostendam evidente, non modò conatu nobis opus esse magno ad corpora externa primò movenda, sed opus etiam esse pari conatu ad eorum motus primò sistendos, siquidem à gravitate aliisve causis non sistantur.

22. Quiescat enim navis in stagno aliquo (id est, in aqua quæ stat & non fluit) & videbimus non majori actione opus esse ad illam impellendam, ut incipiat moveri, quàm ad eandem, cum jam in motu est, subito retinendam, ut incipiat quiescere. Dico, *subitò*, nisi enim hoc fiat, nos soli navem ad quietem non reducemus, sed habebimus alias causas adjuvantes.

23. Aut si experientia hoc in casu doceat, quòd paulò minor efficacia requiratur ad navem sistendam, quàm ad movendam, causa est, quòd & gravitas aquæ, quam navis atollit dum movetur, & ejusdem lentor (supponimus enim aquam stagnantem & quiescentem) paulatim imminuat ejus motum.

24. Atque hinc novam petimus thesicos octavæ & nonæ confirmationem, nimirum, cum hoc loco non agatur de illa actione, quæ intelligitur esse in movente, vel in eo qui motum sistit, verùm de sola translatione, ac translationis absentia, seu quiete, manifestum fit, hanc translationem extra corpus motum esse non posse. Ita nec quies est extra rem quiescentem, nec sessio extra personam sedentem.

25. Quemadmodum etiam manifestum est, hoc corpus alio modo se habere, cum transfertur seu movetur, & alio, cum non transfertur, seu, cum quiescit: adeo ut motus & quies nihil aliud in eo sint, quàm duo diversi modi.

26. Genus *Motus* propinquius, quàm hoc ipsum *Modus*, nobis nullum occurrere th. 11 vidimus. Notabis autem quod Logici in Categoriis Motui propriam sedem non assignarunt, quasi nullum in rerum generibus locum mereatur id cujus beneficio cuncta ad locum suum veniunt, cujus in universo vis & efficacia est multò maxima, ut præced. disp. docuimus. In Categoria quidem Quantitatis Motum esse quantum per accidens aiunt, at quantitatis speciem esse negant.

gant. Sono tamen, calori & similibus, quæ revera localis motus species sunt, in prædicamento Qualitatis per se locum dederunt. Ex quo duplici argumento cognoscere licet, quam imperfecta sit ista Categoriarum doctrina.

27. Si cui videatur ad Actionis & Passionis Categoriam localem Motum esse referendum, is 1. rationem det, cur Quietem non eodem referat, cum duo ista contraria sub eodem genere videantur collocanda. 2. consideret, incessum, cursum, fluxum, sonum, calorem aliasque motus species ad Actionem vel Passionem, uti genuinas classes suas, non pertinere, cum tamen genus & speciem ejusdem esse Categoriarum deceat. 3. distinguat Motus esse respectivum & initiale, ab esse ejus magis absoluto & continuato, atque ex hoc posteriore potius quam illo priore veram Motus naturam æstimandam esse judicet.

28. Quamvis enim motio in principio respectu motoris præsentis actio, respectu corporis moti passio censi possit, non tamen in progressu & continuatione, absente motore, motus in mobili pro actione aut passione haberi debet. (Exemplo sit motus pilæ non amplius urgente reticulo.) Nam eadem ratione continuata quies, sessio vel statio tuæ actiones & passionem essent dicendæ, eo quod initio, quando ab aliquo tali in situ collocatus fuisti, ejusmodi respectum haberent. Aliud est terminari actionem ad motum vel quietem, cursum vel sessionem, aliud ipsum motum &c. esse actionem. Rei natura potius dijudicanda ex eo quod in facto esse quam quod in fieri, aut certe ex eo potius quod in fieri diutius continuato ac durante, quam quod in fieri solum inchoato ac citò transeunte cernitur.

29. Neque sine causa hæc in præsentia, ubi de essentia & natura motus agitur, ut clarum ac distinctum ejus conceptum animus noster formet, observanda esse monemus. Quicunque enim de Motu cogitans potius actionem sibi repræsentat moventis, quam statum, motum vel formam impressam mobilis, is continuo dilabitur ad quærendas motuum causas, quæ nullæ sunt: veluti formas substantiales, intelligentias orbium cælestium motrices, vires insitas aut qualitates à motu revera distinctas & ipso priores. A quibus cogitationibus naturalium rerum studiosus animus, quantum fieri potest, abducendus est.

De motus localis terminis , à quo , & ad quem.

1. **V** Idimus motum nihil aliud esse quàm translationem ; didicimus etiam , cujus rei sit translatio & quomodo latio sit animo concipienda. Quæri autem potest cur hic non subsistamus , sed alia multa definitioni Motus attexamus , aut quare , cùm definitio debeat esse brevis , non paucis verbis nos absolvamus , dicendo , translationem fieri *de loco in locum*. Igitur explicandum est , unde & quò corpus motum transferri intelligatur , ecurr in motus definitione dicatur , translationem fieri *ex vicinia corporum contiguorum , in viciniam aliorum* : quibus verbis significamus , corpus mobile ita transferri , ut , cùm prius tetigerit hæc corpora , jam tangat alia.

2. Sed ut omnia melius percipiantur , tria ista sunt notanda : Primo , in corporibus illis , quæ hic dicuntur contigua , contactum intelligi proximum atque immediatum. Secundo , plura ferè corpora esse , quæ ita tangunt corpus illud quod movetur : sic arbor quæ ex uno horto transfertur in alium , non modò ab aëris contigui , verùm etiam à terræ circumjectæ vicinia recedit. Tertio , ea omnia à quibus recedunt , & ad quæ accedunt corpora mota , *spectari tanquam quiescentia* , etiam si propterea non sit necesse , ut revera quiescant. Non enim opus esse , ut res aliqua in eo statu omnino sit , in quo consideratur à mente nostra , alio exemplo didicimus disp. X III. th. 1. & 2.

3. Dum contactum intelligimus talem , quo corpora sibi adeo sunt propinqua , ut nulla intercurrat inter eorum extremitates sive superficiem alia materia , tollimus ambiguitatem quæ in vulgari motus descriptione , propter adhibitum *loci* vocabulum inerat , de qua disp. XIII. th. 38. & seqq.

4. *Loci* enim vox diversas habet , & in vita quotidiana habere debet , significationes , quas omnes ei assignat animus noster , dum corporis alicujus certum situm ac distantiam refert ad alia corpora circumstantia , propinquiora vel remotiora. Sic hominem dicimus esse in lecto , in cubiculo , in Domo , in Urbe , in Germania , in Europa , in Terra ; sic vinum in poculo , in triclinio , in Domo , in Urbe , in regione Clivenfi , in Germania , in Europa , in Mundo ; Quibus omnibus locum hominis & vini designamus , respicientes alia corpora propinqua , remota , remotissima , pro arbitrio mentis nostræ.

5. At quoniam unum idemque corpus , eodem temporis mo-

mento, non nisi ab una aliqua corporum ambientium congerie immediate potest contingi, laxa illa & vaga de loco & motu loquendi ratio vitatur, *dum ex vicinia corporum immediate contiguorum transferri dicitur*. Huic namque considerationi inhærentes, non possumus uni corpori nisi unum locum, nec uni mobili nisi unum motum eodem tempore attribuere.

6. Logicæ præceptis imbuto lectori rem ista similitudine clarius expono: quemadmodum genus proximum cujuscunque speciei unum tantum est, remota genera sæpè plurima: ita proximè contiguum corpus respectu ejusdem corporis non nisi unum esse potest, remotè contigua vel circumstantia possunt esse multa & varia. Ut igitur in definienda rei natura, majoris certitudinis ac distinctionis causâ, sumitur genus proximum, non remotum: ita in determinando motu, ne mens incerta hæreat, attenduntur contigua proxima, non remota.

7. Postremò addimus, corpora illa contigua, à quorum vicinia transfertur aliud corpus, *spectari tanquam quiescentia*, quamvis non requiratur, ut reipsa quiescant. Sic navis ratione hominis in ea ambulantis consideratur ut quiescens, licet interim celerrime à vento pel-latur.

8. Equidem, ut omnis contactus est mutuus, (nam si mea manus tangit tuam, tua eodem momento tangit meam) ita etiam omnis translatio est *reciproca*: nimirum dum nostræ manus à se mutuo iterum separantur, & mea à vicinia tuæ, & tua à vicinia meæ recedit, adeo ut utrobique translatio illa, quam localem motum proprie nominamus, reperiatur. Quin imo par utrobique vis atque actio requiritur, sive ego velim manum meam à tua, sive tu velis tuam à mea removere, sive uterque nostrum simul idem velit & faciat.

9. Nec melius potest explicari *vis reciproca* in mutua duorum corporum ab invicem separatione, quàm si nobis ponamus ob oculos navigiolum aliquod hærens in luto juxta fluminis ripam, & duos homines, quorum unus stans in ripa navigiolum manibus pellat, ut illud à terra removeat, eodemque prorsus modo alius stans in navigio ripam manibus pellat, ut illud idem à terra removeat. Si enim horum hominum vires sint æquales, conatus ejus qui terræ insistit, terræque idcirco conjunctus est, non minus confert ad motum navigii, quam conatus alterius, qui cum navigio transfertur. Unde patet, actionem, qua navigium à terra recedit, non minorem esse in ipsa terra

terra (cujus sc. pars est homo, qui ei insistit,) quam in navigio (cujus pars jam ponitur homo, qui cum eo transfertur.)

10. Itaque si motum vellemus per se & prorsus absolute considerare (hoc est, si vellemus illud solum attendere, quod revera in corporibus quæ moventur invenitur, & propter quod moveri proprie dicuntur, quoties duo corpora contigua, unum in hanc, alterum in illam partem, transferuntur, atque ita à se mutuo separantur, tantundem motus in uno, quantum in altero esse diceremus. Ex gr. si lapis ex terra effoditur, & aliò transportatur, tantum motus, hoc est translationis in ipsa terra quæ separatur à lapide, quantum in lapide, qui separatur à terra, inesse licet affirmare.

11. Verum communis loquendi usus, ut sæpè alibi, naturæ ipsarum rerum minus accuratè respondet; ita hic non permittit, tali modo de motu naturalium corporum ut loquamur.

12. Et causa quidem cur aliter vulgò loquamur de motu, quam nunc de eo sentiendum esse videmus, ista est, quod assueti sumus stare in terra, eamque ut quiescentem considerare, quasi idem omnino spatium, eundem locum internum & externum, nec non distantiam à quibuslibet corporibus eandem retineat.

13. Unde fit, ut, licet aliquæ terræ partes pedibus, aut calceis nostris, lignis, lapidibus &c. contiguas, ab horum corporum, quæ terræ respectu valde exiguum habent magnitudinem, vicinia separari videamus, non tamen ipsam terram ideo moveri seu transferri ac separari judicemus.

14. Quemadmodum autem de terra, cum parvis ejusmodi corporibus collata, cogitamus: ita etiam sentimus de aliis corporibus quibuscunque, si comparentur minoribus, ut illa spectemus veluti immota, his motum tribuamus: ex. gr. si liber è vicinia unius partis mensæ transferatur in viciniam alterius, quamvis translatio (quæ passio seu affectio rei est quæ transfertur) æque sit in illa parte mensæ ac in libro contiguo, non tamen mensæ, sed libro motum vulgo solemus adscribere.

15. Sed causam plenius aperiamus, cur ex duobus corporibus contiguis, quæ separantur ab invicem, seu, quorum in utroque simul est translatio, unum potius quam aliud moveri dicatur, sicuti in exemplis allatis pes potius quam terra, liber potius quam mensa moveri dicitur.

16. Nempe 1. quoties motum rei alicui assignamus, cogitamus

eam integram & totam esse subjectum hujus motus: Jam verò non possumus existimare totam terram moveri, eo quod corpusculum aliquod contiguum ab ejus partium vicinia, in viciniam aliarum, transfertur. Simili fere loquendi ratione mercator utitur, quando pannum longiorem forfice aliove instrumento in duas partes divisit, quarum altera valde parva est, tunc enim minorem hanc partem à majore ablatam sive abscissam dicit, non contra, etiamsi revera pars major æque sit à minore separata ac sejuncta, ac minor à majore. Sic gladius homini alligatus dicitur, non homo gladio, quem loquendi morem Cicero de genero suo, pusillæ staturæ homine, jocans invertebat. Macrobius Saturn. lib. 2. cap. 3.

17. Et cum 2 sæpius accadat, ut in terra aliisve corporibus translationes sint contrariæ, (verbi gratia, si ego in terra versus orientem ambulem, tu interim versus occidentem iter facias, aut si ego librum meum versus dextram mensæ partem moveam, dum tuum versus sinistram) si quidem absolutæ motus naturæ verba nostra congruere vellemus, res eadem eodem tempore dicenda foret in contrarias partes ferri (v. g. terra simul versus orientem & occidentem, mensa versus dextram pariter & sinistram) quæ nimis intricata, sibi que ipsi repugnans loquendi ratio esset.

18. Ne igitur à vulgari loquendi consuetudine nimium recedamus, cum ars logica dictione pluribus recepta nos uti jubeat, in exemplis propositis, non terram aut mensam, sed homines ambulantes, & libros moveri affirmabimus, atque ita de reliquis.

19. Accedit enim præterea 3 ratio, quod corpora ista majora, quæ veluti quiescentia spectamus, non modo eundem situm retinent inter externa corpora, à quibus certo intervallo distant (quæ consideratio vulgi est); sed præcipue, quia immediatam viciniam cum aliis corporibus ultra existentibus integram servant (quæ significatio magis philosophica est.) Ex causa, etsi liber ab aliqua superiore mensæ parte separatur, aliæ tamen ejusdem mensæ partes superiores, inferiores, laterales, eodem temporis momento immediatum contactum cum aëre, terra, aliisve corporibus ambientibus illibatum retinere possunt. Cum igitur multò plures mensæ partes non transferantur, & à priori fiat denominatio totius, tribuimus mensæ quietem.

20. Quamvis itaque non possimus communi loquendi rationi prorsus refragari, tamen memores interim erimus, id omne, quod revera in corporibus, quæ moventur, invenitur, quodque causa in ipsis

ipsis est cur dicantur moveri (translationem semper intelligo, quantum ut modum & affectionem rei consideramus), reperiri etiam in majoribus corporibus, nempe in terra, mensa, & similibus, quæ tamen ut quiescentia tantum spectantur.

DISP. XVI.

De motu communi & proprio aliisque motuum differentiis.

1. **O**stendimus uni corpori non nisi unum motum eodem tempore posse attribui, quoniam non potest nisi ab una aliqua congerie corporum eodem momento recedere, nec, nisi ad certa aliqua alia corpora, accedere. At putet aliquis, hanc doctrinam repugnare experientiæ, quæ plures in eadem re motus simul esse probat. Vide Disp. XI V. th. 5.

2. Resp. distinguendum esse inter motum *proprium*, qui corpori per se spectato competit, & cujus definitionem hæcenus enucleavimus; & *communem*, qui corpori alicui convenit, quatenus pars est totius alicujus corporis quod movetur, ejusque motum participat: qui motus propriè *Delatio* dicitur, à deferendo; ab aliis philosophis *motus per accidens*, quia propriè & per se motus non est.

3. Ex. gr. si quis ambulans in navi horologium in pera gestat, ejus horologii rotulæ unico tantum motu sibi proprio moventur, quo horas indicant: Sed participant etiam alium, quatenus adjunctæ homini ambulanti unam cum illo materiæ partem faciunt, item alium, quatenus adjunctæ sunt navigio in mari fluctuanti, adhuc alium, quatenus adjunctæ ipsi mari, &c.

4. Omnes isti motus revera sunt in rotulis istis horologii, nec ullus eorum negandus est, cum proprius non excludat communem, nec communis proprium: quemadmodum in omnibus aliis rebus & propria & communia attributa inveniuntur, quæ nullus negat simul posse consistere.

5. At quoniam adeo multi motus non faciliè simul intelligi, nec etiam omnes satis evidenter agnosci possunt, (multitudo enim rerum intricare mentem solet & confundere; vide Log. I. 10.) satis erit in Physicis unicum illum motum, qui proprius est cuique corpori, in ipso considerasse: quemadmodum etiam in accurata rei alicujus contemplatione non solet requiri, ut communia rei attributa multum attendamus, cum ad propria potissimum animus sit convertendus; Log. I. 39.

6. Quem-

6. Quemadmodum autem nihil ferè est adeò simplex & unum, quin à mente humana dividi possit in plura quasi membra (Log. I. 104. seq.) ita etiam motus propriè sumptus, qui in unoquoque corpore unicus est, potest instar plurium ab intellectu nostro considerari: ita solemus in rotis curruum duos spectare motus, inter se differentes, unum quidem *circularem*, circa ipsarum axem, alterum *rectum*, secundum longitudinem viæ, per quam feruntur.

7. Certum interim est; in rota qualibet non esse motus revera inter se diversos, quoniam unumquodque punctum corporis, quod movetur, unam tantùm aliquam lineam circa corpus contiguum, quod veluti quiescens consideratur, describit, circa quod etiam unam superficiem per suam superficiem producit. Sic clavus in curru rota, per terræ planitiem ab equis protracta, circa ejus axem se volvens, unicam habet volutionem.

8. Dices, istam lineam sæpenumero valdè esse contortam, ideoque à pluribus reipsa distinctis motibus ortam videri. Resp. id nihil obstat unitati lineæ, quia possumus eodem modo lineam quamcunque, etiam rectam, quæ nulla datur simplicior, ex pluribus diversis motibus genitam concipere. Talis linea describitur à motu pilæ plumbeæ, quam ferunt è summo malo, in navem velocissimè proVectam, ad malipedem, vel ab equitante in altum projectam, in manum ejus, ad perpendicularum decidere: ubi motus pilæ unicus & proprius ex progressivo & descensorio componitur, qui uterque rectus est.

9. Itaque quamvis ex illo præcepto methodi, quo jubemur difficultates, quas examinaturi sumus, in tot partes dividere, quot expedit ad illas commodiùs resolvendas, persæpe quidem utile sit, unum motum in plures partes dicto modo distinguere, ad faciliorem ejus intelligentiam comparandam (vide Log. I. 103. seq.); absolutè tamen si loquamur, unus tantùm in unoquoque corpore motus est numerandus, qui ei proprius est.

10. E superioribus intelligitur, quid de illis Platonis verbis sit sentiendum, quæ leguntur in Dialog. IV de Rep. interprete Marf. Ficino: *Stare simul atque moveri idem secundùm idem nunquid potest? Nullo modo. Præterea hac diligentius confirmemus, ne qua procedentibus nobis ambiguitas fortè suboriat. Si quis enim dixerit hominem stantem quidem, moventem verò manus & caput, eundem stare simul atque moveri, haudquaquam ita dicendum censebimus, sed partem quidem ejus manere, partem verò moveri.*

Annon?

Annon? Ita prorsus. Quod si artificiosius & argutius iste luserit, asserens turbamem trochumque totum, moveri simul & stare, quando in eodem puncto centrum aculeumque figens revolvitur: vel aliud quicquam, dicens idem agere, cum eadem affixum cardini circumfertur: nequaquam assentiemur, quod non secundum eadem sui hac tunc moveantur & maneant. Dicendum quippe, habere ipsa rectum in se atque rotundum: & secundum rectum quidem stare, cum nulla ex parte declinent: secundum verò rotundum, circummoveri. Quoties autem dum quid revolvitur, in rectum quoque devehitur sive ad dexteram sive ad sinistram, vel antè vel retrò, tunc nusquam permanet.

11. Etiam sine labore intelliguntur motus localis divisiones, quas hac vice, propter affinitatem materiæ, subnectemus. Et primò quidem dividitur motus intuitu corporis, in quo est, in communem & proprium, de qua divisione jam actum. Solum notandum, proprium aliàs communi, aliàs opponi *alieno*: priori sensu, non omnia quæ moveri dicuntur, proprio motu moventur, homo enim ex. gr. jacens & dormiens in navi quâ ex Anglia in Galliam vehitur, propriè non movetur: posteriori sensu, quicquid movetur, motu proprio movetur, id est, suo, non alieno.

12. Deinde, motus differentiarum sumuntur à terminis ad quos tendit (nam termini, à quibus incipit, non ita considerantur); unde alius sursum, qui adscensus; alius deorsum, qui descensus; alius dextrorsum, alius sinistrorsum, &c. Pro varietate differentiarum, quas in situ corporum observamus.

13. Tertiò dividitur motus ratione figure, quæ motu describitur, in simplicem & compositum. Simplex est vel rectilineus, ut motus gravium & levium, vel curvilineus, ut spiralis, circularis, &c. Circularis est vel conversionis, vel circularis progressionis.

14. Motus *conversionis* est, quo mobile circa proprium suum centrum circulariter convertitur, qualis est motus lapidis molaris &c. In corpore, quod tali motu cietur, consideratur aliquid rectilineum quiescens, per centrum, circa quod fit motus, transiens, quod *axis* vocatur, & puncta utrinque illum terminantia, *poli* appellantur.

15. Motus *progressionis circularis* (sic dictæ, ut à recta progressionem distinguatur) est, quo mobile circulariter movetur circa centrum, quod extræ complexum ipsius mobilis est. Talem motum habent Planetæ circa Solem.

16. Motus *Compositus* vel ex pluribus rectis constat, ut progressio animalium; vel ex recto & circulari, ut volutatio; vel ex duplici motu

circulari, conversionis scilicet & circularis progressionis. Sic videmus sæpe festucas in aquarum vorticibus, dum circa propria centra convertuntur, simul integrum gyrum circa vorticis centrum facere progrediendo.

17. Quartò & quintò dividitur motus ratione quantitatis ac temporis in *validum & remissum*, item in *celerem & tardum*, quas divisiones non esse confundendas ex eo patet, quòd motus parvi corporis possit esse *celer*, licet non sit *validus*, & motus magni corporis possit esse *validus*, licet non sit *celer*. Prioris exemplum habemus in celeri virgæ alicujus vibratione, cui ab occurrenti corpore facillè resisti potest. Posterioris exemplum videmus in lento fluminis motu, cui magnæ moles sæpè resistere nequeunt. Dicitur autem motus *celer* seu *velox*, cum brevì tempore magnum spatium conficitur; hoc est magna motus quantitas acquiritur: *tardus*, cum longo tempore parvum spatium conficitur, id est parva motus quantitas comparatur.

18. Ratione velocitatis ac tarditatis motui conveniunt differentię, quibus uniformis vel difformis, regularis seu ordinatus, vel irregularis seu inordinatus dicitur. *Uniformis* vocatur, qui æquè celer aut tardus in omnibus & singulis partibus corporis, quod movetur; *difformis* contrà: Exemplum prioris motus est in lapide projecto, posterioris, in rota conversa, ubi partes axi & polis viciniore tardius moventur illis, quæ inde remotiores. *Regularis* motus est, qui æquè velox aut tardus in principio, medio & fine: *Irregularis* contra. Sic rota ut plurimum moveri solet regulariter, lapis projectus semper irregulariter, quia in principio velocius, in fine tardius. Ergo regularis aut irregularis motus vocatur ratione diversarum partium temporis: sed uniformis aut difformis dicitur ratione diversarum partium corporis mobilis.

19. Sextò dividitur motus ratione durationis in *longum & brevem*, & septimò ratione causæ moventis, in *naturalem & violentum*. Verùm de hac postrema differentia agemus, ubi ad causam motus pervenerimus. Tantùm de subdivisione utriusque aliquid annectemus. Nempe naturalem dividunt, quòd vel omnibus, aut certè plurimis corporibus *communis* sit, vel quibusdam *proprius*. Communem vocant primò motum *ad mutuum contactum*, quo corpora naturaliter feruntur ad loca ab aliis corporibus derelicta implenda, de quo sequenti agetur disputatione; deinde motum *ad situm seu positionem naturalem*, qualis est in ramo arboris inflexo, dum rursus dimissus ad solitam positionem se recipit.

fecipit. Proprii certorum corporum motus sunt illi, qui flammæ, cordi, animalibus his & illis conveniunt, &c.

20. Denique motum violentum dispeſcunt in tractionem, pulſionem & vectionem: qui motus in eo diſtingui poſſunt à prioribus, quod in ſubjectis ſiſ ſuis minus ſint conſtantes & durabiles. Sed *veſtio* (id eſt motus, quo quid movetur unà cum illo, à quo continetur, aut ſuſtinetur, ut vinum cum cantharo, nauta cum navi, eques cum equo &c. ad motum communem pertinet, de quo initio hujus Diſp. *Tractionis* ſive attractionis eſt, quando mobile movetur verſus ipſum movens, ſicut curruſ ab equo trahitur, &c. *Pulſio* contrà, quando mobile movetur à movente, quæ eſt vel *impulſio*, ſeu truſio (ἰκωσις) cum movens & mobile conjuncta manent, ſic bajuluſ ſarracum protrudit; vel *depulſio* & *expulſio* (ἀκωσις) qua mobile à movente ſeparatur: Sic Pauluſ A&t. 28. excuſſit viperam in ignem. *Impulſio* lenior, ſaltem ad ſenſum, vocatur *preſſio*, depulſio vehementior nominatur *projectio*, ita ſagitta ab arcu, globuſ è bombardâ exit. *Voluſatio* tractione vel pulſione perficitur, ita globuſ trahendo vel pellendo circumvolvitur. Reſpice th. 16.

DISP. XVII.

*Quomodo in omni motu integer circuluſ
corporum ſimul moveatur.*

1. **H**A&tenuſ naturam Motuſ expendimuſ: nunc diſpiciamuſ, an ea rebus congruat, & ita in mundo exerceatur. ubi ſtatim occurrat difficultaſ, ex eo quod docemuſ 1. Nullum dari in natura vacuum, ſed omnia ſpatia corporibuſ plena eſſe. 2. Non dari penetrationem dimensionum, hoc eſt unum corpus non poſſe eſſe in eo loco, in quo aliud exiſtit, quia corpus omne eſt extenſum, & extensione ſuâ alia corpora à ſe, ſive ex loco ſuo excludit. 3. Nihilominuſ corpora moveri, hoc eſt, corpus unum ex vicinia horum in viciniam aliorum tranſferri. Hoc multoſ veterum torſit, qui non potuerunt hæc in concordiam redigere, ſed vel motum è mundo, vel plenum ſibi tollendum exiſtimabant.

2. Noſ nodum illum ſic ſolvimuſ: dùm corpus aliquod loco movetur, illud movet & pellit eodem temporis momento aliud corpus è loco ſuo, hoc iterum impellit aliud & aliud, uſque ad ultimuſ, quod cum, ob omnium aliorum locorum plenitudinem, aliuſ locum non inveniat, quàm illum, quem corpus primò motum relinquit, idcirco

hoc ultimum in primi locum necessariò venit, & quidem eoſe temporis momento, quo locus ille derelinquitur, Ita nempe in omni motu fit quodammodo circulus ſive circuitus ex omni materia ſimul mota.

3. Sit Exempli gratiâ excavatus circulus decem globulis plenus: In hoc dum primus globulus verſus aliquam partem movetur, illico pellit ſecundum, hic tertium &c. Uſque ad decimum, qui locum à primo dereliſtum ingreditur. Hocque Exemplum eſt facillimum, quod Phyſicam hanc doctrinam ipſis oculis ſubjicit, cujus inſignis uſus eſt in tota rerum naturalium ſcientia.

4. Ita, quantum vini ex dolio effluit, tantum eſt veſtigio aëris ingreditur, & niſi aditus aëri concedatur, fruſtra tentabis ex dolio vinum aut cereviſiam promere, nam quandocunque circularis illa loci mutatio impeditur, fieri nequit ut quid locum ſuum deſerat. Sic aër replet loca corporum, quæ per ipſum moventur, & quidem motu quocunque, ſuſum, deorſum & ad latera. Sic, dum attrahitur aër ex fiſtula, cujus altera pars in aquam merſa eſt, ſponte ſequitur aqua ſuſum, quod alioquin ejus gravitati repugnat.

5. Motum circularem aëris verſus flammam tendentis, & fumi ex flamma exeuntis licet experiri, quoties magnus ignis in cubiculo aliquo excitatur. Si enim cubiculum ita ſit clauſum ut per tubum camini, per quem fumus exit, unum tantum foramen ſit apertum, ſentietur continuò magnus ventus, per hoc foramen ad focum tendens in locum fumi abeuntis.

6. Præclaram hanc doctrinam Plato obſervavit ac tradidit in Timæo, pluribus omnino verbis, è quibus ſequentia excerpto: *Quoniam vacuum nuſquam eſt, quo quicquam eorum que perferuntur, ingredi queat, ſpiritus autem è nobis evolat, cuius conſtat non in vacuum quidem hunc ſpiritus evolare, ſed proximum ſibi è ſua ſede depellere, depulſum ruruſus illum proximum ſibi ſemper extrudere, ac ſecundum neceſſitatem huiuſmodi quicquid in ſedem illam reperiçutitur atque impellitur, unde excluſus eſt halitus, ingreſſum illuc replenſque halitum ipſum ſubſequi. Idque totum ſimul revolutione quadam, quia nuſquam ſit vacuum, fieri. Quamobrem cum peçtus, pulmoneſque ſpiritus efflaverint, mox aëre corpori circumfuſo meatu corporis penetrante replentur. Ac ruruſus evolans à corpore aër & emiſſus anhelitus inſpirationem intro retrahi cogit per oriũ nariumque meatuſ.*

7. Paginiſ aliquot antè dixerat, quod univerſæ naturæ circuitus, ſecum ipſo congredi ſtudent conſtringat omnia, locumque vacuum relin-

relinqui nusquam patiatur, quodque ideo ignis per omnia maxime penetraverit, deinde aër, utpote qui ipsi tenuitate est proximus, & alia simili ratione deinceps, ubi parva in magnorum contruduntur inania: Postea addit: *Ignis hinc evolante, quippe cum non fiat in vacuum exitus, proximus aër pulsus mobilem adhuc molem humidam in ignis sedes impellit, &c.*

8. In Scholis vulgò docent, hunc motum, quem vocant *Motum ad mutuuum contactum*, fieri propter fugam vacui, eundemque prævalere cunctis aliis motibus, quòd ad totius universi bonum & conservationem ordinatus sit. Ubi rebus corporeis, omnis cognitionis expertibus, cogitationem perperam affingunt & consilium, & quidem vanum prorsus atque inutile. Quomodo enim natura, quam sapiente m dicunt, nihilque frustra agere volunt, vetare aut fugere vacuum, (ut aiunt,) dici queat, cum vacuum spatium in rerum natura omnino dari non possit, utpote contradictionem implicans manifestam? Cerrè nemo sapiens verat aut fugit illud, quod novit esse factu prorsus impossibile. Quis enim nos jubeat efficere, ut idem simul sit & non sit? Ea sola legibus prohiberi quæ fieri, & facile quidem fieri possunt, non quæ difficulter aut nullo modo, Jurisconsulti docent.

9. Sed omnis Motus, qui ob fugam vacui fieri dicitur, ideo revera sit, quia corpus aliquod magna vi de loco suo deturbatur, quod vicissim aliud, (quia vacuum spatium nullum invenitur) in locum primi repellit, vi & motu tantum corporeo, ut in machina aliqua, nulla cogitatione aut consilio intercurrente, quod quidem ipsis illis rebus insit. Divino namque consilio & hæc & alia omnia regi extra dubium est.

10. Et quidem intellectu satis facile est, quomodo in omni Motu integer aliquis circulus corporum simul moveatur, si ad circulum attendamus perfectum, id est, corporeum, qui rotundus sit, & cujus partes æque à centro distent, qualis est annulus. Hic enim nec vacuo, nec rarefactione quidem aut condensatione ulla opus esse videmus ad Motum absolvendum. Exemplum habuimus th. 3. Sed idem in circulo imperfecto, hoc est in eo, qui vel rotundus non est, vel cujus partes non æque à centro distant, imò in aliis omnibus locis, angustia & latitudine differentibus, non æquè perspicuum est.

11. Hic igitur observandum, omnes locorum inæqualitates, in æquali motuum celeritate posse ac debere compensari. Ponamus ex. gr. spatia tria, quorum secundum duplo sit angustius primo, & ter-

tium quadruplo angustius eodem primo, necessum erit, ut materia eadem duplò celerius moveatur in spatio secundo, & quadruplo celerius in spatio tertio, quàm in primo mota fuit. Hac enim ratione si celeritas motus, angustiam loci ubique penset & æquet, qualibet hora, die vel anno tantundem materiæ per unam istius spatii partem, quàm per alteram, transibit, ita ut minimè opus sit aut vacuum comminisci, aut condensationem materiæ istius admittere.

12. Exempla quotidiana huiusce compensationis habemus in cataractis & fluviorum angustis, in siphone, in vento propè templa &c. ubi tardior ejusdem materiæ motus observatur in viis rectis & patentibus, celerior in obliquis & angustis. Sic aër ex folle, quamvis lentè claudatur, valdè tamen celeriter egreditur, propter angustiam viæ, per quam transit. Sic videmus aquam alicujus fluvii, per apertum alveum liberè fluentem tam leni ac tardo proveci motu, ut vix arundinem in eo nascentem loco moveat; eandemque, per angustias cataractarum in eodem fluvio exstructarum determinatam & constrictam, velocissimo, vehementissimoque impetu maximas rotare, attrahere, deprimere machinas, quibus opifices in farina molenda, ferro cudendo, trabibus ferrâ dividendis, aliisque opificiis uti consueverunt.

13. Simili modo spiritus animales, qui in corpore quiescente leniter moventur, in hos vel illos musculos per nervorum angustias influentes, maximam vim musculis tribuunt, ut videre licet in lucta, projectione, verberatione, aliisque vehementibus corporis nostri motibus, quibus gravissima durissimaque alia corpora è locis suis expellimus, confringimus, contundimus, aliisque variis ac validis modis commovemus.

14. Ex iis quæ hætenus de compensatione motuum ac spatiorum docuimus, certò probatur quarundam materiæ particularum divisio indefinita, nempe, ut figuram suam ad innumerabiles spatiorum minorum angustias accommodare queant per ordinem successionis, aliquantulâ omnium, quas imaginari possumus, partium à se mutuo remotione, quæ remotio vera divisio est. Sed nec particulæ illæ omnes enumerari possunt, neque indefinita earum divisio, quo pacto fiat, comprehendendi.

15. Non autem totam materiam sic dividi opus est; at sufficit partibus majoribus, quæ manent indivisæ, quasdam admisceri minores, quæ quomodolibet se inflectendo, compleant accurate omnes angulos,

ángulos, quos istæ majores ob molem suam nequeunt ingredi, utpote quæ nihil aliud faciunt, quàm quòd celeritate sui motus majore aut minore se accommodant ad locum occupandum angustiorē aut latiorē, figuras autem suas non tam faciliè mutant.

16. Neque dubitare licet quin fiat indefinita hæc materiæ divisio, quoniam necessariò sequitur ex clarè nobis perspecta natura ipsius materiæ, quæ partes extra partes positas obtinet, sive, quæ in longum, latum & profundum est extensa. Fatendum interim semper, istiusmodi divisionem, quantum ad modum attinet, à mente nostra, utpote finita, non posse comprehendī.

17. Occasione thesæos secundæ quæritur, *an detur etiam motus in instanti*, ut loquuntur, seu momento. Resp. Motum natura sua esse ens successivum, quod partes habet in perpetuo fluxu, nunquam simul existentes. Et aliud est, motum esse momentaneum; aliud, inter recessum unius corporis è loco & accessum alterius corporis ad eundem locum, nullum momentum interponi. Accessus ille æquè ac recessus motus sunt successivi. At quoniam simul existunt & concurrunt, nullum inter eos momentum intercedit, cùm vacuum ne momento quidem ullum detur.

18. At inquis, lumen in momento à Sole ad terram & per totum cælum diffunditur, quæ diffusio non sine motu est. Resp. aliud est, motum fieri in momento; aliud, cum *transmitti in momento*. Hoc posterius contingit cùm ex. gr. altera baculi extremitate mota simul moveretur altera. Nempe si baculi extremum alterum Lunam, alterum Terram attingeret, eodem prorsus tempore motus pars quælibet sentiretur in terra, quo produceretur in Luna. Simili ratione momentaneam luminis propagationem explicare licet.

DISP. XVIII.

Deum esse primariam Motus causam: & eandem semper motus quantitatem in universo conservare.

1. **O**Mnis de Motu dissertatio Physica divisa est in partes duas, quarum altera *naturam* & essentiam ejus explanat, altera *causam* demonstrat.

2. Causam intellige non *internam*; quamcunque enim assignabis, sive materiam, sive formam dixeris, ad Motus essentiam, de qua egimus, pertinebit; sed *externam*, quæ extra Motus essentiam est.

3. Non.

3. Non autem de *sine* Motus hîc disputabimus, quasi investigaturi, cujus rei gratia unumquodque corpus hoc illôve motu feratur. Nam finis illius ratio vel in Deo, vel in mundo corporeo esset spectanda. At fines & consilia Dei à miseris mortalibus mero rationis lumine, quo Philosophia utitur, temerè & frustra putamus investigari. Corporeum verò rerum universum, cùm sit rationis & consilii expers, nullum sibi finem proponere potest. Quos autem fines horum illorumve motuum alii dicunt, quasi per viam à priori illos cognituri, eos nos in physica speciali, ut effectus motuum considerabimus methodo, quam vocant à posteriori, utentes.

4. Agemus igitur hîc de sola causa *efficiente*, quam in Motu considerandam esse cum ex eo liquet, quod nulla res existat, de qua non possit quærì, quænam sit causa cur existat, tum maximè ex eo, quod motus tale sit rerum corporearum accidens, quod ab ipsa materiæ natura non fluit; sed aliunde advenit. Materia *enim* per se spectata iners & otiosa moles est, uti vulgo etiam Principium merè passivum habetur.

5. Quemadmodum autem in aliis rebus physicis, ita etiam in Motu primò considerabimus causam *universalem* & primariam, quæ efficit omnes motus, qui sunt in corporeo rerum universo; deinde *particularem* & secundariam, à qua varii ac diversi in singulis mundi partibus motus proficiuntur.

6. Causæ particularis nomine intelligere possumus vel *rem* aliquam, quæ motum efficit, vel *regulam* live legem ac rationem, secundum quam efficitur motus: quæ duo hîc distinguenda sunt, ut omnia accuratius percipiantur.

7. Priore sensu causa universalis & particularis ita distinguuntur, ut illius effectus sit motus *universus* totius mundi, hujus autem effectus sit *aliquis* motus in hac illave mundi parte. Deinde, ab universali causa pender omnis motus, quæ *motus*: sed à particulari causa singuli motus *peculiaribus nominibus* sortiuntur ex. gr. cursus, saltus, ambulatio, adscensus, descensus, fluxus, destillatio, conversio, gyratio, projectio, claudicatio &c. De hujusmodi causis motuum particularibus agendum est in Physica speciali, non generali.

8. Posteriori sensu ita se habent causa motus universalis & particularis, *Rex*, qui amplissimo regno præest, & *leges*, secundum quas populum gubernat, & singulis officii rationem præscribit. Eodemque modo Theologi duplex statuunt principium Theologiæ, aliud

in-

incomplexum, *Deum*, aliud complexum, *Verbum Dei*. Et de hujusmodi causa particulari, quæ se habet ut leges in Politica, ut verbum Dei in Theologia, agendum nobis est in Physices parte universalis.

9. Hæc de Motus causa generaliter dicta sunt: nunc speciatim primò universalem, deinde particularem contemplabimur. Ac de universali quidem videbimus primò, quænam sit, deinde, quæ sit ejus actio respectu motus.

10. Universalem Motus causam aliam esse non posse, quam Deum Opt. Max. satis fit manifestum ei, qui considerat, nihil omnino esse in mundo, quod à Deo non pendeat. Nam si quid esset rerum, si vel tantillum esset veri aut boni, quod Deo non deberet ortum, nec suum incrementum & duramentum eidem acceptum referret, ipse non esset Deus, h. e. non esset res summè perfecta. Nam qui ens summè perfectum dicit, intelligit ens independens, à quo omnia pendent.

11. Speciatim etiam si attendamus immensos cælestium corporum vehementissimosque, quibus perpetuò cientur, motus, maris fluxum & refluxum admirabilem, terræ in liquidissimo cælo quietem & consistentiam, primam atque universalem totius motus & quietis in universo causam agnoscemus non aliam esse posse, quam ipsum Deum omnipotentem.

12. Ex ista summa Dei perfectione & potentia sequitur Deum non modò virtutem movendi tribuere rebus omnibus, eamque conservare & applicare; verum etiam ipsum motum tribuere, eundemque conservare & applicare.

13. Cùm enim causa efficiens in procreantem & conservantem distingui soleat, Deus utroque modo causa motus est statuendus. Nam primò, cùm nihil esset rerum, ipse materiam cum motu & quiete fecit. Sic enim impulit nonnullas materiæ partes motumque acceleravit, ut aliis quietem daret, aut saltem motum earum retardaret.

14. Cumque conservatio nihil aliud sit, quàm continuata creatio, nec Deus opus suum possit unquam deserere, ita ut ipsum nihilominus esse perseveret, necessum omnino est, Deum quoque esse motus causam conservantem.

15. Est itaque rationi quàm maximè consentaneum, ut statuamus, Deum nunc tantundem motus & quietis in tota hujus universi materia conservare, quantum initio rerum ac temporis in ea posuit, id-

que per solam suam ordinariam, qua rebus omnibus adest & præest, operationem.

16. Atqui duo obstant, quò minùs id rectè intelligere & pro vero statim recipere possimus: unum, quòd non satis perspiciamus, quomodo motui, qui accidens est, non substantia, possit attribui *quantitas*; alterum, quod credere nequeamus, quantitatem illam, si qua sit, aut si ita appellanda, *eandem* semper in mundo permanere.

17. Ad prius quod attinet, sciendum est, motui & quieti eo sensu tribui quantitatem, quo vulgo calori & frigori *gradus* assignantur à Medicis; dum quid calidum vel frigidum in primo, secundo, tertio &c. gradu aiunt, quo nihil aliud revera significatur, quàm motus & quietis vel intensio, vel remissio. Hæc igitur *intensio* quantitatis revera invenitur in motu, experientia teste, & à quantitate *extensionis*, quæ ad substantiæ corporeæ longitudinem, latitudinem & profunditatem pertinet, manifestè satis distinguitur.

18. Porro cùm Deus pro immensa sua sapientia omnia certo pondere, numero & mensura fecerit, necessariò consequitur, certam etiam dari in mundo motus quantitatem, certum graduum numerum, certam intensiois mensuram.

19. Et quamvis nos ratione humana numerum & mensuram illam assequi nequeamus, facilè tamen assequimur, eam revera in mundo quovis tempore existere, atque (ut de secundo capite jam agamus) omni etiam tempore eandem permanere posse in toto, licet in partibus ejus quotidie varietur.

20. Quemadmodum enim eadem pecuniæ summa in amplissima quadam republica semper manere potest, licèt in membris illius rei-publicæ quotidie magna occurrat mutatio, ut civis aliquis modò plus, modò minus illius pecuniæ possideat, ut dives pauperetur, aut pauper ditetur &c. ita motus eadem quantitas perpetuò esse potest in rerum universitate, etiamsi pars ejus aliqua nunc plus, nunc minus illius participet, & jam quiescat, quæ paulò ante commota fuit, vel etiam omnes aliquando pari motu ferantur. Sic idem numerus civium in eadem rep. manebit semper, si continua vicissitudine tot homines generentur, quot è vivorum numero decedunt.

21. Ita si corpus B duplo celerius moveatur, quàm corpus A, & corpus A duplo majus sit corpore B, tantundem motus intelligemus in minore, quantum in majore. Nam si majus illud in duas partes æquales

æquales dividatur , una pars tam cito , quàm altera movebitur , atque ita adæquabunt motum corporis minoris celerius moti , si nempe duarum illarum partium motum addendo in summam contrahas.

22. Sic æqualis mensura motus in mundo etiam conservatur , si , quantò motus unius corporis magis retardatur , tantò motus alterius ipsi æqualis (semper enim æqualia æqualibus comparanda) magis acceleratur.

23. Ad hæc igitur qui vel tantillum advertit animum , non dubitabit , quin eadem motus quantitas in mundo semper *possit* permanere ; at quòd revera etiam *maneant* , id est quod fidem plurimorum superat , quoniam ipsi sensus ab ineunte ætate contrarium videntur perspicuè nos docuisse. Nunquid enim novi motus productionem probat animalium antea quiescentium incessus , volatus , reptatio , natatio ? Nunquid alicujus motus interitum arguit pila magna vi in arenæ cumulum coniecta , cujus *motus* cessante arenæ tremore totus periisse videtur ?

24. Consideretur modò vehementissimus ille motus , qui multo cum crepitu & strepitu magnoque concussu excitatur , quories tormentum bellicum exploditur. Ille equidem fragor , & per consequens ille motus , non nisi ad certum aliquod spatium se diffundit , habetque aliquam activitatis suæ sphæram (ut loquuntur) intra quam circulum suum peragit : (jam enim pro certo habemus è superius disputatis , omnem motum fieri per circulum.) Quia ergo concitatus ille motus à tormento productus certo ac definito quodam spatio includitur , ac non nisi per breve tempus sentitur , cum paulò post iterum cesset , videtur evidentissimè sequi , illo saltem tempore , quo perstrepebat motumque ciebat tormentum , fuisse plus motus in mundo , quàm fuerat antea. An verò motus ille postea permaneat , an cesset revera (sensus quidem cessare eum judicat) parum refert. Saltem inde colligitur , motus , qui in mundo est , quantitatem aliquando augeri.

25. Qua ex difficultate ut nos extricemus , observandum est , sensibus in hoc negotio non tantopere esse fidendum , cum nos in re prorsus simili jam à pueris sefellerint. Eadem namque ratione , qua inducimur ad credendum , uno tempore plus esse motus in mundo , quàm alio , etiam putamus , aliàs plùs , aliàs minùs in universo esse materiæ seu substantiæ corporeæ. Dum enim luculentus instruitur ignis , qui priùs non apparebat , existimamus novum aliquod corpus in orbe existere ; dumque flamma exstinguitur , putamus eam esse desinere , quo-

niam ex oculis nostris abit. Sed contra ea constanter docent Philosophi, materiam omnis generationis & corruptionis esse expertem, ac nihilum quidem corporeæ substantiæ naturaliter unquam abire in nihilum, aut è nihilo provenire, secundum illud: *Nihil fieri ex nihilo, in nihilum nil posse resolvi*. Cujus quidem sententiæ veritas iis probatur argumentis, quibus ostenditur, spatium vacuum contradictionem implicare aut saltem demonstrari naturaliter non posse.

26. Itaque, quemadmodum non licet hunc in modum ratiocinari: non video unde materia illa venerit, ergo jam primum esse cœpit in mundo; nec ita: sensibus non percipio, quò abeat, ergo desinit esse in universo, atque ita jam augetur, jam minuitur materiæ mundanæ quantitas: sic neque licet de motu judicare, sensus non docet, unde motus illi oriantur, neque ostendit, in quæ alia corpora transferantur, ergo modò major, modò minor in rerum universo motus est.

27. At, inquires, velle te sensus hac in parte deferere, dum modo rationem perspicias evidentem, quæ demonstret, eandem nunc motus quantitatem esse in mundo, quæ fuit heri, imò quæ fuit ante mille annos, & quæ erit post mille annos, si quidem natura rerum tamdiu sit dura tura. Eam igitur rationem ut explicemus opera deinceps præcipuè nobis danda est, & res à capite arcessenda.

28. Meritò autem nos continemus intra limites Philosophiæ naturalis, & quidem generalis, neque de angelis vel intelligentiis, vel humanis animabus jam disputamus, cùm hæc à Physica, aut certè à parte ejus generali aliena sint. Nihil enim in hac præter materiam & motum, ac Deum, qui auctor est utriusque, spectandum nobis exhibetur.

29. Si *motum* ipsum respiciamus, nulla est causa, cur nunc minui, nunc augeri debeat, quoniam, uti semet ipsum non fecit: ita neque semet ipsum destruere potest. Nihil quippe sui ipsius causa efficiens esse queat. Nihil etiam suapte natura ad sui destructionem tendere.

30. *Materia* per se spectata, cùm nihil aliud sit, quàm iners & otiosa moles, in nuda extensione, hoc est longitudine, latitudine & profunditate consistens (unde principium mere passivum Philosophis appellatur) neque dare, neque adimere sibi motum potest.

31. Itaque ad *Deum*, quem causam materiæ & motus esse docuimus, denuò nobis est recurrendum, & quidnam ex consideratione illarum ejus perfectionum, quarum nos notitiam aliquam habere voluit, naturali rationis lumine, quod nobis indidit, de re proposita concludendum sit, dispiciendum.

32. Triplici via in Dei notitiam ratiocinando perveniri vulgò traditur: via *causalitatis*, qua à causis secundis ad ipsum, ut primam, ascendimus: *eminentia*, qua omne quod est perfectionis in rebus creatis ipsi longè eminentius convenire statuimus: *negationis*, qua ab ipso removemus quidquid imperfectionis in Creaturis deprehendimus. Et certè nullum est dubium, quin omnis, quæ in aliis rebus invenitur perfectio, Deo sit excellentissimo modo tribuenda, & contrà omnis imperfectio longissimè ab eo removenda, cùm ipse sit Ens summè perfectum, quo majus ac melius cogitari nihil potest.

33. Utamur igitur familiari Theologis & Philosophis similitudine, & Mundi opificem cum artifice aliquo insigni conferamus. Quæro, utrùm judices ad perfectionem artificis pertinere, ut opus semel factum & absolutum, postea sæpius muret, modò aliquid addendo, modò tollendo; an potius, ut tale illud fecerit, nihil in eo ut mutandum, nihil ut addendum ei aut detrahendum unquam sit?

34. Respondebis, opinor, perfectionem artificis ex eo elucere, quòd tale opus fabricàrit, cui nihil addi, nihil demi possit. His enim verbis describere solemus id quod *perfectum* appellamus. Et nunquid opera, quæ scitè affabreque facta sunt, hoc nomine commendantur, quod nihil illis detrahi aut addi possit? ut bene Aristoteles, 2 *Eth. cap. 5*. At opus tale producere, cui subinde vel addendum vel detrahendum sit aliquid, id vel virium, vel sapientiæ & constantiæ defectum in artifice ostendere quis non videt?

35. Transferamus hæc ad Deum, cunctarum rerum opificem & mundi architectum potentissimum, sapientem pariter & constantem maximè. Quidnam his ipsis ejus perfectionibus dicemus esse consentaneum? Utique affirmabimus, sapientiæ & constantiæ diviniæ contemplationem postulare, ut semper eandem motus quantitatem in rerum universo ab eo effici judicemus: ne, si uno tempore plus, alio minus in mundo morus creare & conservare, operi suo nunc addentem aliquid, nunc detrahentem, Deum arbitremur, aut omnipotentiam, aut sapientiæ & constantiæ perfectissimæ laudem ei videamur derogare.

36. Sed obtendes, Deum esse agens liberrimum, qui ut modò plures, modò pauciores in orbe homines facit existere, dum gaudet, ut videtur, varietate rerum, ut suam creatis mentibus eò clariùs ostendat sapientiam, tum *ἀδιαφορίαν* ita nihil omnino repugnare, quò minùs possit motus in toto mundo quantitatem pro arbitrio

nunc minuire, nunc augere. Id enim sumamæ ejus convenire libertati.

37. Resp. Æqualis semper est in mundo materiæ quantitas, licet ejus materiæ plus nunc, quàm Adami & Evæ, primorum parentum tempore, corpora humana participant. Cujus minui atque augeri nesciæ quantitatis causam nullam assignare valemus, nisi eam, quæ à Dei auctoris petitur sapientia & constantia. Quid enim moveret Deum, ut modò plus, modò minus materiæ in universo produceret? Ecce non eandem de motu totius Universi rationem valere judicamus?

38. Deum equidem liberrimè omnia agere in omnibus nullo modo imus inficias; sed affirmamus insuper, perpetuò eum agere cæteris perfectionibus suis congruenter, adeoque sapienter & constanter; nec uni libertatis attributo sic esse insistendum, ut reliquæ ejus virtutes, quæ non minùs in eo spectandæ nobis exhibentur, minùs à nobis prædicari videantur.

39. Thesi septima motum à Deo esse diximus, quæ motus est, unde primum motorem eum appellamus, qui immobilis ipse movet omnia; at ambulare eum, fluere, gyrare non dicimus, dum Creaturæ ambulant, fluunt vel gyant. A particularibus enim causis & certis motuum subjectis atque organis denominationes istas speciales desumimus. Quare mirum videri non debet, quòd aliquas Dei perfectiones potiùs aut certè alio modo in motu universè spectato, quàm in certis & peculiaribus motibus, ejusmodi sunt v. g. illi, quibus corpus humanum generatur, repræsentari arbitremur: quomodo tamen in ipsius etiam humani corporis productione perfectionem constantiæ suæ Deus patefaciat, thesi 42 videbimus.

40. Sic Dei opificis unitatem ex eo quod unum fecit rerum universum, agnoscì dicunt omnes, referentes Deum ut causam universalem ad opus universum, ut justa sit comparatio; non enim easdem perfectiones suas Deus in partibus singulis expressit semper, quas in toto opere, aut certè aliter hic, aliter ibi eas repræsentavit, ut vel ex hac ipsa varietate sapientiam & libertatem ejus liceat agnoscere: ita nec operis alicujus egregii perfectio semper è partibus æstimanda singulis, at sæpe tantum, aut certe potissimum in partium omnium proportionem & consensu intuenda. Quis igitur hic ferat tali modo ratiocinantes! si Dei unitas ex unitate totius mundi colligitur, ergo & multitudo Deorum ex multitudine Creaturarum colligi poterit: vel ita: si Deus modo jam explicato ostendit immutabilitatem suam in toto Universo,

so, ergo etiam in singulis ejus partibus, aut vero Deus respectu Universi immutabilis erit, respectu vero partium mutabitur. eadem enim utrobique relatio est, & sic omnis mutatio tolletur de Creaturis. Ostendimus enim non esse eandem utrobique relationem. Et sponte corruunt hujusmodi argumentationes, si attendantur ea quæ modo diximus.

41. At inquires, si tam pressè divinæ immutabilitatis considerationi lubeat insistere, facile efficietur, omnia etiam esse immutabilia ut Deus est immutabilis, atque ita motus omnis tolletur è mundo. Resp. Quæstio, quam in præsentī tractamus, hæc est, an consentaneum sit divinæ perfectioni, eandem motus quantitatem in mundo conservare. Ponimus itaque, jam esse motum & mutabilitatem variam in universo, ac proinde, res esse in mundo Deo valde dissimiles (quid enim in corporibus simile prorsus Deo reperiatur?) Hæc igitur cū sint extra controversiam posita, non debent in controversiam hoc loco adduci. Hoc namque solum quæritur, utrū in illa ipsa dissimilitudine, in ipso illo motu & variatione rerum mundanarum similitudo Dei nihilominus aliqua reluceat, utrū in ipsa mutatione aliquod immutabilitatis divinæ vestigium liceat reperire. Id quod affirmamus, & verum esse jam probavimus. Nempe illud est quod asseveramus, in ipsa omnium rerum mutabilitate & mutatione tam varia & multiplici, quæ in mundo observatur, non tantum libertatem Dei demonstrari, eo quod tam varia contingant & multiplicia; sed etiam demonstrari hanc divinæ naturæ perfectionem, qua semper una eademque manet, hoc est æternam Dei constantiam atque immutabilitatem, eo quod perpetuò eadem motus & variationis quantitas & mensura in toto universo conservetur.

42. Utquæ clarius eluceat hujusce sententiæ veritas, en tibi aliud illustre documentum. Miranda se offert in mutis animantibus varietas, & in ea varietate constantia. Non pulex ad muscæ, nec passer ad aquilæ; non canis ad equi, nec bos ad elephanti magnitudinem assurgit. Agni balant, porcelli grunniunt, leones rugiunt, elephanti barriunt, ranæ coaxant, equi hinniunt, tauri mugiunt, & sua perpetuò cūjus bestię propria vox est. Quis neget ex universali illa & infinita, sed constante, varietate divinam elucere libertatem simul & constantiam cum ineffabili junctam sapientia? Nec enim præter Deum huic tantæ variationis causam universalem queas assignare. Denique, cum in ipsa rerum confusione ordinem Deus statuat naturæ & sapientiæ suæ
con-

convenientem, ut Theologi omnes norunt, quid repugnat, quo minus in ipsa continua rerum corpor earum mutatione immutabilitatem suam repræsentet? Equidem illud non modò non repugnare, sed revera quoque ita se habere demonstravimus.

43. Itaque non tollimus illas mutationes, quas experientia perspicuè satis demonstrat in mundo, quasque sine ulla Creatoris mutatione contingere intelligimus. Sed affirmamus in ipsis illis aliquid elucere divinæ immutabilitatis, & cavemus nobis, ne quas alias præterea in ejus operibus esse statuamus, ne mutationis omnis expertem Deum alicujus inconstantiæ arguere videamur. Non tollimus etiam hoc pacto miraculosas Dei actiones, quas divina revelatio nos jubet credere; sed agimus tantùm de iis, quæ fiunt secundùm ordinem naturæ, quæ physica sunt & naturalia, non supernaturalia & extraordinaria. Notandum illud Majemonidis More Nevech. part. 2. cap. 29. *Quod dixi, nullam in Mundo rem à natura sua mutari mutatione constanti & permanente, id dixi respectu miraculorum. Nam licet virga in serpentem, aqua in sanguinem, manus munda in albam conversa sint, sine necessaria aliqua causa naturali; tamen ista omnia constanter ita non permanferunt, neque in naturam aliam mutata sunt. Verùm, prout Rabbini nostri dicunt, Mundus retinet ac sequitur suam consuetudinem.*

44. Quapropter iterum concludimus, rationi esse quàm maximè consentaneum, ut judicemus, ex eo solo, quod Deus diversis omnino modis mundanæ materiæ partes moverit, cùm primùm eas creavit, jamque totam istam materiam conserve, eodem planè modo eademque ratione, qua priùs creavit (quando conservatio nihil aliud est, quàm continuata creatio) eum ipsùm quoque tantundem motus in universa materia perpetuò conservare. Huc pertinet illud Majemonid. libri citati part. 1. cap. 67. Ubi explicat illud Geneseos: *Deum requievit die septimo*, his verbis: *Reliquit die septimo omnia Entia in eo loco & statu, in quosum erant, & in quo nunc sunt.*

45. Quoties igitur rationi huic obnitiuntur experimenta sensuum, sciamus Philosopho rationem esse præferendam. Et quamvis, dum in generali Physica solùm versamur, non possimus ad ea omnia respondere, neque explicare illico, unde hic vel ille motus corporum proveniat, aut quò abeat, cùm desinit sensibus nostris apparere, quod hujusmodi explicatio plurium rerum particularium scientiam desideret; certi tamen & persuasi sumus, nos ista omnia eò rectiùs atque uberius cognituros, quò altiùs in specialis Physicæ adyta penetrabimus.

46. E-

46. Equidem ad exempla th. 23 prolata facile respondetur, quod motus spirituum in animalibus, dum moventur, transeat in alias eorum partes, ita ut, quantum his partibus accedit motus, tantum spiritibus decedat. Pilæ autem in arenam conjectæ motus primò in ipsam arenam, ac deinde in aërem, terram & vicina alia corpora sic transfertur, ut postea non magis oculis cerni possit, quàm ipsa arena, si vento in spatia remota diffletur.

47. Ad exemplum th. 24 productum ut respondeamus, 1. notandum est, malè ita colligi: magis afficiuntur & moventur aures nostræ; ergo major in mundo motus oritur: cùm potissimi potentissimique totius Universi motus (stellarum & cælorum intellige) auribus non percipiantur. Nempe eadem in tali argumento est imbecillitas; quæ in illo: Luna magis afficit oculos nostros, quàm fixa ulla stella; ergo Luna fixis omnibus major est. 2. distinguendum est inter plus motus, & plus talis motus, uti similiter distinguitur inter materiam & talem materiam, hoc est, inter materiam generaliter spectatam, & ad certam formam restrictam. Quemadmodum enim uno tempore plus est *materia hujus* in mundo, quàm alio (ut, ecce, illius quæ corpora humana constituit ex th. 37); & tamen æqualis semper *materia* copia in universo manet, ex th. 25. 37. Sic aliquando plus est *motus hujus*, ex gr. ejus, quem sonum appellamus, quàm alterius; aliquando contra. Nec tamen propterea *motus* universè sumti major uno tempore quàm alio quantitas in mundo datur. 3. Distinguendum est spatium angustum, ubi motus in unum coactus fortior est, à latiore, ubi in multa subiecta divisus est imbecillior. Nam ut aqua in cataractis celerius & majore cum impetu ruit, quàm in patente alveo: ita motus aëris à tormento excitatus initio, dum spatio propinquo angustiore continetur, est vehemens adeo, ut aures feriat & sæpe etiam lædat. Paulatim verò per ampliora & remotiora locorum intervalla dispersus ac diffusus remissior fit in partibus illius spatii singulis, ita ut audiri tandem desinat.

48. Cætera huc pertinentia, uti & ea quæ de spiritibus attigi, è speciali Physica, quemadmodum monui, cognoscenda sunt. Namque à generalis Physicæ terminis longiùs nobis in præsentì recedendum esse non putamus. Et fortassis in culpa sumus, quod ad specialiora isthæc nos abduci passi fuerimus. Si tamen particularia hæc satis hoc loco videantur intelligi posse, quando iis tanquam exemplis ad generalia explicanda usi sumus, exultationem merebimur.

DISP. XIX.

Prima lex natura: quod unaquaque res quantum in se est, semper in eodem statu perseveret; sicque quod semel movetur, semper moveri pergat.

I. **E** Gimus de causâ motus universi efficiente, primaria & universalis: nunc agendum est de causis singulorum motuum secundariis & particularibus, quas *Regulas Physicas* vel *Natura leges* solemus appellare. Est qui hic nodum in scirpo quærat, quod leges tantum sint causæ morales, quæ imperant, non efficiunt, quæ materiæ, utpote rationis experti, ferri non possunt, &c. Resp. fatemur nomina rebus non semper accuratè respondere, uti in hoc exemplo videre est. Nam vocabulum legis à rebus intelligentibus ad corporeas est traductum, quemadmodum vice versâ aliquando à rebus corporeis metaphoræ desumuntur ad ea, quæ sunt rerum intelligentia præditarum, exprimenda. At negamus nos meliora nomina semper posse substituere, aut, si possumus, negamus id nobis esse integrum, cum longo usu recepta sunt Philosophis & ratione quadam nituntur. Nihil autem usitatius Philosophis, etiam castè loquentibus, quam Naturæ leges appellare. Ita Jul. Cæs. Scaliger, Exer. de subtil. 77. sect. 2. *Neque enim, ait, quæ supra Natura leges sunt, ex Natura legibus judicanda censeo.* Et Ex. 244. sect. 1. *Tanta prudentia, tanta sapientia in Natura legibus elucescit, ut etiam desides rapiat animos ad sui contemplationem.* Quæ verba ideo citavi, ut inde intelligamus, ex regulis, quas producturi sumus in sequentibus, res naturales, non supernaturales esse æstimandas; ac deinde, sapientiam Creatoris singularem ex illis elucere. Sunt aliæ similes metaphoræ, quibus Naturæ elogia passim à scriptoribus describuntur, ut cum Natura statuitur semper eodem modo agere, & retinere jura sua, nec ea mutare, non abundare in superfluis, nec deficere in necessariis, proportionem Geometricam jus suum cuique tribuere, &c. Causa autem hujus appellationis (Naturæ legum) est in proptulo. Quemadmodum enim rebus ratione præditis Deus leges imposuit morales, quas observando bene agunt, transgrediendo peccant: ita voluit res omnes naturales certo semper ordine, certis legibus moveri ac quiescere, quas quidem leges ipsæ illæ res, utpote causæ necessariæ, non possunt non observare. Nec sanè aliud *Fati* nomine intelligimus, quam causarum naturaliter agentium seriem, quatenus

tenus ordinariæ Dei providentiæ subjicitur, ejusque leges ac decreta necessariò exsequitur. Unde fato fieri dicuntur, quæ à causis naturalibus secundum ordinem naturæ à Deo institutum fiunt, quo sensu Aristoteles rerum generationes fatales appellat.

2. Sed accedamus ad ipsas regulas: Prima lex Naturæ talis est: *unaquæque res, quatenus est simplex & indivisa, manet, quantum in se est, in eodem semper statu, nec mutatur unquam, nisi à causis externis.* Hanc Naturæ legem primò explicabimus, deinde à priori demonstrabimus, tum à posteriori ejus veritatem exemplis atque experimentis ulterius confirmabimus, dicturi etiam, quare ad motum localem vulgo non satis applicetur, cujus quidem explicandi gratia nos eam præcipuè proponimus.

3. Per *unamquamque rem* intelligimus primò quidem & maximè substantiam corpoream, deinde etiam modum seu affectionem quamcunque substantiæ corporeæ, quæ sit considerationis Physicæ. Nam ut corpus dicitur manere in eodem statu, quamdiu eundem motum retinet: ita motus etiam ipse in eodem statu perseverare rectè dicitur, quantisper eandem retinet celeritatem eandemque metam, seu quamdiu viam & ordinem sui progressus non mutat. Quamvis autem nostri jam non sit instituti, ultra limites scientiæ naturalis excurrere, nolumus tamen inficiari, quin regula hæc Physica possit quoque ad alias res non Physicas suo sensu extendi: sic Thef. 9 sine Animæ nostræ immortalitas ex ea demonstratur. Porro, rem intelligimus non compositam & in multas diversasque partes re ipsa divisam; (harum enim partium una dum agit in aliam, non mirum est, mutari totum) *at simplicem atque indivisam*, ea fere ratione, qua Metaphysicorum aliqui definiunt unum, quod in se indivisum & divisum à quovis alio. Ita facillè apparet ratio, cur corpus humanum non maneat in eodem statu, ut corpus alicujus lapidis.

4. Hæc de subjecto nostræ regulæ, sequitur prædicatum, quod *maneat in eodem semper statu*, hoc est, quod substantia corporea persistat in eadem semper magnitudine, figura, situ, motu, quiete, (nam ab istis quinque omnes omninò corporum formæ pendent) item, quod motus versus eandem semper partem dirigatur, eundemque servet suæ celeritatis vel tarditatis gradum. Possumus etiam, quia de causa motus & quietis tractatio nobis in præsentī suscepta est, omnem rei corporeæ *statum* solummodò ad motum vel quietem referre, licet ille quàm plurima alia sortiatur nomina: ex. gr. quod

quod retinet eundem gradum caloris, manet in eodem statu motus; quod æquè semper frigidum existit, vel perseverat in eodem situ, persistit in eodem statu quietis &c. Adhæc, dum rem unamquamque dicimus manere in eodem statu, *quantum in ipsa est*, non hoc volumus, quasi res corporea suis viribus se ad hunc illumve statum perducere, seque in illo conservare ipsa possit (quomodo enim sibi porro daret esse vel tale esse, cum primum esse vel tale esse sibi nunquam dederit?) sed hæc duo tantum significamus, 1. Quod in ipsa re corporea seu materia nulla sit causa alicujus mutationis. 2. Quod ratione Dei nulla itidem causa sit, cur statum suum mutet res naturalis. Neque putandum est res corporeas eo modo in eodem statu perseverare, quo beati homines, quod sunt esse volunt, nihilque malunt, ut Martialis verbis utar; non enim intellectu & voluntate præditæ sunt; sed per durationem simplicem tales manent, quales sunt, dum potentissimi conservatoris (Dei) manu quasi tenentur. Res itaque materialis *non mutatur unquam*, hoc est in alium statum non transfertur, à motu ad quietem, vel à quiete ad motum non traducitur, ex calida non fit frigida, ex rotunda non evadit quadrata, &c. nisi à *causis externis* hujusmodi variatio inducatur; quæ quidem causæ externæ secundum ordinem à Deo in Natura stabilitum nullæ hic possunt intelligi, nisi aliæ res materiales, ex quarum actionibus & passionibus mutuis quænam in motu & quiete oriatur diversitas in explicatione tertiæ Naturæ legis dicemus.

5. Demonstratur hæc Naturæ lex, 1. ex immutabilitate & constantia Dei in operando, quæ causa est, cur sine manifesta ratione mutationem in ejus operibus nullam debeamus statuere, qua de re actum est disp. præcedente: quinimò tota hæc regula ex præcedente disputatione pender, cum ex ea liqueat, Deum ut sapientem & immutabilem, naturam & perfectiones, quas semel rebus tradidit, etiamnum conservare, easque constanter & perpetuo gubernare, quem Dei concursum vocant. 2. ex communi illa notione, *nihil fit sine causa*: nam inde sequitur, unumquodque perseverare in suo statu, nisi causa aliqua mutationem inducat, quæ causa cum non sit in ipsa re, quatenus simplex & indivisa est, necessum est ut aliunde adveniat.

6. Regulæ hujus veritatem in nonnullis quidem rebus comprobare solemus, in aliis non item. Si enim ex. gr. de *figura* agatur, facile credimus, imò id observare nobis videtur quotidie, corpus, quod semel quadratum est, perpetuò talem figuram retinere, nisi aliunde quid accedat, quod eam immutet. Similiter de *quiete* judicamus, nec
puta-

putamus corpus quiescens suapte natura unquam incepturum moveri, nisi causa movens aliqua adveniat, quæ tollat quietem. Neque aliter arbitramur, cum de magnitudine & situ corporum quæstio est. Sed mirum est, quod de motu longè aliud vulgò feramus iudicium. Existimamus enim rem, quæ movetur, sua sponte & à nulla alia causa retardatam ad quietem tendere, sive à motu suo desistere, cum potius ex regula nostra concludere oporteat, id quod movetur semel, quantum in se est, deinceps in perpetuum motum iri. Quem in sensum Aristoteles 4 Phys. cap. 8 scripsit: *Nemo dicere potest, cur semel motum alicubi stabit; cur enim hic potius quàm ibi stabit?* Ita cælestium corporum motum perpetuum esse nemo dubitat.

7. Sed operæ pretium est causam expendere, quare putemus, res omnes, saltem apud nos, sponte sua & à nulla causa impeditas moveri tandem desinere. Nempe vivimus hic in terra, versamur inter corpora terrestria, quorum alia motum aliorum in se recipere, atque ita auferre ab aliis possunt & solent. Nam terræ terrestriumque corporum partes plurimæ non tam firmiter sibi adhærent, quin possint de loco deturbari & aliis cedere, aut certè tam celeriter non moventur, quin celerioris motus sint capaces. Sic igitur pluribus de causis motus omnes, qui prope terram fiunt, brevi sistantur necesse est. Quæ causæ cum sæpe sensus nostros fugiant atque ignotæ nobis ab in-cunte ætate fuerint, in eam venimus opinionem, cunctos istos motus, qui sic à causis, quas non attendimus, sistebantur, sponte sua desinere & ad quietem tendere, haud secus ac homo fessus itinere lectum petit. De omnibus enim rebus perinde ac de homine judicare amamus. (Respice disp. XIII. 35. XIV. 14. seqq.) Et quoniam à pueritia id nobis videtur in multis observasse, quod tamen revera non observavimus, ideo maturiore ætate valde proclives sumus ad generaliter de omnibus rebus, quæ moventur, pronunciandum, quod naturaliter quietem appetant & moveri sua sponte desinant. Familiare quippe nobis est sectari compendium & ex paucis exemplis, quasi per transennam strictim adspectis, universales illico regulas colligere, de quo vitio actum Log. I. 162.

8. Atqui opinio ista rectæ rationi prorsus repugnat: nam quies motui est contraria, est ipsa motus destructio. At nulla res suapte natura potest ad suum contrarium, sive ad sui ipsius destructionem ferri, quod Plato, ni fallor, his verbis expressit in Phædone: *Contrarium ipsum sibi contrarium fieri nunquam.* Certè per essentiam seu na-

turam suam res quemque est, & quidem est id, quod est: Unde fieri nequit, ut per eandem feratur ad non esse, vel ad aliud esse. Et quemadmodum id, quod non est, per se non potest incipere esse: ita illud, quod est, per se non potest desinere esse; sed omnis mutatio, omnis generatio & corruptio, à causa aliqua proficiscatur necesse est. Res creata est contingens in existendo & quasi indifferens ad esse & non esse: quamobrem ad neutrum semet ipsam provehere potest; sed à causa aliqua, præsertim à prima, ad alterutrum perducere semper debet. Potest quidem aliquid simul esse & non esse secundum diversas partes, siquidem res sit composita: sic homo habet in se esse ratione substantiæ & virtutum, non esse ratione vitiorum; sed motus est res simplex, cui non potest simul esse & non esse competere. At hæc μεταφυσικῶς τε γάρ.

9. Revertamur ad regulam nostram de perseverantia cujusque rei in suo statu, quam de motu confirmat ipsa quotidie experientia in iis corporibus, quæ projiciuntur. *Projectionem* vocamus omnem vehementiorem expulsionem, ut cum lapis in altum projicitur, vel è manu, vel è funda; item cum sagitta per nervum arcus excutitur, item cum globus à spiritu bombardæ incluso exploditur, &c. Hæc omnia unde motum primò accipiant satis est manifestum. Sed quæritur, quæ in iis causa sit continuati motus, postquam à projiciente separata sunt. Alii hanc causam putant esse aëris vel mediū cujusunque impulsū, alii impressum à movente impetum, quem ab ipso motu distinguunt. Nos faciliè nos expeditur dicendo, ideo porrò moveri projecta, quia jam semel motum acceperunt, & secundum regulam propositam manent in eo statu, in quo sunt, adeò ut quærenda potius sit causa, cur desinant moveri quàm cur pergant. Quippe non tanta ratio est quærendi, cur id, quod est, esse perseveret, quàm, cur esse desinat. Quem in sensum Theologus quidam ita scribit: *Non multa ad immortalitatem anima humana adstruendam probatione opus est. Sicut enim quidlibet rectè credimus non esse, antequam probetur esse: ita, quod est, rectè manere credimus, nisi probetur desinere.* Et paucis interjectis: *& certè anima quoque vegetantis & sentientis immortalitas seu permanentia potius asserenda, quam rationalis anima immortalitas neganda fuerit.*

10. Ratio autem, cur projecta non pergant perpetuò moveri, hæc est, quod ab obviis corporibus paulatim retardantur, tandemque ad quietem reducuntur. Ab aëre namque aliisque corporibus fluidis, in quibus moventur, motus projectorū recipitur, atque
ita

ita ab ipsis tollitur, secundum ea, quæ thes. 7 diximus. Quod enim aër motibus aliorum corporum resistat, id non modò sensu tactus experimur, dum ventis agitur, sed etiam, dum, tranquillum aliàs, flabello percutimus, quo modo mulieres ætate faciem refrigerant. Et volatus avium eundem aëris renixum comprobatur, unde strepitus ille excitatur, qui aures nostras ferit. Nec ullum aliud est corpus liquidum seu fluidum in terra, quin multò manifestiùs projectorum motibus resistat, quæ causa est, cur exemplum aëris potissimùm adduxerim. Sic faciliùs homo imitatur pisces natando, quàm aves volando, quoniam aqua pedum & brachiorum motibus vehementius reluctatur.

11. Quemadmodum Deus auctor est omnis *veri*, unde communes notiones & æternæ veritatis theorematata dependent; quemadmodum item auctor est omnis *boni*, unde regulæ practicæ & conscientiæ syntereses oriuntur: ita auctor est omnis *ordinis* in Natura, unde promanant Leges Naturæ; de qua voce si quis litem pergat movere, dicemus, Deum quidem (naturam naturantem) propriè loquendo agere, Naturam (naturatam) autem agi secundum illas. Res enim naturales non nisi actæ agunt, & motæ moventur.

12. Bene dixit Aristoteles: *quicquid movetur*, hoc est, mutatur, *ab alio movetur*, secundum ea quæ in fine th. 4 sunt tradita.

13. Thales Milesius dixisse fertur, nihil morrem à vita differre; interroganti, quare ergo non moreretur, respondisse, *quia nihil differt*. Non jam examinamus dictum illud prius: at responsum posterius apprimè consentit cum exposita Naturæ lege prima, quod unumquodque maneat in eo statu in quo est, nisi à causa aliqua inde derurbetur. Et sane natura materiæ indifferens est ad statum quemlibet.

14. Cur homo quidem sibi manus violentas possit inferre, at motus tamen semet ipsum destruere non possit, intelligitur ex th. 3, & 8. ubi res simplex à composita secernitur.

15. Cadavera in terris *reclusa*, *ligna item aqua tecta*, corpora denique *rotunda*, utpote quæ minimum habent superficiei, cur minùs sint corruptioni obnoxia magisque in eodem statu perseverent, ratio est, quòd causis corruptentibus & mutantibus minùs sint obnoxia.

16. Corpora muscæ vel alterius insecti, si electro fuerint inclusa, non putrescunt, quia aër eò non penetrat, nec electrum, ex insecti natura recipit quicquam.

De Motu Projectorum à jacente separatorum.

1. **E**Gimus de prima Naturæ lege, quod *unaquaque res, quatenus est simplex & indivisa, maneat, quantum in se est, in eodem semper statu, nec mutetur unquam, nisi à causis externis.* Addimus tantum, operæ pretium esse, ut veri studiosus examinet, nunquid in effatis sequentibus Ars æqui & boni rerum Naturam imitetur. Actore *non probante* reus absolvitur, etiamsi nihil ipse præstiterit. Id quod nostrum est, *sine factio nostro*, hoc est, sine traditione, ad alium transferri non potest. In rebus novis constituendis *evidens utilitas* esse debet, ut recedatur ab eo jure, quod diu æquum visum est. Præsumitur quodlibet accidens in eodem, in quo semel fuit, statu persistere, nisi contra *probetur mutatio*: ut conjectura probabilis est, durare patriam potestatem, malitiam, bonitatem, divitias, fortunam, prout cujusque antea fuit, &c.

2. Quæstionem de motu projectorum, quam difficillimam vocat Scaliger Ex. 28. ex eadem Naturæ lege explicandam esse diximus. Nempe, cur projecta postquam à projiciente separata sunt, aliquamdiu in motu perseverent, ex. gr. cur lapis, cum à manu amplius non tangitur, motum continuet, non aliam causam quærendam esse, quam quod semel mota pergant moveri, donec ab obviis corporibus retardentur. Quam quidem explicationem ideo recipiendam esse contendimus, quod omnium simplicissima sit, & intellectu facillima, & ex qua causæ eorum, quæ de projectis in controversiam vocari solent, reddi possunt clarissimè, quemadmodum è sequentibus elucebit.

3. Nam quantum ad eorum opiniones attinet, qui continuationem motus in projectis à projiciente separatis vel à solo aëris impulsu, vel ab aliqua qualitate impressa & distincta à motu, tanquam à causa proxima derivant, ex pluribus argumentis refutantur, quæ in hypothesis proponam, exemplo motus, quo sagitta sursum fertur, utendo, quò facilius ipsius thesæos veritas admittatur.

4. Sagitta non potest moveri sursum per aëra, nisi aëris aliqua pars cedat. Aëris nulla pars cedere potest, nisi aliam partem loco expellat. Neque sic expelli pars una ab alia potest, nisi tandem ultima in locum sagittæ succedat: quæ omnia ex disp. XVII patent. Porro aër ille locum à sagitta derelictum ingrediens naturali necessitate implet illum

lum locum; an præterea sagittam impellat, sunt qui dubitent, sunt qui negent, quoniam ista ratione non solum impleret vacuum, sed etiam occupare conaretur plenum, ut ipsi quidem aiunt. Quæ ratio-
cinatio ita se habet, ac si quis diceret, agrum pro derelicto habitum statim quidem fieri occupantis, hunc tamen occupantem vicinos agros ideo non invadere. At enim si concedamus, quod aër non modo impleat locum derelictum, sed etiam nonnihil impellat seu promoveat sagittam, impulsus tamen hic non sufficiet ad id, ut sagitta motum sursum diutius continuat, quia aër, qui unum continuum corpus constituit, dum in statu suæ continuitatis persistere conatur, motui sagittæ, quo frangitur ac dividitur, prius & potius repugnat. Ad hæc melius intelligenda repræsentat tibi hominem in aquis ambulantem: Hic enim dum impellitur ab aqua quæ tergum claudit, impeditur ab ea quæ ante est. Simile in aëre fieri cogitabis respectu corporum quæ in eo transferuntur.

5. Adhæc, quod sagitta majore impetu sursum fertur, quam pluma, non utique aëri, sed motui semel à jaculante impresso tribuendum, cum aliàs vis gravitatis sagittam magis deorsum pellat, quam ab aëre sursum propelli queat. Nempe sagitta, durum corpus, siue sursum, siue deorsum feratur, semper vehementioris motus capax est, quam pluma mollis, licet interim hæc facilius aëris motum sequatur.

6. Denique, quod sagitta directione jaculantis ad certum aliquem scopum feratur, id non à solo aëris impulsu, neque ab impressa nova aliqua qualitate, quæ differat à motu; sed exproposita Naturæ Lege pendet. Manet enim sagitta in eo statu, in quo est à jaculante collocata. Atqui collocata est non tantum in motu, verum etiam in tali motu, versus talem partem directo.

7. Itaque eodem errore, quo sonus à tremulo & vibrato aëris motu, ut qualitas diversa, à nonnullis distinguitur, etiam impetus seu qualitas motrix ab ipso motu corporum, quasi res quædam diversa esset, separatur. Scilicet nimis faciles sunt multi philosophi ad entia sine necessitate multiplicanda. Nos paucis & clavis principiis contenti non temerè excogitamus novas qualitates, ubi per solas de ipso motu regulas res potest expediri.

8. Si quis sublata causa movente motum ipsum tolli putet, atque inde argumentum aliquod ad nostram de motu projectorum sententiam labefactandam petat, ei verbis Scaligeri è citata antè Exercitatione desumtis respondemus: *Motio est forma in moto impressa, quæ sub-*

latò priore motore etiamnum servari potest. Priorem dico, à quo forma illa im-
pacta est. Non enim est necessarium, efficientes causas particulares simulcum
suis effectibus perpetuari: sed tunc habere tantum, cum efficiunt. Aristoteles af-
fert exemplum ab iis machinis, quæ vocantur αὐτόματα, demonstratque in
moto actionem remanere, quæ indulta fuerat à motore primùm.

9. Obducitur pro impulsu à motu distinguendo tale argumen-
tum: quod sensu percipitur in corporibus non modò quiescentibus,
sed etiam contrario motu impulsis, id ab ipso motu differt. Atqui im-
petus percipitur in corporibus &c. nempe, cum lapis attollitur, aut
vesica aëre plena in aqua deprimitur, deprehenditur in illis impetus
contrarius, quo lapis quidem deorsum, vesica autem sursum nititur.

10. Resp. Impulsus ille contrarius, qui percipitur, non est qua-
litas quædam, seu res à motu distincta, sed est ipse motus. Motus
enim sursum & motus deorsum sibi repugnant, ob metas contrarias,
versus quas diriguntur. Lapis deorsum pellitur à causa universali & cæ-
lesti, cujus actio perpetua & ordinaria naturalis dici solet: at sursum
mittitur à manu, ut causa particulari & terrestri, cujus actio extraor-
dinaria exiguo tempore durat; licet ideo non magis violenta, saltem
in progressu, dicenda sit, quàm prior. Quamdiu igitur hic motus il-
lum vincit, lapis adscendit: at ille dum hunc iterum vincere incipit,
lapis descendit. Motus enim particularis, à manu impressus lapidi,
paulatim aëri communicatur, atque ita impotentior factus faciliè su-
peratur à motu illo universali, qui terrestria omnia deorsum premit.

11. Similiter materia in vesica contenta eam sursum impellit, ma-
nus contrà deorsum; & prout hic vel ille motus validior existit, ita
etiam vesica vel attollitur in aqua, vel deprimitur. Huc pertinet tra-
latitium illud axioma: omnis actio physica unius in alterum fundatur
in victoria & excessu agentis. de quo suo loco plenius.

12. Ad quæstionem, sitne motus projectorum violentus, an na-
turalis, nonnulli respondent distinguendo initium motus à continua-
tione motus, uti disp. XIV. th. 13 & nos distinguebamus. Respi-
cientes igitur solam primam Naturæ legem putant motum projecto-
rum initio esse violentum, quia lapis ex gr. dum sursum projicitur, è
priore suo statu deturbarur, ponimus enim eum antea in terra immo-
tum jacuisse. Attamen contendunt, eundem lapidis motum ratione
continuationis esse naturalissimum, hoc est esse tam consentaneum di-
ctæ primæ Naturæ legi, quàm ullus alius esse queat.

13. Nolumus multum huic sermoni contradicere, quoniam aliter
de

de initio rei, aliter de ejus progressu ac duratione persæpe judicandum esse pluribus aliis ostenditur exemplis, quorum nonnulla, quod primam Naturæ legem illustrare videantur, non pigebit adscribere. Quæ ab initio sunt voluntatis (ita ut possint quidem aliter se habere) postea fiunt necessitatis (ut jam non possint aliter se habere): Quod semel placuit, postea displicere non potest. Non faciliè nec citò amicitia cum aliquo ineunda est, at semel inita non faciliè dissolvenda. Etiam turpius ejicitur, quàm non admittitur hospes. Leges novæ magna cum cura, & non nisi urgente necessitate ferendæ sunt; at semel latæ non faciliè abrogandæ. De conjugio contrahendo sic loquitur Apostolus 2 Cor. VI. 14. *Nolite jugum ducere cum infidelibus.* At de contracto jam conjugio, 1 Cor. VII. 12. *Si quis frater uxorem habet infidelem, & hæc consentit habitare cum illo, non dimittat illam.* Vides, opinor, in his exemplis, principium ipsarum illarum rerum sæpe esse legi contrarium, aut certè non necessarium, quarum tamen semel cœptarum perseverantia ex lege necessaria existit.

14. At revertimur ad quæstionem propositam, & optimè ad eam responderi putamus, si dicamus nihil propriè in Natura violentum dici posse ratione materiæ, utpote quæ res est tantùm passiva, non magis ad motum quàm ad quietem proclivis, neque magis ad hunc, quàm ad illum motum recipiendum idonea. Nimirum æquè naturale est corporibus, quòd se mutuò impellant vel elidant, quando ita contingit, quàm quòd quiescant. Et motus ille lapidis, quem è statu quietis suæ deturbari ponimus, ipsius quoque initii respectu naturalis est, si non ex prima illa physica regula, saltem intuitu tertix Naturæ legis, quæ de propagatione & varietate motus loquitur, ut suo loco videbimus. Nomen autem *violenti* propriè non refertur nisi ad nostram voluntatem, quæ vim pati dicitur, cùm aliquid fit, quod ei repugnat.

15. Philosophi, qui motum in naturalem & violentum divisere, naturam materiæ planè passivam confuderunt cum natura activa rei intellectu præditæ: putantes enim naturalem motum ab interno, violentum ab externo principio proficisci, respectu illius activam aliquam vim innatam atque insitam materiæ existimârunt, cùm è contrario motum omnem, ut extrinsecus materiæ advenientem, nullum tanquam ab ejus natura promanantem considerare debeamus, quem admodum sæpiusculè jam inculcavimus.

16. Corpora projecta, durante eorum motu, si in alia corpora

motum non auferentia incidant, cum directè ulterius progredi nequeant, repelluntur in partem oppositam, sicut in motu pilæ pavimento aut parieti illisæ atque inde resilientis apparet. Ubi primò quæritur, cur tali casu motus non penitus tollatur, sed porro continuet; & responderetur, quia à nullis corporibus totus recipitur, ideo manet in eo subiecto, in quo est. Deinde, cur tamen nonnihil retundatur atque imminuatur; & responderetur, quia tantum motus pila perdit, quantum in aëtem & alia corpora transfert. Denique, an inter projectionem & resultum pilæ quies aliqua interponatur, & generatim, an sit necesse, ut ulla corpora aliquo momento hæreant in iis, à quibus reflectuntur.

17. Ad tertiam hanc quæstionem plurimi solent respondere affirmando. Docent enim primò, motus continuitatem solvi per interpositam moram sive quietem, haut secus ac partium magnitudinis continuitas tollitur per sectionem: quæ comparatio bene, meo iudicio, se habet. Consequenter statuunt, si mobile, postquam aliquamdiu motum fuit, vel momento temporis quieverit, & denuo moveri incipiat, motus illos non esse inter se continuos, neque ex illis unum motum componi posse: quod itidem recte se habet secundum definitionem, qua *Vnum* dicitur, quod in se est indivisum. Postremò addunt, pilam in puncto resultus momento quiescere, & sic omnia corpora exigua saltem mora hære in iis, à quibus reperiuntur. Unde doctus Judæus Maiemonides More Nevoch. part. 2. cap. 10, sic ait: *Licet id, quod movetur motu recto, quandoque revertatur per illam eandem viam, tamen non est continuatio motus; quia inter duos motus contrarios intercedit quies aliqua, prout in suo loco demonstratur. Proinde patet hinc, ut aliquid motu continuo moveatur, & per unam eandemque viam revertatur, necessarium requiri, ut moveatur circulariter.*

18. Videntur in eam venisse opinionem eo quod tripudiantium & saltantium hominum pedes, postquam terram attingere, exigua mora interposita sæpenumero iterum attolli deprehendant. Sed non attendunt satis ad primam Naturæ legem, ex qua evidentissimè ostenditur, pilam ex. grat. non alia de causâ à pariete resilire, quàm quod semel mora pergat moveri, seu, quia suapte natura manet in eo statu, in quo est: est autem in statu motus. Quod si autem vel tantillo temporis intervallo hæreret in pariete, illico poneretur in statu quietis, inque eo ex præscripta Naturæ lege tantisper persisteret, dum ab alia causâ motum reciperet. Neque profectò in arbitrio pilæ situm est, motum

motum tanquam sarcinam aliquantisper deponere, & postea resumere, cum sit agens necessarium, non liberum. Nec paries motum, quippe quem nullum habet, pilæ potest communicare.

19. Ad hunc locum, ubi de resiltu corporum projectorum agitur, etiam pertinet illa quæstio, cur aliquando bombardarum pilæ versus aquam displosæ in eam non possint ingredi, sed versus aërem reflectantur: id quod nonnulli perhibentur esse cum dolore experti, dum animi gratiâ explosis in alveum rivi ex murali machina globis obambulantibus in adversa fluminis ripa vulnerarunt. Resp. Si lapis vel pila ad perpendicularum incidat in aquam, ulteriùs in linea recta sine ulla declinatione descendit, quia manet in eo statu, in quo est, &c. At quantò obliquiùs in aquam impingit, tantò magis detorquetur in adversam partem: atque ita si non dividat ac secet totam aquæ superficiem, minimè quoque aquam penetrabit, sed inde in aërem resiliet, eo modo ac si in terram incurrisset. Effectum hunc nonnihil promovet lævitas illa seu æqualitas, quæ est in aquæ tranquillæ superficie, qua fit ut exigua acus aquæ summæ innatet, quamdiu superficies ejus non divellitur. Eundem effectum magis adjuvat ipsa motus in globo aut lapide celeritas. Quò quid enim celerius movetur, eò vehementiùs ei etiam à parva vi resistitur, quemadmodum sensu tactus cognoscimus, dum aquam palma, virga vel baculo percutimus.

20. Facit huc puerorum ille lusus, quem Minuc. Felix in Octavii principio his verbis describit: *Pueros videmus certatim gestientes testarum in mare jaculationibus ludere. Is lusus est testam teretem jactatione fluctuum lavigatam legere de litore, eam testam plano situ digitis comprehensam, inclinem ipsum atque humilem, quantum potest super undas inrotare: ut illud jaculum vel dorsum maris raderet, vel enataret, dum leni impetu labitur: vel summis fluctibus tonsis emicaret, emergeret, dum assiduo saltu sublevatur. Is se in pueris victorem ferebat, cujus testa & procurreret longius, & frequentiùs exsiliret.* Causa motus ejusmodi in testis ex dictis intelligitur, & similis lapillorum in aquam jaculatio pueris est passim familiaris: ubi cernere licet & lapillos & aquam in eo statu, in quo sunt, quamdiu possunt, perseverare.

21. Difficilior quæstio est, *cur pila plumbea è summo malo ad mali pedem decadat, nave interim velocissimè provecta; cur item ab equitante in altum projecta in manum ejus recadat.* Quod res ita se habeat plenius docet Gassendus initio epist. 1. de Motu impresso &c. *stupuerunt sanè, inquit, cum jussi tam curru quàm equo periculum facere, de-*

prehenderunt, seu quiescerent seu concitatissimè transferrantur, res sursum projectas, perinde in manum redire, manu dimissas, secundum eandem sui, equi aut currus lineam cadere &c. Postea, ut planè convincerentur, deducendi fuere ad mare, observaturi, utrùm navi velocissimè translata, perinde atque quiescente, lapis sursum projectus, v. c. expedè mali, secundum mali longitudinem, tueretur semper tam ascendendo, quàm descendendo, eandem à malo distantiàm, & ad pedem mali, seu in eundem locum præcise, recideret &c. Caterum res ita successit, ut nihil amplius hæserint &c.

22. Causam admirandi illius motus non aliunde meliùs quàm ex prima Naturæ lege explicari possè existimamus. Consideramus quippe in pila vel lapide motum ex progressu & descensu vel ascensu compositum. Descensum à vi gravitatis, ascensum à motu contrario, quem manus impressit, pendere notum est. Progressum denique à navis vel equitantis profectione eidem pilæ vel lapidi impressum esse si judicemus, minimè dubitabimus, quin maneat in eodem subiecto, in quo est, cum ex dicta immutabilitatis Naturæ lege unumquodque, quantum in ipso est, in suo statu semper perseveret, sicuti pluribus exemplis atque argumentis tum hac ipsa tum superiore dissertatione est ostensum, Nec videtur opus esse plura addere.

DISP. XXI.

Altera lex natura: quod omnis motus ex seipso sit rectus, & ideo quæ circulariter moventur, tendere semper ut recedant à centro circuli quem describunt.

1. **C**Orpus illud, quod movetur, considerari potest vel absolute & in se, vel comparatè & cum relatione ad aliud corpus, cui occurrit. Absolute in motu spectatur primo quidem ejus existentia ac duratio, deinde via ac directio. Hæc autem duo inter se distingui manifestum est, quoniam durare potest motus, & tamen interim viam mutare. Vidimus de priore: Sequitur ut posterius consideremus. Nempe habuimus, quod unumquodque corpus semel motum pergat moveri: jam exponendum est, qua via pergat seu quomodo exsequatur motum. Et huc pertinet sequens regula, quæ est secunda lex Naturæ.

2. *Vnumquodque corpus seorsum spectatum, non tendit unquam, ut secundum ullas lineas curvas pergat moveri, sed tantummodo secundum rectas. Dico unumquodque corpus seorsum spectatum; quibus verbis idem significo, quod*

quod in præcedente regula illis denotabam, *quatenus simplex & indivisum*, item, *quantum in se est*. Non enim inficiaseo, quin multa corpora à recto cursu defletere cogantur, propter occursum aliorum, cum jam disputatione XVII ostensum fuerit, in quolibet motu circulum quendam sive circuitum esse totius alicujus materiæ, quæ ad corporis unius motum necessario simul movetur. Tantum hoc volo, motum omnem ex seipso rectum esse, adeo ut solus ille, qui rectus, propriè & strictè naturalis dici possit; omnis obliquus quodammodo contra naturam, saltem primam & simplicissimam; cum aliàs nullus revera motus naturæ ipsius materiæ adversetur, ut proxima antecedente disp. docuimus.

3. Demonstratur hæc regula ex consideratione ipsius illius perfectionis divinæ, qua lex prima demonstrata fuit. Nimirum ex illius operationis, qua Deus motum in mundo conservat, immutabilitate & simplicitate. Animum quippe ad immutabilem & simplicissimam Dei circa motum operationem advertentes, corpus unumquodque perseverare simpliciter & constanter in suo motu, siquidem semel cœperit moveri, rectissime judicamus. Quemadmodum igitur Deus motum in corpore aliquo conservat, faciendo ut is, qui nunc est, porro sit, non habita ratione ejus status, in quo priùs fortè collocata fuerat res illa, quæ movetur: ita etiam versus eam metam pergit corpus mobile dirigere, versus quam hoc ipso temporis momento directum est. Atqui omni momento dispositum est ad motum suum continuandum secundum lineam rectam, non secundum curvam, quamvis antea curvilineum motum habuerit.

4. Clarius ut ista intelligantur, aio, non modo simplicem durationem, at simplicem quoque viam motui per se spectato & prout à Deo pendet considerato tribuendam esse. Ut in duratione motus simplicitas elucet, & constantia: ita in via motus nulla anomalia, varietas vel inconstantia ponenda. Nullus autem prior, simplicior & brevior motus, quam ille, qui fit secundum lineam rectam. Sola quippe linea recta, quæ definitur brevissima ab uno puncto ad aliud punctum extensio, per omnia & sibi & alii rectæ congruit, estque in plures species individua. Curvarum species plures sunt, inter quas simplicissima quidem circularis, quæ tamen simplicitate cedit rectæ. Nam primò motu rectæ, quam à centro ad peripheriam extendi concipimus, procreatur. Deinde omnes quidem ejus partes sibi congruunt, si convexum convexo, concavum concavitati applies, non contra.

contra. Denique quod unius circuli pars alterius majoris vel minoris parti omnino non congruat, manifestum est. Quemadmodum igitur unum prius est multo, verum falso, ita rectum curvo. Nam recta via unica est, curvæ sunt innumeræ, quibus à puncto ad punctum pervenire licet. Cumque natura corporea omne quod agit necessariò agat, si quidem ad agendum ordinata sit, non nisi ad unum & simplicem agendi modum ordinata esse potest. Unus iste & simplex agendi modus in motu recto consistit.

5. Exemplum secundæ hujus Naturæ legis luculentum apparet in radiis luminosis, qui per lineas rectas, è quolibet superficiæ corporis lucidi puncto, in quamcunque medii partem educas effunduntur, quemadmodum & umbrarum rationes & dioptræ, per quarum extrema foramina lumen rectis lineis trajicitur, ostendunt. Hujus rectilineæ effusionis causam hanc adferunt Philosophi, quod omnis naturæ conatus rectis lineis tanquam brevissimis in res objectas feratur, quo citius validiusque effectum assequatur. Gravium & levium, sagittæ quoque rectæ ad scopum tendentis, pilæ similiumque projectorum motus regulam nostram confirmant. Sic fumus recta sursum ascendit, nisi quid impediat: aqua fluviorum rectum perpetuò tenet cursum, nisi quid obstat. Nix secundum lineas rectas decideret, nisi inter descendendum à vento & aëre variis modis impelleretur.

6. Sed notatu dignum est præ cæteris, quod ipsa illa corpora, quæ circulariter moventur, perpetuò conentur recedere à centro circuli quem describunt, ut ipso manus sensu experimur in lapide, qui fundâ circumactus trahit atque intendit funem non solum versus inferiores, quod gravitati tribui posset; verum etiam versus superiores, & alias omnes partes, dum à manu sive à centro sui motus per lineas rectas recedere nititur. Hujus equidem rectilinei recessus, aut saltem recedendi conatus aliam causam non licet invenire, quam eam, quæ hac secunda Naturæ lege continetur.

7. Sunt qui à priori ostensuri, cur natura in præcipuis mundi corporibus figuram sphericam affectare deprehendatur, his inter alia utuntur argumentis, quod hæc figura simplicissima sit, & maxime uniformis (utpote quæ unico tantum termino, eoque à medio comprehensi spatii undique æqualiter distante contineatur); sit etiam robustissima ad resistendum, quod singulæ illius partes aliis firmentur ac sustententur, &c. Similibus argumentis nos uti possumus ad probandum, naturam perpetuò tendere ad motum suum continuandum

secun-

secundum lineam rectam, quod hæc simplicissima sit & maxime uniformis, atque ad agendum vel actioni resistendum efficacissima. Sic lappæ, setæ, spinæ & similia vehementius pungunt eas res, in quas secundum lineas rectas incidunt. Sic frangitur imperus sagittæ, globi à tormento explosi, glaciei in aqua natantis, ubi à via recta recessere.

8. Postquam ita regulam nostram ratione atque experientia demonstravimus, nec non aliorum philosophorum consensu stabilivimus, videamus an etiam in artibus, utpote quæ solent naturam imitari, alicubi ejus vestigia appareant. Et primo quidem in arte medica, simplicia medicamenta compositis, ni fallor, à peritioribus artis filii priora & potiora, reliquis paribus, solent haberi. Deinde in arte Logica simplicissimæ quæque rationes primæ & optimæ judicantur. In arte Hermeneutica semper ille dicti alicujus sensus præfertur, qui est simplicior. Quin etiam omnes de quibuscunque rebus opiniones simplicitate se commendant, quod entia sine necessitate non sint multiplicanda; quam regulam passim videas in analysi bonis scriptoribus placere.

9. Porcius Latro apud Senecam ait, *summa esse dementia detorquere illam orationem, cui recta esse liceret.* unde talis extruitur canon Hermeneuticus: nunquam veniendum est ad sensum orationis tropicum, nisi cogat necessitas, quoniam sensus tropicus natura est posterior proprio, ut curvum recto, versum simplice. Nempe ut natura non deflectit à motu recto, nisi ab aliqua causa coacta; ita à propria vocabulorum significatione non recedit bonus interpres, nisi necessaria vel idonea de causa. Et ipsi Rhetores agentes de tropo docent, nunquam vocem à propria significatione in alienam esse immutatam, nisi necessitas, vel ornatus similisve immutandi causa fuerit. Oratio *prosa* vel *prosa*, id est, recta, opponitur *versa*: Et illa prior hac, quia rectum inverso prius.

10. Nunc alia nonnulla de simplicitate & rectitudine annexemus. Tralatitium axioma est: quo quid simplicius, eò perfectius. Quod verum est de Deo, Ente simplicissimo, omnibusque rebus ad Deum relatis, ad quem etiam motum in præsentia retulimus. Vulgo quoque naturam esse dicunt sapientissimam. Addunt, sapientem nihil frustra agere, non ire per ambages, ubi sunt compendia præsto. Quæ nos facile admittimus, si de natura naturante, seu Deo quæstio sit, cum nullam in corporeo rerum universo mentem ac sapientiam inveniamus, præter eam, quæ est Creatoris & Conservatoris Dei.

11. Opus ab opifice magis minusve, prout fert ejus natura, distinctum esse nemo non agnoscit. At quaeritur, annon ibi, ubi non est aperta dissimilitudinis ratio, convenientiam potius & similitudinem, quàm differentiam ac dissimilitudinem, inter causam & effectum statuere oporteat? Resp. Semper opus tale statuendum, ut opifici respondeat & cum eo conveniat, nisi diversitatis argumentum occurrat manifestum. Sic attendentes ad infinitam Dei potentiam & bonitatem, opera ejus ampla potius & pulchra, quàm angusta atque deformia imaginamur, Principp. III. 1. 2. Et quia confusio minùs videtur convenire cum summa Dei rerum Creatoris perfectione, quàm proportio vel ordo, nullaue proportio vel nullus ordo *simpliciter* est, quàm ille qui omnimoda *aqualitate* constat, idcirco talem in Universo omnium primò consideramus, P. III. 47. Et omnes mundi partes in principio fuisse magnitudine æquales judicamus tantisper dum ipsarum inæqualitatis videamus argumentum, P. III. 83. Ita, quia nullum habemus argumentum vel exemplum, quod persuadeat substantiam, cujusmodi est mens humana, posse interire, meritò existimamus, ipsam in eo Creatori esse similem, quod immortalis, Medd. 81. Sic denique, quia cum Dei perfectione magis convenit, ut modo quam maximè constanti & immutabili operetur, P. II. 36. 42. Cumque simplicitate atque immutabilitate ejusdem operationis, ut secundum lineam rectam corpus unumquodque pergat movere, P. II. 39. ideo utrumque ita se habere judicamus.

DISP. XXII.

Tertia lex: quod unum corpus alteri fortiori occurrendo nihil amittat de suo motu, occurrendo verò minùs forti, tantum amittat, quantum in illud transfert.

1. **H**Actenus potissimum consideravimus corpus unumquodque mobile sine respectu ad alia corpora, quæ motum impedirent aut promoverent: nunc ordo rerum postulat, ut, quinam ex occurſu corporum, quæ moventur & motui resistunt, effectus in rerum natura oriantur, propius inspiciamus. Hac autem de re agit lex Naturæ tertia, quæ brevissimè sic habet: *corpus unum si alteri fortiori occurrit, nihil amittit de suo motu; si occurrit minùs forti, tantum amittit, quantum in illud transfert.* Regula hæc pro duplici, quam in obvio corpore consideramus, differentia, duas habet partes, quas distinctè expendemus.

2. Pars

2. Pars prior est: si corpus unum occurrit alteri majorem ad resistendum vim habenti, quam ipsum habet ad motum viâ rectâ (quia ex lege secunda omnis motus natura sua est rectus) continuandum, tunc in eam partem, secundum quam corpus obvium ei oppositum est, deflectitur, & motum suum retinendo tantummodo motus viam mutat. Sic experimur dura quâlibet corpora projecta, cum in aliud corpus majus, quod durum est & firmum, impingunt, non ideo moveri desinere, sed versus contrariam partem reflecti. Exemplum habemus in pila, quæ parieti vel pavimento illisa resilit.

3. Pars regulæ posterior est: si corpus unum occurrit alteri minorem ad resistendum vim habenti, quam ipsum habet ad rectâ pergendum, tunc illud alterum secum movet, & quantum ei largitur de suo motu, tantumdem perdit. Ita experimur, dura quâlibet corpora projecta, cum occurrunt corpori molli, quia facile in illud omnem suum motum transferunt, illico à motu cessare. Exemplum est in pila, quæ in lanam projicitur. Imò etiam, quòd pila parieti vel pavimento illisa ad dimidium (vel quasi dimidium) tantummodo spatium resiliat, donec tandem quiescat, causa est, quod multum sui motus aëri communicet. Nempe in corpora liquida, fluida, mollia, aut saltem non planè dura potest motus transferri, dum plurimæ eorum partes non tam firmiter cohererent, quin possint per motum separari, aut certè tam celeriter non moventur, quin celerioris motus sint capaces, quemadmodum de terrestribus, Disp. XIX. th. 7, observavimus.

4. Demonstratur pars prior hujus legis ex eo, quod differentia sit inter motum ipsum & directionem motus versus certam regionem, cum duo sint modi, quorum unus alteri in eadem substantia corporea additur, quemadmodum cursui accedit celeritas vel tarditas. Quemadmodum igitur celeritas facile à cursu equi abesse potest, & revera abest, dum tardiùs currit: ita facile potest directio motus variari, motu ipso continuante. Quin facilius illud intelliges, si cogites, ita ferè se rem habere, ac si dixeris, posse hominem pergere eundo viam, etiamsi faciem non versus eundem semper locum convertertat.

5. Prima regula Physica nos docuit, quod unaquæque res, latè sic dicta, sive substantia sive modus fuerit, uti est motus, perseveret perpetuò talis esse qualis est simpliciter & in se spectata, non qualis est rerum intuitu aliarum, donec occurssu alterius alicujus mutare statum suum cogatur. Corpus itaque dum movetur, si obvium habeat

aliud corpus durum adeo & firmum, ut nulla id ratione propellere queat, necesse est ut omnino amittat dispositionem illam, quam habebat, se movendi versus regionem istam, quoniam causa, quæ hanc dispositionem mutat, est in propatulo, nimirum corporis illius obstantis renixus. Nec tamen ideo necessum est, ut vel tantillum perdat sui motus, quoniam is neque per corpus illud obvium, neque per ullam aliam causam tollitur. Nec est quod contra dicas, hac ipsa fortassis reflexione motum auferri. Cum enim motus motum in corpore, cui inest, non destruat, quocunque modis vel inflectatur vel reflectatur, nihil interest. Motus, inquam, motui in eodem subjecto non est contrarius, sive sursum, sive deorsum, sive ad latera dirigatur. Apparet hoc in ventis, qui in templa impingentes flare pergunt, utcunque in alias atque alias partes ibi convertantur.

6. Demonstratur etiam *pars altera* nostræ regulæ ex consideratione divinæ in operando constantiæ, de qua Disp. XVIII actum. Et certè Deus mundum eadem actione conservat, qua creavit: conservationem enim nihil aliud esse, quàm continuatam creationem, alibi docuimus. Quare cum corporum plena sint omnia, ac nihilominus unaquæque materiæ pars feratur ad motum suum secundum lineam rectam continuandum, manifestum est, quod jam inde à principio, quo Deus creavit materiam, non solum diversis modis partes ejus moverit, verum etiam, quòd hanc ipsis proprietatem dederit, ut jam tum aliæ alias, in quas motu recto impingunt, impellere, aliæque aliis nonnihil de motu suo impertire inciperent. Et quia Deus cunctas materiæ partes, id est, omnia & singula mundi corpora, adhuc gubernat eadem prorsus actione eisdemque legibus, quas auctore ipso observabant dum creabantur, necessum est ut jam nunc conservet in illis omnibus & eum, quem tunc largitus est, motum, & hanc, quam addidit motui, proprietatem, ne eisdem perpetuo materiæ partibus adhereret, sed ab aliis transiret ad alias, prout diversis sibi modis occurrunt. Ita quidem ut continua illa, quæ in creaturis cernitur, mutatio, nullo pacto repugnet immutabilitati Creatoris, sed ejus potius indicium atque argumentum esse videatur, cum fiat modo immutabili. Respice ea, quæ circa finem Disp. XVIII dicebamus.

7. In hac tertia naturæ lege omnes causas particulares mutationum, quæ corporibus accidunt, seu in moventibus seu in mobilibus exspectantur, contineri certum est. Certum, inquam, est, si de causis lo-

qua-

quantur, quæ ipsæ corporeæ sunt. An enim & qualem humanæ angelicæve Mentis facultatem habeant corpora movendi, efficiantne motum, ut equus currum trahit, an solum dirigant, ut auriga equum regit, potius ad specialem de Homine contemplationem referendum, quàm in Physica generali tractandum existimamus.

8. Sed restat unum, & quidem præcipuè, in regula ista explicandum, illud nimirum, quod de resistendi vi diximus in utraque regulæ parte. *Resistentiam* vulgo faciunt duplicem, unam *activam* seu *positivam*, quæ & *Reactio* dicitur, ut, cùm id, quod sursum movetur, ab alia causa deorsum repellitur: alteram *formalem* seu *negativam*, ut, cum paries obsistit pilæ versùs eum projectæ. Nos illam agendi, hanc resistendi vim propriè appellabimus, ne barbaris istis vocibus perpetuo uti cogamur.

9. Tenendum igitur est, omnem corporis cujuscunque vim agendi in aliud, omnem item actioni alterius resistendi facultatem, in hoc uno consistere, quòd secundum primam naturæ legem unaquæque res tendat, quantum in se est, ad permanendum in eodem statu motus vel quietis (ad hos enim duos omnis corporum status referri potest, uti docuimus Disp. XIX. th. 4.) in quo est. Hinc enim id, quod alteri conjunctum est, vim (ratione quietis scilicet, ut postea videbimus) habet nonnullam ad impediendum, ne disjungatur (hoc est, ad perseverandum in sua quiete;) id, quod disjunctum est, vim habet aliquam ad manendum disjunctum, quod sit vel motus vel quietis continuatione; id, quod quiescit, vim habet ad perseverandum in sua quiete, & consequenter ad resistendum illis omnibus, quæ possunt mutare quietem; id, quod movetur, vim habet ad perseverandum in suo motu, hoc est, in motu, qui eundem servet celeritatis gradum eandemque viam.

10. At quæritur, unde cognoscendum, vis illa agendi & resistendi quanta sit. Resp. Primò respicienda est magnitudo vel parvitas corporis illius, cui vis tribuitur; quo pertinet axioma: *in majori quanto major est virtus*; item, *virtus unita fortior*: intellige, in agendo & resistendo, in movendo & quiescendo. 2. attendenda est magnitudo vel parvitas superficiiei, secundum quam corpus illud, de cujus virium quantitate agitur, ab alio disjungitur. Ita corpora spherica minus passioni sunt obnoxia, quia minimum habent superficiiei pro ratione suæ molis. 3. consideranda est motus celeritas vel tarditas, nam ex. gr. corpori celeriter moto faciliè resistitur etiam à parva vi, ut si virga

aquam percutias. 4. Spectandum est, quomodo sibi occurrant corpora diversa, seu quis qualisque modus sit, quo sibi invicem opponuntur: ex. gr. lapillis transversim in aquam missis resistit aqua; non item iis, qui perpendiculariter incidunt.

11. Et quoniam hic dispicimus, quomodo corpora sibi agendo & resistendo repugnent, observandum est, motum unum alteri motui æquè veloci per se non esse contrarium; sed propriè duplicem duntaxat in rebus Physicis inveniri pugnam. Prior est inter motum & quietem, v. g. inter calorem & frigus. Motum enim & quietem duos esse modos naturæ suæ oppositos ex ipsorum definitionibus intelligitur. Ad hanc autem oppositionem etiam ea referri potest, quæ est inter motus celeritatem & tarditatem. Tarditas quippe omnis non nihil de natura quietis participat, & quidem tantò plus, quantò major existit. Simile est, quod homo tardioris ingenii affinis est stupido. Ita quò minus agitur aqua, eo facilius gelu constringitur.

12. Posterior physicarum rerum in agendo & resistendo pugna dependet ex directione motus versus aliquam regionem & occursum corporis in illa regione quiescentis, vel aliter moti. Movetur autem aliter, si vel tardiore gradu, vel diversâ viâ incedit: quæ via vel directè, vel transversim, vel mediis quibusdam modis adversatur. Estque dissensus hic posterior nunc major, nunc minor, pro situ regionis, in quam corpus alteri occurrens fertur.

13. Ex his igitur, quæ dicta sunt, ut possimus æstimare, quo pacto singula corpora motus suos augeant, vel minuant, vel alias in partes convertant (triplex enim hujusmodi variatio motui accidit) oportet solum attendere, quantum in unoquoque corpore sit virium, sive ad movendum, sive ad motui resistendum, ac pro certo statuere, illud semper, quod valentius est, sortiri suum effectum. Unde vulgatum illud axioma: *omnis actio physica unius in alterum fundatur in victoria & excessu agentis.*

14. Usus doctrinæ hujus physicæ multiplicem sequentibus in Problematis licebit animadvertere. 1. Cur in familiari pueris globulorum lusu, si unus in alterum sic impellitur, ut eum accuratè tangat, prior sistitur, & alter eadem celeritate movetur, qua antè prior; si ex parte solum tangat, tantò tardius movetur prior, quantò plus motus posteriori communicavit; sin prior posteriorem planè intactum prætereat, ille pergit celeriter moveri? Respondetur ex declarata jam lege naturæ tertia, quia globulus tantum amittit de suo motu, quan-

quantum in alium transfert; si autem nihil transfert, nihil etiam amittit, quia manet in eo statu, in quo est. 2. Cur aqua calida frigida affusa totam reddit tepidam? Respondetur ex eadem regula, quia calida motum impertiendo frigida tantum amittit caloris, quantum hæc acquirit, unde totum evadit tepidum. 3. An igitur, quoties calidum quodcumque corpus frigido additur, temperatum inde compositum existit? Resp. negando; potest enim interdum contingere, ut, secundum partem regulæ nostræ priorem, quies in frigido corpore majorem ad resistendum vim habeat, quam motus in calido ad agendum; unde sequitur, calidum à frigido in contrariam partem deflecti, adeoque ut calida simul & frigida intemperies in corpore tali existat, non autem temperata partium mixtura. Flumina in mare labentia dulcedinem sæpe retinent ad longum satis intervallum, quoniam adeo velociter & efficaciter moventur, ut maris motui resistent, aut ei saltem subjici non possint, donec altè satis in illud penetraverint, ubi salsedinem iis mare communicat. Hoc exemplo confirmantur quæ ad secundum ac tertium problema jam sunt responsa.

15. 4. An in omni actione datur *reactio*? Neg. quia non omne impedimentum, quod in corpore aliquo est, reactionis nomine appellandum, cum sufficiat resistantia, quam vocant, formalis, ex thesi octava. 5. Hæc igitur, quæ dicitur, resistantia formalis, est-ne passio potius, quam actio appellanda? Resp. Non est actio; sed actionis potius impedimentum: neque propterea *passio* est; siquidem, quod magis subiectum resistit, eò minus patitur. Pati enim est recipere. Atque durum parietis alicujus corpus quanto vehementius motui pilæ resistit, tanto minus recipit motus; imò nihil omnino recipit, si durum satis existit. Dicemus ergo, resistantiam illam formalem esse modum inter actionem passionemque medium, seu, esse actum quendam corporis, quo se opponit agenti, actionem ejus non recipiendo, adeoque nec patiando. 6. Cur homines temperanter viventes naturaliter sunt longævi? Resp. quia motus, qui acquiritur & reparatur per cibum, æqualis est motui amisso. Nam ex th. 11. motus motui æquè veloci non est contrarius. Dicta autem ratione motus instaurati æquales ratione velocitatis evadunt perditis, justæque his proportionem respondent. Contrarium apparet in equis Hispanis, qui bibentes generosiora vina majores acquirunt motus, quam perdiderunt, unde necessum est eorum vitam breviori annorum spatio terminari. Similia cogitare licet de infantibus, quibus vinum à parentibus propinatur.

DISP.

Corpora fluida ac dura respectu motus & quietis quomodo differant.

1. **Q**uamvis cujusque corporis motus ob aliorum corporum occursum mutetur, definiri faciliè posset tribus his politis conditionibus: 1. si *duo* tantum corpora sibi mutuò occurrerent: 2. si ea essent planè *dura*: 3. si à reliquis omnibus sic *divisa*, ut eorum motus à nullis aliis circumjacentibus impedirentur nec juvarentur. At quoniam nulla in rerum universo corpora possunt esse à reliquis omnibus ita *divisa*, nec ulla circa nos esse solent omnino *dura*, ideo vix ac ne vix quidem certâ mensurâ definiri potest, quantum cujusque corporis motus propter aliorum occursum mutetur. Nam respicienda si-mule ea omnia sunt, quæ corpus illud, de quo agitur, circumquaque contingunt, sive tantum exteriorem ejus superficiem ambient, sive etiam poros pervadant. Et ea quidem varios produciunt effectus, prout fluida vel dura fuerint, quorum diversitas in quo consistat, hoc loco est considerandum.

2. Notandum igitur corpora ratione motus & quietis dividi in fluida & stabilia. *Fluida*, ad quorum naturam accedunt *mollia*, sunt exempli gratiâ aër, aqua, vinum, lac omnesque liquores, imò por-tissima mundi pars fluidis constat, cujusmodi sunt cæli, sol & stellæ fixæ, quemadmodum in speciali Physica demonstratur. *Stabilia* seu *dura* sunt ferrum, lapis, lignum, cera & reliqua, quorum ea est con-sistentia, ut faciliùs suis quàm alienis terminis contineantur. De his-ce, fluidis videlicet ac stabilibus, primò quid sensus, deinde quid ra-tio insuper doceat, videbimus: ille τὸ ὄν, hæc τὸ διόν, monstrabit.

3. Sensus de *fluidis* quidem testatur, quod eorum partes facile re-cedant è locis suis, atque ideo manibus nostris pedibusque versus illa se moventibus non resistant, unde *Molle* Latinis dictum videtur voce contracta ex *Mobile*, & Germanicum *weich molle* convenit cum *wei-chen* ἔκχειν cedere. De *stabilibus* autem testatur idem sensus, tactus, in-quam, præcipuè, deinde & visus, quod eorum partes ita sibi invicem cohæreant, ut sejungi non possint, nisi vi aliqua quæ satis sit valida ad istam cohærentiam tollendam, unde Germanis *hart* durum ab *har-ren herere* derivatur, & Latinis *durum* ac *durare* ejusdem sunt originis.

4. Jam si ratione ulteriùs investigabimus, qua de causâ multa cor-pora,

pora, ut aqua, aër &c. sine ulla difficultate loca sua corporibus aliis cedant; alia, ut lapis, terra, non item; facile animadvertemus id ideo contingere, quod illa moveantur, hæc autem quiescant. Nam quæ jam in *motu* versantur, utique non impediunt, ne loca, quæ proprii motus impetu deferunt, ab aliis occupentur: Non enim in mundo corporeo id regnat injustitiæ genus, quod inter homines, qui interdum ea, quæ ipsi deferunt, nolunt aliis concedere, licet id sine detrimento suo facere possent; sed potius illa perdendo & corrumpendo impediunt ne ab aliis occupentur, contra illud effatum Juridicum: *quod nemini nocet & alicui prodest, facile concedendum*. Atqui ea quæ sunt in statu *quietis* non sine vi sufficiente à locis suis expelli possunt, quoniam unaquæque res manet in eo statu in quo est, nec mutatur unquam, nisi à causis externis, ut habet lex Naturæ prima.

5. Ex his jam licet fluidorum & stabilium corporum definitiones contexere. *Fluida* nempe corpora sunt in multas exiguas divisa particulas, quæ particulæ motibus propriis à se mutuò diversis agitantur, sic ut aliæ versus dextram, aliæ versus sinistram, aliæ antrorsum, aliæ retrorsum, aliæ sursum, aliæ deorsum ferantur: quod fieri non potest nisi per circulum. *Stabilia* verò sunt, quorum omnes particulæ juxta se mutuò quiescunt. Fluidorum itaque seu liquidorum corporum natura posita est in motu, non quo ipsa *tota* simul de loco in locum transferuntur, nam sic etiam globus durissimus, dum celeri motu progreditur, liquidis corporibus annumerandus, & glacies pariter ut aqua fluida putanda esset; sed quo *particulæ* eorum inter se moventur, qui motus *varius* esse debet, nam si in unam omnes tenderent regionem, facile cohærent, ac durum corpus efficerent, cujus essentia in mutua partium cohærentia consistit.

6. At sola quiete durorum partes connecti, id multis probabile non videtur, qui alio nescio quo glutino opus esse putant, quo firma satis earum reddatur conjunctio. Quibus ita respondemus: glutinum illud, quod fingunt, vel substantia est, vel modus sive accidens substantiæ. Quicquid enim in rebus naturalibus invenitur, vel ad substantiam earum pertinet, vel est modus seu accidens quoddam separabile. At cum partes durorum corporum ipsæ sint substantiæ, aliam ab ipsis distinctam *substantiam* requiri quæ eas connectat, dici nequit. Nulla quippe ratio excogitari potest, cur eas per aliam potius substantiam, quam per semetipsas conjungi necesse sit. At sine ratione quicquam in Philosophia affirmare atque entia temerè multiplicare non

licet. Neque dici queat, per *modum* aliquem à quiete diversum durum corporum partes adunari. Illud enim, quod individuo nexu eas coherere facit, necessum est ut maxime adversetur motui, per quem separantur ac divelluntur à se invicem. Contrariorum enim in eadem materia effectuum causas naturales esse contrarias ratio docet. At nihil magis adversatur motui, quam quies: sunt enim hi duo omnino contrarii rerum corporearum modi. Si per implexos ramulos, cate-nulas, annulos vel hamulos partium in duro corpore fieri nexum contendas, quæro, quæ causa sit, cur hujusmodi vincula firmiter adeo conjungant corpora? Non aliud poteris respondere, quam quod immediatum contactum & quietem partium apud se invicem promoveant. Atque ita redibis ad nostrum principium, à causa illa remota ad nostram proximam.

7. Quantum ad fluida corpora attinet, earum tenues minutias pro majore minoreve celeritate motus possumus in *volantes* & *repentes* distinguere, petita minorum atque insensilium illarum appellatione à rebus, quæ magnæ sunt & sensibiles. Fumi, vaporum, flammæ, aquæ ebullientis particulas ob celerem agitationem quasi *volantes* possumus animo concipere: tantus quippe illarum est motus, ut ipsis obvius sit sensibus. At olei, aquæ frigidæ, vini, lactis similiumque crassorum liquorum minutias quasi *repentes* nobis repræsentamus, quod lentius inter se discurrant. At roget aliquis, quomodo in his posterioribus continuus ille, quamvis lentior, discursus & remotio aliarum ab aliis perpetua probetur; cum vulgus ad motum istum vix soleat animum advertere, quoniam ob minutiarum, quæ sic moventur, exiguitatem sensibus non est manifestus. Ita qui *flagnum* (ein stillstehend wasser) à stando nuncuparunt, *flumen* autem seu fluvium (ein stießend wasser oder fluß) à fluendo, in illo quidem *oto* quietem, in hoc toto motum in unam partem seu progressum præ oculis habuerunt; sed in neutro *minutiarum* in partes varias motum considerant.

8. Respondeo, motum hunc varium in aquæ, vini, lactis similiumque liquorum particulis à posteriori ex effectibus satis demonstrari. Etenim si omnes horum liquorum partes mutua quiete sibi adhererent, uti ceræ frigidæ, crysalli, glaciæ aliorumque *duorum* corporum partes, inter aquam frigidam & glaciem nulla foret differentia: nec ulla posset causa assignari, cur glaciæ tactui resisteret, aqua vero duris ex quacunque parte venientibus corporibus cederet.

Et

Et quod moveantur horum liquorum partes ex eo quoque manifestum, quod facile abeunt in auras ac dissipantur, quemadmodum paludes & alia loca humida exsiccari videmus. Idem ex eo confirmatur, quod liquores illi, ut aqua & vinum, in unum vas infusi sibi invicem permiscuntur, non more siccorum corporum (uti grana tritici & hordei, nummiaurei & argentei) quæ discreta manent, sed ita ut inter se confundantur. Propriè namque hæc dicitur *confusio*, quia liquidorum est, quæ simul funduntur, quam Jurisconsulti signatè loquentes à siccorum *commixtione* distinguunt. Denique motus ille in liquorum partibus inde comprobatur, quod in crassorum corporum partes se insinuant, sicque illa sæpe corrumpunt, ut patet in carnibus aëri æstivo expositis vel dulci aquæ immerfis; sæpe dilatant & extendunt, ut pluvio cælo deprehenditur in valvis ligneis, & liquet in pane bis cocto, qui lacti vel vino est intritus; sæpe in tenues particulas resolvunt, ut patet in terræ gleba & aliis corporibus, quæ in aceto vel aqua frigida, ne dicam de calida, dissolvuntur. Quod in poros ingrediuntur liquorum illæ partes, probat in iis esse motum: quod in poros quocunque modo sitos irrepunt, probat motum iis inesse & lentum & varium.

9. Cùm itaque varii & singularum partium proprii sint isti motus in fluidis, sive volent sive repant particulæ, sequitur tot earum ferri in unam regionem, quot in aliam, hoc est, tot sursum, quot deorsum, tot dextrorsum, &c. vide th. 5. Quid igitur fiet de corpore duro, quod undique fluido cingitur? Resp. Necessum utique est, ut corpus illud durum contrarios istos fluidi particularum insultus omnes excipiat; cumque non major causa sit, cur his potiùs earum impulsibus quàm illis cedat, quamdiu ipsi sunt æquales & totum simul loco suo non movetur, necessum est, ut inter omnes istos impulsus tanquam in æquilibrio consistat, neque magis versus hanc partem, quàm versus illam propendeat. Hac ratione terræ nostræ fluidissimo cælo undique cinctæ quietem sive immobilitatem animo concipimus. At quemadmodum pars altera bilancis à vi externa etiam minima facile attollitur vel deprimitur: ita contingere potest, ut corpus durum omni ex parte à fluido circumdatum atque in eo quiescens à vi externa vel minima ad motum incitetur: quo intuitu Archimedes dixit, Des punctum extra terram immobile, hanc loco dimovebo.

10. Neque enim requiritur ut vis illa externa omnem, qui in duro isto corpore reperitur, motum largiatur; at sufficit ut suo ad alteram

partem accessu tollat æquilibrium, efficiendo ut vis illa fluidi quæ ferebatur ex. gr. sursum, & à vi opposita æquali deorsum repellatur, vincat. Sic ergo fluidum promovet corporum ei innatantium motus, dummodo non magis in hanc quàm in illam regionem feratur, nec ullas in se habeat particulas, quæ non celerius aut æquè saltem celeriter moveantur, quàm corpus durum ab externa vi impulsus fuit.

11. At si fluidum ipsum totum simul versus aliquam regionem fluminis instar tendat, ex. gr. deorsum, non juvabit, sed potius impediet motum corporis duri, quod sursum propellitur; aut, si quædam fluidi partes tardius moveantur, non sufficit minima quæque vis ad corpus in eo natans impellendum, sed tanta requiritur, quæ resistentiam illam tardioris motus superet.

DISP. XXIV.

De Corporum naturalium figura, præsertim spherica.

1. **I**Nter omnes corporum affectiones *Motus* localis facile primas tenet, de quo proinde multis agendum fuit disputationibus. Secundus tenet *Figura*, quæ tamen non activum, uti *Motus*, sed dispositivum, ut Scholasticorum verbis utar, rerum naturalium principium est. De Figuris igitur hac dissertatione agemus, & præsertim de spherica, quippe quæ omnium præcipua judicatur.

2. *Figura* in re corporea non est ipsa ejus extremitas, sed *extremitatis certa dispositio*, seu modus, quo corporis alicujus magnitudo terminatur. Comitatur ergo figura magnitudinem duntaxat finitam ac terminatam. Ineptè agit qui in corpore indefinito atque interminato figuram quærit. Ubi enim extremitatem non habes, de modo extremitatis frustra laboras. Ita cum limites Mundi nullos attingas, rotundam an quadratam figuram habeat absurdè quæris.

3. Quando verò innumeris modis terminari magnitudo potest, innumeras posse dari corporum figuras manifestum est. Quis enim recenseret omnes modos, quibus extremitates corporum disponi queunt? Simile in Métaphysicis est, quod entis perfectio innumeris modis finiri ac limitari potest, unde creati entis tot genera existunt. At Ens infinitum unicum est, nec aliter atque aliter se habere potest. Sic vita terminatur multis modis. Sed interminabilis vitæ semper una eademque ratio est.

4. *Figuras corpora diversas accipiunt à vario motu, & vicissim pro varietate figurarum, quæ sunt in corporibus mobilibus, eorum quoque motus variant:*

pate-

patebit illud in sequentibus. Simile est in Ethicis, quod actiones crebriores certas dispositiones & habitus in animo producant, qui habitus iterum ad certas actiones producendas animum disponunt.

5. Etiam fluidorum & mollium corporum motus figuram consentientem ac durorum possunt immutare. Sic gutta sæpe cadendo lapidem cavat, & fluviorum perpetuo lapsu duri quantumvis lapilli lævigantur.

6. Quoniam igitur per motum figuras suas corpora nanciscuntur, evidens est, corpus aliquod eò facilius figuram aliam atque aliam posse recipere, quò mobilius, fluidius & mollius est. Sic cera calida & mollis leviore negotio varias induit figuras, quàm frigida & dura. Et liquida corpora promptissimè figuras mutant, quamdiu liquida; concreta & coagulata non item.

7. Itaque mobilissimum seu fluidissimum in mundo corpus omnes poterit figuras induere. Hujusmodi corpus non est aër vel aqua aliudve liquidum aut humidum terrestre corpus; quoniam illorum corporum partes determinatæ magnitudinis ac figuræ sunt, sicuti ex eo patet, quod in pluribus corporibus nec aditum nec exitum inveniunt.

8. Dari autem ejusmodi in Universo materiam subtilissimam ac fluidissimam, quæ omnes omnino formas induere possit, ex eo demonstratur, quod omnes qui usquam reperiuntur anguli, inter corporum partes situm & ordinem perpetuò mutantes, quolibet momento materia quadam omnino replentur: cum vacuum spatium ne tantillum quidem existere unquam in rerum universitate possit.

9. Eadem causa est, cur omnes mundi partes globosæ seu sphericæ esse nequeant. Plures quippe globi simul juncti spatium continuum non opulent, sed intervalla quædam circa se relinquunt, quæ intervalla ab alia materia impleri necessum est. Ad quem effectum, inter minutissimos globulos assidue situm variantes, aptissima est illa, quam diximus, mobilissima totius Universi materia, non autem alia, quæ figuras suas minùs facile variare potest.

10. Sunt tamen pleraque mundi corpora spherica (saltem quæ in sensus incurrunt, partes enim materiæ subtilissimæ seorsum sunt insensiles) aut certè figuram obtinent rotundam ac talem quæ sphericam quodammodo imitatur. Quod maximè interpreteris de corporibus simplicibus, quamvis & in compositis ejus vestigium sæpenumero cernas. Exemplum habes in magnis terræ, stellarum & cælorum corporibus. Habes & in parvis guttarum, ovorum, uvarum, pomorum, pyro-

tum, cerasorum, prunorum, pisorum, raporum, mespilorum, variorum seminum &c. Unde Belgis *rondsæd*, legumen minus. Nec solum in *Macrocosmo*, verum etiam in *Microcosmo* partes plurimas globosas aut rotundas invenis. Considera figuram capitis, oculorum, brachiorum, pedum, digitorum, ventriculi, vesicæ, cordis, ossium &c.

11. Causa rotunditatis ac globositatis in omnibus corporibus non est eadem. Plurima equidem rotunda sunt eo quod varios motus circulares habent. Nam opera tornariorum nos docent, ea corpora tandem sphaerica reddi, quæ diversis modis in gyrum aguntur. Quicquid enim ultra figuram sphaericam eminet, tali rotatione atteritur atque abraditur. Ampullam vitream eo solo rotundari cernimus, quod ær in ejus materiam igne liquefactam, per tubum ferreum immittitur: quandoquidem ær iste non majore vi ab ampullæ orificio in ejus fundum tendit, quàm inde in omnes partes reflectitur & æquè facile illas omnes pellit.

12. Communis tamen rotunditatis in tot mundi corporibus causa hæc solet assignari, quæ petitur ab illius figuræ perfectione. Nemini quippe mirum videri queat, si perfectissimus opifex perfectissimam operibus suis formam dederit, ubi quidem illa non obstabat motibus, ad quos unumquodque destinabat. Quæ ratio sæpe locum invenit in corporibus *compositis*, heterogeneis atque organicis, rariùs in simplicibus & homogeneis.

13. Circuli & Sphæræ præstantiam passim prædicari videas. Ita *circulum absolvere* proverbio dicitur, pro eo quod est, rem omnibus numeris omnibusque partibus perfectam reddere. *Encyclopædia* appellatur à cyclo, id est, circulo, & intelligitur perfectio doctrinæ, ubi conjunctio disciplinarum velut orbem eruditionis efficit. Commendatur ab Horatio Græcorum eloquentia, cum ait, Graiis dedit *ore rotundo* Musa loqui, id est, ore perfecto. Ipsam sphaeram præclarus quidam Etymologus derivat à *ῥω* pulchritudo. Belgis *ronden dag*, *rond jaer* sunt perfectionis & plenitudinis vocabula. *Rotundo* per translationem est perficio.

14. Perfectio autem & pulchritudo sphaericæ figuræ in pluribus omnino capitibus consistit. Nam primò quidem *figura sphaerica est simplicissima & maxime uniformis*; quod unico solum termino, & quidem à medio comprehensi spatii æqualiter distante, contineatur. Hinc descen-

descendit metaphora, quæ planè & sincerè quidpiam elocuturi perhibemur rotunde dicere, etwas rund heraus sagen. Belgis *rond uti sincerus*. Sic Galli, *il est tout rond*, Latini, *vir teres atque rotundus*, schlecht und recht. Facit huc illud axioma: Quò quid simplicius, eò perfectius.

15. Istam rotundæ figuræ simplicitatem ut melius capias, considera lineam rectam, quæ linearum omnium simplicissima est, nunquam posse magis æqualiter & minùs in unoquoque ex punctis suis inflecti, quàm transeundo in circularem. Angulus enim contingentiæ, quo solo linea circularis à recta distat, omni angulo rectilineo minor est, & in nulla linea curva, præterquam in circulari, ubique æqualisprehenditur. Hinc autem sequitur, quod omnes motus, qui impediuntur quò minus recti esse possint, per aliquam causam, quæ eos undiquaque æqualiter detorquet, necessario reddantur circulares. Nam ita in orbem eundo minus à motu recto (quem persequi semper, quantum in ipsis est, ex Lege Naturæ altera conantur) abeunt, quàm si motu suo rectilineos angulos describerent. Sicaquam fluminum in vortices agi videmus, ubi aliquid impedit quo minus tam celeriter motu recto procedat quàm incitatio ejus requirit.

16. Intelligitur etiam hinc, cur gladii nonnulli & similia dura facile flectantur in circumulum; at frangantur, si ad triangularem quadrangularemve figuram aut angulum quemcunque rectilineum ea detorquere coneris. Intelligitur item, cur minus dura, ut virga, charta &c. Voluta in orbem intemerata maneat, sine rupturis & flexuris; non autem si plicata vel ad rectilineos angulos ducta fuerint.

17. Deinde *figura spherica est quodammodo infinita*, quoniam in ejus ambitu seu circumferentia non occurrit finis vel terminus; at semper aliquid ultra licet accipere. Hac ratione nec principium nec medium in sphaera invenitur, ut imperitè agant qui in globosa Telluris superficie medium quærunt, aut suum natale solum in mundi, id est, terræ superficiæ medio locatum esse opinantur. Hæc multis causa est, cur mensas malint rotundas (unde proverbium: *rotundæ, quàm quadratæ mensæ præstat accumbere*), quod de loco supremo vel infimo disputandi materiam non præbeant: cum è contrario quadrata mensa, præsertim oblonga, distinctos accubitus habere videatur.

18. Tum *figura spherica est omnium capacissima*. Habet quippe minimum superficiæ, pro ratione molis sub se contentæ; hoc est, nulla figura datur, quæ sub minore superficie majorem materiæ molem concludat. Hæc altera causa est, cur multi rotundas mensas eligant,

quia

quia nempe plures illæ convivas capere possunt. Ita cùm rotundos Deus animalium oculos fabricârît plures utique radios recipere queunt. Similia de vesica urinaria, cranio aliisque corporis nostri partibus observant Anatomici. Ollæ, capsæ aliaque vasa majoris capacitatis ergo rotundam accipiunt figuram.

19. Præterea *figura spherica est robustissima ad agendum & resistendum*; quod singulæ ejus partes aliis firmentur & sustententur. Hinc rotunda & globosa corpora tam apta sunt ad alia complananda vel conterenda, quod omnis eorum vis versus unam lineam, imò in prorsus sphericis versus unum punctum dirigatur. Considera figuras pistillorum, lapidum molarium, cylindrorum similiumque instrumentorum.

20. Porro *corpora spherica* inter omnia, quæ quidem certas ac definitas figuras obtinent (excipitur enim materia illa quibuscumque modis figurabilis, de qua supra) *ad motum sunt aptissima*, quoniam angulis carentia nullo obstaculo sufflaminantur. Inde proverbium, *sphæra per precipitium*, nempe volvitur, pro eo, quod est currentem incitare. Ob hanc motus facilitatem pilæ, globi & globuli varii, quibus in diversis ludorum generibus utuntur, figuram talem acceperunt. Et pilulas Pharmacopolarum globosas faciunt, ut eò facilius deglutiri possint. Et nodulis seu globulis utimur in vestibulis necandis & solvendis, ut promtius indui atque exui queant.

21. Hanc etiam mobilitatem rotunda corpora, licet non globosa, participant, uti rota, unde *rotunda* figuræ nomen, turbo, trochus, qui à *τρέχω* curro &c. Et Germanis *rad* substantivum rotam, sed adjectivum, *gerad*, inter alia rapidum & agile quid significat, ut Gr. *ῥαδίον* facile. Hinc rota fortunæ assignatur, *glückes rad*, quia passibus ambiguis fortuna volubilis errat, & manet in nullo certa tenaxque loco. Sic ille apud Plautum, Pro rota, inquit, uti me licet; hoc est, sum versutus & versatilis instar rotæ. Etiam phalangæ & vasa rotunda sunt, ut facilius per terram rotari possint.

22. Denique *globosa corpora* non tantum facilem habent motum, sed etiam *pluribus modis admirabilem*: ex. gr. globus vel rota uno eodemque motu movetur duobus motibus contrariis, sursum ac deorsum, si circumferentiam spectes; movetur item rota dum progreditur & linea curva circa axem & linea recta secundum longitudinem viæ. Imò corpus figura spherica præditum, dum circulariter convertitur, id est,

est, dum super uno puncto in gyrum agitur, immobiliter quodammodo & quiescendo movetur, in eodem semper loco consistens: quod & pyramidi evenit circuli ratione &c.

23. Hactenus ea fusius tractavimus quæ ad *Physicam generalem* spectant, cujusmodi sunt illa de natura Corporis & Materiæ, de spatio, de Formis corporum, & præsertim de Motu & Quiete, tandemque de Figura. Nunc veniendum est ad *Physicam specialem*, cujus quidem præcipua fundamenta secuturis Disputationibus plenius interpretabimur. Reliqua enim in Physica contracta & corporum viventium Theoria specialius attinguntur. Et primò quidem Mundus hic visibilis in partes integrantes nobis dividendus est.

D I S P. XXV.

Mundus aspectabilis dividitur in corpora lumen emittentia, transmittentia & remittentia.

1. **S**I in particularis & exiguæ alicujus rei divisione recte dividendi leges minimè negligendæ sunt, multò magis eæ observandæ erunt, ubi totum hoc Universum in primarias partes distribuendum. Nos igitur *Mundi hujus aspectabilia corpora in certa ac præcipua genera divisuri* solidum divisionis fundamentum assignare, membra dividendia ritè inter se opponere, nec alia quam rei dividendæ congrua & adæquata proferre studebimus.

2. His Logicæ artis præceptis probè consideratis & Universo corporeo animi pariter & corporis oculis perlustrato, corpora mundum aspectabilem constituentia in tria summa genera dispecimus. Alia enim *lumen ex se emittunt*, uti Sol: alia *lumen transmittunt*, uti Cælum; alia *lumen remittunt*, sicuti Terra. Quæ lumen emittunt, vocantur corpora *Lucida*; quæ transmittunt, *Luminosa*, pellucida, perspicua, diaphana; quæ remittunt, *Opaca*, umbrosa.

3. Divisio hæc petitur à præcipua materiæ mundanæ proprietate, diversitatis ac formarum omnium corporearum prima origine, id est, *Motu*: quod indicat *mittendi* verbum ter repetitum. Lumen enim sine motu aliquo neque exit, neque transit, neque redit.

4. Et quidem à tali motu petitur ista divisio, quo *Visus*, omnium sensuum nobilissimi latissimeque patentis organum, oculus, afficitur: quod rei, de qua agitur, apprime congruit. Dividimus enim in partes integrantes *Mundum aspectabilem*. Nec possemus ab ulla ad alium

D d

quem-

quemcunque sensum habitudine rerum corporearum distributionem arcessere, nisi mundi regionem longè amplissimam vellemus omittere.

5. At cùm inter objecta visus etiam sint magnitudines, figuræ & plura alia communia, quæ dicuntur sensibilia, divisio proposita mundi visibilis desumitur à *visu objecto proprio*. Cumque objecta visus propria sint lux & color, color verò in rebus non, uti lux, propria virtute radiet, sed ope tantum luminis appareat, nec maximis Universi corporibus distinguendis ita inserviat, distributio nostra non solum proprium, verum etiam *potissimum* visus objectum Lumen pro fundamento habet. Equidem lux est omnium præstantissima pulcherrimaque Universi, quod videmus, qualitas, & præcipuus Mundi ornatu, qua tanquam aureæ cujusdam vestis splendore supera inferaque omnia nitent ac decorantur. Et ipse Cæli Terræque Creator maximus à Rege psalte extollitur Ps. 104. 2. ut, *amicus lumine sicut vestimento*.

6. Præterea membra divisionis propositæ convenienter sunt inter se opposita, præsertim si Lucida, Pellucida & Opaca corpora intelligantur in vigore & perfectione sua, quemadmodum in oppositione rerum fieri decet. Nam quod propria luce fulget, alieno lumine pellucidum esse nequit, & quod radiis transitum non permittit, sed eos reverberat, uti facit opacum corpus, id neque lucidum, neque pellucidum esse potest. *Principium* lucis & terminus, à quo egreditur, est Lucidum; *Medium* & via lucis, qua progreditur, est Pellucidum; *Finis* ac terminus ad quem venit & unde quasi regreditur, est Opacum. Quæ si paulo diligentius attendas, ordinis illius & oppositionis elegantiam admiraberis.

7. Denique membra distributionis illius absoluta & positiva sunt omnia, non respectiva & negativa tantum; nihilque in toto rerum Universo cernitur, quin ad unum ex tribus illis generibus referre liceat. Adeo divisio & menti satisfacit & sensui, quæ duo raro conjungi solent. Nec deest illi quicquam, dummodo natura lucis, quam pro fundamento habet, non maneat intellectui nostro abscondita. Eam vero suo loco à nobis detectam videbis.

8. Jam si ex adverso illas Mundi divisiones, quas alii scriptores afferunt, cum nostra lubeat conferre, magis etiam hujus bonitas elucebit. Mundum alii in *partes continentes & continentas* dispescunt. Continentes illis sunt, quæ cæteris corporibus præbent naturalia domicilia,

lia, veluti cœlum & elementa, aër, aqua, terra. Contentæ sunt, quæ in continentibus, ut propriis domiciliis habitant, veluti stellæ in cœlo, meteora in aëre, pisces in aqua, metalla in terra, &c. Hæc divisio sumpta est 1. non à proprio & physico fundamento, sed à communi & Logica continentis & contenti relatione: 2. à loco tantum & situ, qui non est prima ac præcipua corporum proprietas, sed eam solummodo consequitur: 3. membra non habet accuratè sibi opposita, quia coincidunt. Terra quippè & aqua sunt æque partes contentæ respectu cœli, ac luna vel aliæ stellæ. Vicissim luna fortè æque continet alia diversa corpora, ac ipsa terra.

9. Alii dividunt mundi corpora in ætherea & sublunaria, seu *cœlestia & subcœlestia*, quorum illa quidem generationis & corruptionis omnis expertia, hæc autem ejusmodi mutationibus obnoxia esse arbitrantur. Causa de cœlestibus ita sentiendi ethnicis quidem fuit persuasio de cœli divinitate. Alii pro argumento afferunt primo quidem sensuum experientiam, qua videtur ostendi, *nullam tot seculis in siderum vel magnitudine, vel numero, vel claritate factam esse differentiam*. Sed ea dicentes parum cogitant, se judicium ferre de corpore tam remoto à sensibus nostris, ubi innumeræ mutationes esse possunt, ad quas oculorum nostrorum acies non pertingit. Nam prope simile est, ac si è cœlis contemplaremur terram, cujus eadem semper magnitudo ac forma nobis videretur, utcunque corruptioni sint obnoxia singula. Adhæc falsum est quod de claritate, magnitudine & numero dicunt. Nam historici quidam referunt, solem aliquando per plures dies, aliquando etiam per integrum annum, solito pallidiorem, Lunæ instar, sine radiis lucem tristem præbuisse. Notarique potest multas stellas nunc minores majoresve apparere, quam olim ab Astronomis descriptæ sunt. Et Pleiades olim numeratæ sunt septem, quæ jam sex tantum conspiciuntur. Quarum rerum omnium rationes reddi possunt, postquam tubus opticus corpora quædam opaca, quæ dicuntur *Solis maculæ*, nobis detexit. Quæ maculæ cum non diu in superficie Solis durent, & quotidie generentur novæ, certum indicium præbent, non minus generationi & corruptioni obnoxiam esse cœlestem quàm sublunarem materiam. Et quoniam ipse visus telescopio adjutus illud observat, cœli incorruptibilitatem defendentes frustra hic ad sensuum testimonium provocant.

10. Eandem sententiam alii tueri conantur argumentis à fine petitis; *incorruptibilia*, inquit, oportebat esse *cœlestia corpora*, ut & tempora

perpetuo suo motu accurate distinguere, & in hisce inferioribus ordinatam ac perpetuam generationum corruptionumque vicissitudinem efficere possent: cum è contrario, si communi cum subcælestibus corporibus ortus atque interitus lege tenerentur, immensam quandam in his inferioribus confusionem perturbationemque consequi necesse esset. Tandem addunt quod Univerſi perfectio ſublatis perpetuis atque incorruptibilibus corporibus conſtare prorsus nequeat. Resp. 1. Argumenta quæ ducuntur à fine & perfectione, quam homo fingit in mundo requiri, parvi in rebus phyſicis momenti ſunt. 2. Si fixa aliqua ſtella maculis obrecta in Cometam vertatur, non ideo, ab incommodis, quæ obijciuntur, terricolis metuendum: metuendum, ſi modo quodam ſimili totus Sol obnebreſcitur, quod nondum factum. 3. Generationes & corruptiones illæ *partiales*, quas circa Solem eſſe maculæ docent, hæcenus è cælo Solem non ſuſtulere, quemadmodum neque Terram deſtruxere, quæ ab orbe condito in ea & circa eam contingere, mutationes. Adeo ut cernere nequeam, cur ortus atque interitus lex non æque pertineat ad ea, quæ in cæleſtium corporum, quàm quæ in terræ ſuperficie verſantur.

11. Alii dividentes mundi corpora in *ſimplicia*, id eſt cælum & elementa vulgo nota, & *mixta* ſeu compoſita ex elementis, 1. ponunt cælum, aërem, terram non eſſe è variis rebus ac veris mundi elementis compoſita: quod aliter ſe habere Phyſica ſpecialis oſtendit. 2. perinde faciunt ac ſi diſtribuerent Univerſum in punctum & omnia. Vide Log. I. 109. Quod idem agunt, qui mundum in corpora ætherea & ſublunaria partiuntur. Terra enim hæc tota cum omnibus quæ circa eam ſunt, ad cælum relata exigui tantum puncti rationem habet. Sed hæc poſtrema corporum in ætherea & ſublunaria diſiſio, præterquam quod coïncidit cum illa th. 9. atque à ſitu & loco tantum petita, etiam hoc vitio laborat, quod membra dividentia non ſatis oppoſita. Sublunaris enim Terra Lunæ & Planetis ſimilis eſt.

12. Retineamus igitur mundi viſibilis partitionem in tria ratione luminis diſtincta rerum genera, initio poſitam, & quæ ad genus unumquodque pertineant corpora, porro diſpiciamus. Et primo quidem in eo videntur cuncti homines conſentire, *Solem eſſe corpus lucidum*, hoc eſt, lucem, qua oculos noſtros perſtringit, in ſe habens. Non enim tantam ab omnibus fixis ſimul acceptis mutuari poteſt, cum ipſæ tantam ad nos haut mittant, quamvis non
tanto

tanto sint intervallo à nobis remotæ, quanto sunt à Sole. Nec aliud ullum corpus magis apparêt radiosum, à quo lucem Sol accipiat. Si quod autem esset, sine dubio appareret. Ubi enim objectum sat magnum & efficax est ad movendum sensum, & organum sensus bene dispositum, hoc ab illo moveri necesse est. Ut hic omnino valeat testimonium sensus negativum.

DISP. XXVI.

*Stellas fixas sua ipsarum luce fulgere, ipsasque
& Solem flammæ esse.*

1. **S** Tellas quoque fixas, haut secus ac Solem propria luce fulgere arbitramur: quia 1. licet intervallum infinitis quasi modis amplius inter ipsas & terram, quàm inter terram & planetas intercedat, radios tamen magis vividos, quàm ullus planetarum, vibrant; 2. cum longissimè à Sole distent, non videtur fieri posse, ut radii à Sole ad ipsas venientes, tam immensâ spatia bis transeundo, inde ad nos, & quidem adeo fortes, redeant. Nempe in longissimo illo & repetito itinere si non omnino evanescere, at certe magis, quàm nunc observatur, languescere istas radiorum vires necesse foret. Neque enim tantam vim esse luminis à corpore opaco redeuntis, quanta est à lucis fonte primum exeuntis, patet exemplo luminis solaris à Luna reflexi, quo nox sublustis quidem, at nunquam instar diei illustris redditur. Hoc tamen argumentum non magnopere urgemus, quia *non tam restringere Solis efficaciam, quam Fixarum virtutes extendere cupimus.* Satis est quod tantæ distantix consideratio facit ut existimemus, si tam vicini essemus stellæ alicui fixæ, quàm Soli sumus, ipsam Sole nec minorem nec minus lucidam apparituram esse.

2. Nam 3. attendentes ad infinitam Dei potentiam & bonitatem, quam cælestia corpora vel maximè nobis enarrant, non est cur putemus, nos opera Dei nimis ampla & pulchra & absoluta imaginari: cùm potius è contrario in eo à teneris omnes peccare soleamus, quod limites Dei operibus nobis non certò cognitos assignamus. Propter quod ipsum animi nostri vitium verendum prosectò nobis est, ne non satis magnificè de Creatoris potentia sentire videamur, nisi matura ætate physicarum rerum studiosi errorem corrigamus. Hoc igitur intuitu præstat tot propria luce fulgentia in cælo corpora statueret, quos stellæ

fixas conspicimus, quàm omnia opaca & alieno tantum lumine splendentia existimare: præsertim 4. si ex ista hypothese cuncta phænomena cælestia (nempe Solis & Fixarum lux, figura, situs, novarum inter fixas stellarum, Cometarum item productio &c.) sic explicari possint, ut & cum naturæ legibus & inter se apprime consentiant.

3. At cum apud nos corpus nullum lucidum simul & calidum esse experiamur, quin flamma sit & ignis, examinatu digna hic nascitur quæstio, *num Solem & per consequens fixas stellas etiam pro flammis & ignibus habere liceat.* Resp. 1. id quidem de Sole visus ac tactus indicant. 2. Ratio idem confirmat. Nam intelligere non possumus, quo pacto corpus aliquod nativum lumen habere, ejusque interventu calorem producere queat, nisi igneum fuerit. Equidem inter lumen & inde ortum calorem tam necessaria cum Igne videtur esse connexio, quàm est inter intellectum & quæ eum comitatur voluntatem, cum Animo. Et 3. cum propinquiora corpora, quæ lucida simul & calida esse sentimus, cuncta ignea deprehendamus, ac de similibus simile judicandum sit, nulla ratio datur, cur Solem ex Ignium numero eximamus, aut aliter de ipso quàm de ingente flamma philosophemur: præsertim 4. quia Solis divinitatem atque incorruptibilitatem cum ethnicis eorumque sequacibus non admittimus, uti patet è disp. proximè antecedente.

4. Sed, inquiunt, si eadem est natura Solis quæ Ignis apud nos, requireret etiam pabulum quo alatur, eoque deficiente Sol extingueretur. Nam qui affirmat antecedens illud, is etiam hoc necessario consequens affirmare tenetur. Unde autem sufficiens pabuli copia ad tantum ignem conservandum? Utique enim quo major ignis, eò copiosius alimentum requiritur. Resp. 1. si homines in terris arte possint ignes facere perpetuos, ex igne pabulum, ex pabulo ignem continuantes: annon idem longè magis Deus in cælis possit? Neque enim ambigere licet quin Naturæ opera perfectione multum superent arte facta. 2. Cum nocturno tempore sæpe videamus ignes in remotis hujusce terræ locis accensos, ligna iis admota non videamus: quid mirum si ad Solem, qui tanto à nobis distat intervallo, pabulum, si quod accedat, nullum oculorum sensu animadvertere possimus?

§. Verum ulterius investigandum hoc loco est, an & quare flamma omnis pabulo indigeat. Quippe cum naturæ lex prima sit, *unumquodque manere in eo statu, in quo est, donec ab aliqua causa externa inde derube-*

itur,

itur, consequi videtur, flammam semel existentem, etiam *absque* alimento, perseverare debere, dummodo ab externa causa non destruat^r, haud aliter ac alia quævis corpora in statu suo perdurant. Sed observandum est, legem illam aliter in duris, aliter in fluidis corporibus intelligi. *Durorum* in eodem statu permanſio conſiſtit 1. in quieſcendo & hærendo, 2. in non cedendo, ſed reſiſtendo aliorum corporum motibus. *Fluida* vero in ſtatu ſuo permanent, dum 1. variis agitari motibus, & 2. facile aliis corporibus cedere pergunt. Utrumque in flammam vel maximè quadrat, quoniam materia quam maximè fluida & mobili conſtat. Ideoque 1. non modò ſemetipſam propter vehementiſſimam partium ſuarum agitationem variè diſſipat ac diſpergit; ſed etiam 2. hic ſupra terram à materia circumjacente, ex gr. ab aëre, diſſipatur atque obruitur, locum aliis corporibus promiſſime cedens. Hoc tamen deſtructionis periculum non ita tangit Solem, ut noſtros igniculos, propter ingentem ſolaris ignis magnitudinem. Cum enim in majori quanto major ſit virtus, tanta copia igneæ materiæ, quanta eſt in Sole coacervata, nunquam ſemetipſam tota diſſipat, nec à cælo ambiente ſic obruitur. Quid? quod *cælum* ambiens, ſi quidem in orbem agitur, à Sole, ut centro, per lineas rectas undiquaque recedere conatur verſus exteriora, ex lege naturæ ſecunda: Unde Sol in cæli medio, ceu tuto loco, relinquitur, nec proinde ſic eget alimento, ut ignes noſtri infinitis partibus minores ac debiliores. Ut illud quod th. 3 dicebat obſectio, majoris ignis majus eſſe pabulum, haudquaquam ſit univerſale.

6. Interim tamen Phyſica docet, *novam ſemper materiam in Solem per polos ingredi, & aliam ex eo per loca à polis remota elabi*, ut nulla hic difficultas ſupereſſe queat. In præſenti ſolummodo examinabimus, quis ſenſus quæſtionis *de flammæ & Solis pabulo*. Sic enim res tota liquidior erit. Neque enim hic ejus ſenſus eſt, quid requiratur, ut eadem numero ignis particulæ eodem loco fixæ quaſi hæreant & morentur. Talis enim permanſio vel conſervatio fluidorum naturæ & maximè ignis, utpote fluidiſſimi corporis proprietati adverſatur. At quæſtio ſolum eſt, quidnam aliis ignis partibus abeuntibus ſubſtitui debeat ut unus idemque ad ſenſum ignis æſtimetur eodemque nomine appelletur, quo prius. Præclare namque Ariſt. de juvent. cap. 5. *Ignis fluminis inſtar perpetuo gignitur & fluit*, quanquam id præ celeritate nos lateat: Cujus effati veritatem qui attendit, facile cernet, non alio modo flammam eandem, quàm flumen idem conſervari, nec alia ratione Solem, quam

quam Oceanum unum & eundem permanere. Quid autem requiritur, ut flumen, ex. gr. Rhenus, semper idem judicetur? Nihil aliud nisi ut nova continuo aqua in locum abeuntis veniat. Sic mare semper idem, dum quantum aquæ per meatus & cavitates terræ ex eo ad fontium generationem egreditur, tantum circiter per fluvios in illud rursus ingreditur. Similis datur materiæ igneæ in quamcunque flammam ingressus atque ex ea egressus. Et generalis hæc est fluidorum natura, ut non aliter conserventur, quàm similis materiæ in locum discedentis substitutione.

7. Jam pone te versari in loco à mari tam remoto, ut illud totum pedale aut bipedale solum tibi videatur, quemadmodum nunc Sol nobis apparet. Ibi certe existens ulla in mare flumina illabi non videbis, utcunque multa & magna illabi certum sit. Multoque minus oculis notare licebit, per quas terræ cavernas & poros aqua iterum ex oceano exeat ad montium radices; unde fontium origo est. Quid igitur mirum, si nos in terra stantes, innumeros igneæ materiæ quasi fluvios, per longissimos cælorum meatus, ad Solem & stellas fixas perpetuò affluere, & vicissim ex iis effluere, id quod ratio docet verum esse, oculis observare nequeamus?

8. Si quis ulterius de hac Solis, *per similis materia influxum*, seu conservatione seu nutritione ac reparatione scrupulum moveat, is consideret, 1. Solem non esse corpus heterogeneum, uti sunt nostra, ac proinde nec heterogeneo indigere alimento; at 2. esse eum corpus homogeneum, atque ita homogeneo commodissimè ac facillimè reparari. Nam quemadmodum conservatio nihil aliud est quàm continuata creatio: ita unumquodque eo rerum genere conservatur, ex quo constat. 3. Alimentum omne quamvis initio sæpè dissimile sit corpori alendo, postea eidem assimilari debere. Ergo ubi jam statim initio simile alimentum adest, adeo ut nulla mutatione sit opus, promptissimè ac celerrimè quod absumtum fuit eo reparabitur. Quod valde convenit naturæ solaris materiæ, quippe quæ in motu semper versatur celerrimo. Et nihil apud nos proclivius factu esse cernimus, quàm ignem igne parare & accendere.

9. Quod si ergo Sol & stellæ fixæ in eo cum flamma conveniunt, quod 1. lumen à seipsis emittunt; 2. luminis interventu calefaciunt; 3. materiæ suæ aliquid semper ejiciunt, & simile recipiunt; cur non & 4. in motu & situ cum flamma convenire judicentur? Neque enim de corporibus ad idem genus pertinentibus idem judicium ferendo

errare

errare possumus. Jam autem nihil hic supra terram videmus esse mobilius flamma, nam & alia corpora, juxta quæ posita est, nisi admodum solida & dura sint, particulatim dissolvit ac secum movet. Quod verò alteri sic dat, id multo magis ipsa habet. Attramen ejus motus sit tantum *secundum partes*, quæ etiam ex seipsis ad motum sunt incitatae, motum intellige fluiditatis ac dissipationis. Nec tota flamma solet unquam ex alio loco in alium migrare, qui motus esset progressivus, nisi ab alio quodam corpore, cui adhæret, deferatur. Quæ ratione licet etiam existimare, *Solem constare quidem ex materia valde fluida & mobili*, quæ omnes cæli circumjacentis partes secum rapiat, ut nostræ flammæ corpora vicina abripiunt; *sed in hoc nihilominus stellis fixis esse similem, quod ex alia cæli regione in aliam nunquam migret.*

10. Atque hinc tandem colliges, cum Sol ratione situs non differat à fixis, quæ eandem inter se distantiam eundemque ordinem perpetuo servant, fixas omnes in unius alicujus sphaeræ circumferentia non versari, ut plurimi opinantur: quoniam Sol, quem fixis jam annumeramus, in eadem ista sphaeræ circumferentia esse nequit, cum longè sit infra eam, utpote propinquior nobis, quam ulla alia fixa. Sicuti ergo Sol vastum quoddam circa se spatium habet, in quo nulla stella fixa continetur: ita singulas fixas ab aliis omnibus valde remotas esse & alias magis quam alias à nobis & à Sole distare necesse est.

11. Ex dictis de situ, distantia & natura ignea Solis & stellarum fixarum etiam liquet, non posse consistere eorum sententiam, qui stellis fixis aliquid propriæ, aliquid item alienæ lucis attribuunt. Hujusmodi enim divisio inter flammæ, tantopere præsertim distantes, locum habere nequit. Manifestum quoque est, errare eos, qui putant *stellas omnes opacas esse* oportere, ut eo magis lucere ac visum melius terminare possint. Quid enim hoc aliud est, quam flammæ invisibiles opinari & corporum genera diversissima, lucem & umbram, confundere? Errat denique qui substantiam Solis esse solidissimam censet, ita ut non immerito Democritus Solem massæ ferri candentis olim compararit. Solidum enim Scriptor ille opponit fluido, ita ut stabili vel duro æquipolleat. Nihil certe ferro simile ignito tantam emittere lucem valeat, quantam emittit purissima flamma, quæ nil nisi ignis est.

DISP. XXVII.

Cælos esse corpora pellucida, & quidem fluida, non dura.

1. **P**ergimus ad alterum genus corporum, quod est eorum, quæ lumen transmittunt & *pellucida* nuncupantur. Hujusmodi corpora maximam longeque amplissimam totius universi adspectabilis regionem occupare, inde liquet, quod omnis innumerabilium Cælorum machina lumen transmittere observatur. Nam si *opaci* vel umbrofi essent Cæli, nec Solem nec stellas ulla cerneremus. Neque *lucidis* mundi visibilis corporibus cæli accendi possunt. Nam si lumen ex semetipsis visibile emitterent, Luna non posset tota obscurari, dum in umbram Terræ incidit seu eclipsin paritur; cujusmodi tamen obscuratio aliquando contingit. Imprimis autem, si Cælum foret lucidum adeoque calidum, uti Sol & Fixæ, unam cum ipsis flammam componeret: quoniam similia corpora in similes motus consentiunt. At nunc Cælorum expansum à stellis lucidis diversum est. Nec, si lucentes luce propria Cæli, alieno siderum lumine pellucerent. Et quæ stellæ tunc apparere nobis ullæ possent? Denique, cum Cæli tot ac tanti Terram, Planetas & Cometas proximè ambiant atque attingant, quomodo non incenderent ac destruerent ista cuncta, si quidem eadem, quæ stellæ lucidæ, materiâ igneâ, celerrimè vehementissimeque semper agitata & agitante, constarent? Cæli igitur pellucidi sunt.

2. At cum *pellucidum corpus duplex* inveniatur, aliud *fluidum*, ut aër, aqua; aliud *durum*, ut crystallus, glacies, vitrum; quaestio est, ad utrum genus corporum pertineant Cæli. Er olim quidem recepta multis fuit opinio, *Cælum esse instar adamantis aut crystalli durum*. Sed contrarium jam omnes docuit motus Planetarum, qui in cælo modò ascendunt, modò descendunt, modò propinquiore Soli, modò ab eo remotiores. Eandem sententiam falsitatis convincunt Cometarum motus, quos supra Planetarum sphaeras vagari, hodie inter doctos in confesso est. Nec orbes ejusmodi coelestes dari, qui *pellucularum capæ* instar sese ambiant, & quorum duriores partes sint stellæ, ut nodi vel clavi sunt in rota vel tabula lignea, ex iis, quæ de natura stellarum ignea diximus, apertum est. Alia argumenta apud alios legere est, quibus adde novum quod sequitur.

3. Nempe *corpora, quæ dura simul & eximie pellucida apud nos esse de-*
pre-

prehendimus, fuerunt initio fluida. Considera exempla glaciæ, vitri aliæque id genus. Quod si ergo Cælum pellucidum, nunc durum est, fuit aliquando fluidum: cum ratio nulla detur, cur aliter de eo quàm de similibus apud nos existentibus corporibus, hac quidem in parte philosophemur. Atqui si fluidum in principio fuit Cælum, etiamnum tale erit. Nam ut induraretur & concreceret, ignea Solis ac stellarum substantia non permisit. Imò si vel semel concrevisset, à flammis illis cælestibus iterum funderetur & in tenues dissolveretur particulas. Nec posset Cælum undiquaque lumen transmittere, se toto pellucidum ipsumque luminis subiectum esse, ut revera est, nisi corporis valde fluidi ac liquidi naturam haberet. Crystallus enim, Vitrum ac similia ratione pororum tantum pellucida esse postea demonstrabitur. Nimirum, ut in genere corporum lucidorum prima nobis & potissima sunt cælestia sidera: ita in pellucidorum genere ipsis cælis merito primas tribuimus. Nec ulla tam diaphana in mundo corpora reperiri judicamus.

4. Igitur, quemadmodum Solem & fixas stellas nostris ignibus & flammis assimilamus, nisi quod multo puriores sint & majores: ita rationi consentaneum est, ut *Calum potius Aëri nostro quam adamanti & Crystallo simile* putemus, licet multo purius & infinitis partibus amplius existat. Et hoc tam probabile videbitur cunctis, quæ anticipatis opinionibus imbuta non sunt, ingeniis, ut ulteriore demonstratione superfedere liceat. Nec dissentiant qui Cælum aquis originem debere judicant. Equidem terrestria cælestibus comparanda non esse novimus, quoties de eorum agitur magnitudine, cum differant ut punctum & omnia. Sed nulla prorsus obstat ratio, cur in aliis proprietatibus inter ea comparatio institui nequeat.

5. Inveniuntur verò non pauci, qui Cælum haudquaquam durum, sed instar tenuissimæ auræ subtile corpus esse nobiscum statuentes, de suo addunt 1. non tamen esse fluidum seu liquidum, quoniam instar aëris non diffluit, nec terminos ac figuram à continente accipit; sed propriis terminis, non siccitate, sed naturæ ingenitæ virtute continetur: 2. propter tantam substantiæ tenuitatem ac subtilitatem Cælum proximè ad spirituales substantiam accedere, unde & *spiritus ac spirituale corpus* nonnullis dicitur. Sed quia nostrum non est vel temere entia multiplicare, vel diversissima rerum genera confundere, neutram additionem probare possumus. Et quantum ad priorem attinet, nos omnia, quæ dura ac stabilia non sunt, fluidorum genere

comprehendentes, neque tertii generis corpus, seu medium per negationem utriusque extremi ullum admittentes, quæcunque Physica generalis tanquam fluidis omnibus communia proposuit, Cælis etiam attribuimus. Nempe partes habent exiguas in vario motu constitutas, atque ideo non resistunt aliorum corporum motibus; cumque ipso- rum morus in unam aliquam partem determinatus est, ex.gr. in orbem, necessario secum deferunt omnia corpora in se contenta, quantumvis dura ac solida, dummodo à nulla causa externa hæc retineantur.

6. Ideoque minimè placet eorum opinio, qui putant Cælum quidem motibus aliorum corporum non resistere, attamen præterea nullam habere vim ad ipsa secum deferenda. At, inquis, Cælum contulimus cum aëre, aër verò corpora solida deferre secum non solet, cum omnia vi gravitatis deorsum ad terram ferantur. Resp. Hoc ipso tamen exemplo docemur, Cælum, dum circumquaque terram ambit atque omnia terrestria æquè apud antipodes ac apud nos, & ubique versus centrum ejus compellit, Terram sustinere, ne cadat. Unde sequitur, siquidem hoc Cælum, quod terram ita cingit moveatur, non posse non Terram ab eo deferri atque immotam ejus motibus obsequi. Sic navis nullis ventis aut remis impulsâ nullisque anchoris alligata (quæ terræ nullis columnis suffultæ nullisque funibus appensæ, sed fluidissimo solum cælo undiquaque cinctæ similis) in medio mari quiescit, etsi forte aquæ ingens moles occulto & insensili cursu delabens ipsam secum ferat. Denique ad propositam objectionem respondeo, minimè bonam esse consequentiam hanc, si Cælum partes terræ à suo toto sejunctas ac separatas non desert, ergo nec desert secum integram terram omnesque partes ei conjunctas & ad eam detrusas. Quam verò actionem *Calum*, quo nomine in præsentia & *Aërem* complector (utpote cujus partem cælestis materia potiore facit), ista ratione in terram exercet, eandem in Cometarum & Planetarum corpora exercere valet.

7. Sed maximè quoque improbamus eorum sententiam, qui Cælum proximè ad spirituales substantias accedere vel incorporeis rebus cognatissimum esse perhibent. Equidem hujusmodi homines neque corporis neque spiritus clarum ullum vel distinctum animo fovere conceptum, evidens est. Nam affirmare *Cæli naturam incorporeis rebus proximam*, *Calum vix amplius materiale*, sed propemodum immateriale esse, sic enim cogitant & loquuntur, nihil aliud est quàm dicere, Cælum vix amplius longum, latum & profundum esse; sed parum abesse,

esse, quin intellectu & voluntate sit præditum. Quasi corpus fluidum & subtile minus esset corpus, quàm durum & crassum. Quasi mens & corpus subtilitate & crassitie distinguerentur. Quasi corpus cæleste, quod iidem scriptores *Inani* simile aiunt, simul præstantissimis rebus, id est, *Mentibus*, simile foret. Cujusmodi capitales errores alibi refutavimus.

8. At contra eos, qui *Cælum vacuum esse spatium* contendunt, speciatim observa, 1. si spatium velint, *omni corpore vacuum*, idem esse ac si in extenso nullam extensionem, in alto & profundo nullam altitudinem & profunditatem inveniri affirmant; item perinde esse ac si dicerent Solem & stellas à terra atque oculis nostris longissimè quidem latissimeque distare, & tamen aliquid inter stellas & oculos interjacere negarent. 2. Si spatium concipiant materia quidem seu extensione plenum, sed *quod aliorum corporum motus nullo modo juvet nec impediatur*, tale quoque nullum in rerum natura dari, ex iis quæ de natura & proprietate fluidorum ac durorum corporum in Physica generali docuimus & jam ex parte repetivimus, manifestum est. 3. Si *Corporis* nomine visibilem quandam denotare velint materiæ massam, quæ peculiari superficie ab aliis distincta sit, & locum in Cælo occupans lumen ad nos vel emittat, vel remittat, uti faciunt stellæ fixæ, Cometæ & Planetæ [hoc enim voce Corporis, quatenus mundi partem integrantem significat, vulgo intelligunt] tunc quidem fateamur, *Cælum non esse corpus*, hoc est ejusmodi massam lucidam vel opacam Cælum esse negamus, quoniam illud eximè pellucidum statuimus. Nemo tamen inde concludat, inveniri ullum in rerum Universo spatium, quod aut corporea extensione aut motu simul & quiete vacet. Neutrum enim Philosophia naturalis admittit.

9. Eodem namque modo totus etiam *Aër vulgo pro non corpore adeoque vacuo & inani spatio habetur*, quia non est talis massa visibilis, qualis terra vel Sol. Nec tamen eo ipso negatur aut negari debet, aërem *extensum* esse, quod est materialem & corpoream essentiam obtinere; *Motum* vero ejus, dum ventis agitur & calore aut frigore corpora nostra afficit, ipso etiam sensu percipimus. Sed operæ pretium est ut consideremus originem illius cogitationis de Vacuo tertii generis, propter absentiam lucidi vel opaci corporis sic appellato. Nimirum *objectum*, quia ab eo motus initium potissimum attendere & respicere solemus, id solum videre nos atque audire dicimus. *Medium* an & quomodo moveatur, quid quantumque ad sensum

afficiendum conferat, vulgo non consideramus. Hinc illud pro aliquo corpore, hoc pro nullo reputamus. Sic dicimus nos videre lumen Solis aut Lunæ, quatenus inde radii ad nos veniunt; nos audire sonum campanæ, quoniam ab illa inchoatur ille motus, quem sonum appellamus. Sonum verò, id est, tremulum & vibratum motum, in aëre intermedio esse & usque ad aures nostras continuari, plerumque non animadvertimus. At Physicæ studiosus diligenter hoc loco observabit, quemadmodum sonus campanæ nullus exaudiri potest, nisi primum campana, ut *causa efficiens* soni, motum aëris excitet, ac deinde aër, ut *subiectum* illius motus, eundem propaget ad aurem usque: ita quoque stellæ fixæ lumen nullum posse cerni, nisi primum ab ipsa stella motus aliquis oriatur, ac deinde per Cælum ad oculos nostros propagetur. Quod proinde Cælum subiectum illius luminis vel motus esse debet, ut aër subiectum est soni vel motus tremuli.

10. Et sicuti impossibile foret sonum campanæ audiri, si aër interpositus corpus omnino quiescens ac durum esset; ita impossibile, videri lumen stellæ, si interjacens Cælum omni ex parte durum corpus existeret. Imò si corpora dura inter campanam & aurem in aëre interjaceant, in iis poros esse oportet aëre repletos, ut concussio illa sine interruptione continuetur. Similiterque necesse est dari *poros in vitro* aliisque duris ac pellucidis corporibus, cælesti materia plenos, per quos à stella ad oculum, nusquam interrupta actione, lumen propagetur. Quæ omnia confirmantur illo Philosophorum effato: *quandocunque agens circa patiens remotum operatur, necesse est ut idem simul agat in totum medium interjectum*. Solummodo cavendum, ne putemus illud, *transmittere lumen vel sonum*, esse minùs realem actum, quàm emittere vel remittere; aut posse reperiri ejusmodi transmissionis & continuæ propagationis actum in subiecto non vero & reali.

DISP. XXVIII.

Luna corpus esse opacum. Tria Mundi visibilis elementa temerè à Viro docto impugnata.

1. **S**equitur tertium genus corporum, quod lumen non emittit, nec transmittit; sed remittit.
2. Hujusmodi corpus radiis invium Philosophis appellatur *Opacum*, quod Perspicuo seu diaphano, id est, radiis pervio corpori opponunt.

ponunt. Quamvis Latinis scriptoribus Opacum potius opponatur *Aprico*, ut idem sit quod umbrosum. Apricus enim locus dicitur qui Soli expositus.

3. Natura opaci corporis exemplo Terræ nobis magis innotescit, quam Lucidi aut Pellucidi essentia exemplis flammæ & aëris.

4. Præcipuum verò, quod hîc in controversiam venit, illud est, quænam præter Terram in Universo corpora, magna ita sint facta, ut neque radiis transitum concedant, neque ullos producant.

5. Talia autem esse Planetas & Cometas à priori & posteriori Physica nostra Contracta demonstrat. Vide & Logicam Vet. & Nov. part. 1. quæst. 164. 167.

6. Ad *Lunam* imprimis hæc transfertur quæstio; unde de reliquis Planetis simile fit iudicium.

7. Atque eam quidem lucem propriam atque ingenitam nullam habere, inde clarissimè ostenditur, quod interdum tota penitus amittatur, adeo ut ne vestigium quidem ejus appareat, quando tamen proximè circa locum ejus stellæ fixæ quartæ & quintæ magnitudinis cerni possunt, ut suspicio caliginosi nimis aëris locum habere nequeat. Quod Anno 1620 die 17 Junii contigisse Keplerus testatur, epit. Astron. lib. 6.

8. Pallor verò ac rubor Lunæ eclipsin patientis ex aliqua ejus nativa luce haudquaquam provenit; sed aliunde. Quandoquidem rubor iste tantò magis minuitur tantoque Luna nigrior apparet, quantò ipsa humilior ac terræ propinquior est atque ita profundius terræ umbram ingreditur.

9. Lumen item quod in Luna corniculata & quidem in parte à Sole averfa conspicitur, pro nativo ejus Lumine haberi nequit; quoniam non est perpetuum, sed fortissimum circa novilunia, debilissimum in quadris. Quo indicio patet, lumen illud è Solis radiis à terræ superficie Lunam versùs reflexis promanare.

10. Hæc autem cum ab aliis jam pridem demonstrata sint, qui etiam similem Planetarum reliquorum & Cometarum esse naturam docuere; nos potius ad illa progrediemur, quæ Cartesianæ Physicæ propria, neque ab aliis tractata sunt. Fundamenta specialis Physicæ intelligimus, quæ tria sunt mundi visibilis elementa.

11. Atqui de tribus Mundi elementis cum cura, ni fallor, ego Phys. Contr. §. 457. & seqq. adeo ut vix ullo putem opus esse commentario. Quia tamen Cl. H. Vossius in libro de Lucis natura cap. 4. de-

demonstrationes ejusmodi tanquam figmenta deridet, quippe quas minimè intelligit, rogandus est ut Principia Cartesii diligentius legat, cumque iis quæ de eodem argumento scripsi conferat.

12. Ubi observabit triplicis elementi materiam tum à priori, tum à posteriori demonstrari. A priori quidem argumento primo, ex materiæ mundanæ divisione, argumento item tertio, è figurarum theoria petito &c. à posteriori verò argumento secundo, quod Lucida, Pellucida & Opaca reperiantur in mundo corpora, item argumento septimo &c.

13. Omnia verò ista argumenta cùm sint à motu & figuris desumpta, nullam causam Vossius habuit sic de Cartesio scribendi: *cum à paucis postulatis & communibus valde notionibus Philosophiam suam auctus sit, in progressu tamen operis nemo plura adsumsit, & quidem talia, quæ nec ab ipso demonstrata sint, nec demonstrari à quoquam possint, etiamsi vim intellectui inferamus. In eo præcipuè callidus fuit, quod cùm tam plana & perspicua præmittat principia, mox tamen iis relictis alia promat, quæ neque visu neque sensu percipi possunt, &c.* Hæc si defendere scriptor ille velit, ostendendum ipsi est, aliud quicquam à Cartesio esse prolatum, quàm quod ex attenta magnitudinis, figuræ, situs, motus aut quietis in rebus physicis consideratione dependet. Ista enim quinque, cum effatis physicis eodem pertinentibus, sunt illa plana & perspicua, quæ Vossius laudat, principia, ex quibus omnia Philosophorum princeps Cartesius in Philosophia naturali deducit. Quod autem prima rerum naturalium elementa Cartesiana Vossius eo nomine rejicit, quia visu & sensu percipi nequeant, eo ostendit se ejusmodi rerum naturam parum attendisse. Audiat sibi Platonem respondentem in Timæo: *De his adeo parvis ita putandum est, quod, si singula duntaxat singulorum generum capiantur, nullum eorum propter parvitatem cerni à nobis poterit: si multa invicem congregentur, eorum moles magnitudinesque cernuntur.* Quod ipsum qua ratione fiat, Phys. Contr. docui §. 485. 413.

14. Argumenti, pro triplicis elementi materia, primi tale est principium Logicum: *posito sine*, quod Deus mundum, cælum, voluerit creare, *ponuntur media ad finem*, id est motus varius. Vide reliqua in Physica Contr. §. 457. sqq. Actum enim agere non placet. Hoc argumentum tractat Cartesius Princip. III. 48. sqq.

15. Alterum argumentum Phys. Contr. §. 483. sqq. Cartesius attingit Princip. III. 52. sine his verbis: *Cùm Sol & Fixa lumen ex se emittant; Cæli illud transmittant; Terra, Planeta & Cometa remittant: triplicem*

plicem hanc differentiam in aspectum incurrentem, non malè ad tria elementa referemus.

16. Ibidem cum elemento tertio Cartesius partes attribuat *magis crassas & figuras minus ad motum aptas*, quàm sunt elementi primi & secundi, cumque illarum figurarum varia sint genera (ex. gr. ramosæ, angulosæ, oblongæ, Cartes. Principp. III. 33. Phys. Contr. §. 836. sqq. Vossius ignorantiam illius Philosophiæ quam impugnat, satis prodit, dum putat Cartesium, uti secundi elementi particulas *globosas*, ita tertii *striatas* vocare. Legerat fortè inter tertii elementi partes etiam esse striatas coherentes. Inde colligit omnes tales esse. Quod idem est, ac si in genere avium audivisset esse aquilas, atque inde statim concluderet, aves omnes esse aquilas.

17. Vossius citato loco argumentum triplicis elementi, secundum præcipuè, his verbis conatur refutare: *quis non miretur trina hic statui elementa, cùm secundum propriam hypothesin unum tantum agnoscat? Quis unius ejusdemque materiæ diversas formas, diversa unquam vocavit elementa?* Ad quam objectionem, utcunque à nomine tantum petita sit, respondi Phys. Contr. §. 484. Nempe Vir ille putat, hæc duo adversa fronte pugnare, quod Cartesius statuit Principp. II. 22. Unam & eandem rerum omnium esse materiam, & Principp. III. 52. tria dari genera materiæ valde diversa seu tria elementa.

18. Itaque exemplo Grammatico facili & obvio propositum argumentum declarabo. Qui literam sermonis omnis principium esse affirmat, is utique verum dicit. Atque ita Materia extensa naturalium rerum principium Cartesio dicitur. Porro, qui plura sermonis elementa statuit, propterea quod sonus humani oris diversas habeat formas, is minimè sibi contradicit eo quod Literam antea sermonis esse principium dixerit. Nempe soni diversas formas diversa facere orationis elementa nemo unquam dubitavit. Pari ratione materiæ in rebus physicis diversæ sunt formæ, quæ consistunt in varietate magnitudinis, figuræ, situs, motus, quietis. Hæ formæ si tota possunt in mundo corpora distinguere, cur non etiam partes? Si partes majores, cur non & minores ac primas? Hujusmodi minorum & primarum particularum in magnitudine, motibus & figuris distinctio distincta nobis parit corpusculorum genera, quæ Mundi elementa nuncupamus, quia 1. corpora ex iis fiunt ac generantur, & vicissim in ea resolvuntur. 2. totum Mundum componunt. Simili modo è literis & singulæ voces fiunt, & ex iisdem liber integer constat & componitur.

19. Sed videamus annon materiam triplicis elementi ex ipso Vossio confirmare possimus. Solent enim qui quid impugnent nesciunt, sæpius idem illud alibi asserere. Sic igitur Vossius cap. 6 scribit. *Omne itaque corpus aut fluidum est aut solidum.* (a) *Fluida corpora sunt illa quæ non habent consistentem formam:* (b) *Solida vero sunt, quæ eundem partium servant situm, etiam si moveantur.* (c) *Dividamus verò solida in simplicia & composita. Simplicia solida sunt, è quibus composita solida fiunt, & in quæ vice versa dissolvuntur. Iam vero in confesso est apud omnes, talia corpuscula poris carere,* (d) *si enim non careant iis, non erunt simplicia, non erunt solida, denique non erunt corpora. Nam sine illa quidem interstitia, quæ meatus separant, sint solida, ubique erunt meatus, nihil itaque in rerum natura erit corporeum.* Hoc verò cum per absurdum sit existimare, sequitur dari corpuscula physica quæ omnino sint solida. Porro quia hæc coherere (e) sibi invicem non possunt, quin relinquuntur multa spatia inania, jungi ideo & conglutinari liquore intercurrente, omnes, nisi fallor, fatebuntur. *Liquorem vero illum esse continuum & nullis interceptum meatibus* (f) & hoc quoque certum est. Hæc verba sunt Vossii, quæ literis a, b, c, d, e, f, interstixi, ut quæ sequuntur annotata mea benevolus Lector facilius intelligeret.

20. *Solidum.* (a) Eandem divisionem habet Cartesius Princip. II. 53. sqq. Cujus fundamentum est Motus & Quietis distinctio, quæ duo sunt ex quinque nostris rerum corporearum principiis. Vide Phys. Contr. §. 235.

21. *Formam.* (b) Loco definitionis hujus negativæ (cui similis est illa calidi definitio, calidum est quod non habet frigidi formam: ut enim calidum & frigidum, ita fluidum & consistens opponuntur) Cartesius habet affirmativam multis partibus accuratiorem, declarans illa corpora esse fluida, *quæ divisa sunt in multas exiguas particulas motibus à se mutuo diversis agitatae.* Quam definitionem enucleavi Disp. XXIII. 5. & Phys. Contr. §. 247. sqq. Nec Vossio tamen putem hanc esse contrariam, quia Solida definit, *quæ eundem partium servant situm &c.* Unde ex opposito sequitur, Fluidorum partes non eundem servare situm, sed eum mutare, quod est moveri.

22. Verum inhæreamus definitioni Vossianæ. *Fluida*, inquit, *sunt quæ non habent consistentem formam.* Ergo simpliciter & absolute fluida si fuerint, quamlibet induere formam apta nata erunt. Nam si alicubi & aliquando consistent, ita ut aliam figuram recipere, nequeant, fluida esse desinent. Atque hoc est ipsissima primi elementi materia, de qua Disp. XXIV. 7. 8. Phys. Contr. §. 290 sqq. 466. sqq.

23. Mo-

23. *Moveantur.* (c) Ita cartesio stabilia seu consistentia corpora sunt, quorum omnes particulæ juxta se mutuo quiescunt, etiam si tota moveantur. Vide loca prius citata.

24. *Poris carere.* (d) Simplicia solida Vossius docet poris carere. Hoc quadrat in materiam secundi elementi, de qua Cartesius P. III. 123. *Globuli secundi elementi sunt omnium solidissimi qui esse possunt, quia nullos in ipsis meatus alia materia solidiori repletos intelligimus.* Hæc expressissima cum sint Cartesii verba, fallit & fallitur Vossius cap. 4 sic scribens: *Iam verò cum globulos & corpuscula sua (Cartesius) non ut Democritus insecabilia & solidissima faciat, sed verò longè molliora & quæ secari & comminui in minima possint corpuscula, quæ fieri potest ut immensa ista globulorum textura continua rotatione non sint attrita & in pollinem comminuta?* Et paulo post: *Cum enim sectilia & fragilia supponantur hæc corpuscula, disrumpentur potius priores globuli, quàm ut sequentibus eundem imprimant motum.* Egregias adeo consequentias ex falsa hypothese necit Vir ille. Globulorum equidem cælestium stabilitatem soliditatemque ex mente Cartesii confirmavi Phys. Contr. §. 478. Hoc verò nihil impedire, quò minus fluidos cælorum vortices componant, ibidem docui §. 251. sq. 295. sq.

25. Qua ratione Vossius adductus fuerit, ut falsam Cartesio opinionem affingeret, investiganti mihi occurrit Princip. IV. 202. Ubi Philosophus ait, rejectam fuisse Philosophiam Democriti, quia corpuscula sensum fugientia, intellige omnia indivisibilia supponebat, eodemque nomine se quoque illam rejicere testatur: quia nimirum ipse 1. ex insensibilibus particulis certum tantum genus indivisibile statuit, 2. & quidem hac solùm mente, non quod naturâ suâ dividi nequeat, sed quod Deus efficere voluerit, ne ab ulla re creata dividi possit. Princip. II. 20. Primi & tertii elementi particulæ à causis secundis & corporeis dividi possunt ac dividuntur revera. Nec aliud habetur Princip. III. 52. Ubi particulis secundi elementi *certam ac determinatam* adscribit quantitatem, distinguens eas à particulis primi elementi, quarum parvitas *indefinita* est. Natura itaque in illis quidem dividendis sistit, adeo ut formam habeant consistentem; in his autem dividendis modum non habet. Quodque ibidem addit Cartesius nihilominus particulas secundi elementi *in alias multò minores esse dividas*, id ex citato P. II. 20. est explicandum, ne adverteretur verbis coherentibus jam expositis. Nempe manent istæ particulæ naturâ suâ divisibiles, quia manent corporeæ, id est, extensæ. Possunt à Deo dividi, non à Creaturis. Confer Disp. V. 20. sqq. Phys. Contr. §.

407. sqq. 26. *Cohærere.* (c) Corpuscula physica omnino solida negat Vossius cohærere sibi invicem posse, quin relinquantur multa spatia inania; jungi itaque & conglutinari materia intercurrente &c. Simili pacto Cartesius negat globulos secundi elementi posse simul jungi & spatium continuum replere, nisi intercurrente fluidissima primi elementi materia, P. III. 48. sq. Quamvis non ideo materiam utriusque generis conglutinari putet, quamdiu corpus *fluidum* constituit, utpote cujus naturæ adversatur partes habere juxta se mutuo quiescentes. Vide quæ supra th. 21. dicta. Glutinum enim ad corporum particulas conjungendas nullum esse statuit firmitus ipsarum quiete, Principp. II. 55. Disp. XXIII. 6.

27. De eo autem quicquid sit, Vossius corpusculis omnino solidis aut certam ac definitam omnibusque eandem assignat figuram, aut aliis aliam. Sive autem prius sive posterius velit, materiam intercurrentem & spatia replentem quaslibet posse figuras induere statuat necesse est, præsertim si corpuscula illa solidissima judicet moveri, ut supra aiebat, *etiamsi moveantur*. Hujus argumenti vis ostenditur Phys. Contr. §. 292. sq. 468. sq.

28. *Meatibus.* (t) Quod Vossius addit, liquorem illum intercurrentem continuum & nullis meatibus interceptum esse, id quoque materię primi elementi purę convenit, seu magna seu parva ejus copia sit. Sic in potentissima flamma perfecte lucida, nullo modo opaca, non videntur nisi unius generis particulę esse posse. Nam si inessent diversi generis, eę vel tardius vel celerius moverentur. Atqui celerius agitari non possunt, quoniam purissimę flammę particulę celerissime semper volant. Nec tardius in ejusmodi flamma perseverantes moveri possunt, quia, cum dissimilia in eisdem motus non consentiant, consumi, dissipari ac versus exteriora ejici ipsas necesse est. Non possunt igitur in pura flamma meatus vacui vel alienę materię occupati locum invenire. Nam propter celeritatem & vehementiam suarum particularum flammea materia ipsa continuum spatium occupat, tardioresque & segniorem inde expellit. Atque ita primi elementi materia, omnimodis figurari ac dividi apta nata, ad puram ac simplicem flammam congregandam idonea est. Quæ refer ad ea illustranda quæ de Sole diximus Phys. Contr. §. 486. 491.

29. Jam si materiam tertii elementi dicamus constare partibus, quæ sint *composita* solida, quorum poros fluidior materia percurrit, habebimus tertii elementi materiam secundum Philosophiam Cartesii. Vide Phys. Contr. §. 479. sq.

30. De particulis *striatis* cùm hac vice in Physicis non egerim, quia brevitatis studio doctrinam de Magnete (cujus fundamenta inde petuntur) omisi, nolo etiam in præsentì multa de iis verba facere. Aliàs quidem Physices Contractæ articulo 610, quem inspice, sequentia subjecissèm: Atque ita transeuntes per spatia inter globulos triangularia, triangularem in latitudine & profunditate figuram induunt §. 288. Et quantum ad longitudinem, tanquam exiguæ columnæ posunt concipi §. 415. Et quoniam, dum hæ columnæ à polis ad medium Cæli recta tendunt proprio motu, circulem quoque globulorum circa polos motum participant §. 585. necessum est, ut tribus striis in modum cochlearum intortis excaventur. Unde *striata* particulæ dici possunt. Cumque versus medium cæli veniant ex polis contrariis, dum vortex totus cum ipsis in easdem partes convertitur; etiam contrario modo intorquentur, adeo ut regredi non possint per easdem vias, per quas ingressæ. Nempe ut cœlæ alio modo intorquentur dum aperiuntur, alio dum clauduntur. Et funes intorquentur aliter dum componuntur, aliter cùm iterum dissolvuntur. Confer §. 126. Has particulas oblongas & striatas, quamdiu inter globulos &c.

31. Verum enim verò hæc de particulis striatis, quemadmodum & superiora nonnulla hac disputatione in medium prolata, nisi collatâ Physicâ Contractâ, probe intelligi non possunt. Nec ego ab animo meo jam impetrare possum, ut in iis quæ citato cap. 4 à Vossio tam temere jactantur vocibus plenius refellendis ullam diligentiam impendam. Attexam quædam duntaxat ad Elementi triplicis materiam ulteriùs declarandam corollaria.

32. Sicut in genere Mentium datur quæ omnimodè infinita: ita in genere Corporum datur quod omnibus modis finiti potest.

33. Omnes perfectiones interminatas habet Deus: omnes terminationes recipit hæc materia, dum figuras induit quassilibet.

34. Omne maximum in Deo: indefinitæ parvitatì hæc materia. Et tamen quia permeat omnia, multamque & miram habet efficaciam, ab antiquorum nonnullis pro Deo habita, uti Solipsè, qui ex ejusmodi constat materia, ethnicorum Deus fuit.

35. Diversæ & contrariæ naturæ corpora è diversis principiis, elementis vel partibus componuntur. Si in primis & remotis conveniunt, saltem in magis propinquis differunt. Quemadmodum *suber* & *rebus* literis quidem consentiunt, ordine autem literarum & syllabis dissentiunt.

pro lumine habetur. Atqui illi conatui, quo materia Solis & Caelorum à centrīs sui motus orbicularis versus peripheriam recedere nituntur, luminis proprietates insunt. Ergo &c.

10. Major probatur illo canone: de quo affirmatur proprium, de illo ipsa quoque essentia affirmatur. Probatur minor non tantum ex illis tribus primariis Lucis proprietatibus citato Phys. Contr. capite recensitis, verum etiam ex aliis alibi traditis. Ita Ph. Contr. §. 814. seq. exponitur, quomodo lumen calefaciat &c.

11. At conatui illi à motu distinguendo non faver Cl. Vossius, dum cap. XIV. adversus Cartesium sic scribit: *Quod autem facit differentiam inter motum, & propensionem ad motum, & hoc quoque Oedipo opus habes. Natura non habet propensionem ut illuc moveatur, qua ire non potest.*

12. Resp. Si legisset atque intellexisset Princip. part. tert. §. 56. & sequentes, ad ea quæ Cartesio magistro discunt alii, Oedipo opus esse non putasset. Vesica aëre plena cum vi quadam sub aqua diutius detineretur, non desinit sursum tendere, quò tamen ire tali in statu posita non valet. Ramus inflexus sursum redire conatur, nec tamen potest quàm diu valida manus eum detinet. Si nihil est conatus ille, neque à motu distinguitur, cui tamen jungitur, cur lapis in funda rotatus, adhuc detentus in ipsa, nec inde egredi valens, potius à manu recedere, quàm ad ipsam accedere nititur? Sed quid ego hîc talia repeto, quæ luculentissimè alibi demonstrata?

13. Præterea subiectum luminis Cartesius non modò generaliter assignat, Cælum & Solem nominando, sed specialius insuper ac distinctius particulas globosas, ex quibus Cælum componi docet & materiam primi elementi, ex qua Solem, conatus illius subiectum asserit. Vide eum Princip. III. 63. & alibi.

14. Adeo ut Lux Cartesio sit pressio seu conatus ille, quo globuli secundi elementi, nec non materia primi in Sole aut alia fixa stella congregata, recedere nituntur à centrīs sui motus, Princip. III. 55.

15. Nempe ut in moralibus *Contractus* exempli causâ, multi speciale nomen habent dicunturque emtio, venditio &c. Ita in naturalibus Motus & propensio ad motum accipiunt subinde specialia nomina, quatenus in certis subiectis considerantur, vel proprietatem aliquam adjunctam habent. Ita motus 1. aëris, 2. tremulus & vibratus, Sonus appellatur.

16. Jam cum illa Cartesiana Vossianam Lucis definitionem conferamus, quæ legitur capite tertio: *Lux est actus corporis lucentis, per quem nihil visibile est cernimus.*

17. In

17. In qua definitione sequentia lector observet: I. Lux illi Viro definitur vocabulo valde generali & Metaphysico, *Αἶς*; quo nihil certi ac distincti intelligitur. Confer Philosophorum de voce *ἐντελέχεια* disputationes. Cartesius non illud nomen *Αἶς*, sed specialia & Physica vocabula usurpat, cujusmodi sunt illa: *pressio, prima preparatio ad motum* &c. Cum autem Logica doceat in definitione potius genus propinquum quam remotum esse adhibendum, lector vel inde judicet, utra melior Lucis definitio.

18. II. Actum hunc Vossius esse dicit *corporis lucentis*, neque sanè in eo fallitur, cum nemo sit è vulgo, qui non simili prorsus ratione *eruditionem* definire queat perfectionem eruditi, *sonum*, actum corporis sonantis. At quodnam corpus lucens sit, definitio illa, uti par erat, minimè explanat. Capite quidem primo *causam & subjectum lucis ignem* esse dixerat, unde ego quidem facilè vocabulo *corporis lucentis* illum ignem, uti causam lucis & subjectum, intellexissem, nisi cap. secundo *ignem esse corpus* Vossius negasset, & capite tertio *Lucem visibilem*, quam definit, *non in igne, sed in corpore pellucido* collocasset.

19. Cartesius in definitione Lucis non modo specialiter Cælum & Solem nominat, verum etiam specialissime particulas illorum corporum exprimit, in quarum conatu & pressione Lucis natura consistit. Similiter in aliis rerum affectionibus declarandis non modò totum, ut subjectum denominationis, sed etiam accuratioris explicationis causà partes & particulas indicat, quæ inhesionis subjectum existunt. Adi ea quæ mox Disputatione de Calore thesibus 14 & 15 dicemus.

20. III. addit Vossius: *per quem quidquid visibile est cernimus*. Atqui Lux ipsa primò & maximè visibilis est. Ergo lux est actus per quem cernimus lucem. Sic definitum ingreditur definitionem. Nimirum & his & præcedentibus verbis ignotum per æquè ignotum explicatur, ut affirmare liceat clarissimæ rei à Viro docto definitionem allatam esse obscurissimam. Perinde est ac si dixisset, Lux est qualitas rei luce præditæ, qua videmus quidquid videre possumus.

21. Ad imitationem Vossii sic possis definire sonum: *Sonus est actus corporis sonantis, per quem quidquid audibile est percipimus*. Qui hanc recipiet spectatà Cartesianà, *sonus est tremulus & vibratus aeris motus auditum afficiens*, is quoque definitionem Lucis Vossianam Cartesianæ præferet.

22. Hactenus nonnulla ad illustrationem trium Mundi Elementorum

torum & Lucis artulimus. Quoniam autem in illis Naturalis scientiæ fundamentis rectè percipiendis multi hanc ob causam deficiunt, quod ordinem considerandi res Physicas, tanquam paulatim orientes, non assequuntur, cum in Philosophiæ principiis explicandis bene à Nobilissimo Philosopho observatum esse, sequenti Dissertatione planum faciam.

DISP. XXX.

Ordo considerandi res naturales in Physicis, tanquam paulatim orientes, explicatur ac defenditur.

1. **A**B iuventute ætate de Operibus Dei naturalibus abjectè nimis sentimus, dum v. g. universum cælum pro vacuo & inani spatium habemus, & stellas in eo collocatas tanquam exiguas lucernas imaginamur, &c. Et quia tam parvi facimus res creatas, ideo Creatoris magnificentiam non satis inde perspicere studemus, atque de apparente rerum illarum exiguitate potius, quàm de vera intellectus nostri imbecillitate cogitantes, putamus eas omnes conjunctim aut singulas separatim simul & semel à nobis posse comprehendere.

2. Philosophiæ igitur officium est, erroneas ejusmodi cogitationes emendare, Operumque divinorum amplitudinem, pulchritudinem & perfectionem demonstrare, ut sapientia, bonitas & potentia excellentissimi Opificis eò luculentius agnoscantur pleniusque celebrentur.

3. Ejusdem officium est, intellectus humani infirmitatem captusque nostri angustiam sedulò attendere, ut in augustissimis Dei Operibus cognoscendis gradatim ac pedetentim progrediamur, nec illico totum id quod habent perfectionis simul à nostro ingenio capi posse existimemus.

4. Hanc Methodum Physica Cartesiana tenens considerat omnes res naturales non statim quales sunt in statu perfectionis suæ absoluto (ut vulgò fieri solet ab aliis); sed prius agit de quibusdam earundem principiis valde simplicibus & facilibus, deinde explicat, quomodo paulatim ex illis principiis, suprema Causa certis legibus opus dirigente, oriantur & fiant, aut certe oriri ac fieri possint, donec tandem tales evadant quales esse experimur dum consummari & absolutæ sunt.

5. Et hujusmodi quidem consideratio eo solum fine instituitur, ut

ut naturam rerum creatorum & admirandum Creatoris artificium, innumeris modis, partibus, gradibus illustre, eò distinctius ac melius intelligant Physicæ studiosi, & ad Medicinam artesque alias quam plurimas Physicæ ope perficiendas tantò rectius præparentur, atque ita uberiores ex hac scientia fructus percipiant.

6. Si quis homo barbarus omnino & peregrinus (ut hoc simili rem præsentem illustrem) veniens in has regiones nostras scientiam sibi vellet comparare stupendorum quæ apud nos sunt ædificiorum (templorum, curiarum, basilicarum &c.) non tantum exteriorem eorum formam debet adspicere, sed quomodo paulatim exstructa, secundum quas regulas ita ordinata, qua proportionem & symmetria partes aliæ aliis junctæ, & similia pervestigabit.

7. Nos omnes peregrini & ignari naturæ venimus in mundum; expetimus rerum quæ in eo sunt naturalium scientiam. Alii doctores exteriorem duntaxat earum formam nobis describunt ac tales eas solummodo repræsentant quales jam sunt: nostra Physica profundius in naturæ penetralia sese insinuans considerat quomodo Deus pondere, numero & mensura fecerit omnia, quo artificio coagmentatum sit mundi opificium, quo ordine partes singulæ sic fuerint connexæ &c. Illi totum id pulchritudinis quod est in mundo à Deo productum unico obtutu integrum volunt capere: nostri intellectus oculus illud per partes sensim ac divisim perlustrare nititur.

8. Hæc methodus nostra, licet sua præstantia se commendare ipsa videatur, ideo tamen invisæ & suspectæ est quibusdam, quod historiarum Creationis à divino Mose descriptæ adversari videatur. Nam Deus, inquiunt, sex diebus totum creationis opus absolvit & rem unamquamque non paulatim & gradatim, sicuti architectus partes ædificii progressu temporis conjungit; sed illico totam simul & perfectam creavit & produxit.

9. Ego quidem ut historiam creationis sex diebus absolutæ sincerè credo; ita utrùm opera cujusque diei uno momento sint absoluta, an verò intervallo isto temporis, quod dies appellatur, facta & perfecta, Theologis hac quidem vice disquirendum relinquo, quoniam sepositâ etiam illâ controversiâ Methodum Physicæ nostræ defendere ac tueri pronum est.

10. Itaque hac Dissertatione solum explanabo (id enim ut quanta possem claritate facerem pii doctique viri à me desiderarunt) quomodo methodus nostra creationi divinæ haudquaquam repugnet,

etiam posito, quòd opus unumquodque momento fuerit absolutum.

11. Utergo quantum in me est, huic negotio lucis inferam, primò adduco exemplum *Philosophorum*, quorum hæc est receptissima methodus, ut in tradendis Metaphysicis & Physicis primùm agant de ente quatenus ens est, deinde de corpore in genere, tùm de cælesti, porrò de subcælesti in communi, de planta, de animali, de homine, non hoc aut illo, sed generatim & universè. Ita nimirum progressu temporis diversisque Philosophiarum partibus opera Dei gradatim abstrahendo contemplantur.

12. Atqui Deus non creavit primò ens, postea corpus, adhæc animal, denique hominem in genere; sed creavit hunc hominem (Adamum) in individuo, dumque eum produxit, simul & semel creavit ens, substantiam, corpus, mixtum, vivens, animal, hominem & omnia prædicata universalia, quæ tanquam distincta sibi in vicem succedentia spectantur à Philosophis. Nec tamen ullus mortalium, quod sciam, ideo eos tanquam divinæ creationi contradicentes hæctenus accusavit, cum ejusmodi methodus ab universalibus ad particularia procedendi, & prius genus quàm differentiam specificam querendi, à Logica præscribatur. Eademque ratione illa, de qua in præsentia agimus, methodus à vera Logica præcipitur, videl. ut res omnes, quæ ejus sunt naturæ ut fieri & nasci quacunque ratione possint, non veluti absolutæ jam & perfectæ, sed quasi paulatim orientes ac nascentes spectentur.

13. Secundo loco produco exemplum *Geometrarum*, quorum docendi ac demonstrandi ratio sine dubio est accuratissima & certissima. Hi dum naturam Corporis accuratius nobis exponunt (considerant autem verum & reale corpus atque idem planè quod considerat Physicus, quemadmodum alibi demonstravi) hac methodo utuntur: primò mente concipiunt *punctum*, cujus pars nulla est, deinde cogitant punctum hoc ex uno loco in alium fluere seu moveri, atque ex hoc fluxu gigni *lineam* afferunt, hoc est, longitudinem latitudinis expertem; porrò lineam in transversum moveri aiunt, ut nobis ob oculos ponant quid sit *superficies*, hoc est, quæ longitudinem latitudinemque tantùm habet; postremò in superficie spectandum monent, quòd æqualiter elevetur seu in transversum moveatur, ut intelligamus *corpus*, id est, extensum aliquod in longum, latum & profundum.

14. Omnes autem judicant Deum Creatorem non primò fecisse punctum atque illud postea movisse ut fieret linea, lineamque porrò

in

intransversum egisse, ut superficies constitueretur, tandemque hanc superficiem elevasse, ut plenum corpus evaderet; sed simul & semel uno eodemque actu corpus fecisse longitudine, latitudine & profunditate sua præditum. Nec tamen propterea modum illum Corporis naturam explicandi Geometris ulitatum, quasi in Creationis opus injurium, quisquam reprehendit. Sed tamen sat frontis habent aliqui ad nos, qui simili modo circa rem similem (imò eandem, quandoquidem species re non differt à genere) explicandam versamur, veluti historię Creationis fidem labefactantes, sugillandos.

15. Tertio loco exemplum primorum nostrę *infantia doctorum* ob oculos pono, qui sermonis naturam exposituri primò agunt de literis, deinde de syllabis, tum de vocibus, tandem de sententiis ac periodis, non statim ipsam orationem perfectam & consummatam legendam atque intelligendam exhibentes; sed à primis principiis inchoantes & literas seorsum spectantes, quamvis separatim pronunciari (saltem eæ quę consonę dicuntur) atque ita in oratione existere non possint.

16. Ita si quis tironi, Hebræicę & Græcę linguę prorsus ignaro, verba Dei in Veteri aut Novo Testamento velit explanare, initio literas internoscere docebit, & quomodo ex illis syllabę & vocabula oriantur ostendet, quomodo vocabula construantur & inflectantur pluribus postea regulis declarabit, ut ita tandem gradatim ac paulatim ad genuinum sacrarum Literarum sensum discipulum suum perducatur.

17. Interim certum est, Deum non priùs protulisse literas atque eas postea in syllabas collegisse, ex his voces, postremo è vocibus sententias integras composuisse, secundum regulas Grammaticę multo tempore & labore procedendo. Si dicas, Deum verba sua per Prophetas & Apostolos promulgasse, qui, cùm homines fuerint, humano ore & more locuti sunt; rehero, verba illa Dei non aliter à nobis Grammaticè resolvi posse, etiam si immediatè (ut quidem sunt nonnulla) à Deo essent profecta.

18. Quarto loco eandem *Scripturam sacram* adduco prout est considerationis non Grammaticę, sed Logicę & Rhetoricę. Qui eam interpretantur tali ordine agunt; *hoc est thema sive id quod sibi Spiritus S. hic proposuit tractandum; sequuntur argumenta quibus tractatur; hoc petitum est à causa, illud ab effectu, quod postea declaratur à signo, insuper amplificatur per distributionem &c.* Non sanè quod Deus in genesi suorum verborum paulatim regulas Logicas vel Rhetoricas ita attenderit & sermonem secundum eas disposuerit, quemadmodum harum artium studiosi

in *analyfi* facere jubentur, vel etiam in eruditæ alicujus orationis *genesis*; sed quòd hujusmodi per partes distincta consideratio artificij, splendorem, nervos divini eloquii nobis apertiùs detegat ac manifestet.

19. Eccur igitur traducimur, quòd tali omnino modo, tali proposito, circa opera Dei versamur, quali circa verba Dei occupantur viri pientissimi? Utrobique sanè est *analyfi* sive verborum sive operum divinatorum, quorum *genesis* ei soli convenit, quamvis nos similibus quodammodo verbis & quandoque operibus nonnullis (quarenus nempe ars naturam imitatur) aliqua saltem ratione Deum queamus imitari.

20. Quinto loco *decreta Dei* considerata propono, in quibus Theologi distinguunt decretum de fine à decretis de mediis, in his iterum ordinem observant, ut alia præcessisse, alia secuta esse dicant, ex. g. *primò*, inquirunt, *Deus decrevit hominem condere ad imaginem suam, deinde decrevit ejus lapsum permittere, tertio ut in hominibus in miseriam lapsis ostenderet misericordiam & justitiam, quosdam elegit ad salutem, aliis in miseria relictis, quarto ne miseretur electorum cum præjudicio suæ justitiæ, ab æterno destinavit iis Christum redemptorem, &c.* Alii alium ordinem in decretis Dei concipiunt, maximusque super ea re Theologorum quorundam dissensus.

21. Sed illi omnes in eo consentiunt, I. quòd ordo aliquis, id est prius & posterius quid in decretis Dei sit concipiendum. 2. quòd in Deo nihilominus omnia ista decreta (ut multa & sibi invicem succedentia à nobis spectata) sint unus & simplex idemque æternus actus. Quum igitur ejusmodi methodus observetur in operibus Dei internis & immanentibus (quæ improprie opera dicuntur) quid-ni observari possit in operibus externis ac transeuntibus, quæ revera sunt ac dicuntur opera, nec sunt æterna atque idem planè quòd ipse Deus, uti priora; sed realiter à Deo distincta, habentia partes ac successioni temporis subjacentia?

22. Sexto loco ipsam *Dei naturam* in exemplum adduco, nunquid enim in illa varia attributa considerantur, quæ sic inter sese ordinantur, ut alia primi, alia secundi generis, alia priora, alia posteriora dicantur, atque alia ex aliis velut à priori demonstrantur? Hac attributorum divinatorum multitudine atque ordine haudquaquam obstante unus & simplicissimus Deus statuitur, ita ut cuncta ejus attributa in ipso nihil aliud sint, quàm unus ipse. Quid-ni ergo similem methodum

dum servare liceret in operibus Dei, quæ rêvera sunt composita & partes habent realiter diversas & à se invicem separabiles :

23. Excipiat aliquis, cur multa & varia, priora & posteriora, considerentur in decreto & natura Dei, causam esse, quia illud multiplicem volendi varietatem eminenter continet, hæc verò propter eminentiam infinitatis suæ omnem perfectionum varietatem completitur, unde fiat, ut plures utrobique conceptus inadæquatos formare cogamur, cum una cogitatione totum assequi nequeamus : talem autem rationem in Dei operibus locum non invenire. Opponat etiam superioribus, gradus universalitatis majoris minorisve rectè distingui, quoniam tales sunt in facto esse, inde verò non sequi, gradus quoque in *τῷ* fieri esse distinguendos.

24. *Resp. 1.* Verum quoque est de operibus Dei quòd uno conceptu adæquato à nobis non possint comprehendi, quare autem nos aliter nobis persuadeamus dictum fuit hujus disputationis exordio. 2. res eadem est in fieri quæ in facto esse, imò mundus ille qui nunc actu est, idem est non solum cum eo qui creabatur in principio, sed etiam cum eo qui ante illud principium poterat esse, sive qui erat ens potentia, ut Metaphysici loquuntur : creatio etiam & conservatio re idem sunt in operibus Dei, nec minus divisio & gradus considerari possunt in *τῷ* fieri, quàm in *τῷ* facto esse, cum per *τὸ* fieri suum res acceperit ea omnia, quæ habet postquam facta est. Itaque Aristoteles lib. 1. de Repub. cap. 2, ubi regulam illam, quæ totius hujus disputationis fundamentum est, proponit, videl. *si quis à principio res orientes ac nascentes inspexerit, hoc modo optime rei veritatem perspecturus sit*, quibusdam interjectis subjicit rationem hanc : *quale enim quidque est ortu ejus absoluto atque perfecto, hanc cujusque naturam esse dicimus*. Ex quo intelligitur, si ortum istum (qui in rebus naturalibus per partes & continuatam successionem instrui solet) à primo momento per continuatam suam seriem ad ultimum momentum usque inspexerimus, tam demùm accuratè nos intellecturos, quidnam id ipsum sit, quod toto isto tempore tributum fuerit illi quod generatur, quæ ipsa rei natura est.

25. 3. Cur prius & posterius considerentur in decreto & natura Dei, causa est quòd varietas & successio reperiatur in objectis & effectis Dei, sive in rebus quodammodo similibus : at quod in rebus naturalibus varietas & successio attenditur, causa est quòd talis varietas & successio in iisdem rebus naturalibus (specie, inquam, iisdem) inveniat. Adamo qui primum creatus fuit, neque aliter hodie ignis ge-

nera

peratur, quam cælestes illos ignes (designo solem & stellas fixas) factos intelligimus &c. Liceat igitur nobis ipsum illud fieri rerum corporearum, quod in se varium ac divisibile est, variis ac divisis cogitandi actibus & explicandi formis animo apprehendere & verbis efferre.

26. Septimo Peripateticorum in Physicis methodum propono, dum v. g. considerant materiam primam omni forma privatam, cui deinde formas, modò hanc, modò illam, accedere perhibent, cum tamen materia sic omnibus formis destituta, ut plerique eorum fatentur, neque à Deo creata sit neque existere possit. Cur autem non sit nobis concessum pari ratione in Physicis considerare res materiales secundum eos status, in quibus tamen diversis vicibus non existerunt, quando primùm creatæ sunt & productæ? Vulgò etiam considerantur elementa pura, temperamentum ad pondus & similia, non quod revera existant talia, sed quòd talis consideratio ad uberiores rerum intelligentiam animum promoveat.

27. Octavo loco rem hanc illustro repræsentando *methodum*, quæ *Philosophia nostra ex homine non philosopho facit philosophum*: primò postulat hominem qui judicium suspendat de omnibus, quæ ante maturum rationis usum opinatus fuit, ut videat quid nunc adulta ætate & maturata ratione de rebus è naturæ lumine cognoscibilibus statuendum. 2. docet eum qui sic judicium suspendit eo ipso quo hoc facit necessariò existere, & hoc quidem quòd judicium suspendit non esse corpus, sed mentem. 3. ex propriæ mentis consideratione, notionum ei insitarum ductu, deducit philosophantem ad cognitionem Dei Creatoris & Conservatoris. 4. ab hujus porrò notitia corporis humani aliorumque existentiam & naturam derivat ac demonstrat, &c.

28. Qui hanc methodum non capiunt, nec hominem philosophum paulatim nascentem & crescentem attendunt, sed vident quòd initio de cunctis rebus philosophicis judicium suspendatur atque ubi de mente humana agitur, nihil adhuc statui de Deo, ubi de Deo, nihil adhuc determinari de corpore &c. Philosophiam accusant jam quòd nimium dubitet, jam quòd Deum abneget; jam quòd hominem meram animam asserat, quia nempe hanc solam prius considerat, quàm de corpore quicquam doceatur; jam alia atque alia objectant. Quæ omnia ex mera incitia oriuntur, quam quidem æquo animo ferre parati essemus, nisi conjunctam haberet obrectandi malitiam. Perinde faciunt ejusmodi homines, ac si Grammatico, dum circa solas literas versatur, objicerent, quod neget vocabula aut totam orationem.

tionem nihil aliud esse statuat quàm literas separatim existentes.

29. Sed quia duo imprimis poëtæ sunt, qui ut hunc philosophiæ nostræ ordinem, ita illum Physicæ, pro cuius defensione hæc omnia scribo, calculo mordent, nono loco ipsis è sua arte exemplum producam adeo simile & gemellum huic de quo agitur negotio, ut ejus explicationi accommodatius & adversariis refellendis efficacius nulum inveniri possè videatur. Penitiùs autem hoc ipsum intellegendum, ut Physicam Cartesii conferant, rogantur.

30. I. Ovid. de Trist. lib. 1. Eleg. 4. Ut foret exemplum veri Phocæus amoris, Fecerunt furia, tristis Oreste, tuæ. Hi sunt versus dati: quæritur, quæ tales illi sint facti, adeoque quæ sit eorum natura. Versibus hisce respondent *Phænomena seu ea quæ apparent & observantur in mundo: quæritur quomodo illa talia sint facta; seu quæ sit eorum natura.*

31. II. Ovidius hos versus ex tempore fecit & perfecit, nam poëtæ hujus excellentiæ nequaquam consentaneum est, ut eis componendis multum laboris ac temporis tributum ab eo existimemus, quandoquidem ipse est qui de se testatur: Sponte sua numeros carmen veniebat ad aptos, &c. Ita non est dubium quin Deus, ὁ ποιητὴς τῆς κόσμου, mundum ab initio creaverit cum omni sua perfectione, &c. Attendendo enim ad immensam ejus potentiam, non possumus existimare illum unquam quicquam fecisse, quod non omnibus suis numeris fuerit absolutum. P. III. 45.

32. III. Jam tiro aliquis rei poëticæ cognoscere velit artificium hujusmodi carminis ejusdemque naturam & constitutionem; quomodo præceptor hanc ei ostendet? Tiro Physicæ expetit rerum naturalium scientiam, sic ut earum naturam & constitutionem rectè perspiciat; quomodo hanc ei monstrabit Physicus?

33. IV. Alius nihil aliud facit quàm ut tironi ostendat versus prout jacent perfecti & consummati, monstrat syllabas longas & breves, pedem alium dactylum, alium spondæum vocari ait, &c. Plures philosophi nihil aliud faciunt, quàm ut describant res tales, quales jam sunt, dividunt eas in calestes & subcalestes, in elementa & mixta &c.

34. V. Alius Poëta quidem verba retinet, sed non eo modo & ordine proponit, verùm aut confusè trahenda sic: amoris veri exemplum foret ut Phocæus, tuæ, Oreste tristis, fecerunt furia; vel ita: exemplum ut foret Phocæus veri amoris, furia tuæ, tristis Oreste, fecerunt; vel aliter; aut ordine syntactico sic: Oreste tristis, furia tuæ fecerunt, ut Phocæus foret exemplum veri amoris. Ita Philosophus noster retinens ea, quæ Deus creavit (materiam & motum) per hypothesin quandam vel chaos.

proponit, ut in *Dissert. de Meth. vel ordinem in iis simplicissimam*, ut P. III. 46. sq.

35. VI. Et poëticæ artis doctor proposuerat jam antè regulas Profodiæ de syllabarum quantitate, de pedibus, de carminis Elegiaci structura &c. ex frequenti poëtarum lectione observatas aut alia ratione suffultas. Sic Philosophus prius tradiderat *Physicam generalem*, in qua egerat de regulis quibusdam sive legibus naturæ P. II. 37. seqq. quas per experientiam observaverat, & rationibus à Dei Creatoris perfectione desumptis probaverat.

36. VII. Nunc verò ostendit, quomodo si verba proposita secundum illas Profodiæ regulas disponantur, prius unam, post alteram attendendo, paulatim ejusmodi versus oriantur. Sic Philosophus ostendit, quomodo mundus hic à certis quibusdam principiis, secundum leges naturæ motis, paulatim oriatur, formas illas quas materia successive assumere potest ordine considerando, donec tandem ad illam quæ est hujus mundi deveniat. P. III. 47.

37. VIII. Et proficitur quidem disertè, poëtam nobilem in carmine componendo sic non processisse, nam 1. poëta sine materia sibi prius data carmen fecit: at poëseos discipulo dantur loco materiæ versus perturbati (sic vocari solent, licet ordo in illis jam sit syntacticus) quos in ordinem redigere jubetur, qualem nempe requirit metrum. 2. poëta ex tempore simul & semel composuit illos versus: verum discipulus paulatim & pedetentim progreditur cum cura & labore attendens regulas artis &c. Fatetur equidem etiam Philosophus non eo modo à Deo creatum fuisse mundum; sed 1. ex nihilo conditum. 2. brevi tempore (sex diebus) totum perfectum. P. III. 45.

38. IX. Attamen contendit, posse hoc modo considerari carminis illius originem & naturam: 1. quoniam tali modo fieri non repugnat naturæ talium versuum, etiam si excellentiæ talis Poëtæ non satis videatur conveniens, eos tali omnino modo tales fecisse. 2. cum tali modo hodie à multis versus componantur. Sic addit Philosophus, posse tamen sic mundi ortum spectari: 1. cum talis paulatim oriendi modus nullam involvat repugnantiam à parte rerum creatarum, quamvis immensa Creatoris potentia non satis consentaneus videatur. P. III. 45. præsertim 2. cum hodie sic fiant & generentur plurimæ res naturales. P. III. 51. 57. 62. sq. 75. 80. 83. 94. sqq. P. IV. 41. &c.

39. X. Imò utiliter admodum originem carminis ita considerari monet, quia simili ratione possunt alia quæcunque verba proposita secundum

secundum easdem regulas construi, ut simile carmen inde resulret. Sic Philosophus docet, non sine insigni usu mundi ortum sic spectari, quia ejusmodi methodus ed nobis inservire potest, ut simili modo causas naturales disponamus ad similes effectus producendos. P. III. 44. IV. 204.

40. XI. Insuper addit, alios rei poeticae praeceptores perperam docere, quia modum quo carmen fuit compositum, aut saltem componi potuit, non monstrant, nec proinde ad similia carmina facienda praeunt, & quia longè facilius ac penitiùs natura carminis innotescit, si ut paulatim secundum Poëticae regulas factum consideretur. Sic Philosophus, alios Physicos perperam docere asserit, quia modum generationis & constitutionis (sive possibilis sive actualis) rerum naturalium non detegunt, nec proinde ad Medicinam ceterasque artes, quae Physicæ ope perfici possunt, viam sternunt, & quia natura rerum multò facilius capi potest, cum ita paulatim orientes conspiciuntur, quàm cum tantum ut absoluta & perfecta considerantur. 1. de Meth. p. 41.

41. XII. Patet ex dictis Poëticae doctorem falsam hypothesein proposuisse (dum Ovidii versus perturbatos exhibuit, ut paulatim secundum regulas artis in ordinem redigerentur) non quòd talis construendi carminis modus repugnet vel absurdus sit à parte carminis, sed quia constat Poëtam eximium in ejus fabrica non tam lento gradu processisse &c. Pari ratione patet è dictis, quomodo Philosophus falsas hypotheses P. III. 45. proposuerit, dum è quibusdam assumptis & suppositis secundum leges naturæ paulatim nasci rerum universum conspexit, nempe, non quòd repugnent vel absurda sint ratione subjectorum sive rerum naturalium (uti sunt fictiones Astronomicae, v. g. Ptolomaicae); sed quòd ex verbo Dei aliter se habere constet, quæ ut talia sint, qualia finguntur, nihil repugnat.

42. XIII. Et patet variis modis potuisse materiam carminis proponi, varia & multiplici admodum ratione potuisse initio vocabula trajici, nihilominus si regulæ poeticae ordine attenderentur, idem carmen elegiacum oriturum fuisse. Sic patet quare, P. III. 47, dicatur: *Omnino parum refert, quid hoc pacto supponatur, quia postea juxta leges naturæ est mutandum. Et vix aliquid supponi potest, ex quo non idem effectus per eandem naturæ leges deduci possit, &c.*

43. XIV. Adeo ut vituperari nequeat Poëticae magister, si fortè priùs valdè perturbata vocabula proposuerit; magis tamen laudandus, si postea ordine naturali & syntactico. Adeo ut vituperari nequeat Philosophus, quòd chaos primùm proposuerit, magis tamen laudandus, quòd ordinem postea. *ibid.*

44. XV. Quia sic facilius versus in ordinem redigi potuere & omnia fuere clariora. *Quia etsi ex quavis hypothesei idem effectus deduci queat, operosius tamen per unam, quam per alteram, ibid.*

45. XVI. Nec error ullus ex falsa doctoris poetice hypothesei metuendus. *Adeo ut hic nihil erroris ex falsa suppositione sit timendum, ibid. in fine.*

46. XVII. Nec alia est versus natura, quam si tali modo compositi fuissent, *Nec alia est rerum physicarum natura quam si tali modo genita essent. P.IV. 1. 205.*

47. Obducatur aliquis hactenus instituta physicarum & poeticarum rerum comparationi, simile hoc tantopere à nobis commendatum non ubique satis esse congruum illi rei, cui illustrandæ adhibetur: e. gr. contra thesin 31 excipiat, Deum momento fecisse res singulas, Poëtam verò quantumvis excellentem in componendis versibus adhibere moram saltem aliquam, dum syllabarum mensuram &c. attendit, quamvis exercitatus multò citius absolvat non exercitato. Opponat etiam contra th. 42, perturbatos ejusmodi versus sæpe variis modis posse in ordinem redigi atque ita diversos versus ex eadem materia prodire posse, quò pertinet illud Scaligeri in fine exercit. 318. *Noster quoque versus heroicus circumfertur: cujus vocibus transpositis eliciuntur versus facies plus sexaginta. Sed & alios post illum excogitavimus longè fecundiores.*

48. Resp. 1. Ad prius, brevem moram comparatè ad longum tempus posse momento assimilari ea ratione, quâ terra in ordine ad cælum, hoc est parvum corpus in ordine ad multò majus, cum indivisibili puncto solet conferri. 2. Ad posterius, posse sumi talia vocabula, quæ non nisi unico modo disposita versus producant; quo in casu exceptio hæc non inveniet locum. Dari autem hujusmodi versus, qui unica sola collocatione metro congruant, nemo nescit.

49. Generalis 3 responsio est ex vulgatis istis: *simile non est idem; omne simile etiam dissimile*: e. gr. in eo est dissimilitudo non minima, quòd opus poëtæ alicujus etiam absque ejus influxu potest subsistere, quemadmodum Virgilio mortuo ejus opera adhuc extare dicuntur, &c. Sed opera Dei ne momento quidem temporis queunt superesse, nisi ab ipso Deo Creatore & Conservatore continuò pendeant & regantur.

50. Denique 4 adjicio, tam multas adhuc alias circa hanc materiam comparationes posse, in eadem similitudine persistendo, institui,

stitui, ut hæc non debeat ullo modo contemni, hujusque rei demonstrandæ gratiâ apponam sequentia.

51. Scaliger lib. I poët. cap. 2. *Poëta nomen non à fingendo, ut putarunt, quia fictis uteretur, sed initio à faciendo versu dictum est*, qui videtur sanè, ut cap. I ait, res ipsas, non ut alii, quasi histrio narrare, sed ut *alter Deus condere*. Hæc ille; quæ ideo adduco, ut minus incommoda appareat nostra comparatio.

52. Quemadmodum omne carmen certos numeros & mensuram justam exigit: ita rectè dicitur à Poëta: *Pondere, mensura, numero Deus omnia fecit*.

53. Namque ut syllabæ vocum, ex quibus versus constant, certam habent quantitatem: ita non modo partium materiæ, verum etiam motus in universo determinata quantitas est. Et quemadmodum duæ breves interdum compensant unam longam: ita compensatio est in motuum celeritate ac tarditate, de qua agitur in Physica generali.

54. Quot syllabæ, quot regiones, qui pedes debeant esse in Elegiaco Prosodia docet, sed utrum in hac illave regione, v. g. in prima, secunda, tertia, quarta debeat esse spondæus, an daetylus experientia in particularibus exemplis docere debet, quia talia plurimis modis possunt variari: similis planè doctrina de rebus physicis exstat P. III. 46.

55. Versus Ovidiani, utcunque ego & mecum alii plurimi in iis animo vel charta retexendis ac describendis mille modis diversis occupemur, manent iidem illi qui sunt & eo modo facti quo facti sunt: sic mundus idem manet qui est nec definit eo modo factus esse quo factus est, etiamsi variis modis in mente Philosophi aut systemate Physico resolvatur ac describatur.

56. Excellens poëta molestè non solet ferre, si artem quam posuit in carmine pangendo pro modulo nostro cognoscere laboremus; id enim ad laudem ejus facit: nec mundi opifex indignatur, si nos rationales Creaturæ sapientiam ejus admiremur eandemque in opere magnifico relucentem pro captus nostri angustia apprehendere conemur, id enim totum vergit ad gloriam nominis ejus.

57. Cùm versus in ordinem redacti sunt, tùm demum alius hexameter, alius pentameter &c. nominatur: sic in Philosophia nostra nomina tum demum ritè rebus imponuntur, cùm earum fabrica & constitutio à primis initiis ad consummationem usque innotuit.

58. Mundus est Alphabetum magnum, in quo literæ omnes sunt vocales, nulla muta.

DISP. XXXI.

De natura Caloris.

Quemadmodum proximæ quædam superiores Disputationes ad Theoriam corporum imprimis cælestium illustrandam pertinent: ita Caloris & Frigoris contemplatio in subcælestibus insignem omnino usum habet. Et quoniam Clarissimus Comenius, quem Janua Linguarum dudum orbi notum fecit, hanc materiam ante paucos annos examinavit, *Disquisitionibus de Caloris & Frigoris natura in Prodromum novæ Physicæ* &c. editis, rogatus ab amicis, qui Virum id minimè ægrè laturum affirmabant, illarum Disquisitionum breve examen tribus sequentibus Disputationibus instituam. Quibus annectam de *Fontium origine* Dissertationem, quodd in fontibus producendis caloris & frigoris effectus vel maximè eluceant.

I. *Calor est motus.*

1. **S**I quis, jactis antea primis humanæ cognitionis fundamentis, alicujus rei naturam cupiat perspicere, imprimis necessum est, uti rem istam ad genus aliquod intelligibile referat, ac deinde videat, quomodo ab aliis ejusdem generis rebus, vel ejusdem subjecti accidentibus, si quidem res proposita sit accidens, distinguatur. Dico ad *genus intelligibile* rem quamlibet esse referendam, quia si clarum distinctumque generis intellectum non habeas, ad speciei perspicuam cognitionem assequendam nihil proderit.

2. Quæritur igitur in præsentia, ad quod genus rerum pertineat *Calor*? Resp. Qui decem Categorias in Logica recensent, solent Calorem appellare *Qualitatem passibilem*, quia efficit ut sensus, tactus videlicet, aliquid patiatur. At quoniam hic remanet dubium, quidnam illud sit, quod sensum tactus afficit, an, aut quomodo ab ipso motu tactum afficiente atque efficiente diversum, nos malumus Calori genus Physicum assignare, dicendo, quod sit *Motus*.

3. Quid *Motus* sit, sat intelligibile nobis est, cum variationem situm esse dicimus, quemadmodum è contrario *Quietem*, permanensionem in eodem situ. Per se enim notum est attendenti, quod corpus dicatur *Quiescere*, quamdiu eodem modo applicatur partibus corporum, à quibus ambitur. Unde sequitur, quod corpus dicatur *Moveri*, dum continuò aliter atque aliter applicatur diversis corporum ambientium partibus.

4. *Satis*

4. Satis etiam intelligimus, Calorem esse motum, sive eum in ortu suo, sive in progressu & incremento, sive in remissione & decremento, sive in sensu, sive extra sensum spectemus. Calorem in liquidis oriri conspiciamus, dum eorum particulæ ab igne vel sole variis modis agitantur; in duris, dum ultrò citroque moventur, sicuti cultrum super ligno acuiamus. Calor intenditur, dum acceleratur iste motus, quemadmodum in liquidis ferventibus, in duris incensis aut scintillas emittentibus apparet. Remissio caloris est, cum retardatur atque imminuitur ille motus: sic aqua fervida ab igne remota paulatim fit tepida. Et quemadmodum in aqua fervida, quæ est extra nos, motum exiguarum partium varium conspiciamus: ita similem motum in manibus nostris experimur, cum frigidas ad ignem calefacimus, vel aquæ calidæ immittimus, vel nive fricamus, vel aliis modis variè & validè commovemus.

5. Obtendat aliquis, si calor sit motus, tum perperam homines inter calorem & calefactionem distinguere, aut, si rectè distinguant, tum caloris nomine intelligendam esse qualitatem à calefactionis motu, qui pro diverso respectu actio est & passio, diversam. Resp. Ego quidem non intelligo, quid calefactio inchoata aliud sit in subiecto calido, quam calor inchoatus; quid in progressu aliud, quam calor continuatus. Differentia solum est in modo concipiendi, quod *calefactionis* nomine intelligamus ex. gr. motum in aqua, quatenus incipit, diciturque respectu ignis actio, respectu aquæ passio. At quatenus idem motus in aqua, etiam absente igne externo, perseverat, propriè *calor* appellatur, atque ita nec actio, nec passio, sed modus ac status quidam aquæ est, uti cubatio ac sessio in cubante ac sedente. Ita sagitta per aërem volans in statu motus est, qui motus initio respectu sagittarii impellentis actio, respectu ipsius sagittæ impulsū recipientis passio dicebatur.

II. *Calor est motus varius.*

6. Calorem esse motum seu variationem situs, diximus. At cum situs differentię sex recenscantur, sursum & deorsum, ante & post, dextrorsum ac sinistrorsum, quibus aliqui addunt introrsum seu centrorsum, & extrorsum seu versus peripheriam, quæ tamen si ad terram & similia corpora referantur, ab eo quod sursum ac deorsum vocatur, non differunt; inquirendum porro est, cujusmodi motus sit calor, seu, quam situs differentiam nanciscantur corpora vel corporum partes, eo ipso quod calorem recipiunt.

7. Cl.

7. Cl. Comenius existimat, motum hunc caloris esse propriè *extrorsum*, à centro ad circumferentiam, calorem per suam formam esse motum dilatativum seu diffusivum seu expansivum: his enim vocabulis utitur. Atque illud ipsum est, quod vulgo dicunt Physici, *calorem movere à centro ad circumferentiam*; quia corpora laxat, rarefacit, attenuat atque in ampliora spatia extendit, uti in aqua, quæ calore intumescit, aliisque pluribus rebus videre licet.

8. Nos quidem fatemur, calorem omnia fere corpora rarefacere & in majus extendere, atque ita admittimus axioma illud Physicum eo sensu, quo alia nonnulla axiomata intelliguntur, non de illo, quod necessariò & semper, sed quod sæpius vel ut plurimum est aut fit. Certum quippe est, quod calor aliquando etiam condenseret atque in angustius spatium corpora cogat. Ita nix in calido loco posita constringitur & mole valde imminuitur, ante etiam quàm ulla aqua ex ea profluat, vel de pondere suo quicquam amittat. Hinc tepescente aëre pilas & massas niveas pueri conficiunt, quas intensiore frigore frustra condensare conantur. Præterea si consideres, quomodo nix in aquam resolvatur, quomodo cera liquefiat, quomodo pelles & nervi arcuum, folia plantarum, calore contrahantur, quomodo ea quæ siccantur calore, laxentur quidem, qua parte rimas agunt, at in rimarum ambitu densentur; calorem non modò rarefacere, verùm etiam sæpe condensare, facile agnosces.

9. Cum autem id, quod in definitione caloris ponitur, ut essentialis ejus proprietas ac differentia, omni calori & quidem perpetuò convenire debeat, non possumus cum Cl. Comenio putare, calorem rectè prorsus definiri, motum expansivum, sive motum extrorsum à centro ad peripheriam. Sicuti non definimus calorem, quod *congreget homogenea ac disgreget heterogenea*, quoniam illud verum non est de omni calore, licet ut plurimum contingat, quoties scilicet calor moderatus est. Quamvis & alia causa sit, cur definitionem istam non probemus.

10. Veremur etiam, ne, si Comenianæ definitioni insistamus, motum hunc, quem calorem dicimus, à motu levitatis non satis accuratè distinguamus. Nam si quid à terra versus cælum moveri dicas, utique dicis à centro ferri ad circumferentiam, quod propriè loquendo est leve esse, ni fallor, non calidum esse. Quid enim vocatur apud nos levitas aliud, quàm impulsus corporum à centro ad circumferentiam? Si dicas, levitatem esse motum sursum, idem dicis.

Quod

Quod si quis affirmet, caloris & levitatis definitiones ideo affines esse, quia levitatis motus proximè caloris motum sequitur, uti aqua dum calefit, simul in vapores redacta ascendit; respondeo, id non esse perpetuum, allata caloris densantis experimenta docere. Et quamvis aqua plus caloris habeat quàm glacies, est tamen infra hanc sibi innatantem. Licet etiam perpetuum & necessarium omnino caloris consequens esset levitas, quia tamen consequens peculiarem ac propriam definitionem requirit. Multò minùs confusionem hanc admiserint illi Philosophi, qui tactilis qualitatis duas species contrarias faciunt, motricem, ad quam gravitatem & levitatem, & alteratricem, ad quam calorem & frigus referunt.

11. Quoniam igitur ab eo, quod essentiam rei alicujus consequitur, & quidem non semper ac necessariò, sed tantùm ut plurimum, essentialem illius rei definitionem petere non licet; sed potiùs ab eo, quod antecedit hunc rei effectum & essentiam ejus constituit; investigemus, quidnam illud sit in caloris motu, propter quod corpora quidem pleraque rarefiant, aliqua tamen etiam condensentur. Invenimus illud non esse motum sursum, vel motum à centro ad peripheriam, neque ullum alium, qui ad unam aliquam situs differentiam prorsus restringi possit; sed esse *motum varium*, id est, quo partes aliæ sursum, aliæ deorsum, aliæ dextrorsum, aliæ levorsum, aliæ versus anteriora, aliæ versus posteriora feruntur, & pro diversa partium mobilium dispositione & figura ac motus ipsius gradu modò in angustius, modò in latius spatium extenduntur.

12. Equidem pleraque corpuscula terrestria cum à calore plus solito agitantur, in tam angusto spatio non possunt contineri, quàm cum quiescunt vel minùs moventur, quia figuras habent irregulares, quæ minus loci occupant, cum certo aliquo modo junctæ quiescunt, quàm cum assiduo motu disjunguntur. Quod ita esse crasso hoc exemplo intelliges, si cogites homines sobrios & quiescentes multos posse angusto conclavi capi, ebrios ad verbera procedentes, gladios & cultros stringentes non posse. Et spectat huc proverbium Germ. *Gedülstiger schaaf gehen viel in einen stall*. Cui quidem dicto cum nonnulli soleant opponere illud: *ungedülstiger noch mehr* / confirmant id ipsum quod dixi de nive. Sicuti enim oves aliæ supra alias assurgentes, aliæ aliis insidentes, se invicem trudentes & prementes varioque motu se quasi compingentes plures eodem stabulo contineri possunt: ita particule nivis faciliùs componuntur magisque ad se invicem accedunt,

dunt, dum vario motu agitantur, quàm cum extremitatibus quibusdam se tangentes quiescunt.

13. Calori itaque non adeo strictam naturam assignamus, ut motum solummodo extrorsum esse statuamus; sed *varium* esse dicimus, ac pro diverso particularum corporis alicujus situ & figura multis modis diversum esse arbitramur, quem quidem motum in plerisque rarefactio, in quibusdam tamen potius condensatio sequatur. Atque ita discernimus motum hunc, quem calorem vocamus, non tantum à motu levium, sed etiam ab omni alio motu progressivo, quo res vel sursum tantum, vel tantum deorsum, dextrorsum aut sinistrorsum tantum &c. feruntur. Et quis non videt in flamma, in aqua fervida, & similibus corporibus motum particularum varium? Quis non sentit istam varietatem in manu frigida igni admota & paulatim incalescente? Ipse Comenius varietatem in calore agnoscit, dum pag. 53. sic scribit: *Frigidus ille extrinsecus veniens Aër non motu directo, ceutelum aut cuneus, ingreditur, sed motu variè gytrato seu torsivo, mille vorticum instar. Qualiter & interior Aër sese torquet, sed motu contrario distortivo, &c.* Ubi quod frigori æquè ac calori motum varium attribuit, id postea examinabimus.

III. Calor est partium corporis exiguarum motus varius.

14. Integram Caloris definitionem jam habebimus, dummodo addamus *subjectum inhesionis* illius varii motus, quod dicimus esse non totum corpus, quod calidum appellamus, seu quod respectu caloris *subjectum denominationis* est; sed propriè & proximè partes ejus, & quidem exiguas, quæ sigillatim insensiles. Calore ergo agitur non totum corpus simul, quatenus unum totum (quomodo enim posset unum idemque numero corpus propriis motibus pluribus & variis eodem tempore ferri?) sed particulæ ejus diversæ agitantur variè, hoc est, aliæ atque aliæ aliter atque aliter feruntur. Id quod ex præcedentibus minimè obscurum est. Sic motus in aqua calida, quæ fluit, alius est, quo versùs unam partem tota progreditur, alius, quo singulæ ejus partes motibus à se diversis agitantur, ut fluidum seu liquidum, & calidum corpus constituent.

15. Clarissimus etiam Comenius de Caloris & Frigoris subjectis peculiare caput proponit, idque non sine causa, quia nullum accidens ritè definiri potest, nisi mentione facta subjecti alicujus, cui inest, cum ejus esse sit inesse. Atqui omissa ab eo fuit distinctio ista inter motum

motum totius & partium, omiſſa ibi fuit hæc obſervatio, quòd caloris motus in partibus exiguis, non in toto, quatenus totum eſt, conſiderandus. Id quòd ad Caloris naturam perſpicuè cognoscendam & ab aliis motibus diſtinguendam non parum juvat.

IV. *Varius ille particularum motus tum præſertim Calor appellatur, cùm eſt major ſolito, ac ſenſum tactus afficit.*

16. Qui acutiùs ea, quæ de natura Caloris diximus, intuetur, facile opponet, ſecundùm noſtram definitionem omnia liquida & fluida corpora eſſe calida, ex. gr. omnem aquam eſſe calidam, nullum ut amplius diſcrimen maneat inter aquam calidam & frigidam. Probabit conſequentiam, quia varia illa partium agitatio conſtituit naturam corporis fluidi & liquidi, quæ ſi in aqua ex. gr. ceſſet, non amplius aqua, ſed glacies eſt. Quæret proinde, an natura fluidi ſeu liquidi eadem prorsus ſit quæ calidi: unde ſequi videretur, nulla è corporibus duris & conſiſtentibus unquam poſſe cenſeri calida, quoniam illorum partes variis motibus nunquam cientur.

17. *Reſp.* Agitatio particularum varia vulgo tum demum calor appellatur, cùm tanta eſt, ut ſatis fortiter ſenſum tactus afficiat, ſeu (ut exemplo me explicem) manuum noſtratum nervos moveat. Si tanta non ſit, caloris denominatio ei tribui plerumque non ſolet, quia nomina hujusmodi rebus dantur prout in ſenſus noſtros incurrunt. Ita tremulus & vibratus aëris motus ſi non ſit tantus ut moveat auditum, licet revera habeat omnia reliqua ad ſonum conſtituendum pertinentia, tamen ea ſola de cauſa non appellatur *Sonus*. Ergo non tam ipſa varia exiguarum corporis particularum agitatio per ſe ſpectata, quàm illius agitationis certus gradus ad ſenſum tactus, qui in nobis eſt, relatus *Caloris* nomine vulgo inſigniri ſolet. Unde Calorem in abſolutum & reſpectivum poſſumus diſtinguere, ita ut aliud naturâ ſuâ calidum, aliud inſuper calidum ad ſenſum eſſe intelligamus, & calidum vulgo appellemus.

18. His præmiſſis, aio corpora omnia fluida ſeu liquida abſolutè loquendo eſſe calida, non tamen ad nos relata appellari calida, niſi cùm eorum tactu exploratorum particulæ celeritàs moventur, quàm particulæ manus tangentis. Inde eſt quod manum dextram ſiniſtrâ calidiorẽ habentes, idẽ corpus dextrâ frigidum, ſiniſtrâ calidum eſſe

esse sentimus. Itaque aqua, quæ frigida dicitur quoad sensum, aliquid tamen adhuc caloris ut habeat necesse est, quia refrigerari potest, & refrigeratur, cum in glaciem concrevit. Cum enim recipiens à natura recepti denudatum esse debeat, ut loquuntur, necessum est id aliquantum caloris habere, quod frigoris ulterioris capax est. Quod ergo Cl. Comenius ait p. 11. *Omnia apud nos corpora, ærem, aquam, terram & quæ ex his constant caloris & frigoris receptiva esse*, & pag. 42. *Nullum elementorum per se vel calidum vel frigidum esse*, illud de tribus illis elementis ratione caloris respectivi tantum admittimus: nam aquæ & æri, quam diu fluida corpora sunt, calorem simpliciter non denegamus.

19. Quod autem ex hac sententia sequatur, duris corporibus calorem nunquam esse adscribendum, id minime nobis videtur. Quemadmodum enim arborum rami variè à ventis agitantur, jam diducuntur, jam contrahuntur, jam sursum, jam deorsum potius moventur (qui motus tamen non est Calor, quia magnas, non exiguas totius aliqujus partes pro subjecto habet) licet ideo ab arbore non avellantur, aut frangantur: ita durorum corporum partes exiguæ variè possunt agitari & concuti, quamvis ideo non illico à se invicem omnino separantur. Exempla habemus in cera & ferro, dum ita incallescunt, ut non fundantur; imò in ipsa manu incalescente, postquam valde frigida & rigida fuit. Hinc scilicet intelligitur, quomodo cera, ferrum & similia calore molliantur varieque flecti, duci ac trahi possint.

DISP. XXXII.

De Natura Frigoris.

V. Frigus est quies.

20. **F**rigus esse contrarium calori, nemo est qui ignoret. Nemo etiam diffiteatur, quod ad definiendum alterum ignotum contrarium multum juvet definitio alterius jam cogniti: cum oppositorum, quatenus opposita sunt, attributa sint opposita, & oppositorum eadem sit scientia. Sed in controversia, quæ quidem præcipua hæc est inter nos & Cl. Comenium, versatur, in quonam illa Caloris & Frigoris contrarietas & oppositio consistat.

21. Comenius autumat Calorem opponi Frigori, ut motus extensorum motui introrsum, ut motus rarefactivus condensativo opponitur. Nos arbitramur Calorem & Frigus opponi ut motum & quietem,

tem, aut certè accelerationem motus & ejusdem retardationem atque imminutionem. Quam nostram sententiam Comenius adèd putavit à veritate alienam, ut occasione illius corollarii philosophici in Belgio ventilati, *frigus esse partium exiguarum quietem*, libellum de Caloris & Frigoris natura scripserit, novæque philosophiæ placitis abreptis hîc dormire dixerit, & quasi ad imitationem Scaligeri (qui Exerc. de subtil. 18. Cardano frigus esse privationem statuenti sic inter alia respondet: *Soleas abjice ac pileum, Cardane, quo tempore ex Alpibus Raticis urit nos Boreas &c. Sanè privatio non repellit habitum, sed expellitur. Nam quibus machinis expugnabitur capitis tui calor à frigore, si frigus nihil est?*) eos ludibrio habuerit, ac si fidem sensibus non haberent &c. Quemadmodum è Dedicatione videre est. Quo autem jure, qua injuria Viros philosophos ita exagitet, iis, qui legerunt atque intellexerunt eorum scripta, judicandum relinquo.

22. Nos probamus sententiam nostram primò quidem argumento tali, quali probavimus initio, calorem esse motum. Si frigus neque in ortu suo, neque in progressu & intensione sua, neque in sensu, neque extra sensum aliud esse deprehenditur, quàm exiguarum corporis partium quies aut saltem minor motus, tunc nihil aliud ad ejus naturam definitione exprimendam referre possumus. Atqui &c. Ex.gr. quantò magis minuitur agitatio in aqua, quæ fervida fuit, tanto fit aqua frigidior, donec tandem amissa omni agitatione in glaciem, hoc est, in corpus frigidissimum redigatur. Sic manus calidæ sunt agiles & mobiles valde: at rigidæ & frigidæ cùm fiunt, partes earum quiescunt, neque ad motum idoneæ sunt. Nempe uti manus tunc ad scribendum ineptæ, ita atramentum nec influit in calamum, nec effluit amplius ex eo. Utrobique quies & consistentia motusque retardatio deprehenditur.

23. Alterum argumentum desumo ex thes. 9. & seqq. disp. præced. si rarefacere vel à centro movere ad circumferentiam, non est essentialis, perpetua & inseparabilis caloris proprietas; motus autem omni calori, & quidem semper inest, tunc de contrario Frigore non Comeniana, sed nostra potior erit sententia. Quod enim pro fundamento perpetuæ distinctionis & naturalis contrarietatis ponitur, id omnibus ita distinctis & contrariis perpetuò conveniat necesse est. At omne frigidum si cum calido conferatur, ab eo differt, ut quiescens, aut minus motum ab eo quod movetur, aut quod celerius movetur. Atque hæc duo argumenta sufficiunt, quorum prius ab

experientia, posterius à ratione præcipuè desumptum est.

24. Videamus nunc quid obstat imprimis, cur Comenius aliique Frigoris naturam in quiete consistere nolint admittere. Præcipuum illud esse video, quod calor & frigus *contraria* sint; motus autem & quies *privativè* opponantur. Huc enim pertinent argumenta, quæ Comenius tum in Dedicat. tum alibi profert: *Si frigus est quies*, inquit, *ergo summum frigus summa quies erit. Quomodo ergo tanta quies tantas turbas (legando flumina & pontum, enecandoque tot corporum, nisi se abscondant, visam) dare potest.* Vide ejusdem lib. cap. 6. Nempe putat quietis nullam esse vim, nullam efficaciam. Et quid hoc aliud, quàm eam non esse quid positivum in natura, sed privationem meram, id quod Cardanus de Frigore perperam sensit. Quærat igitur aliquis, quomodo à Cardano dissentientes nihilominus frigus esse quietem statuamus?

25. Equidem mirabor admodum, si ingenio Metaphysico, cuiusmodi est Comenianum, non queam demonstrare, quietem æquè vel magis etiam positivam habere naturam, quàm motum. Hunc igitur in modum argumentor: Si quies in Physicis differt à motu, sicut in Metaphysicis *immutabile* differt à *mutabili*, tum etiam quietis natura positiva erit, & magis quidem, quàm natura motus. Atqui verum prius: ut enim ens immutabile est, quod semper *manet* idem quod est: ita quies est *permanens* in eodem situ. Ut mutabile est, quod non semper manet idem quod est, seu, quod aliter atque aliter se habere potest: ita motus est variatio situs, motu situs continuò alius atque alius acquiritur. Vide definitionem Morus & Quietis th. 3. atque inde etiam sequentia argumenta elice. Nota autem ante ad majoris propositionis confirmationem, quod nemo dicere possit, mutationem in rebus creatis esse magis positivum quid, quàm est immutabilitas in Deo; sed omnes potius maxima cum ratione dicant contrarium.

26. Si quies in Physicis se habet ad motum, ut constantia in Ethicis ad inconstantiam, tunc utique est positivum quid, & magis quidem positivum, quàm ipse motus. Atqui, &c. Constantia nimirum idem est quod immutabilitas, & inconstantia idem quod mutabilitas. In eo tantum differentia est, quod in Ethicis positivum *Constantia* positivo nomine, privativum *Inconstantia* privativo nomine, id quod rectè fit, designatur. At in Metaphysicis, ubi mutabile ab immutabili distinguitur, contrarium evenit, & quidem malè.

27. Adhæc, si quies & motus differunt sicut idem ac diversum, tunc

tunc natura quietis magis etiam positiva, quàm natura motus. Nam diversitas seu distinctio formaliter in negatione consistit, qua unum non est aliud; identitas è contrario in affirmatione posita, qua unum est id quod alterum. At quies & motus differunt ut idem ac diversum: nam corpus quiescens quàm tale *eodem modo* applicatur partibus corporum tangentium, corpus motum semper *alio atque alio modo* illis applicatur. Certè *Ejusdem ac diversi* distinctio est primum ac summum fundamentum distinctionis inter quietem & motum, inter immutabile & mutabile, inter constans & inconstans, quemadmodum evidens est attendenti.

28. Præterea *stare, sedere, manere, persistere, perseverare, habere, durare*, quæ sunt nomina quietis, nunquid æquè positivum sonant, ac *ire, currere, evadere, fluere, elabi*, quæ sunt nomina motus? Quies est permanſio in eodem situ. Quot vocabula hic audis, tot inde pro sententia nostra promes argumenta. *Permanſio* enim positivum quid est, *identitas* positivum, *situs* denique positivum. Ecquis neger, *stare & sedere*, quæ sunt quiescentium, si quidem ad situm pertinent, esse positiva opera?

29. Accedunt his argumenta alia Physica, nempe quod quies *per se sentitur*, tanquam sensibile commune tactus & visus. At nulla privatio per se sentitur. Item, quod quies facit res coherere, eas indurat, conservat. Nulla quippe firmior *coherentia*, nulla major *induratio*, quàm si partes corporis aliæ juxta alias quiescant. Porro, quod res *conservat* & continet, id æquè vel magis etiam positivum est, quàm quod corrumpit ac destruit. At quies multa corpora conservat, quæ motu corrumpuntur ac destruuntur. Sed hujusmodi argumenta in disputationibus de Motu attigimus: ubi etiam causam reddidimus, quare quietis natura non æquè realis ac positiva, ac natura motus, vulgo putetur. Nimirum, cum ipsimet quiescentes non ita sentiamus in nobis actionem, quæ præcipuè voluntatis nostræ est, uti sentimus actionem dum movemur, voluntatis scilicet nostræ imperium atque inde pendentes actus membrorum nostrorum imperatos, existimamus in objectis extra nos constitutis rem eodem prorsus modo se habere, quasi in illis æquè voluntatis imperium esset, atque in nobis. Nec sane nos ipsi sumus, qui exerceamus illam actionem, per quam in quiete tenemur, sed gravitate membrorum sistimur, cum è contrario motu à voluntate imperato, adeoque actione nostra, cujus conscii sumus, directis spiritibus in membra eorum adminiculo ea moveamus.

VI. *Frigus tamen non semper est omnimoda
quies, at saltem minor motus.*

30. Tandem ex principio concessio argumentamur. Conceditur enim ab adversa parte, *motum esse aliquid positivum*. Et nos minimè arbitramur, frigus omne in omnimoda quiete consistere; quia non omnia frigida summum illico frigoris gradum obtinent. Sufficit nobis, frigus esse minorem motum, esse tarditatem, esse agitationis imminutionem. Cumque minor motus etiam sit motus, ut minor fides & infidelitati propinqua etiam fides censetur, minor homo etiam homo; si motus positivum quid est, frigus etiam tale quid erit, licet natura ejus quieti propinqua sit.

31. Verùm hic duas subnasci objectiones video, quarum prior est, quod, cùm magis & minus speciem non mutant, seu cùm *gradus non variant speciem*, si calor celerior sit & major motus, frigus nihil aliud, quàm tardior & minor motus, gradu duntaxat has qualitates à nobis distinguere, cùm tamen specie differant. Posterior est, si minorem motum frigus esse dicamus, cur igitur per quietem illud definiamus, & quare corollario tali Ultrajectinus Philosophus, *frigus esse partium exiguarum quietem*, Comenio aliisque viris contradicendi & contra scribendi occasionem dederit, quam facile evitare potuisset, aliter mentem suam exprimendo.

32. *Resp.* Ad prius: argumentum purè Logicum nequit mutare rerum naturam. Quis docuit calorem & frigus ita specie & natura differre, ut sæpissime non sola celeritate & tarditate motus distinguenda sint. Tactus credo docuit. At quid docuit? Revera nihil aliud, quàm quod, cùm particulæ corporum, quæ tangis, tardius moventur manuum tuarum particulis, sentias frigus; cùm celerius illis, sentias calorem. Quæ in sensu contraria sunt, non ideo semper multum distant in rebus: quod voluptatis ac doloris exemplo egregiè ostendit Philosophus noster Principp. IV. 191. Utrùm ea, quæ in rerum contemplatione subinde distinguenda sunt, species an gradus oporteat existimare, non semper adeo liquidum nobis esse Ontosoph. novæ §. 68. 200. demonstravi.

33. *Resp.* Ad posterius: non modò illud, quod minùs tale est, contrario nomine sæpe appellatur, uti in Categoria Qualitatis diminuta Potentia vocatur Impotentia, & infirmior Fides apud Marcum IX.

24. Infidelitas (ut ita minor ac tardior motus rectè etiam quies vocari possit)

possit) verum etiam definitionis bonæ hæ sunt leges: ut sit brevis, ut contrariæ rei definitio contrarietatem perspicue exprimat, ut rei cuiuscunque definitio naturam ejus describat prout ea invenitur in vigore suo & statu perfectissimo. Jam quia tardior motus comprehendipotest sub quiete, brevitati consulunt, qui dicunt, frigus esse exiguarum partium quietem. Cumque in caloris definitione solius motus facta sit mentio, si in frigoris definitione sola memoretur quies, evidenter erit oppositio. Ac denique cum perfectum frigus, frigus *simpliciter* tantum in quiete consistat, quamvis minus frigidum tardioris motus sit particeps, rectissime, opinor, definitio frigoris sola quietis mentione absolvitur. Summus gradus unius contrarii nihil relinquit de altero, quemadmodum dici solet. Ergo definitiones caloris & frigoris ita compositæ, uti dictum est, naturas utriusque qualitatis optime declarant. Verum hæc de re non est magnopere disceptandum, cum satis exposuerimus sententiam nostram, quod frigus sit partium corporis exiguarum quies, aut certe tardior motus: quæ quies, quæ motus tarditas tum demum frigoris nomine insigniri solet, cum partes organi tangentis celerius agitantur. Inde enim fit, quod istam quietem vel tarditatem ut agitationi huic contrariam sentimus, quemadmodum de caloris appellatione & sensu §. 17. disp. præcedente observavimus.

VII. *Frigus interim minus commodè per motum definitur.*

34. Si quis non obstantibus eis, quæ modò demonstrata sunt, pertinacius instare velit, frigus posse etiam definiri, quod sit motus, cum minor motus æquè motus dicendus ac major, ei ulterius obviam ire possumus ostendendo, non æquè in frigoris ac caloris definitione motus esse mentionem faciendam, & peccare Comenium, qui differentiam à nobis assignatam insuper habendo aliam substituit, quæ non est perpetua, quod scilicet frigoris motus introrsum, caloris autem motus tendat extrorsum. Ita nempe ipse in sola determinatione seu directione motus discrimen caloris & frigoris ponit. Nos majus ponimus (id quod observa contra objectionem primam th. 31. præter ea, quæ jam th. 32 responsa) qui hæc qualitates differre statuimus, seu motum & quietem, aut certè tanquam celeritatem & tarditatem: quæ tarditas utique naturam quietis participat.

35. Cl. Comenius in Dedic. sic ratiocinatur: si frigus est quies, quemadmodum scil. nos, quos impugnat, existimamus, ergo summum

num frigus summa quies erit. Imitemur Virum, & retorqueamus in ipsum hoc telum, sic argumentando: Si frigus est motus, uti Comenius arbitratur, tum utique frigus majus major motus, ac tandem summum frigus summus erit motus. Atqui aucto frigore motum quoque in corpore frigido augeri nemo affirmabit, qui considerat, quomodo aqua fervida paulatim magis magisque perdendo motum magis etiam frigescat, tandemque in glaciem, hoc est rigidum & immobile corpus redigatur. Et quis non experitur quotidie, eò minus mobiles suas esse manus, quò sunt frigidiores?

36. Ipse Comenius naturalium effectuum memor, at suæ oblitus hypotheseos p. 18 statuit, quod frigoris visurgens particulas aquæ ad *immobilitatem* condenset, ut ex corpore fluido aliud prorsus rigidum & *immobile lapidis instar* fiat, glacies. Frigoris igitur effecta (intelligo immanentia, quæ ab ejus essentia non differunt) esse spissitudinem, rigorem, *immobilitatem*. Idem, p. 25, faterur frigidissimum apud nos corpus esse glaciem. Quod si ergo è phænomeno nobis maximè obvio & manifesto naturam alicujus rei Physicus rectè solet indagare, quid-ni Frigoris naturam ex obvio corpore maximè frigido venemur? Et quid in illo aliud est *frigidum esse*, quàm partes habere immotas sive quiescentes apud se invicem? Aut igitur vera est nostra sententia, aut si Comeniana, quæ frigus motum esse definit, verior existit, tum ei, quod maximè frigidum est, frigidi definitio minimè conveniet.

37. Concludamus itaque in Frigore non tam *motum*, quàm *tarditatem* atque imminutionem motus esse spectandam: quoniam à calore differt non qua motus, sed qua tardior motus vel quies. Calor quò major est, eò celerior motus: contra, quò majus frigus, eo tardior motus ac tandem quies. Definitio autem rei cujusvis universalis peti debet à consideratione illius exempli, in quo potissimum talis rei natura elucet, eo statu & gradu, in quo vigorem suam atque excellentiam obtinet.

VIII. *Argumenta, quibus impugnatur, quod frigus sit quies, infirma sunt.*

38. Videamus nunc aliquantò plenius, quàm in superioribus th. 24 & seqq. factum est, quibus argumentis inductus Comenius sententiam de natura Frigoris, quam & vero consentaneam & utilem in Physicis esse nos quidem existimamus, in *Disquisitionis* suæ epistola deduc.

dic. primum deridere, ac deinde in libello toto refutare aggressus fuerit. In dedic. sic scribit: *In medio savientis illius frigoris paroxysmo habita in Academia vicina Philosophica disputationi annexum vidi corollarium*: Calorem nihil aliud esse quam minimarum particularum insensibilium agitationem variam, Frigus è contra earundem quietem. *Itane? Ergo summum frigus summa quies erit. Quomodo ergo tanta quies tantas turbas (ligando flumina & pontum, enecandoque tot corporum, nisi se abscondunt, vitam) dare potest? Si in re seria joco esset locus, suadendum putarem, ut quem assertio illa oblectat per unius noctis spatium sub dio apricari, illasque quiescentium aura particularum delicias experiri, liberet. Nisi hic etiam consuetum illud suum, Sensibus non esse habendam fidem, opponant: hic etiam Aristotelem, qui Ignem urere negantem flammis admoventi, donec fateretur, suavit, susque deque faciendo.*

39. Ad quæ respondemus, planè invertendam esse propositionem, dicendumque, quod ligat flumina & pontum atque enecat tot corporum vitam, id esse quietem, non motum. Pontus glacie consistit. Ista consistentia quid nisi quies? Stare annon est quiescere? Et quid aliud est flumina esse ligata, quam quod partes aquæ juxta se invicem quiescant? Quæ moventur, ea sunt in statu separationis, quo continuo à se invicem recedunt ac removentur. At quæ ligata sunt, ea co-hærent, hoc est, simul hærent seu quiescunt: unde Germanis *hart ab harren*/ quæ vox commodè admodum de aquæ particulis durum glaciei corpus constituentibus usurpari potest. Nam licet glacies quidem tota vehatur interdum ac deferatur ab aqua, quatenus tamen frigida ac dura est, partes ejus juxta se invicem quiescunt. Si enim moverentur singulæ, non glacies, sed aqua essent. Præterea, solvere & ligare, ni fallor, contraria sunt. At quando solvitur acris hiems, nunquid illa solutio fit aquæ & aliorum corporum concretorum divisione in partes, fusione, segregatione partium aliarum ab aliis, id est, motu? Quomodo igitur intelligi potest ligationem eorum, quæ ligata sunt, quantisper ligata sunt, etiam in motu, ac non potius in quiete consistere?

40. Adhæc vita corporea in motu & varia spirituum, sanguinis aliarumque partium agitatione posita est, cujus in agitationis & motus imminutione ac retardatione nimia, tandemque sublatione mors consistit. Nihil enim magis est contrarium motui, quam quies. Ita non solum muscæ, verum etiam alia perfectiora animalia frigore enecantur. Et quemadmodum aquæ partes gradatim & paulatim ad

quietem rediguntur, donec ex iis glacies concreſcat : ita percipimus in membris noſtris frigefcentibus , quod magis magisque torpeſcant , obſtupeſcant & ſoporentur , motuque amiſſo ad quietem redigantur : quæ ſi major ac diuturnior ſit , homo vel pars illa frigida non tantum ſenſu privatur, verum etiam emoritur. Poſtremò quod adjicitur, nobis conſuetum illud eſſe axioma , *Senſibus non eſſe habendam fidem* , &c. id ſi alius dixiſſet , putarem eſſe vitium rectæ interpretationi oppoſitum. Nam ſenſibus in rebus Phyſicis cognoscendis non eſſe habendam fidem, nemo noſtrum ſtatuit. Quid ? quod humanorum ſenſuum fidem , valorem , præſtantiam , multò uberius quam eorum , qui nos ita rodunt, quiſquam in fine paraph. Med. VI. demonſtravimus. Illud ſolum negamus , quod ſenſuum perceptiones rerum extra nos poſitarum naturam & internas proprietates ſimpliciter nobis detegant.

DISP. XXXIII.

De Calore & Frigore quædam Problemata.

41. **P**Ræcipua inter nos & Cl. Comenium controverſia eſt, utrùm frigoris natura in motu; an potius in motus imminutione & quiete conſiſtat. Ille prius, nos poſterius affirmamus. Igitur ne diutius in generalibus verſemur, ſpeciminis gratia nunc ex ipſo problemata nonnulla phyſica producemus, viſuri, an-non è noſtris principiis tam commodè vel etiam commodius, quàm ipſe è ſuis, ad ea reſpondere poſſimus. Comenius itaque p. 48. *Cur animata corpora calore langueant, frigore recreentur ? Reſp. quia calor corpora depopulatur, attenuat, exhaurit, ad minimum vires à centra evocat : frigus vero eum nihil aufert, condenſat potius & concentrat.* Idem p. 55. *cur calor natura amicus, frigus vita inimicum dicatur.* Reſp. *quia vita ignis eſt, motu diffuſivo ſe ipſum ſuſtentans, quem ejus ſtatum calor fovet: frigus autem obturatione pororum &c. circum obſiſtens impugnat, & ſi prævalere poteſt ut poros undique occludat, exſtinguit : ut in muſci, aviculis, adeoque hominibus frigore peremptis patet.*

42. **CENSURA** I. Prior quæſtio nimis generaliter affirmat, quod calore langueant animata corpora , quoniam poſterior recte aſſerit, quod calor natura amicus. Dicendum fuit, quod calore nimis intenſo corpora langueant. 2. Nec ſufficit generalibus depopulandi atque exhauriendi verbis languoris illius cauſam denotaſſe, ſed ſpeciatim, quidnam ex animato corpore exhauriatur, à Philoſopho explicandum. Exhauriuntur autem calore, qui exiguarum partium varius motus eſt, ſpiritus & humores, in quibus motus & vigor corporis animati con-

confistit. Hinc languor in corpore reliquo. Nempe sicuti mola vento aut aqua destituta, ut sit nimio æstu, moveri desinit: ita quoque corpus animantis, absumentis calore spiritibus & humoribus, lentius ad motum evadit. 3. Non debuit in priore quæst. simpliciter poni, quod frigore corpora animata recreentur, cum è posteriore liqueat frigus esse vitæ inimicum. Dicendum erat, frigore moderato æstuantia animalium corpora recreari. Nam ut frigus nimis intensum, id est major exiguarum aëris & aquæ partium quies, gelu molæ aquam constringit, unde motus ejus cessat: ita pariter nimia in corpore animantis humorum spirituunque retardatio, vitæ corporeæ quæ in agitatione varia consistit, tam est adversa, ut vehementius urgens diutiusque perseverans eam prorsus auferat. 4. Ex dictis etiam patet, falsum esse, si ita generaliter efferatur, quod frigus viribus corporis animati nihil auferat: aufert enim motum, quia motus imminutio est, unde manus valde frigida ad scribendum ineptæ. Vide th. 22. Disp. de natura Frigoris. Reliqua verba impropria & metaphorica, de virium à centro evocatione, earum condensatione & concentratione, quia fortassis nil nisi verba sunt, brevitatis causâ jam non examino.

43. Com. p. 55. Cur nihilominus ad rerum generationem caloris & frigoris vicissitudine opus? Resp. quia textura corporis utraque operatione indiget æquæ ut textura linteæ diductione & reductione staminis. Hinc dierum & noctium, æstatumque & hiemum prorsus necessaria vicissitudo: ut quantum vaporis diurnus fervens sol per arboris aut herba ramos sublimando diduxit, tantum nocturna frigedo condenset, & cortici, ligno, foliis, fructibus agglutinari eoque modo corporefcere cogat. CENSURA I. Quemadmodum è præcedentibus apparuit & calorem & frigus nimium esse naturæ inimicum: ita hinc plenius elucet, calorem & frigus moderatum esse naturæ amicum, quamvis calor amicior frigore. 2. E nostris principiis liquet, agitatione particularum varia, quæ est caloris, per certos poros ad certa loca propelli quædam corpuscula, quæ ibi congregata succedente quiete vel retardatione motus, quæ est frigoris, sistuntur, figuntur & cohærent. Cumque hoc verbis agglutinari & corporefcere Comenius revera indicet, si quid veri dicit, quid-ni probare nostram de frigoris natura sententiam judicetur?

44. Comen. p. 52. 22. Cur refrigerato hypocausto circa fenestras vapores gelaſcant? & cur à parte interiore, non foris? Resp. hoc neque frigore solo fieri, neque calore solo, inde certum est, quod fenestra soli frigori exposita (ut in templis) talem circumgelationem non patiuntur; sed fenestra hypocaustrum,

rum, quæ calefacta frigescere incipiunt. Dum inclusus conclavi calor attenuatum ærem foras protrudit, circumfusus vero foris frigidus ær eundem repellit: ex hac lucta fit illa circa hypocaustorum fenestras pruinarum textura. Idemp. 53. Vnde intenso valde frigore pruina illa fenestrarum aut glaciatio, tam varias (arborum, florum &c. effingat figuras? Resp. quia frigidus ille extrinsecus veniens ær non motu directo, ceu telum aut cuneus, ingreditur, sed motu varie gytrato seu torsivo, mille vorticum instar. Qualiter & interior calidus ær sese torquet, sed motu contrario distorsivo. Hi ergo duo textores, calor & frigus, sibi obviantes, materiamque sic contrarie agitatam (ceu flamen aut tramam) secum ferentes, & per invicem texentes, non possunt non talem tela sua texturam, varîe in gyros picturam, producere.

45. CENSURA 1. Calore, hoc est, motu vario devehuntur vapores ad fenestras, quas cum transire nequeant, succedente à parte inferiore frigore, id est, motus imminutione, in aquam rediguntur; & si frigus sit intensius, id est, si major sequatur partium prius agitarum quies, glacies circa fenestras concrescit variâ figurâ, prout varia partium agitatio, per quam vapores alii aliis sensum aggregati, paulatim ac gradatim circa diversas fenestrarum partes imminuta fuit: confer th. 43, fin. 2. Falsa hypothesis est, frigoris naturam, æquè ut caloris in vario partium motu consistere. Neque proinde texturæ exemplum hic & alibi adhibitum satis idoneum putamus. 3. Videtur etiam autor caloris & frigoris actiones tanquam eodem tempore ad eundem effectum producendum concurrentes describere; cum tamen in proposito congelationis exemplo certum sit, frigus calori, hoc est, quietem motui succedere ac tempore posteriorem esse: perinde ut in explicato th. 43 agglutinationis exemplo, hiems æstate, noctes diebus posteriores considerantur.

46. Com. p. 49. Cur æstivus fervor tranquillo aëre fiat vehementior, vento autem (imo & aura leni) refrigeretur? Resp. quia caloris spicula vento dispelluntur, illorumque operatio (terebratio) turbatur. CENSURA 1. Spicula quomodo hic tribuat calori, ut alibi etiam frigori, cum ambo sint accidentia, non satis capio. 2. Nil ergo revera dicit metaphorica ista responsio, nisi quod aëris calor vento minuat, quod idem questio dicebat & nemo ignorabat. Philosophi erat propriis verbis perspicuè ostendere, qua ratione talem effectum ventus producat. Ratio autem è nostris principiis ista redditur, quod calor aëris sit exiguarum ejus partium agitatio varia. Atqui aura spirante totus ær simul movetur versus unam aliquam regionem, adeo ut singulæ aëris particulæ motum

tum suum varium tam liberè continuare in eodem loco non possint, quàm tempore tranquillo. Si crasso licet exemplo uti, dicemus, rem simili ferè modo se habere in nave, in qua pueri multaque alia animalia variè inter se discurrent: qui discursus in iis turbatur atque impeditur, dum ventus totam navem simul cum omnibus illis animalibus in unam partem rapit. Colliduntur enim vel tam prope ad se invicem accedunt, ut suum quodque animal motum & locum separatim sibi non retineat.

47. Com. p. 50. *Quomodo fiat ut eodem oris halitu & frigus è manibus & calorem è jusculo (dum sorbendum est) depellamus? Resp. quia utrobique, aque in calore ut frigore, motus & torsio est, qua flatu dispellitur.* CENSURA 1. Frigida responsio & falsa in eo, quod æquè in frigore atque in calore motum statuit: imò si vel maximè hoc ita esset, manet nihilominus quæstio, quomodo flatu, qui est motus, pellat calorem & frigus, quæ itidem motus? 2. Vera causa ex proxime antegressa thesi elucet. Nempe flatu vehemente, quippe qui materiam omnem *versus unam partem* dirigit, fit, ut partes subtiliores seu aëris seu alterius liquoris *varie agitata* (nam inde totum calidum appellatur) singulæ seorsum proprios motus liberè exercere non possint. Hinc calor simul è jusculo, simul è manibus expellitur isto vehementiore flatu. At leniore oris halitu, qui calidus, hoc est, qui constat varie agitatæ particulis, manibus nostris circumfuso illæ calefiunt, hoc est, secundum tenuiores sui partes varie agitari incipiunt. Simili utrumque illustro: Impetuosus ventus, totam arbores simulque ramos ejus omnes in unam urgens partem, tollit motum varium, quo ramos singulos diversis pulsibus lenior aura prius agitabat. Hinc etiam fit ut venti vehementiores semper sint frigidiores. Quæ omnia definitionem Caloris, quod sit motus exiguarum partium varius, apprimè confirmant.

48. Com. p. 55. *Cur æstate carnes cruda & alia, facile putrescant & verminent, non item hieme? Resp. quia æstivus calor omnem materiam solvit & liquat eoque spiritui reliquo corpuscula (sibi habitacula) molliendi occasionem dat. Frigus è contra ligat materiam, & in ea spiritum, ut nihil operari queat.* CENSURA: si frigus ligat materiam, si ligat in ea spiritum, nihil ut operari queat, utique natura ejus, quemadmodum nos volumus, in quiete consistit, non motu, ut ipse contendit. Dixerat certe p. 32, *omnem actionem peragi motu*: hic autem subjungit, frigore sic disponi materiam, ut nihil agat, hoc est, ut non moveatur: unde sequitur, ni fallor, quod frigidi corporis, quatenus frigidum est,,

est, partes quiescant, non moveantur. Contra verò calorè, utpote qui motus varius est, variè agitantur ac miscentur corporum humidorum partes, dumque ista ratione aliæ facile conjunguntur, aliæ sejunguntur, exiguo temporis progressu varia inde corporum genera existunt. Unde ætate tanta muscarum, pulicum aliorumque insectorum copia. Et solent agricolæ, quoties lenior hiems, ne insecta multiplicentur in satis, frigus subinde optare.

49. Com. p. 50. *Cur tepor calida manui frigus, frigida calor videatur? Experire è calidissimo balneo egressus, aut è gelidissima hieme reversus, & aqua tepida manum immerge, senties*) Resp. quia per teporem ibi caloris, hic frigoris spicula hebetantur. CENSURA I. Manui nihil videtur, sed menti, à vario corporis motu variis modis excitatæ. 2. Spicula caloris & frigoris antea rejecimus. Et quomodo tepor, id est, minor calor seu minor agitatio particularum (quæ media est inter majorem calidi motum & frigidi quietem) spicula tam caloris, quam frigoris, quæ jam hebetata sunt (ut Autor docet p. 48) hebetare queat, non intelligo. 3. Vera causa est, quod motus particularum aquæ tepidæ, respectu particularum, quæ in manu calida variè agitantur, tardior, frigoris sensum inferat; respectu manus frigidæ, cujus partes, scilicet molles ac fluidæ, tardissimo motu repunt, celerior, caloris sensum excitet. Vide Disp. de Calore th. 18. Et cogita, quàm bene hæc omnia stabiliant sententiam nostram, quod calor & frigus non nisi motu & quiete vel celeritate ac tarditate motus in rebus ipsis differant, licet in sensu multò majorem contrarietatem habere videantur. Simili nimirum ratione pedis frictio lenis sensum voluptatis infert, vehementior autem doloris. Qui profectò motus parum in re differunt, licet in sensu non minus contrarii sint, quàm calor & frigus.

50. Com. p. 20. *Cur æstate visus, auditus & olfactus multo longius penetrent quàm hieme? Probatum enim est campanas, quæ æstate ad milliare unum audiri possunt, hieme vix ad quadrantem, atque id etiam obtuse. Sic odores æstate vehementer diffundi (quò serventior fuerit aer, eò magis) notum est, cum hieme etiam animalium excrementa quasi inodora fiant &c.* Resp. Aeris raritas æstate visibilibus, audibilibus, olfactibilibusque speciebus promptè cedit, easque fluere quousque possunt sinit. Contra densitas hiberna eas arctat, hebetat, tandemque sistit. CENSURA I. De visu quod ait, experientiæ & rationi repugnat. Rationem paucis hîc explicare non licet. Experientia nobis frigidissima hieme tam clarè fulgentes in cælo stellas exhibet, quàm calidissima æstate, dummodo aer æque serenus. 2. Sonus cum tremulus

tas & vibratus aëris motus sit, ab ejus particularum varia agitatione seu à calore promoveretur, & contrà à frigore seu illius agitationis imminutione impeditur. Sic obtuse valde exauditur campana, dum ningit, quia materia nivis crassior tremulo & vibrato aëris motui officit. 3. Particulæ, quæ odoris sensum in nobis cient, non nisi calore agitatæ è corpore odorato (ut patet in multis quæ incenduntur) egredientes ad nares feruntur. At frigus, quoniam retardatio motus vel quies est, tam resolutionem corporis odorati, quam particularum per aërem vectionem impedit, adeo ut vel nullæ earum vel paucæ tantum, & eæ quidem segnius, ad nares perveniant. Nec possunt Autoris verba, quod *frigus liget, sistat, hebetet*, &c. aliam, quæ vera sit, significationem admittere quàm illam, quæ nostræ de frigoris natura sententiæ conformis est.

DISP. XXXIV.

De Fontium origine, Aquis, Vaporibus, Ventis.

I. **M**Agnum illum Hebræorum regem Salomonem non sine summo merito sapientissimum celebrari mihi persuadeo. Ita pulchra naturalis pariter & moralis scientiæ dogmata passim dedit. De fluviis inquit Eccles. 1. *Omnia flumina intrant in mare, & mare non redundat; ad locum unde exeunt flumina revertuntur, ut iterum fluant.* Naturæ miraculum dixeris expressisse. Quî enim illud fiat, ut mare non redundet, in quod tot tantaque flumina se exonerant? Aut quomodo fontes & fluvii à mari prodire possint, cùm sæpe in montium jugis scaturiant, quò aqua propter gravitatem ascendere nequit? Et cùm aquæ fontanæ & fluviales sint dulces, marinæ salæ, qua ratione contingere valeat, ut vel hæ ab illis, vel illæ ab his originem trahant? De ejusmodi rebus disquisitionem instituere naturalium rerum admiratorem, non modò rationi consentaneum est, verùm etiã ad optimi Creatoris potentiam ac sapientiam prædicandam utile. Ut autem procedamus methodo quàm facilissima, per Quæstiones & Responsiones dilucidas rem totam pertractare conabimur.

2. **Q**UÆST. I. Ecquod-nam ergo primum est & potissimum fluviorum fontiumque principium? Resp. Mare, ut testatur Salomon, cujus ductu philosophari modò animus est. Nec videtur Plato ab ejus dicto jam citato valde alienus existisse, quando in calce Phædonis ita scripsit: *χάσμα εἰς οὐρέουσι πάντες οἱ ποταμοὶ, καὶ ἐκ τούτου πάν-*

πάντες ἐκέρχον, id est, *Hiatus in quem omnia conflunt flumina, atque inde rursum effluunt.*

3. Q. II. Sed quomodo primùm è mari egreditur aqua ut eò perveniat, ubi fontes efficit? Resp. In terra cavitates esse multas, multos meatus & hiatus, ambigi nequit. Aquæ verò parva copia quantum se insinuare soleat in quolibet etiam exiguas cavitates, quàm studiose quærat exitum, præsertim si agitata fuerit, nemo nescit. Immensa aquæ copia in mari est, quod à ventis validissimo impetu commoveretur, admirabili æstu tumefactum à Lunæ corpore attollitur ac deprimitur. Nec proinde dubium esse potest, quin aqua marina vi ponderis & reciproci motus vehementiâ per terræ quoscunque meatus protrusa longè lateque diffundatur, adeò ut infra campos & montes magnæ cavitates aquis plenæ reperiantur.

4. Q. III. Facile percipio, ad imas istas profunditates penetrare posse maris aquam; at quo pacto inde in sublime attollatur, ut non solum ad exteriorem camporum superficiem, sed ad summa quoque montium juga pertingat, nondum capio? Resp. Attollitur ex istis cavitatibus aqua, quatenus vi caloris subterranei in vapores resoluta per meatus, quos ubique invenit, ascendit. Nihil enim aliud sunt vapores, quàm aquæ particulæ ope caloris ab invicem disjunctæ ac celeriter motæ.

5. Q. IV. Sed est-ne ignis aut calor in terra, elemento frigido, à quo talis procedat in aquas operatio? Resp. Esse ignes subterraneos eosque plurimos & maximos satis cognoscitur ex Ætna, Vesuvio, Hecla & aliis montibus ignes ingenti copia eructantibus. Et per est verisimile, ejusmodi ignes in plurimis etiam terrarum locis non erumpere; at solum per meatus diffundere calorem suum quaquaversum, uti calor in animantibus à corde per omnia viscera & corporis membra dispergitur. Argumentum quoque ignibus hisce thermæ præbent, è terræ planicie, quandoque etiam è montibus prosilientes. Ne nunc dicam de terræ motibus, qui ab iisdem ignibus excitantur. Fiunt enim quando sulphureæ & bituminosæ exhalationes in rimas & cavitates terræ magnâ copiâ affluentes, & pingues ibi crassosque fumos componentes, ab ignis aliqua scintilla protinus ita accenduntur, ut subito rarefactæ omnes carceris sui parietes magna vi concutiant.

6. Q. V. Admitto sanè ignes subterraneos; sed eorum calorem adeò per universum terræ globum esse distributum, ut omnis aquarum in vapores transmutatio inde proficiscatur, nondum planè convin-

vincor. Resp. Neque illud fieri necesse est. Datur enim in terra calor à Sole productus, qui ut latè per eam diffunditur, ita profundè fati in eam penetrat.

7. Q. VI. At cum radii solares in exteriori telluris superficie terminentur, quò fieri potest, ut ad profundiora ejus deveniat calor ab illis excitatus? Resp. Particulæ terrestres à radiis solis impulsæ, alias sibi vicinas, ad quas isti radii non pertingunt, agitant, hæque rursus alias, & sic consequenter. Cumque semper tota terræ medietas à sole illustretur, tot ejusmodi particulæ simul commoventur, ut quamvis lumen in prima opaca superficie subsistat, calor tamen ab eo genitus, usque ad interiores terræ partes debeat pervenire, ubi metallorum & fossilium (uti plantarum circa exteriori telluris superficiem) generationem promovet. Verùm dari calorem in terra, undecunque tandem oriatur, vel ex eo manifestum est, quod fumare soleat ipsa, si hiberno effodias tempore, quodque citò liquefiat nix, quæ agro ceci-derit recens inarato.

8. Q. VII. Jam itaque didici, ignem & calorem per terræ interiora passim dispergi, & experienciâ edoctus novi, naturam hanc esse caloris, quòd aquam rarefaciat inque vapores resolvat, quod in aqua ad ignem calefacta & radiorum solarium in paludes & humida loca operatione quotidie observo: Sed scire velim, ubi & à qua causa illi vapores in aquam, id quod requiritur ad fontes constituendos, iterum coeant & congregentur? cur non retineant semper vaporum formam, per terram huc illuc commoti aut in aërem egressi? Resp. Equidem vapores ejusmodi non pauci ad nubes usque attolluntur, atque ibi frigore postea concrecentes, pro vario concretionis modo, pluvias, nives, grandines producant: attamen eorum plurimi quò minùs in aërem ascendant, frigore circa superficiem terræ calidioribus partibus succedente impediuntur, eoque torpescunt in aquam revertuntur. Quæ causa est, ut hiberno tempore largior sit aquæ effusio, etiamsi non sint imbres: Sicuti matutino quoque tempore largior est quàm pomeridiano, propter noctis præcedentis frigus. Et enim exiguus calor sufficit ad aquam in vapores resolvendam; namque pannus v. g. lineus aqua perfusus facillimè exsiccat in hypocausto tepido, quæ exsiccatio fit aquæ in vapores resolutione. Similiter exiguum frigus satis habet ad vapores in aquam cogendos efficaciam, quod in vaporibus, qui vitreis fenestris nostris adhærent, quotidie experimur, dum levi frigore in guttulas aquæ condensantur, quæ inde

de in terram sæpe defluunt. Etiam exiguum operculi frigus efficit, ut halitus ex olla evaporans in aquæ guttulas concreascet.

9. Q. VIII. Quo autem pacto evenit, ut vapores ad montium iuga identidem ascendant, tam longum iter prius emetientes, quàm in aquam vertantur? Resp. Terræ meatus, per quos vapores sursum tendunt, eò usque continuantur: atque facilius per istiusmodi meatus vapor ascendit, quia à terræ particulis suffulcitur; quàm per aërem, cujus fluidæ ac molles particule ipsum ita fulcire non possunt. Eadem de causa alimentum facilius sursum movetur per poros stirpium & segetis, quàm per liberum aëra, unde agri frumento & horti arboribus consiti magis emaciantur quàm non consiti. Parque fumi, melius per caminum quàm per apertum aërem assurgentis, ratio est. Suntque hæc dignissima, quæ observet naturalium rerum indagator.

10. Q. IX. Quando jam circa superficiem terræ vapores in aquam sunt conversi, quid fit, quod hæc aqua mox in conspectum nostrum prodeat, aut certè latente cursu per vias parum distantes ab exteriori telluris superficie decurrat; cur non potius descendit iterum per eosdem illos meatus, per quos vapor ascenderat? Resp. Meatus illi per quos vapor ascendit nimis sunt angusti, quàm ut aqua per eosdem descendere valeat. Longè enim tenuiores vaporum sunt particule, quàm aquæ guttulæ, unde in resolutionibus chymicis observare licet, quòd millenæ aliquot vaporis portiuncule subinde vix unam guttam aut sensibilem molem component.

11. Q. X. Quoniam igitur aqua per angustos terræ meatus descendere nequit, per quos vapores ascendere, necessum est, ut in exterioribus terræ partibus vias inveniat latiores. Resp. Ita est: & hæc viæ aquam oblique secundum vallium & camporum declivitatem deducunt: atque ubi istæ subterraneæ aquarum viæ, in superficie montis, vel vallis, vel campi terminantur, ibi fontes scaturiunt, quorum rivi multi simul congregati flumina componunt, perque decliviores exterioris terræ superficiei partes in mare labuntur. Sic nimirum perennium fontium & fluviorum aquæ ad mare tandem redeunt, ex quo primum venerant. Aliis interim rivis & fonticulis, minùs diu fluentibus, pluviæ ortum præbere possunt, sicut etiam eadem perennes fontes & fluvios augent, quos fervens solis æstus minuit.

12. Q. XI. Hactenus ergo fluviales & fontanas aquas à mari præcipue

cupiè derivâsti, utpote à quo & ipsæ pluviz magnam partem: Verum ut plenius ea de re persuadear, cupiam illum generationis fontium modum similibus quibusdam exemplis ulterius mihi declarari. Resp. Jam-jam de Chymicis resolutionibus loquebamur, à quibus exemplum satis appositum capere possis. Nam sicut in destillationibus ab igne supposito ex humidis corporibus multi vapores per Alembicum elevati, in frigidulo vasis illius capite in guttas concresecunt: Ita aqua in terræ cavitatibus contenta à calore in vapores resolvitur, qui vapores ubi ad terræ superficiem frigidiorē pervenire, formam aquæ recipiunt.

13. Q. XII. Habes-ne aliud insuper exemplum in promptu? Resp. Habeo tam clarum & evidens, ut nihil cogat ad Chymicorum abire officinas, cum hocubivis locorum occurrat, solidoque sententiam nostram firmet argumento. Ejusmodi est pluviz in aëre productio. Rationi enim quàm maximè congruum est, ut talis existat generationis aquæ modus sub terra, qualis est supra terram. At supra terram pluvia in aëre generatur, quando vapores, ex aqua aliisve humidis corporibus vi caloris assurgentes, in frigidiorē aëris regione rursus condensantur. Quare etiam in terra vapores, ex aqua in profundis cavitatibus latente beneficio caloris educti, tandem frigore locorum per quæ commeant, in naturam aquæ converti, aut potius reverti necesse est.

14. Q. XIII. Confirmata mens est, uti vix quicquam desideret amplius, nisi quid ultrò velis adjicere. Resp. Ne quidem extra temetipsum egredi opus fuisset, cum in tuo corpore, velut in minori mundo, exempla generationis aquæ, cujusmodi in majori mundo nunc annotata fuit, habeas luculenta. Ita vapores è stomacho ascendentes frigore cerebri condensantur, posteaque in os & aliò depluunt. Ita lachrymæ fiunt ex vaporibus qui egrediuntur ex oculis. Ita sudor provenit è vaporibus, qui exeuntes ex aliis corporis partibus in earum superficie in aquam convertuntur. Quorum omnium consideratio attentior, uberiores, quàm ut in præsentī par sit adjungere, tractationem postulat.

15. Q. XIV. Satis jam perspexi, quomodo ex mari fontes, vel in ipsis montium jugis, oriantur, quomodo rivi eorum juncti flumina, in mare tandem decurrentia, progignant. At cum assidue multa flumina, multæ aquæ ex montibus versus mare fluant, quæ sit, quodd cavitates ex quibus ascendunt non exhauriantur, nec

mare augeatur? Resp. Cùm patentissimi sub terra sint meatus, tanta semper aquæ quantitas à mari versus radices montium redit, quanta ex montibus egreditur; & hinc fontium fluviorumque perennitas dependet. Nempe circularis quidam hîc aquarum est processus, perinde ut in aëre super terram, ubi ex aqua vapores attolluntur, vapores in aquam condensantur, quæ aqua denuò in terram depluit, inde rursus vapores, atque ita deinceps.

15. Q. XV. Cùm igitur fontes è mari proficiscantur, mare autem falsum sit, mirum est, quod aquæ fontanæ non retineant illam falsedinem? Resp. Mirari defines, si scias maris aquam constare ex particulis aliis dulcibus, aliis falsis, quodque falsæ rigidæ sint & inflexiles, dulces contrà molles & flexiles. Ex hoc enim intelliges solas dulces particulas in fontes ascendere, cùm sint tenues ac flexiles. Salas verò cum rigidæ existant ac duræ, nec facilè in vapores mutari, nec ullo modo per obliquos terræ meatus transire posse.

16. Q. XVI. Unde verò constat, talem esse aquæ marinæ particularum differentiam? Resp. Cum nulla in rerum natura corpora dentur tam accuratè similia, quin semper aliquantulum in magnitudine & figura differant, moroso nimis sit ingenio, qui difficulter sibi persuaderi patiatur, etiam aquæ partes non omnino æquales esse, & præsertim in mari (quod ingens est aquarum omnium receptaculum) quasdam tam crassas inveniri, ut instar aliarum diversimodè inflecti nequeant. Hæc sanè causa est, cur aqua maris arenâ percolata dulcescat, quia nimirum partes salis cùm sint inflexiles, non ut partes aquæ dulcis, per exiguos illos anfractus, qui circa sabuli grana reperiuntur, labi possunt. Ac denique gustus ipse differentiam patefacit. Salsæ enim partes in cuspides erectæ ac telorum instar vibratæ, linguæ poros ingrediuntur, atque ita ad illam pungendam satis altè penetrant. Ex adverso partes aquæ dulcis molliter supra linguam fluitantes & semper in latera, ut ita dicam, jacentes vix gustu queunt percipi.

17. Q. XVII. Ex dictis agnosco, fontes & fluvios, cùm non nisi ex aquâ per multam arenam terramve percolatâ vel per vapores sublatâ consent, minimè salos esse oportere. Sed quærere adhuc lubet, cur mare non dulcescat propter tot ac tanta flumina dulcia in illud influentia? Resp. Si majus flumen sit majorique cum impetu in mare labatur, per intervallum aliquod suam retinet dulcedinem, sed postea cum salsa maris aqua ibi relicta iterum miscetur, quæ mixtio statim etiam

etiam contingit, ubi minores fluvii in mare veniunt. Nam æqualis ferè salis quantitas in mari perpetuò remanet.

18. Q. XVIII. Cùm hæc ita se habeant, uti jam fuit expositum, quo igitur pacto evenit, ut in quibusdam puteis à mari valdè remotis multum salis reperiatur? Resp. Quoniam terra multis rimis fatiscit, fieri potest ut aqua salia non percolata ad puteos illos perveniat; sive quia maris superficies æquè alta est atque ipsorum fundus, sive etiam, quia ubi viæ sunt satis latæ, faciliè salis particulæ, à particulis aquæ dulcis, per corporis duri acclivitatem sursum evehuntur. Hoc ex eo confirmatur, quòd in nonnullis montibus magnæ salis moles instar lapidum concretæ visantur. Quippe aqua maris eò ascendente, ac particulis aquæ dulcis ulteriùs pergentibus, solum sal in cavitatibus, quæ casu ibi fuerunt, remansit, ipsasque implevit.

19. Q. XIX. Quoniam eò jucunda contemplatione devoluti sumus, ut salia & dulcis aquæ differentias cognoverimus, placet illi materiæ paulisper insistendo, alias de mari & aqua quæstiones eodem pertinentes proponere. Rogo itaque cur sal carniū corruptionem impediat, dulcis verò aqua eas corrumpat? Resp. Particulæ salis punctim ingressæ poros carniū non modò humiditatem, quæ mater putredinis, tollunt: Verùm etiam tanquam paxilli inter carniū partes defixi, immotæ & non cedentes illas sustinent atque impediunt, ne aliæ magis lubricæ seu plicatiles immixtæ illas concutientes loco moveant & ita corrumpant corpus quod componunt. Hinc etiam carnes sale conditæ paulatim magis indurescunt. Aqua verò dulcis dum se variis modis inflectit atque huc illuc poris carniū illabitur, faciliè illas emolliendo dividit & corrumpit.

20. Q. XX. Cur naves quas mare sustinuit, aliquando merguntur in flumine? Resp. Quia marina aqua propter partes salias, quæ crassiores, solidiores ac proinde etiam graviores sunt, magis resistit. Eadem de causâ naves non altè adeo immerguntur in mari quàm in flumine. De lacu Asphaltite (qui Hebræis mare salis sive salissimum ob salsedinem, aliis mare mortuum ob immobilitatem dicitur) legimus, quòd etiam natâre nescii, si vinctis à tergo manibus injiciantur, in eo fluitent, nec mergantur, sicuti Vespasianum ipsum expertum fuisse Josephus belli Judaïci scriptor memoriæ prodidit. Sed præter salis copiam fortassis alia multa ac diversa in hoc mari perpendenda sunt. Quædam aquæ præ tenuitate nimia, nulla sustinere navium onera perhibentur. Uti nec in aëre navigare licet.

21. Q.

21. Q. XXI. Cur æstate ac sub zona torrida mare salius experimur? Resp. Quia sol continuò ex superficie maris tenuiores dulcioresque partes educit, & in vapores agit, relictis salis & crassioribus. Quare ubi solis æstus est vehementior, plures ejusmodi vapores excitantur, qui in aquam redacti non semper eodem relabuntur unde venierunt, sed plerumque aliorsum deferuntur. Hanc solis & aquarum naturam cum attenderent Ægyptii, è Nilo ad diurnum potum noctu potissimum hauriebant aquam, priusquam sol, quod tenuius dulciusque foret, extraxisset.

22. Q. XXII. Cur aqua quæ igni apposita diu bullit, postquam refrigerata est, celerius congelatur, quàm frigida & cruda? Resp. Quia tenuissimæ ejus partes quæque propter inflectendi facilitatem maximè congelationi resistunt, ex ea dum bullit egrediuntur.

Appendix de Aquis, vaporibus, ventis.

23. Q. XXIII. Cur madefactis velis velocius procedit navis quàm exsiccatis? Resp. Quia aqua stipat & claudit velorum poros & meatus, unde hæc magis obstant vento, transeundi facultatem ei minorem concedendo, majorem propellendi.

24. Q. XXIV. Potest-ne naturalibus de causis accidere, ut sanguine pluat? Resp. Sanguineum colorem pluvia facile acquireret, si genita fuerit è vaporibus qui exhalant è locis minio aut rubrica abundantibus, quomodo nix in Armenia quandoque est rubra, ob minium quo regio illa abundat; vel ex locis sanguinolentis post magnas hominum clades; vel sanguineum colorem induere possit propter calorem solis intensum, quomodo febricitantium urinæ, item aquis per calidos cineres percolatis rubor conciliatur.

25. Q. XXV. Cur halitus oris, sudor item calentium equorum magis videtur hieme quàm æstate? Resp. Tempore hiemis halitus & sudor propter aëris frigus specie densi & obscuri fumi crassescit, quandoque etiam in aquam concrescit, imò intensiori frigore barbis & pilis adhærens congelascit: Contrà verò æstate propter ejusdem aëris calorem dissipatur & non apparet.

26. Q. XXVI. Sunt-ne plures vapores in aëre æstate cum non videntur, an verò hieme, cum videntur? Resp. Plures esse hieme vulgus opinatur, tu verò scies æstate plures esse, quia fieri nequit, quin sol torridus æstivo tempore, longioribus diebus, lacui aut locis paludosis incumbens multò plures vapores ex iis elevet, quàm hieme inde

inde queant elevari. Tum enim temporis notatur manifestissime, magis aquas subsidere & decrefcere, quàm aëre frigido & obscuro. Plus etiam è corpore animalis æstivo tempore exhalare rationi patet, quamvis halitus tum non appareat, ob causam præcedente responfione allatam.

27. Q. XXVII. In quo confiftit natura ventorum? Resp. Generatim quidem omnis aëris agitatio fenfibilis ventus appellatur, à quacunque etiam caufa proficifcarur: ita aër è folle elifus aut flabello impulfus, ventus dicitur. Speciatim verò venti latiùs diffufi terrasque & maria perflantes, nihil funt nifi vapores moti, qui dilatati ex loco arctiori in quo erant, in alium ubi faciliùs expandantur, tranfeunt.

28. Q. XXVIII. Cur sæpius in littoribus venti interdium à mari, noctu à terra fpirare deprehenduntur? Resp. Sol dum splendor communiter plures vapores ex mari quàm terra attollit, quia terra multis in locis exficcata non tantum materiæ illi quàm aqua fuppeditat: & contrà, cum fol recessit, calor relictus, plures è terra quàm è mari elevat, quia terra, utpote corpus craffum & ponderofum, diutius quàm mare calorem fibi imprefsum retinet. Ex quo autem loco plures vapores veniunt, inde venti fpirant. Ignis etiam fatuus ob eandem causam viatores noctu ad aquam ducit, indifferenter enim aëris curfum fequitur, qui aër ad aquam à vicinis terris propterea defertur, quòd ille qui ibi eft magis condenfetur.

29. Q. XXIX. Cur sæpe venti juxta maris littora cum fluxu illius & refluxu mutantur? Resp. Quoniam aër qui fuperficiem aquarum tangit, motum illarum quodammodo fequitur. Eadem ratio eft, cur tranquillo aëre circa majora flumina placidi quidam venti curfum earum fecuti fentiantur.

30. Q. XXX. Qui fit quòd eadem tempeftates graviùs in mari quàm in terra fæviant? Resp. Quia vapores ex aquis emiffi femper humidiores & craffiores funt illis, qui ex terris attolluntur, quique idcirco multo plus aëris atque exhalationum fecum vehunt. Eandem ob causam idem ventus qui in una regione ficcus eft, in alia humidus effe poteft. Ita venti meridionales humidi ferè ubivis, ficci in Ægypto effe feruntur, ubi terra Africæ, ficca & combufta, materiam iis fubminiftrat.

*Adversus eos, qui naturalem cognitionem & appetitum
quendam Plantis & corporibus inani-
matis affingunt.*

1. **Q**Uoniam vim & naturam rerum corporearum hætenus exposuimus, solis his nixi principiis, quantitate, figura, situ, motu, quiete (in quibus & lucis, perspicuitatis, saporis, caloris & reliquarum, quæ vocantur, qualitatum corporearum naturam consistere in Physica contracta & hisce Disputationibus docuimus): alii verò Philosophi unà cum forma substantiali *cognitionem aliquam naturalem & appetitum* corporibus inanimatis & plantis insuper adscribunt, videbantur hoc loco repetenda, quæ olim contra ejusmodi opinionem disputavi. Id enim tum ad præcedentem sub-cælestium corporum, tum ad sequentem Plantarum theoriam conferet.

2. I. Quali argumento quidam illorum Philosophorum utuntur ad probandum, cælestia corpora vitam vel animam non habere, quod nempe vita vel anima illa nec vegetativa, nec sensitiva, nec rationalis esse queat, nec liceat quartam aliquam & novam vitam comminisci, nisi lubeat entia sine causa & necessitate multiplicare; tali & nos in hac materia & majori quidem evidentiâ, uti possumus.

3. Nimirum in confesso est apud nos & adversarios, cognitionem intellectualem & sensualem in mundo inveniri. Quod si autem ipsi aliam quandam tertii generis, distinctam ab utraque, in rebus existere contendunt, regerimus illos sine ulla necessitate, sine causâ evidente nova in rerum naturam entia introducere, quod nulla unquam Philosophia permisit.

4. II. Quæ & qualis illa sit cognitio sive perceptio, si & sit, & ab intellectu sensuque diversa sit, nullo modo scriptores illi explicare possunt, adeoque judicant illud esse in rebus corporeis, quod nulla ratione intelligunt quale sit: & tamen dicunt esse tale, ut pro cognitione quidem & perceptione, non tamen sensu vel intellectu vero debeat haberi, verba quædam proferentes, animo nihil rei concipientes. Sic agendo peccant contra principem omnis sani judicii regulam, quæ

quæ severè mandat, ne quid de rebus philosophicis judicemus, quin priùs clarè distincteque perceperimus.

5. III. Cognitio illa naturalis, quam vocant, est vel cum discursu conjuncta vel à discursu sejuncta prorsus ac separata. Si discursiva est; ergo & syllogismos faciunt lapides, & sophismata necunt plantæ, nisi fortè perfectiùs homine ratiocinentur & paralogismis nullis unquam sint obnoxii.

6. Sin cognitio illa naturalis non est discursiva, id est, si res corporeæ non cognoscunt intermedio aliquo notiore ad ignotum perveniendo, sequitur ipsas cognoscere, id quod cognoscere dicuntur, immediata perceptione objecti cognoscendi, hoc est, intuitiva cognitione. Hoc sanè Philosophi indicare videntur, quando aiunt, *aquam sursum ferri propter fugam vacui, lapidem deorsum tendere ut quiescat in loco suo naturali, aquam in rotundas cogere se guttulas quò ab hoste se tueatur, plantas alimentum sibi conveniens agnoscere &c.*

7. Quòd si autem aqua, plantæ, magnes & reliqua corpora terrestria cognoscunt, non ratiocinando, at simpliciter objectum intuendo, illud consequitur, res merè corporeas divina quadam cognoscendi vi esse præditas, cui similis ne quidem in homines cadat, nisi sapientissimos. Hi namque simplici mentis intuitu multa vident, quæ ab aliis hominibus longa demum ratiocinatione colliguntur. Hinc Aristoteles (verba hæc sunt Joh. Neldelii, Institutione de Usu Organi pag. 232.) *non absque singulari consilio definitionem thesi differentem postposuit demonstrationi τῆς διότι, quia ipsa ultimus & summus fructus est, adeoque Τελευτὸς seu apex omnis demonstrationis ac perfectæ scientiæ, siquidem proximè accedit ad cognitionem intelligentium naturarum, qua sine discursu rationis omnia intelligunt.* Hæc ille. Ego pro illo, omnia, potiùs dixerim *pleraque*: quoniam Angelos etiam ex signis non pauca colligere atque addiscere, vix dubitandum videtur.

8. IV. Dum adversarii judicium rebus corporeis tribuunt (dicunt enim *plantas alimentum sibi conveniens à noxio secernere*, assignant rebus *motum cum discretione ac vim discretricem naturalem*: Loca scriptorum antehac alibi adduxi neque in præsentī lubet repetere), talibus involvuntur difficultatibus, unde se extricare nequeunt. Quæro enim an discretionis illud judicium, exempli causâ in plantis, sit immune semper ab omni hæsitazione, an verò interdum cum dubitatione vel etiam errore conjunctum.

9. Si dubitant quandoque plantæ & ambigunt ; sit-ne alimentum utile nec-ne , poterunt iudicium aliquantisper suspendere , ac præditæ erunt indifferentiæ libertate : quum tamen è contrario hæcenus creditum fuerit ab omnibus , entia ejusmodi ex naturæ tantum agere necessitate , nec aliter posse agere quam agunt.

10. Si nunquam dubitant , nunquam deliberatione opus habent plantæ , perfectiores iterum erunt Homine. Homo namque sæpissimè ambigit , utrum quod offertur , salutare sit alimentum , an potius noxium venenum , haut raro medicum consulit , de cibo & potu assumendo ratiocinatur ac deliberat , & tamen aberrat frequentissimè. Infans candelam in os ingerit , & carbones quandoque pro alimento deglutit. Plantæ verò prudentiores infante nunquam attrahunt quæ tam sunt ad alendum inepta ; imò , si placet adversariis , prudentiores viris adultis ac peritis , qui in alimentis deligendis atque assumendis quotidie variis modis per ignorantiam delinquant.

11. Jul. Cæsar Scaliger quamvis alibi contendat *unicuique enti insitam esse appetitionem infinitatis atque aternitatis* , Exerc. 9. tamen Exerc. 138 , de plantarum sensu Cardani opinionem refellens hæc inter alia promittit : *Hostilitas illa quam aliæ contingat ratione , quam cum ignis aquam fugit ? Sentit-ne ignis ? terra cum descendit sentit-ne centrum quod non vidit ? Nam quæ simpliciore natura constant , non nisi unum id , cui destinata sunt , agunt. Ignis non potest non calefacere : Terra non descendere : Formica non parere annonam : Apes non mellificare : Fucus ponere operam. Quod si Camelus novit , limpidioris aqua potum , aut intestinorum dolorem excitaturum , aut propter simplicitatem , minus alimenti collaturum , atque idcirco pede prius obturbatam bibat : longè sit Camelus homine sapientior , qui quæ nunquam expertus sit , sciat : catua vel medicus vel philosophus. Caterum in his ea neutiquam à ratiocinatione diriguntur. Sicuti ne alia quidem animalia , cum quæstis comparatisque remediis bonam valetudinem assequuntur : sed solo Natura vel ductu vel impulsu , quem Cicero infinitum vocat , sine ulla ratione. Hæc ille.*

12. Atqui instinctum illum naturalem vix ullus philosophorum illorum aliter animo concipit ac rationem vel intellectum vel mentem aliquam : licet verbo quidem rationem esse neget. Nos lectis & signatis verbis id *motum localem* nominamus , quem ut totius & partium , etiam exiguarum , certa quantitate & figura præditarum , hic solummodo

modò consideramus. Nihil quod cognitionem vel cogitationem redoleat addimus. Nihil, inquam, quod rebus insit corporeis, veluti earum proprietas vel affectio. Divinæ enim rationis ductum infallibili necessitate natura corporea sequitur. Atque ita opus naturæ est opus intelligentiæ non errantis: haut secus ac sagitta à sagittario perito dirigitur ad scopum, quem tamen ipsa minimè cognoscit.

13. V. Res illæ, quibus naturalis cognitio, naturalis quædam discernendi vis adscribitur, sunt vel tantum corporeæ, vel tantum cognoscentes, vel ex re corporea & cognoscente compositæ. Simpliciter & merè cognoscentes si sunt, erunt Intelligentiæ vel Mentis separatæ. Compositæ si sunt, erunt homines, aut certe erunt animalia, quoniam ex corpore & anima cognoscente constabunt. Si corpus organicum dicas requiri ad ejusmodi compositionem, quale nulum est in lapidibus, uti nec tale est in plantis, quale requiritur in animali; cur non eodem modo per corporeas dispositiones solas pergis res naturales distinguere? cur ipsis notitiam & voluntatem, quam quidem appetitum naturalem vocas, affingis?

14. Sin res illæ, quas naturali donas cognitione & appetitu, sunt merè corporeæ atque ita non compositæ, sed simplicem habent naturam, cognitione præditæ esse nequeunt, quia corporeitas & cognitio, sive cognoscendi vis, tanquam unius naturæ attributa jungi neuriquam possunt. Notandum quippe est, quæ sunt unius ejusdemque rei attributa, nexum, affinitatem & cognitionem inter se habere: Verbi gratiâ, quia nulla res potest intelligere, quin eadem & velle possit, & vice versa, hinc voluntatem & intellectum unius naturæ attributa esse agnoscimus. Quia nulla res potest esse extensa & figurata, nisi possit & moveri, vel ex finibus unius corporis in fines alterius transferri, & vicissim, quia omne mobile est figurabile, omne figurabile extensum, attributa hæc ad unam pertinere substantiam intelligimus. (Repete hîc quæ Disp. 12. th. 14. item Disp. 28. th. 37. & sequentibus docuimus.)

15. At quænam, quæso te, est affinitas, quis nexus, quæ naturæ cognatio inter corporeitatem & cognitionem, hoc est, inter longitudinem, latitudinem, profunditatem, figuram, situm ex una parte, & cognitionem, perceptionem, judicium ex parte altera? Neque potest cognitio aut perceptio fluere ac dependere à natura corporea,

quia nobilior & excellentior ab ignobiliore & indigniori produci & promanare nequit.

16. VI. Ex iis quæ in Logicis & alibi de præjudicatis infantie opinionibus tradidi, erroris hujus, quo cognitio rebus datur corporeis, origo manifesta est. Nimirum quia homines ab ineunte ætate notitiam & propensionem voluntatis cum corpore junctam in se experiuntur, ita ut quoties membra eorum moventur, toties ferè perceptionem & cogitationem apud se deprehendant, inde est quod in aliis rebus similes quosdam motus vel operationes corporeas observantes illico putent similem aliquam perceptionem, cogitationem, appetitum iis esse connexum. Ita ferè res Universi omnes tanquam ex corpore & mente (quam modò formæ substantialis, modò cognitionis naturalis, modò aliis nominibus insigniunt) compositas sibi repræsentant. Estque hoc ipsum plurimorum gravissimorumque errorum & confusionum fundamentum: quod velim diu multumque Philosophi attendant.

17. Opponunt adversarii: 1. In rebus merè corporeis datur appetitus naturalis à voluntate seu appetitu rationali & sensitivo seu animali distinctus. Ergo datur etiam cognitio à ratione & sensu diversa: ubi enim est appetitus, ibi & cognitio, quia ignoti nulla cupido.

18. Resp. 1. Do Cl. Sennerto Hypomn. Phys. I, capite 5, aliisque Philosophis hanc consequentiam sive hunc nexum appetitus & cognitionis; neque hanc sine illo, neque illum sine hac usquam reperiri posse statuo. Hoc enim confirmatur iis quæ th. 14 modò diximus. Sennerti verba sunt: *ut appetitus quidam naturalis, quem vulgo instinctum naturalem vocant, datur: ita etiam datur cognitio aliqua naturalis, à sensu & intellectu distincta. Nihil enim potest aliquid appetere, ut gratum, vel fugere, ut ingratum, nisi cognitione aliqua naturali illud gratum & sibi conveniens, hoc ingratum & sibi non conveniens esse agnoscat. Nihil enim appetitur, nisi quod prius agnoscitur. Hac cognitione planta alimentum sibi conveniens agnoscunt, appetunt & ad se trahunt; quod verò sibi conveniens non est, relinquunt, aliud in corticem, aliud in fructum convertunt.*

19. Resp. 2. At nego Sennerto aliisque appetitum naturalem, quem sibi fingunt, iisdemque argumentis, quibus cognitionem naturalem, appetitum quoque evertio. Dico ab illis viris altero errore alterum stabiliri atque ex uno absurdo commento aliud inferri. Nota verò, quòd

quòd ipsis illis argumentis, quibus naturalis cognitio rebus corporeis denegatur, sensus etiam & intellectus iisdem abjudicatur. Tenemus illud Cartesii Resp. sext. §. 10. *Nulla cognitio nisi in mente esse potest.*

20. Opponunt 2, non posse rem ullam ad sui conservationem tendere vel eam sibi procurare, nisi cognoscendo & appetendo media conservationi inservientia. Resp. Quomodo res merè corporeæ non quidem absque ulla cognitione, sed absque ulla cognitione sua conserventur, facile intelligitur ex hujus Disp. th. 12. item ex Disp. physica 19. th. 1. 4. & aliis alibi traditis.

21. Obducunt 3 multa exempla attractionis, consensus, dissensus, sympathiæ, antipathiæ, quæ cognitionem & appetitum rebus corporeis inesse demonstrare videantur. Resp. Quomodo alantur & crescant stirpes sine ulla attractione, collige ex Disp. proximè antegressæ th. 18. & multò clariùs ex Theoria Viventium secutura. Quomodo gutta rotunda fiat, gravia absque cognitione & appetitu descendant, repete ex Physica Contr. §. 801. sqq. Quomodo magnes ad ferrum moveatur sine ulla attractione, cognitione, appetitu, Physica Cartesiana Princip. parte quarta clarissimè docet eum qui non planè est excæcatus. Error aliorum inde procedit, quod ingenium non satis exercent in explorandis viribus naturæ merè corporeæ, ad quam pertinent magnitudo, figura, situs, motus, quies, quæ Physicæ nostræ sunt principia. Illa equidem si minùs contemnerent atque attenderent accuratiùs, secundum tenorem argumenti nostri primi th. 2 & 3 prolati nollent entia temerè multiplicare, nollent (quod reliqua nostra urserunt argumenta) pura puta corpora humanis mentibus anteferre.

22. Observa enim hîc iterum illud Scaligeri Exerc. 102. sect. 5. ubi Cardano dicenti, magnetem trahere per animam, ita contradicit: *At anima trahere nequit quod non tangit. Sic enim Magnetis anima esset quàm Hominis anima nobilior. Hominis enim anima extra Hominis corpus actionem habet nullam.*

Atque hîc finis esto harum Disputationum Physicarum, quibus hoc Disputationum nomen tantùm ex consuetudine datum est, quoniam earum pleræque, more in Scholis recepto, pro exercitio Juventutis Academicæ diverso tempore nobis fuere. In illis quidem de *Motu*, paraphrasin vel commentarium in alteram partem Principiorum,

rum Philosophiæ Cartesianæ habes. De Meteoris & Magnete aliisque materiis physicis tractandi, ubi similiter scholastica nostra exercitia occasionem nobis dederint, eorum quoque rempublicam literariam participem faciemus, nisi id ei ingratum fore intelligamus. Ea quidem quæ in præsentia damus & juvenum & senum, in Germania præsertim, frequentes instantiæ nobis extorserunt.




P R Æ.

P R Æ F A T I O

In

THEORIAM VIVENTIIUM.

 Uanquam de rebus haut satis cognitis opiniones suas tanquam dogmata vel decreta lectoribus venditare philosophum haudquaquam decet; hac tamen venia datur in Scholis agenti, ut scribat interdum aliqua & in lucem edat, in quibus examinandis alii cum ipso veritatis studiosi occu-

pentur. Equidem hac de Corporibus Viventibus generalia, deque Plantis specialia, qua propositurus sum, à Medicis, Anatomicis, Botanicis vera Philosophia gnaris rectius tractari atque ulterius perfici posse nullus ambigo. Mihi enim pro ingenii modulo & officii publici ratione magis familiares & nota esse debent res illa simplices, qua à materia secreta vitam agunt spiritualem, quam ha composita & ex materia concreta, qua vitam corpoream vivunt. Idcirco facile contingere potuit, ut cum ratio tum experientia me alicubi defecerit, ubi à doctioribus erudiri gratum erit. Nec solum tenuitatis mea in omnibus, qua unquam scripsi, verum etiam in his properata quodammodo descriptionis mea probe mihi sum conscius. Quando autem Physica mea pluribus jamdudum petentibus concedenda erant, hac de Viventibus minimè omittenda videbantur: idque duas potissimum ob causas; quarum altera est, ut obviam iretur veteri & justa doctorum virorum querela, quod plerique existiment, se naturalis Philosophia studio satis fecisse, simul ac inter Philosophia tirocinia de generalibus aliquot questionibus Physicis disputarunt, licet hac & similia particularia, Medico, Iurisconsulto, Theologo maximè scitu necessaria, ne semel quidem delibarent. Altera causa est, ut communi occurrerem eorum, qui Phi-

Nn

loso-


lofophiam à nobiliſſimo Cartefio inſtauratam ignorant, objectioni, quaſi è noſtris principiis, totius ac partium quantitate, figuris, ſitu, motibus, quiete, id genus particularia Natura admiranda explicari nequeant. Quibus ego cuncta hac juſta rationis lance trutinanda libenter offero, uti videant, poſſint-ne ex ſuis principiis, id eſt, formis ſubſtantialibus & qualitatibus realibus à motu, figura aliisque qua modo recensuimus revera, quemadmodum opinantur, diverſis quicquam probabile magis vel intelligibile in lucem proferre.




T H E O.

THEORIA CORPORUM VIVENTIUM.

I. *Prolegomena.*

1.  N terra inveniuntur corpora alia *vita expertia*, ut ferè omnia fossilia, lapides, metalla; alia *viva*, ut plantæ & animalia.

2.  Quando autem ex horum viventium numero corpora quoque nostra sunt, & quæ existunt alia, quamplurimis modis homini intervniunt, omnia denique singularem Dei sapientiam, bonitatem & potentiam demonstrant, eorum contemplatio Physicum vel maxime decet.

3. Contemplabimur igitur corpora vivencia primò quidem *generatim*, secundùm ea quæ omnibus quodammodo communia sunt.

4. Deinde verò *speciatim* ad Plantarum & Animalium, denique ad Hominis theoriam animum applicabimus.

5. In generali & communi theoria primò quidem differentia viventium & non viventium investiganda, ut illud, in quo vita consistit, inveniatur.

II. *Viventium & non viventium differentia.*

6. Differunt autem Viventia à non viventibus, quod horum, ut ecce lapidum, metallorum & reliquorum fossilium, integra corpora sub qualibet figura sensibili consistere possunt: at plantæ & animalia certam *figuram* postulant.

7. Hinc solis Viventibus adscribitur corpus *organicum*, hoc est, variis organis præditum, cujusmodi sunt in Planta radix, caulis, ramus, surculus &c. in Animali caput, os, venter &c.

8. Major itaque corporum viventium *pulchritudo* est, quatenus è varietate quidem ea æstimatur Ph. 91. 386. Saltem in aliis corporibus tanta varietas sensu non percipitur.

9. Adhæc vivorum corporum talis est textura, ut innumeras habeant *fibras* seu fila & villos, id est, extremitates partium ex quibus constant, inter quas pori quamplurimi, sæpe etiam satis lati, interjacent,

10. At quoniam corpus organicum, partium & figuratum varia textura in machina quoque artificiali, item cadavere vel planta mortua inveniri possunt;

11. Viventia ab artefactis illis ac mortuis corporibus in eo differunt, quod *succus* aliquis, quo aluntur & crescunt, per meatus eorum in omnes partes, & quidem in longum, latum & profundum, diffunditur. Ph. 1172.

12. Diffunditur autem ac distribuitur ejusmodi succus in corporum viventium partes beneficio *caloris* à Sole aliove igne proficiscentis.

13. Ita ut quæ de cælestium in subcælestia actione generatim diximus Ph. 785. sqq. & speciatim de metallorum in terris proventu repetivimus Ph. 1199. Hoc etiam loco ad plantas & animalia oporteat applicare.

III. *Vita ac vegetatio in calido & humido temperato.*

14. Quapropter omnis *vita corporea in calido & humido consistere* vulgò dicitur: quorum illud agentis, hoc patientis rationem habet.

15. *Calidi* autem nomine intelliges Ignem illum ardentem & non lucentem, de quo Ph. 1150.

16. Calor viventium *vitalis* cognominatur, & à *caleffi*, cujusmodi à Sole proficiscitur, atque *elementari*, qualis in igne culinario ex. gr. est, distinguitur.

17. Gradibus tamen potius, quàm naturâ atque essentiâ, calorem cælestem, elementarem ac vitalem differre judicabis, ubi operationes uniuscujusque attenderis.

18. Atque ut omnis ignis pabulum aliquod requirit: ita speciatim calor vitalis absque *humore* quodam conservari nequit.

19. Quandoquidem autem viventia nec ita calent ut conflagrent, nec ita hument ut disfluant, patet calidum in illis frigido, & humidum sicco quodam, naturæ uniuscujusque congruenter, temperatum esse.

20. Hoc Medicis appellatur *temperamentum ad justitiam*: quod opponitur temperamento *ad pondus*, ubi calor, frigus, humiditas, siccitas inter se gradibus æquari intelliguntur: quale fortassis non datur.

21. Quoniam igitur justum calidi & frigidi, humidi & siccici temperamentum in viventibus requiritur, hinc est quod perfectiora animalia cibo simul & potu indigent.

22. Item, quod succus omnis, quo nutriuntur viventia, pulvisculis durorum corporum est inspersus;

23. De-

23. Denique, quod calore & frigore per vices ista corpora vegetantur & crescunt.

24. Atque ita vita quoque nostra non simpliciter illis, quæ calidum & humidum augent, sustentatur; (liquoribus enim calidis tunc perpetuo esset utendum:)

25. Sed iis, quæ bonam in sanguine *fermentationem* excitant, quælia interdum valde frigida, ut acetum; vel sicca, ut chalybs præparatus. Exemplum ejusmodi fermentationis cernitur, quoties affusione aceti frigidi olla, in qua coquantur pisces, ebullitione propinqua, actu ebullire & exundare incipit.

26. *Humidum* ita temperatum ubi majore copia reperitur, ibi viventium corporum uberius proventus, dummodo calor non deficiat.

27. Sic gramen in locis crescit humidioribus. Similiter pili in corpore nostro. Uvæ & alii fructus in majorem molem excresecunt, quoties non deest pluvia.

28. Equidem humiditate germinationem promoveri, vel inde colligas, quod in locis humidioribus corpora mucescunt & rubigine obducuntur, in siccioribus non item. Ph. 1209. sq.

29. Pariter *calidum* rite temperatum ubi magis invenitur, ibi plura viventia nascuntur. Sic æstate plantæ, muscæ, culices, vermes è carne ingente numero proveniunt.

30. Nimirum ut pluvia deficit ubi vel deest materia humida, vel deest calor ejus particulas elevans, vel frigus eas iterum condensans: ita plantæ & animalia similes ob causas deficiunt.

31. Ex quibus patet, cur aromata aliique fructus, quos à calore multum elaborari necesse est, in calidioribus tantum regionibus inveniantur. Confer Ph. 1202. Ita nec passim uvæ maturescunt.

32. Insuper è dictis intelligitur, cur brevi æstate in Septentrione, at majore æstu & longioribus diebus frumenta citius crescant, quam in aliis regionibus: ita quidem ut intra septimam vel octavam à satione hebdomadam sæpe metantur. Ph. 820. 921.

33. Sic mel Russiæ magnopere commendatur, quia licet ea tellus sita sit ad Septentrionem, ob longiores tamen dies æstivos, ros & halitus florum diutius à Sole excoquantur.

34. Quantum verò ad arbores & corpora, quæ longiore tempore egent, quo ad justam magnitudinem perducantur, illa in frigidis regionibus magis recta & procera, in calidis curva & breviora nascuntur.

N n 3.

35. Con-

35. Confer abietes aliasque arbores, item capillos & humana corpora Septentrionalia cum iis, quæ in calidioribus crescunt regionibus.

36. Calor enim in frigidis terris est tardior, uti motus esse solet in viis rectis; in calidis celerior, quemadmodum in viis obliquis motus esse consuevit. Ph. 135.

37. Cumque celeriter moto corpori vel exigua vis resistat. Ph. 219. hinc fit ut fervidiore calore agitata corpora propter occursum aliorum facilius à recta via detorqueantur.

38. Brevitatis in corporibus viventibus hæc etiam causa est, quod calor intensior poros aperiendo citius humidum alimentum consummat, & corpora calore exsiccata & indurata in ampliorem molem extendi nequeant.

39. Unde qui calorem intensum obtinent homines, non solum brevis staturæ, sed etiam *macilentis* esse solent, atque ad iram proclives: quod varia proverbia spectant.

40. Contrà illi, quibus calor est moderatior, *pinguescunt*: ut scæminæ plerumque viris sunt pinguiore, nisi morbus aut alia præternaturalis causa obstiterit.

41. Et quoniam frigus aëris ambientis constringit interiorem calorem, ne dissipetur, inde est, quod coctio ciborum in corporibus nostris melius procedit hieme quam æstate. Unde ventres hieme calidiores Hippocrates affirmavit. Æstate & locis calidis minus viget appetitus.

42. Ideoque Itali in cryptis & speluncis vel circa noctem sæpe cibum capiunt, diurno verò tempore calidiore dormiunt.

43. Nempe hieme & frigido quovis tempore & loco pori corporis magis sunt coarctati. Et æstate quoque cibus eò melius coquitur in ventriculo, quò arctius ille clauditur. Simile contingit in olla quæ operculo tegitur.

44. Inde quoque est, quod populi Septentrionales magis vivaces & robusti sunt aliis.

45. Tandem ex iis, quæ de humido ad germinationem necessario dixi, etiam sequitur, argillosum agrum arenoso fertiliorum esse.

46. Nam *argilla*, utpote terra pinguis, ramosas adjunctas habens particulas è spirituum & exhalationum conjunctione natas, sistit pluviæ, quemadmodum pilæ motum lana sistit. Ph. 206.

47. Unde & *simo* vel *marga*, id est, argilla spissiore seu densiore,
ut

ut feraciores sint, ante sementem agri stercorantur.

48. *Arena* verò (Ph. 1168.) hoc est, congeries minutissimorum lapillorum, licet acres interdum succos conjunctos habeat, pluviam transmittit.

49. Ita semen, quod cecidit in petram, enatum exaruit, quoniam humorem non habebat, Luc. 8. Contrarium fit in arbore ad rivos plantata Psal. 1.

IV. *Viventium interitus & mors à causis contrariis.*

50. Porro sicuti vita in calido & humido temperato sufficiente consistit: ita viva corpora moriuntur atque intereunt frigido vel sicco ita prædominante, ut principium vitæ, ignis calidus, imminuatur vel tollatur.

51. Valeat enim hoc loco illud: contrariorum causas esse contrarias.

52. Igitur quæ causa facit, ut hieme animalia quædam, veluti muscæ, ranæ, item arbores & herbæ quædam moriantur, aut certe crescere desinant.

53. Eadem efficit, uti plantarum plurium folia sub finem autumnii in regionibus frigidioribus decidunt.

54. Nimirum ob defectum caloris solaris è radice satis alimenti non elicitur: neque plantarum pori à frigore superveniente clausi sufficientem ad folia vegetanda succum transmittunt.

55. Idem defectus alimenti, nec non siccitas atque contractio pororum efficit, ut media ætate rosarum folia decidunt.

56. Quamvis enim calor Solis, qui succum attollere solet, ætate non desit, fermentum (Respice §. 25) tamen in plantis non videtur nisi certo ac definito tempore operatione sua fungi posse.

57. Simile exemplum habemus in calce viva, quæ aquâ adspargitur: ubi fermentatio exiguo temporis intervallo finitur, & semel peracta non potest in eadem per aquam instaurari. Idem in aliis fermentationibus observatur.

58. Ejusmodi temporis, quo plantæ cujusque fermentatio circumscripta est, & exsiccationis à calore Solis incumbente proficiens consideratio in multis quoque aliis locum invenit.

59. Sic poma matura in terram cadunt: ubi ad alimenti defectum & meatuum, qui sunt in petiolis, exsiccationem accedit vis gravitatis.

60. Et propter easdem causas glandes ac nuces è putaminibus, grana è spicis, pisa è folliculis, ubi maturuere, delabuntur.

61. Hæc autem, quæ de stirpium foliis & fructibus ita decidentibus dicta fuere, etiam ad animalium pilos, plumas, pennas, cornua delabentia liceat applicare.

62. Similes quoque effectus à laxatis poris oriuntur. Iis quippe dilatatis quod innatum est, nisi simul dilateretur, facile excidit.

63. Ita cùm æstivo quàm hiberno tempore meatus cutis sint ampliores, (quod etiam de aquæ corporumque aliorum poris verum est) pelles bestiarum, quæ æstate excoriatur, pilos difficilius continent.

64. Similiter dentes junioribus excidere putantur, quando alveoli, quibus inclusi, magis ipsis crescunt & ampliantur. Nisi & huic effectui communem cum pomis & nucibus decidentibus causam assignare malis.

65. Verùm de morte viventium ut plenius erudiamur, cogitandum est, calorem in viventibus, quamdiu vivunt, continuò agere in humidum, ipsumque absumere. §. 18.

66. Quamobrem temperamentum viventium paulatim siccius evadit, ad instar carnis, quæ igni admota assatur.

67. Ac sicuti caro vehementiori igni propius admota exteriore quidem superficie amburitur, interioribus autem partibus non satis excoquitur: ita quandoque contingit uvis aliisque plantarum fructibus, dum nimium Solis æstum patiuntur.

68. Utque intelligas, quomodo ipsi etiam pisces in aqua viventes progressu temporis exsiccentur,

69. Considera, elixa, subducto naturali per coctionem humore, assis quoque sicciora reddi. Ne dicam de lignis, quæ in aquam projecta, post justum temporis intervallum inde sicciora educuntur.

70. Si flammam ceræ vel sevo adhærentem augeas, citius suum illa absumet pabulum. Eadem ratione calido extrinsecus vel intrinsecus supra modum adaucto, viventia pereunt.

71. Sic nimio Solis æstu stirpes consumuntur: & qui vinum infanti vel equo largiùs propinat, vitam eorum abbreviat:

72. Ex illa igitur caloris in humidum non satis restitutum actione corporis viventis *mors naturalis* tandem sequitur.

73. Licet plurima quotidie ante illud non impeditur aliunde naturæ tempus *violenta* morte extinguantur.

V. *Etatum differentia.*

74. Exinde quoque *etatum discrimina* pendent, quarum tres omni viventium generi communes: juvenus, vigor, & senectus.

75. In juventute calor à copia humidi quodammodo obrunditur: in vigore magis fervet: in senectute humido diminuto marcescit.

76. Quare, *corpora viventium recens genitorum humidiora* cum sint, nec absit calor, plus ex illis exhalat vel destillat.

77. Ita ex corpore infantis plus expirat, quàm ex corpore adulti.

78. Simile est, quod è locis humidioribus plures vapores ascendant, modò calor adsit. Ph. 919.

79. Humiditas in causa est, cur infantes & multi sint somni, & lacrymentur sæpius.

80. Et pediculis præcipuè infestantur capita puerilia, quia sudor vaporque ille ex capite emanans cute & capillis confidet & inhaeret: aliis vero partibus defluit. Confer quæ supra de argilloso & arenoso agro docuimus.

81. Eadem de causa membra viventium in juventute sunt molliora, & facile huc illuc inflectuntur.

82. Hinc ossa in pueris fracta non difficulter conjuncta restituntur: in adultis, ob duritiem & siccitatem non item.

83. Propter istam membrorum juvenilium mollitiem pori quoque illorum levi negotio extendi ac dilatari possunt, ut crescant & augeantur.

84. Labentibus autem annis, ubi membra induruerunt, adeo ut pori non ita dilatari queant, viventia crescendi finem faciunt.

VI. *Viventium aliorumque quorundam corporum superficies durior.*

85. Quando verò non omnia viventium membra æquè mollia vel dura ubique sunt, hoc in iis communiter observatur, quod eorum *superficies magis indurata esse solet, quàm substantia interior.*

86. Causa hæc esse videtur, quod partes viventium extimæ impetum aliorum corporum impingentium primæ sustinent & frangunt.

87. Semper enim sunt, quæ in superficiem viventium impingunt corpuscula innumera, nempe primi, secundi ac tertii clementi particulae, quotquot eorum poros non pervadunt. Ph. 805.

88. Ideo plantarum & animalium corpora involucris quibusdam

reguntur, cujusmodi sunt *putamen, cutis, tunicula, pellis, pellicula, cortex, &c.*

89. Quod non modò in animalibus & arboribus, verum etiam in ovis, uvis, cerasis, nucibus, glandibus, mespilis, fabis, pis, pomis, pyris, prunis, &c. Imò in ipsis foliis experientia manifestum reddit.

90. Sedi folia, utpote crassiora, id satis evidenter demonstrant.

91. Ob similem exteriorum corporum in membra nostra impulsam, *callus* in manuum & pedum extremitatibus generatur.

92. Quid? quod idem effectus eadem de causa in pluribus aliis inanimatis corporibus deprehenditur.

93. Ita nivis exterior superficies magis induratur. Confer Ph. 853.

94. Superficies item panis, lagani, libi, assæ carnis & similium in furno, veru, sartagine vel patella vi ignis expositorum. §. 67.

95. Quod autem puls, fervidum lac & alia fercula calida ab igne remota cuticulam nanciscuntur, id inde est, quod motus caloris inhaerentis propter contactum frigidioris aëris prius in superficie, quam in partibus interioribus, ei communicatus languescit ac retardatur.

96. Eodemque modo aqua in parte superiore congelari incipit, cum in fundo prope terram validior sit caloris agitatio.

97. Nempe languescente impetu materiz subtilis, quæ aquam interfluendo partes ejus à mutuo contactu quodammodo removet, illa in glaciem vertitur. Ph. 957. sqq.

98. Neque hanc posteriorem causam à frigoris constrictione procedentem ab effectu illo in corporum viventium superficie, de quo in præsentia loquimur, producendo excludimus:

99. Quamvis illa prior, in caloris actione consistens, magis naturalis & communis viventibus esse videatur.

100. Hinc enim est, quòd ea parte superficie, quam corpus radiis solaribus obvertit, uti magis excoquitur, maturascit & coloratur, ita quoque magis indurescat.

101. Exemplo sint poma, pyra, uvæ præsertim rubræ, facies humana. Cantic. I. §. *Nolite me considerare quod fusca sim, quia decoloravit me Sol.*

102. Sed cum in tellure, plantarum & viventium genitrice, observemus, quod molliora & humidiora ejus loca exteriori superficie, tempore quidem æstatis vi solaris caloris exsiccantis. Ph. 1143. Hic mis autem tempore vi frigoris constringentis, prius & magis indurescant

scant partibus terræ inferioribus (cujusmodi superioris terræ condensatio & induratio etiam fistucatione, & pedum calcatione quocunque tempore inducitur).

103. Triplicem ejusmodi causam in viventium quoque superficie considerabimus, quæ tamen causæ ad illam §. 86 expressam omnes quodammodo referri posse videntur.

VII. Caloris & fermenti in viventibus varietas.

104. Adhæc non solum *externus calor*, qui agit in corpora viventia, pro locorum & temporum diversitate variat;

105. Verum etiam *internus*, pro distinctione, 1. *atatis*; & 2. *sexu*, varios habet effectus.

106. Ac 3. in hoc *viventium genere*, calor alius, alius in illo, debilior aut fortior, magis minulve durabilis, &c.

107. Ita cum excrementa nostra (quæ sunt instar cinerum tenuioribus partibus igne absumentis remanentium, Ph. 1123.) aliis animalibus, veluti gallinis, porcis, in alimentum cedant;

108. Rursus horum animalium stercora plantas alant;

109. Manifestum est, calore Solis aliquid absorberi ac digereri, quod non potest calore bestiarum: harum item calorem à nostro differre.

110. Nempe quod fermentatione in hoc vivente absoluta non potest in eodem ulterius fermentari, sæpe respectu alterius novum atque idoneum fermentum est.

111. Sic fermentata satis farina ulterius quidem fermento eodem fermentari nequit: attamen in ventriculo nostro denuò fermentatur, fitque novum eo respectu fermentum:

112. Eoque melius in ventriculo fermentatur, quò plures partes fermentatione præcedente jam sunt teneriores redditæ.

113. Sic ergo fæces alvi, quamvis per intestinorum fermentum amplius attenuari nequeant, ita tamen jam sunt attenuatæ, ut à bestiis, quæ fæcibus illis vescuntur, fermento melius subigi possint.

114. Rursus à bestiarum fermento teneriores redditæ fæces, à Solis radiis in stirpibus facilius porro attenuantur.

115. Simili ratione Pharmacopœi, quò spiritum vini distillant frequentius, eò pauciores ac subtiliores faciunt.

VIII. Natura alimenti in alio manens.

116. Non obstantibus istis mutationibus, alimentorum reliquæ

quædam vel in ipsis excrementis apparent.

117. Cerasa nigra vel moros myrti si comederis, fæces alvi colore nigro tinguntur.

118. Dantur alia, quibus assumtis certum odorem vel colorem urina recipit: quamvis vini quidem rubri colorem eadem non servert.

119. Sed *alimenti & succi vis & natura in corpore, quod eo nutritur & crescit, magis etiam custoditur.*

120. Tametsi enim in animalibus innumeræ particulæ exhalent, aliæ per urinam, fæces alvi & sudorem ejiciantur;

121. Non possunt tamen non multæ potus ac cibi partes remanere in corpore animantis, quod iis alitur ac vegetatur.

122. Sic homines ut plurimum duri sunt, qui duro cibo vescuntur: delicati & molles contra.

123. Si vinum bibis, aliter corpus habet, ac si cerevisia vel aqua sis contentus.

124. Scorbuto laborant homines in terris, ubi salis & infumatis vivunt, rariùs alibi: ex. gr. ubi tota aliqua civitas subsalsâ aquâ ad coquendos cibos ac cerevisiam uritur, morbus iste communis est.

125. In omni terra latere aliquid salis, ejus in plantis reliquæ docent. Ita salem absinthii Chymici faciunt. Pomorum exempla cuivis obvia.

126. Maximè quoque alimentorum natura in plantarum & animalium fructibus sese patefacit, ex. gr. in *lacte*.

127. Prout enim gramen aut stramen vaccæ comedunt, ita & *butyrum* aliam vim, alium colorem & saporem obtinet.

128. Vere, quando floribus & herbis recentibus nutriuntur, id imprimis apparet. Inde butyrum vernum valde commendatur. Et lac tunc temporis salubrius.

129. Notatu digna est Medicorum observatio, quod ubi planta purgans à capra devorata fuit & in chylum vel sanguinem ac tandem in lac conversa, si lac illud à nutrice bibatur, atque iterum per varias mutationes in lac muliebre vertatur, infantem ubera sugentem purgari.

130. E dictis etiam causa intelligitur, cur generosæ & bona gaudentes valetudine matres ipsæ liberos suos lactare debeant.

131. In *melle* idem, quod in lacte & butyro, experientia nos edocet. Unde magni interest cujusmodi herbis infideant apes. Itaque in Sardinia mel est amarum, quia legitur ex absinthio. Imo in Hera-
clea

clea Pontica venenatum est, quoniam ex aconito colligitur.

132. Idem patet in vino, quod Germanis ob fœtorem *Brunkert* aut *Stinkert* appellatur. Provenit enim in vinea, quæ simo nuper pabulata.

133. Eâdem ratione vapores ascendentes aliquid secum vehunt illius terræ, ex qua ascendunt: unde nix in Armenia quandoque rubra cadit. Vide Ph. 1065.

134. In vino Hispanico, in Gallico item generosiore plus est materiæ oleagineæ: in Rhenano & similibus plus materiæ acris & acidæ. Unde hæc vina minus calida prioribus.

135. Considera hoc loco unde arthritis & alii id genus morbi oriuntur.

IX. *Mutatio in Viventibus ob loci vel temporis diversitatem.*

136. Ex aliolo in alium translata *Viventia* sæpe mutationem in melius vel deterius experiuntur:

137. Idque tum propter caloris & frigoris, tum propter humiditatis & siccitatis, quo aluntur, differentiam.

138. Juniores interdum paucis hebdomadis extra proprios lares agentes plus crescunt, quam integro anno, si patria aut consuetudine mensa utantur. Sæpe contra alieno victu minus bene habent.

139. Etenim pori corporum *Viventium* ad hæc transmittenda magis dispositi quam ad illa; item hoc loco vel tempore aliter dispositi, aliter alio.

140. Sic homines multi hunc illumve aërem ferre non possunt, atque ex calidioribus regionibus ad nos venientes intolerabile sibi frigus esse conqueruntur.

141. Primum in mari navigantes nauscant, præsertim quando libero non fruuntur aëre. Fœtor enim, qui in navibus esse solet, & maximè jactatio corporis ejusmodi effectum habent.

142. Interim notatu dignum est, quod plures morbi, febres imprimis mutato aëre, etiam in magnis maris jactationibus curantur.

143. Item, quod multorum appetitus magis viget cum navigant, quam cum in sicco habitant.

144. Multum in his consuetudo potest. Nec proinde subito mutanda ratio victus, cui assueveris, præsertim à teneris.

145. Adeo ut etiam tenello infanti salubrius sit, assueto fœveri calore,

lore, cognatumque & familiarem potius matris, quàm alienum & peregrinum nutricis haurire succum.

146. Herbæ exoticæ in hisce regionibus rarè easdem vires acquirunt; aut si acquirant, progressu temporis perdunt.

147. Et sæpius transplantata arbor minus bene crescit, aut fructum ferre cessat.

148. Similis mutatio contingit, quoties ex alia anni tempestate in aliam, veluti ex hieme in æstatem & contra, transitur.

149. Primum frigus, ut vulgo aiunt, intolerabile, & repentinus omnis ab uno extremo ad aliud transitus periculosus.

150. Primo vere caput nudum si radiis Solis exponas, dolorem percipis: quòd pori hiberno frigore contracti particulas materiæ cælestis, quæ tunc apud nos majusculæ sunt, omnia permeantes non facile admittant.

151. Vernis noctibus aut etiam diebus haut rarè frugum & fructuum primordia frigore corrumpuntur.

152. Quoties cælum solito serenius est, aliquam in nobis hilaritatem sentimus: contra tristitiam, ubi nubila tempestas.

153. Capitis aut aliarum partium dolor ex imminente tempestate sæpe à multis percipitur, maximè, si vulneri cuidam cicatrix non bene obducta fuerit.

X. *Figura Viventium varè rotunda in ipsis aut eorum partibus, fructu, semine.*

154. Ad *figuram* Viventium quod attinet, cùm certam ac determinatam poscant, qua non solum à non viventibus distinguuntur, §.6. Sed etiam inter se mirum in modum variant,

155. Non immeritò quæritur, utrum in illa tanta varietate ac dissimilitudine commune & simile quid possit inveniri? Id enim hoc loco, ubi de iis, quæ cunctis Viventium generibus communia sunt tractamus, dispiciendum est.

156. Respondetur autem, hoc esse commune, quòd & ipsæ res Viventes & earum fructus *rotunditatem* aliquam habent.

157. Non tamen Geometricam, nec unam eandemque omnes; sed multiplici varietate distinctam.

158. Nempe rotunditas si non est in toto Viventis corpore, saltem est in ejus aliqua parte, vel in fructu quem profert, vel in semine ex quo nascitur.

159. Rotunditas si non adest omni tempore, adest saltem aliquo. Exempla præbet brassica capitata, lactuca, aliaque id genus, quæ certo demum anni tempore clausa globosi corporis instar habent.

160. Existunt & alia, quæ vespertino tempore clausa sphaerica evadunt, matutino ac diurno rursus aperta, & latius expansa aliam rotunditatem obtinent.

161. Præcipuè verò duplex in rotunda Viventium figura varietas annotanda venit, quatenus vel in longum protensa, vel in globum reducta est.

162. Rotunditas oblonga invenitur in ramis arborum, brachiis, pedibus, digitis, imò in toto ferè animalium corpore, & arborum truncis, caule, stipite, stylo.

163. Attende in plantarum genere radices, raphanos, siseses, pastinacas, culmos, calamos, arundinem, graminis certam speciem, &c.

164. In animalibus occurrunt serpentes, anguilla, lumbrici & vermes oblongi, membrum virile in hominibus, equis, &c.

165. Sphaerica figura aut quasi talis cernitur in pomis, pyris, cerasis, prunis, ovis, uvis, baccis variis, pis, aliisque leguminibus, rapis, nucibus, capite humano, &c.

166. Protensio in longum continuatur in corporibus; quamdiu vis succum recta propellens superat.

167. At ubi vis hæc succi progredientis & rotundantis causæ æquales existunt, oritur globositas.

168. Videtur autem hujusce rotunditatis ac globositatis, saltem in plerisque viventibus, eadem causa esse, quæ rotunditatis in guttis & liquoribus destillantibus causa cernitur.

169. Quippe liquores tam diu rotundum oblongum facere videmus, quamdiu vis gravitatis deorsum pellens superat.

170. Ubi autem vis illa minor est, & causa quædam liquorem in aëre suspensum tenet, virtute ejusdem causæ, qua in longum protensus ille prius rotundabatur, ejusdem gutta sphaerica redditur.

171. Exemplo sint stiriac, & hiberno tempore è tectis dependentes glaciei partes oblongæ & rotundæ.

172. Quæ in fine acutiores, quemadmodum & arborum rami.

173. Ac sicuti liquores illi paulatim in stiriac concrescunt: ita rami arborum initio molliores, paulatim indurantur.

174. Candelæ simili modo rotundæ fiunt, sed parte inferiore

cra-

crassiores, quia plus ibi, dum intinguntur, accedit materiæ: cum in stiriis è contrario à parte superiore novus continuò liquor affluat.

175. E naribus, adhibito pulvere purgante, eadem ratione descendere vides humorem rotundatum, qui in extremitate sæpe guttam crassiorem efficit.

176. Contemplare id genus plura pingua & viscosa destillantia, quæ propter tardio rem motum cum tardè crescentibus Viventium corporibus rectius, quàm alia celerius agitata, conferri possint.

177. Quanquam & in aqua res satis evidens est, cælo præsertim frigido.

178. Quò autem accuratiùs in ejusmodi phænomenis examinandis verferis, cave 1. ne fluant liquores è rotundo foramine vel canali. 2. ne celeriter nimis defluant. 3. ne magna nimis quantitate.

179. Causam igitur rotunditatis in plerisque saltem viventibus eandem esse, quæ in liquidis corporibus, tum ex effectuum, tum è subjectorum & corporis ambientis simili dispositione probatur.

180. *Effectuum similitudo* posita est, 1. in globositate guttarum & fructuum plurium. 2. in rotunditate oblonga liquorum, ramorum, &c. 3. in acumine stiriarum, digitorum, ramorum, spinarum. 4. in superficie quadam æquabilitate, quæ asperitati opponitur. 5. in eo quod recta linea progrediuntur liquores cum descendunt, uti plantæ, dum crescendo ascendunt.

181. *Similis dispositio subjectorum* sita est in convenientia liquidorum & mollium. Mollia enim & flexilia principio ætatis, quando certam formam induunt, viventium esse corpora jam supra consideravimus.

182. Si opponas, non adeo molles esse Viventium partes, ut æquè promptè ac liquores à corporibus ambientibus figurari possint:

183. Respondeo, hoc eo compensari, quòd liquores illico rotundantur, & quasi in momento. Atqui viventia longiore temporis tractu, & iteratis innumeris pulsibus figuram similem recipere possunt.

184. Nam actionum frequentia quod unicuique roboris deest facile suppletur. Sic asperam habentia superficiem ferramenta solo manuum vel vestium contactu crebriore poliuntur.

185. Invenitur quoque in eo similitudo, quod materia cælestis ut in liquidis, ita pariter in viventibus corporibus rectà currit quaquaversus.

186. Atque ita succus ipse, quo viventia nutriuntur, in omnes
corum

eorum partes à cælesti materia propellitur. Quò spectat in animalibus circulatio sanguinis, quæ per totum corpus perpetuò sursum deorsumque peragitur.

187. *Similitudo corporis ambientis* ista est: 1. quod guttas & liquores idem, qui viventia corpora eorumque partes, aër ambit. 2. quòd aër ille diversum ut à liquoribus, ita à viventibus corpus. 3. quòd secundum partes, utpote fluidus, continuò movetur.

188. Repete hîc quæ supra de impulsu corporum in externam Viventium superficiem (unde cutis, pellium, corticis origo) diximus: & magis iriis, quæ nunc de rotunditate ejusdem superficiiei tradimus, confirmaberis.

189. Quæ verò causâ sit rotunditatis in guttis, repete ex Physices Contractæ §. 801. sqq.

190. Si quis contradicat iis, quæ de simili utrobique corporis ambientis dispositione protulimus: quod animalium corpora, item ova in matrum utero, non in aëre formentur; vermes quoque oblongi & rotundi in corpore nostro, vel in terra generentur, in qua etiam rapa, sîferes & radices omnes crescunt;

191. Ei respondemus, 1. etiam in terris aliisque corporibus materiam illam cælestem, quæ dum recta quaquaversus pergere nititur, obvia corpora sic format, ut recto ejus cursui quàm fieri potest minimum obstant, reperiri.

192. 2. Datur insuper in ipsis corporibus viventibus succus ac liquor, qui à materia cælesti intus propulsus, & quidem æqualiter in omnes partes, ad rotundam figuram efficiendam concurret.

193. Quapropter eandem in Viventibus, saltem plerisque, quæ est in liquoribus, rotunditatis causam existere, è dictis inferimus.

194. Tamen si enim occulta vis naturæ sit amplissima, idemque effectus à plurimis causis diversis produci queat; (ut omnes fatebuntur, qui vel hoc unum cogitabunt, quod idem genus morbi diversi generis medicamenti sanari possit: vide & supra, §. 102. & alibi.)

195. Similium tamen effectuum potius similes quàm dissimiles, & communium communes causas licet assignare, dum ratio nulla mentem nostram trahit ad contrarium asserendum. Ph. 418.

196. Rationem autem rotunditatis in Viventibus ab ejus figuræ perfectione desumptam Ph. 301. non quidem hinc excludimus: attamen ut nimis generalem minimè sufficere existimamus.

XI. *Plantarum calor. Certorum quorundam morborum ratio.*

197. Hactenus vidimus quæ omni Viventium generi communia: nunc aliquantò specialius de *Plantis* agemus.

198. Ubi primò quidem considerabimus, quis & unde sit calor, qui in *Plantas* agit, deinde contemplabimur subiectum quod *patitur* & movetur.

199. Nempe causa efficiens, cur vegetentur & crescant *Plantæ*, est primò calor Solis, quatenus hic diurno & æstivo tempore tellurem & provenientes ex ea stirpes radiis suis verberat.

200. Accedit porrò calor ille, seu varia particularum agitatio, quæ à Sole in terris ac terrestribus nocte vel hieme relinquitur.

201. Denique calor in *Plantas* agens profiscitur interdum à subterraneo vel alio quocunque igne.

202. Sic hiberno tempore in cellis nostris, aliisve ædium locis calidis plantæ quædam germinant. Cepas etiam in trabibus culinæ suspensas germinare vidimus.

203. In hordeo madefacto, quod Maltam vocant, res est liquida. Ut & in liliis, aliisque floribus, qui incunte vere vasculo aqua pleno, ut folia citius explerent, domi reperiuntur. Ubi etiam patet, quantum humiditas germinationem promoveat. §. 26. sqq.

204. Maximè verò in plantis considerandum est ignis ille calidus, & non lucidus, in quo fermentatio consistit.

205. Talem quippe ignem plantæ in semine, bulbis, radicibusque habent, quoniam in cunctis aliquid invenitur, quod respectu telluris, in qua crescut, fermenti rationem obtrinet.

206. Calor in planta existens sive à Sole sive ab alio igne fit perfectus, succum alimentarium per plantæ meatus sursum agit, ut minimè sit necesse vim ullam attracticem plantis affingere. Vide Ph. 921. sqq.

207. Eodem conducit omnis materia cælestis, quæ à terra sursum tendens ingente copia in poris cujuscunque plantæ semper vagatur, & quidem potentiùs ac celerius die quàm nocte, æstate quàm hieme movetur.

208. Hujusmodi caloris & materiæ cælestis actione succus non modò ex terra in radicem propellitur;

209. Sed ulteriùs etiam in ramos attollitur ad foliorum usque extremitates.

210. Ad-

210. Adde quod calor externus fructus coquit & maturat, attenuat, exsiccat, rarefacit, &c. de quo supra.

211. Quo officio ut eò feliciùs Sol in excoquendis uvis fungatur, folia viti demuntur, vites quoque in collibus, aut circa parietes & muros, ubi radiorum reflexio, plantantur.

212. Sic hortulani in Belgio melonibus, aliisque fructibus, qui majorem calorem ad maturationem requirunt, cistas vitreas imponunt.

213. Simile fit in iis, quæ ad ignem culinarium assantur, opposito è regione corpore concavo, unde vis ignis repercutitur.

214. Calor in plantas per intervalla agit, non actione continua, sed interrupta.

215. Huc enim pertinet quod §. 56. sq. docuimus, suum cuique fermento tempus, quo duret, à natura assignatum esse, & quod semel fermentata eodem fermento denuò fermentari nequeant, §. 110. sqq.

216. Itaque aut alia accedunt, quæ novam fermenti materiam præbeant, ut in paroxysmis febrilibus apparet;

217. Aut certè temporis intervallum intercurrit, quo pori nonnihil immutantur, ut fit nocturno vel hiberno frigore.

218. Atque hinc pendere videntur distinctiones ramorum & nodi in arboribus; in cornibus item animalium, unde numerus annorum ætatis in bestiis quibusdam vulgo judicari solet.

219. Nam quod uno die vel anno crescenti arbori adjicitur, distinguitur aliquo modo ab eo, quod accedit die vel anno sequente.

220. Quandoquidem nox aut hiems interponitur.

221. Materia quoque cælestis in plantas & alia terrestria agens pro anni tempore variat,

222. Et similem in his & illis, in quæ agit, subjectis dispositionem inveniens, similem utrobique operationem exercet.

223. Proinde mirum non est, si florente vite mutatio quædam in vino deprehendatur:

224. Siquidem succus in vite, ac vinum in dolio, similiter quodammodo disposita fuerint.

225. Pari ratione contagio in aëre serpente corpora viventia simili modo affecta simile patiuntur, alia non item.

226. Sic pestis aliàs hominum, aliàs bestiarum quarundam corpora duntaxat infestat.

227. Et mutatio sæpe-numero in corpore nostro sentitur, quando proximus consanguineus moritur.

228. Ex hoc aut simili fundamento pendere quoque putem, quod morbi dantur *hereditarii*, & qui integram quandam familiam infestant.

229. Morbi item *endemii*, qui multis eandem regionem incolentibus sunt communes. Confer §. 124.

230. Morbi denique *epidemii*, qui non nisi statò tempore in regione aliqua sæviunt, uti pestis, de qua diximus.

231. Eodemque modo certo Veris tempore hoc genus arborum floret, alio aliud.

XII. *Plantarum germen, & fructus.*

232. Jam attendamus, secundum ea quæ §. 198 proposuimus, quidnam sit in ipsis plantis, quod actioni supra declaratæ subjectum est, & paulatim eâ perficitur.

233. Hic initio occurrit *primordium planta*, quod est ramusculus quidam vel germen, quemadmodum in nucleis cerasorum, nucum, glandium, prunorum, mespilorum, patet.

234. Similiter in ovo principia gallinæ inveniuntur.

235. Nimirum viventia corpora, postquam ad justam ætatem pervenere, *producunt sui simile*.

236. Idque vel manifestè & apertè, ut in viviparis apparet;

237. Vel magis occultè & latenter, veluti in iis, quæ ova aut semen quodcunque producant.

238. Sicuti autem pullus in ovo delitescens incubantè & foventè gallina paulatim detegitur & manifestatur: ita agente calore, & materia celesti homogenea congregante, & heterogenea segregante, è semine planta pullulat.

239. Quamobrem ovum gallinæ, semen plantæ, diverso respectu, & principium est antecedens, & fructus consequens.

240. Cujusmodi rerum circulus in Physicis passim à philosophis animadvertitur. Ph. 1022.

241. Similitudò inter plantam & ejus fructum tum quoque elucet, cum duriorum duriores, molliorum molles fructus inveniuntur.

242. Ita quercus glandes, nux nuces, castaneus castaneas profert; vitis autem uvas, &c.

243. Quod tamen non esse perpetuum, alia plantarum & fructuum docent exempla.

XIII. *Plan-*

XIII. *Plantarum pori & succus, & quomodo crescant.*

244. Pori, qui in plantis dantur innumeri, & in multis satis patentes conspiciuntur, hunc usum habent, ut facilius per eos quasi totidem paratos tubulos succus ascendat.

245. Expeditionem quippe esse materiæ fluidæ per ejusmodi vias ascensum, quàm per liberum aëra, alibi didicimus, Ph. 342. 1033.

246. Hæc nempe causa est, quamobrem agri consiti magis exhauriuntur & emaciantur iis, qui inculti jacent.

247. Unde etiam novale & requietus ager fertilior est restibili. Quibus fertilioribus agris addere licet cum, qui effossis fundis cæspitiis præparatur.

248. *Mollities* germinis vel plantulæ aut surculi recentis isti rei inservit, ut pori promtius dilatari possint. §. 83.

249. Quemadmodum enim panis meatus per ingressum lactis aut vini multum ampliantur: ita succus in plantarum poros impulsus eos extendit.

250. Atque ita *planta crescunt* & augentur, quoties majores succorum particulæ vel plures accedunt, quàm poris angustioribus capi queant.

251. Quibus autem in plantis pororum latera duriora sunt, eæ aut tardius crescunt, aut crescere etiam desinunt, ut fit in senectute.

252. Unde liquet, cur vitis, salix, cucurbita, ac similia mollia plantarum corpora velociter crescant, & ramos suos longè lateque expandant: quercus autem, mespilus, aliaque id genus dura ligna tardius incrementum habeant.

253. Præterea quando hiberno frigore pori contracti ac stipati sunt, & caloris agitatio parum valet, non mirum est, plantarum germinationem & augmentum impediri.

254. Sed inquirendum in præsentia illud est potissimum, quid fiat *quod succus alimentarius in plantis bareat*, & cum partibus earum majorem partem coalescat. §. 120. sq.

255. Non autem ascendat inde in sublimiorem aërem, vel descendat rursus in terram, & loca inferiora, unde venit, repetat?

256. Responderetur, hujus effectus causa prima est meatuum in plantis certa dispositio.

257. Judicare enim oportet à transitu alimenti & ascensu continuo fibrillas & ramulos in poris eminentes sic esse inclinatos,

258. Ut succus facile quidem sursum, non item deorsum ferri possit, propter assurgentes ac viam obstruentes ramalorum prominentium, quas diximus, extremitates. Ph. 358.

259. Hoc vel inde probari videtur, quòd, si cultro vel dolabra utaris in ligno scindendo vel radendo contra naturalem fibrillarum ordinem, majori conatu tibi sit opus, ac citius asperam illorum instrumentorum superficiem reddas.

260. Altera causa est frigus hibernum & nocturnum, quod elevatos aestate vel die præcedente succos figit & sistit, ulteriorem ascensum impediens.

261. Ex quo intelligitur, quantopere etiam ad plantarum generationem diei ac noctis, caloris & frigoris vicissitudo conducatur. Confer quæ de fontium generatione dicta Ph. 1034. sqq.

262. Tertia causa, quod vis major est caloris rarefacientis & succum elevantis, quàm gravitatis, qua deorsum relabitur. Ph. 860.

263. Adde quartam, quod per aërem difficilius ascendat succus, quàm per meatus plantarum, ut ante docuimus.

264. Ex quibus omnibus non modò patet, quare tempore frigidiore succus ascendere, & planta crescere nequeat;

265. Verùm etiam, cur nimio æstu succus idem uberiore copia in sublime attollatur, & planta eo destituta exarescat.

266. Præterea, quisquis meatuum in plantis situm, & crescendi modum nunc expositum attendere voluerit, facile agnoscat, cur è lignorum viridum igni appositorum extremitatibus, non ex partibus intermediis aqua exsudet.

267. Ubi quidem manifestè deprehenditur, quomodo ignis non trahat, sed pellat humores, & quidem in hanc potius quàm illam partem eos propellat. Ph. 923.

268. Ejusmodi *succorum destillatio* etiam in plantis nondum excisis, vel ex terra evulsis observatur, ex. gr. in vite, cujus rami justo tardius putati.

269. Aestate quidem si præscindatur viridis ramus vitis, non tantum effundit humoris, quantum fundit ramus, qui stetit hieme, verno tempore seriùs præcisus.

270. Nempe per tubulos, quorum latera duriora sunt, facilius currit liquor, quàm per poros corporis, instar spongiæ, mollis.

271. Quapropter hieme cæduntur ligna, priusquam succus calore agitur currere coeperit. Id quod ad trunci conservationem facit.

272. Et

272. Et quæ ad fabricam expetuntur ligna, ne cariōsa fiant, Luna decreſcente amputantur, quia tunc minus ſunt humida.

273. Huc ſpectat gummi & reſinarum ex arboribus deſtillatio.

274. E meatibus raporum, pomorum & id genus aliorum humor interdum tanquam è ſpongia quadam exprimitur.

275. Excocti pyrorum, pomorum, ceraſorum liquores diutiùs durant, quoniam coctiōne multum humiditatis, quæ putredinis mater eſt, abſumitur.

276. Aqua roſacea non tam citò putreſcit vel muceſcit, ſi panniculo laneo ſuppoſito in vas decurrat :

277. Quia ramoſæ particulæ, quæ cohærendo inducere poſſent corruptionem, in ſuperficie panni hærent.

278. In planta exciſa, dum incipit exſiccari, meatuum illorum plurimi, ſenſibili etiam modo anguſtantur, & totum ejus corpus contrahitur. Ph. 1143.

279. Adeo ut pori illi plantarum aquæ loco aërem alicubi contineant. Ph. 1009.

280. Aut certè ſucci, priùs materiam ſecundi elementi circa ſe habentes, jam in poris anguſtioribus non niſi materia primi elementi, quæ ſubtilior eſt, cingi poſſunt.

281. Quæ cauſa eſt non ſolum cur ſcœnum recens incluſum incaleſcat. Ph. 1113. ſq.

282. Verùm etiam, cur in ſtirpes emortuas & exſiccatas ſuccus alimentarius impelli nequeat, cùm forma pororum ſit immutata.

XIV. *Plantarum varietas.*

283. Hinc ad *plantarum diverſitatem* contemplandam progredi licet.

284. Pendet ea primò quidem à caloris diverſitate, qui variat pro varietate regionum. Conſer §. 31.

285. Et quod fermentum idoneum in planta eſt hujus ſoli reſpectu, non eodem modo ſe habet reſpectu ſoli alterius.

286. Deinde varietas illa pendet à diverſitate ſucci, qui in aliis terris alius.

287. Altera vel utraque etiam, aut ſi mavis triplex illa cauſa datur, cur non omnis ferat omnia tellus.

288. Adhuc à pororum in plantis diverſa diſpoſitione multiplex earum varietas oritur.

289. Sic

289. Sic vitis & ligna abiegna ebenis & Brasiliensibus poros habent laxiores.

290. Quæ res efficit, ut illa quidem flectantur, hæc autem frangantur facilius. Vide quæ de Vitro dicta, Ph. 1187.

291. Unde patet, quomodo pluvia eadem diversissimarum plantarum nutritioni inserviat.

292. Nam propter meatuum dissimilitudinem succus in plantas ascendens aliter in his, aliter in illis formatur.

293. Adde quod succus ex hac terræ parte assurgens alia secum corpuscula vehit, alia qui ex parte terræ diversa.

294. Sic idem cibus & potus, idem medicamentum in cunctis animalibus non semper eundem sortitur effectum: quia aliter in his, aliter in illis disponitur, figuratur, movetur, alii atque alii ibi prius existenti materiæ jungitur & miscetur.

295. Quin-imò ne in eodem quidem homine idem eundem perpetuò effectum producit: ex. gr. vinum quod mihi jam prodest, alio tempore nocebit. Medicamentum quod jam alvum mover septies, postea sæpius aut minus movebit.

296. Causa est, quia fermentum ventriculi atque inde pendentia alia ob diversitatem ciborum, potuum, medicamentorum, aëris, animi affectuum, &c. perfacile mutari, pauloque meliora vel deteriora reddi possunt.

297. Quod ita dictum de homine est, in bestiis minùs locum invenit, quoniam hæc tam diversa non assumunt, nec tot perturbationum sunt obnoxia motibus.

298. Unde velut in transcurso colliges, quanta sit incertitudo Medicinæ, humani præsertim generis intuitu.

XV. *Surculorum insitio, & eorum cum trunco, plantarum cum terra conditio.*

299. Sed ad plantas ut revertamur, hoc etiam ex ante demonstratis apertum est; cur pro diversitate ramorum, qui eidem inseruntur trunco, diversi fructus producantur. §. 292.

300. At cum diversarum arborum pori sibi non respondeant, quæret fortassis aliquis, quomodo diverso trunco diversa arboris ramus sic inseri possit, ut succus è trunco in ramum ascendat?

301. Resp. 1. cum pori in planta qualibet sint longè plurimi, satis est ad succum è trunco in ramum deducendum, si multi eorum quodam-

dammodo sibi respondeant, licet alii multi non congruant.

302. Sic pori vitri unius poris alterius non quidem ubique respondent, & tamen per diversa vitra lumen transmittitur. Ph. 796.

303. *Resp.* 2. Vix etiam ramum insitum cum trunco ita coalescere unquam, uti congenitæ ejusdem rami partes inter se cohærent.

304. Observatum quippe est in annosa arbore, vehementiore vento partem olim insitam à trunco suo avulsam fuisse, quæ per multos annos omnino coaluisse videbatur. Quod minùs firmæ cohærentiæ signum est. Ph. 244.

305. *Resp.* 3. Ipsi quoque telluris pori meatibus arboris non prorsus consentiunt. Et tamen succus inde in arborem ascendit.

306. Quæ comparatio quidem huic loco minimè aliena putanda est, quia probabile, ramum inditum progressu temporis in truncum alium, cœu in terram quandam, radices qualicunque modo agere:

307. Quemadmodum cornua sic in animalium capitibus plantata esse videntur, ut nervis, venis & arteriis tanquam radicibus adhæreant.

308. *Resp.* 4. Dum succus è trunci poris in poros insiti rami transit, facile aliquantillum à via recta declinare possit.

309. Ac denique §. alimentum in corpore vivente paulatim sibi ipsi vias certas parare & adaptare potest. Vide §. 257. sqq. Quæ consideratio in his aliisque antea traditis locum habet.

310. E superioribus intelligitur fundamentum physicum illius Jureconsultorum sententiæ, quod planta in alieno solo posita ejus maneat cujus fuerat, usque dum radices egerit: tùm enim incipere illam ejus esse, cujus est solum.

311. Unde aiunt, credibile esse, plantam alio terræ alimento aliam faciam: quod est consentaneum iis, quæ diximus §. 146.

312. Nempe radicum immissione fit, ut plantæ cum terra sic coalescant, ut jam earum non sit separatum à fundo corpus.

313. Sic fœtus in utero, quàm diu eodem cibo & potu, quo mater, fruitur, unum cum illa censetur.

314. Nec lactans animal à lactante tam diversum est, quàm si alio victu uteretur.

315. Sed magis huc spectat exemplum surculi, qui cum trunco, cui inseritur, coalescit: de quo in præsentia agitur.

316. Atque ita rami pars viva ac virens discernitur à mortua & exsiccata, minorem cum ea habens unitatem. Simile judica de membro animalis, quod exaruit.

Qq

317. Co-

317. Coaluisse autem & radices in terra egisse plantam ex eo cognoscitur, quod vivit adhuc & vegetatur post id tempus, quo emori & exarescere poterat.

318. Certius idem ex eo discitur, si quid ex se emittat, aut fructum ferat.

319. Qua verò ratione *plantam vel surculum recentem tractare oporteat, uti cum terra vel trunco facilius coalescat*, è superioribus colligitur.

320. Danda nimirum opera est, ne concutiat^r surculus, sed infixus hæreat, dum succus è tellure vel trunco influat.

321. Avulsus non diu retinendus, sed ocyus inferendus.

322. Si radix tota vel pars ejus simul cum planta transferatur, facilius hæc in aliena terra germinabit.

323. Item, si portio terræ prioris, quæ proximè juncta fuit arbori, cum ipsa deferatur.

324. In ea quoque terra surculi illius arboris inspicati conservantur, & incorrupti ad aliam regionem transportantur.

325. Præterea surculum accipies longiorem, quem trunco dum inferis, ab utraque parte præscindere possis, si fortè extremitate cæperit arescere.

326. Tempus anni opportunum observabis.

327. Partes rami eundem ordinem & situm, quem priùs habuerunt, retineant.

328. Quid autem, si ramus arboris deorsum inclinatus alteri trunco immittatur, quem *sugere* vulgo his oris dicunt, ut postea quàm coaluit amputetur?

329. *Resp.* 1. Meatus illius rami, quippe mollis & flexilis, possunt paulatim aliter disponi.

330. 2. Potest initio ex ramo ad truncum pervenire aliquis succus, & vice versa ex trunco ad ramum per meatus diversos, vel etiam diverso tempore per eosdem.

331. Adeo ut mutuas sibi invicem vires quodammodo submittant, donec satis coaluerint.

XVI. *Plantarum situs, & locus in terra, muris, sub nive.*

332. Hinc ad situm plantarum & ordinem, quem partes earum ad locum habent, examinandum pergimus.

333. Sic autem inversa planta cum Homine comparatur.

334. Os enim nobis supernè est: stirpes radicem, quæ oris vicem præstat, infernè habent.

335. De-

335. Deinde plantis rami sursum, nobis brachia & crura deorsum spectant. Adspice arbusculas in sepibus inflexas & à situ naturali detortas, unde novi rami sursum tendentes pullulant.

336. Cur autem rami arborum sursum crescant, patet ex iis, quæ de alimenti in poros impulsu & caloris actione diximus. A motu enim figura & situs pendent.

337. Hinc rami deorsum inflexi (nisi jam in illo situ nimis obri-guerint, poris aliquantum immutatis. §. 329.) externa vi cessante, se rursus in altum erigunt. Ph. 336.

338. Quia non modò succus alimentarius, verùm etiam cælestis omnis materia, quæ succum defert, sursum tendit. Ph. 1190.

339. Eodem modo quo flumen, si quod impedimentum objiciatur, quò minùs commodè solitum persequatur cursum, imperum facere non cessat, donec illud loco pepulerit.

340. Ligna tamen molliora paulatim etiam huc illuc flecti ac duci possunt, & alium quemcunque situm recipere, ut patet in vite, tilia, salice, &c.

341. Quemadmodum & fluvius progressu temporis per aliam viam, quàm priùs secutus fuit, derivari potest.

342. Causæ verò quamobrem plantæ quædam, vel earum rami deorsum inclinentur, aut saltem non assurgant in altum, sunt quæ sequuntur:

343. 1. Vi gravitatis deorsum inflectuntur rami pomis oncrati.

344. 2. Vi Solis aperiente & premente extremitates surculorum, & folia deorsum pelluntur.

345. 3. Multæ plantæ molliores in longitudinem excrecentes, ob defectum firmitatis, erigere sese nequeunt: sed aut humi repunt, aut fulcris quibusdam subnixæ sursum crescunt.

346. Exempla videmus in hedera, vite, cucurbitis, pisib, fabis.

347. Caules tamen per terræ planitiem expansos succus non destituit, utpote qui facilius per certos meatus, quàm per liberum aëra progreditur.

348. Ad situm & locum plantarum hoc etiam pertinet, quod *in via calcata non solent provenire.*

349. Nam perpetuus & fortis impulsus facit, ut molles surculi in perficie telluris assurgere non valeant.

350. Simili de causa in vela manus & planta pedis non crescunt pili.

351. Et quod assiduo teritur usu ferrum, rubigine non obducitur.

352. Gramen etiam, in quo sæpius diutiusve jaces aut sedes, marcescit.

353. Mitiora verò pyra & altior arbor esse consuevit, ubi via circa arborem calcata est, quàm ubi gramen circumcirca crescit.

354. Tunc enim omnis in solam arborem succus ascendit, cujus alias quantitatem magnam herbæ recipere.

355. Sic rami extravagantes & stolones amputari solent, ut primaria arbor eò crescat lætius.

356. Et stirpes quò rariores plantatæ sunt, eò singulæ crassiores vel altiores evadunt. Simile judica de rapis, siferibus, &c.

357. Quandoquidem igitur nihil in terra calcata, nihil in lapidibus provenit. §. 48. sq. *quo pacto in muris planta germinet*, interrogare liceat.

358. *Resp.* Semina quidem eò à vento vel avibus deferri possunt.

359. Terreni aliquid mollioris in muri poris, fissuris & rimis latere potest.

360. Atque in ejusmodi locis pluvia non difficulter sistitur.

361. Quæ & ipsa cum oriatur è vaporibus (qui ex heterogeneis variis particulis constant. §. 133.) plurium rerum semina secum vehit. Unde & bestiolæ certæ nascuntur in aqua pluvia, diutiuscule cisternis asservata.

362. Accedit Solis calefacientis virtus, magis etiam in muris quàm locis terræ humilioribus efficax.

363. Feliciùs autem in muris vetustis & à consortio hominum remotis quid crescit, quàm in novis, & circa quos homines versantur.

364. Quoniam temporis diuturnitate per operationem tum Solis, qui eos radiis suis verberat, tum pluvix, quæ superficiem eorum emollit, magis porosi evadunt.

365. Et quando aves in ejusmodi muris aut nidulantes, aut certè sæpius confidentes, fæces alvi excernunt, illæ non minùs ibi ad generationem plantarum faciunt, quàm aliorum animalium stercore ad agrorum fertilitatem. §. 47.

366. Difficilius quid crescit in tegulis, quia pluvialis aqua majore impetu inde descendens non adhæret, & ipsæ propter concavitatem suam citiùs à radiis solaribus exsiccantur.

367. Ita se habet locus plantarum à parte inferiore: à parte autem superiore vel aëre, vel aqua, vel nive tanguntur.

368. Sa-

368. Sata nive tecta foveantur tum humiditate, tum calore, quæ duo ad vitam singulari modo pertinere judicantur. §. 14. sqq.
 369. Humoris aliquid à nive ad tellurem pervenire nemo dubitet.
 370. Telluri calorem inesse patet, quia fumat hiberno effossa tempore. Ph. 1148. sq.
 371. Istum verò terræ calorem custodit nix, exhalationes inde calidas assurgere non permittens. §. 41.
 372. Et arcens exteriores causas frigus inducentes,
 373. Earum tardiores motus sistendo & sibi adjungendo. Ph. 167.
 374. Haut secus ac lana corpus nostrum calefacit, dum externorum agentium motus in se recipit.
 375. Confert ad effectum illum crusta nivis exterior, quam à corporum impingentium pulsu formari supra docuimus. §. 93.

XVII. Plantarum colores.

376. Adhæc plantæ colore, sapore & odore maximè se vulgo commendant.
 377. Colorem respexit Christus loquens de liliis agri. Matth. 6.
 378. Odorem attendunt pictores olfactui florem assignantes.
 379. Sapore delectantur, qui herbis vescuntur.
 380. Complures harum sensilium qualitatium in appetendò fructu vetito prima parens considerasse videtur. Gen. 3.
 381. Præter extremos colores, album & nigrum, de quibus Ph. 946. sq. in plantis reperiuntur intermedii, flavus, ruber & cæruleus.
 382. Quibus coloribus quinque simplicibus accedunt plures compositi.
 383. Et hi quidem non rarò ab ipsis plantis aut floribus certis denominationem sortiuntur.
 384. Uti color *roseus* (vulgo incarnatus) qui ex albo & rubro componitur.
 385. *Violaceus* (hyacinthinus) qui ex multo cæruleo & paucò rubro.
 386. *Herbaceus*, qui è multo flavo & paucò cæruleo.
 387. In quibus non solum commixtio colorum, verùm etiam diversa mixtorum proportio spectatur.
 388. Sed maximè communis & universalis plantarum color est *viridis*, oculis nostris gratissimus. (Unde quod Lat. *viridarium* Germ. *Grünsaarten*.)

389. Utpote compositus è duobus mediis, flavo, qui albo proximus, & cæruleo, qui proximus nigro.

390. Hujusmodi viridis coloris compositio è sequentibus elucet indiciiis.

391. Objectum visibile cæruleo colore tinctum si per vitrum flavum inspicatur, viride apparet.

392. In opposito item pariete viridis color repræsentatur, si per duo vitra, quorum alterum flavum, alterum cæruleum sit, radius luminosus transeat.

393. Similem compositionem experiri liceat, si liquorem flavum cæruleo miscueris.

394. A colorum diversitate petuntur variaz plantarum, tum in eodem, tum in diverso genere distinctiones.

395. Considera rosas, lilia, violas, populum.

396. Etiam eodem numero folia, vel fructus diverso tempore diversos colores recipiunt.

397. Haut secus atque capilli capitis nostri.

398. Quæ omnia colorum naturam, in varia luminis reflexione, pro diversa superficiæ corporum visibilium dispositione, consistentem demonstrant.

XVIII. *Plantarum sapes.*

399. *Saporum* natura eorum, quæ in arborum fructibus percipiuntur, exemplo rite declarari potest.

400. Fructus quippe dum Solis calore, siccum cum humido digerente & permiscente, paulatim ad maturitatem perducuntur, simul etiam sapes alios atque alios, pro diverso maturationis gradu, recipiunt.

401. Primò quidem acerbum, deinde austerum, tum acidum, tandem dulcem; & si excedens calor ulterius in eisdem agat, etiam amarum & acrem.

402. *Acerbum* igitur gustu deprehenditur in fructibus immaturis, ut & in prunis silvestribus, quibus lingua contrahitur atque exasperatur.

403. *Acris* in pipere, Zingibere, semine sinapi, cæpis, &c. qui linguam pungit ac dividit, cum sensu caloris dilatantis.

404. *Dulcis* in tritico & aliis, quibus lingua quasi oblinitur, & exasperatæ ejus partes æquantur.

405. Ad hunc saponem etiam refertur is qui *pinguis* appellatur, cuiusmodi est in oleo.

406. *Acidus* est in acetosa & similibus, quibus lingua pungitur ac dividitur, ut ab acris, at cum sensu frigoris constringentis. Confer. §. 25.

407. *Amarus* in absinthio, aloë, &c. quibus lingua detergitur & siccatur.

408. Et hi quidem quinque sunt saporibus *simplices*, è quibus extremi acerbus & acris, intermedius dulcis, acidus & amarus.

409. Ex illis componuntur saporibus alii, veluti *salsus* ex acris & amaro; *austerus* ex acido & acerbis; *vinosus* ex acris, dulci & acido.

410. Intelligitur è superioribus 1. saporibus inde oriri, quod calor frigore variè temperatus siccum cum humido temperat & miscet.

411. Quod idem artificiali coctione probatur in carnibus, quæ clixatæ vel assatæ saporem mutant.

412. Ita mel, quod à prædominante sapore dulce appellatur, quantumvis & acre sit, nimia coctione amarescit.

413. Intelligitur 2. quem in diversis saporibus introducendis ordinem natura servet.

414. Ex quo ordine porro constat, *dulcem* saporem amaro oppositum non extremum esse, ut multi putant. sed intermedium.

415. Quod vel ipsa ejus suavitas, qua sensum delectat, aperte evincit.

416. Eam namque mediæ potius qualitati, quàm extremæ convenire, exemplo viriditatis ante cognovimus. §. 388. sq.

XIX. Plantarum odores.

417. Odores iisdem ferè modis generantur ac distinguuntur, iisdemque nominibus appellantur, quibus saporibus.

418. Differentia tamen inter eos hæc intercedit, quod odor in partibus siccis & tenuibus, sapor in crassioribus & humidioribus præcipuè consistit.

419. Ad convenientiam pertinet, quod omne fere odoratum etiam sapidum est, licet non contra.

420. Imò quod corpus odorem saporis analogum plerumque habet, quamvis non semper.

421. Nam rosæ & myrrha saporem quidem amarum & ingratum, odorem verò dulcem obtinent.

422. Nempe sapor potissimum partibus inest crassioribus, quæ nullum odorem spirant: tenuiores autem & odoratæ partes saporem qui-

quidem odori similem habent, sed qui à crassarum partium sapore superatur atque obtunditur.

423. Subtiliores ac vividiores odoratorum corporum particulas inde licet agnoscere, quod creta, ossa combusta, aliaque insipida odore alterius, cui adjacent aut miscentur vel tantillum, sic imprægnari queunt, ut latè spirent; ut in moscho patet.

424. Flores non tam grati odoris si proximus sis, quàm si pauxillum distes.

425. Quia in propinquo sunt halitus crassiores herbæ atque ipsius etiam terræ, qui non longè avolant, uti subtiliores ac tenuiores.

426. Vel potius, quia florum halitus, si pauxillum distes, non tanta copia intrant nares, ut ultra modum nervos odoratorios moveant.

427. Ita enim parum stercoreis Zibethæ bene olet: sin multum ejus accipias aut thecæ, cui inclusum est, nares prope admoveas, foetet. Quod idem de pluribus aliis balsamis experientia confirmat.

428. Quoties tempestas valde calida est, herbarum florumque odores minùs percipiuntur, nisi fervor mitigetur, ut sit tempore matutino ac vespertino, item cadente pluvia.

429. Causam ex iis, quæ §. 265 & præcedentibus dicta fuere, petere liceat.

430. Unde etiam patet cur tempore valde frigido odores non percipiuntur.

431. Eundem effectum habet nimia tum *siccitas*, tum *humiditas*. Sic terra diuturno æstu torrida nullum odorem spirat, nisi compluatur. Rursus odorem diuturnâ pluviâ amittit.

432. Interim hoc verum manet, in odore calidum & siccum prædominari.

433. Hinc piper, caryophyllum, & alia aromata, cum sicca valde & calida sint, valde etiam odorata.

434. Inque Syria & Arabia plantarum odoratarum copia major. 1 Reg. 10: 10. Matt. 2: 11. quia loca sicciora.

435. Et odorata magis olent ubi calefeceris, ut patet in aqua rosarum stillaticia, &c.

XX. Mors plantarum.

436. Hactenus de plantarum colore, sapore, odore, calore, frigore, humiditate, siccitate pro epitomes nostræ ratione sat multa protulisse videmur.

437. In-

437. Inter qualitates earum sensibiles *sonum* quis restare putet: sed is in aëre potius & metallis, quàm plantis considerari meretur. Ph. §. 948. sqq. 1192. sqq.

438. Quare autem viva ac viridia ligna obtusiores habeant sonum, quàm mortua & exsiccata, expositum fuit Ph. §. 1007. sqq.

439. De morte igitur plantarum aliquid subnectamus, quæ ipsi, eodem sensu quo vita, à multis tribui solet.

440. Cur plantæ ex terra evulsæ, item rami ab arbore abscissi, dum ex loco in locum transferuntur, non statim moriantur, querere licet.

441. *Resp.* Succus in illis aliquantisper fluere pergit, neque porit tam citò mutantur. Hinc ligna vere amputata atque in terra jacentia sæpe aliquamdiu germinare pergunt.

442. Animal similiter per aliquot dies sine cibo & potu extrinsecus assumpto vitam sustentare valet.

443. An hieme quoque vivant plantæ, quando neque nutriuntur & crescunt, neque generant, quæstio potius de nomine, quàm de re esse videtur.

444. Si affirmes, muscas quoque hiberno tempore vivere statuas, necesse est: quod eadem utrobique ratio, nisi quod in musca sensum illum & motum, quem præter vegetationem in animalibus consideramus, cessare magis perspicuè videamus.

445. *Resp.* Vivere potius potentia, quàm actu, ita tamen, ut non censcantur prorsus emortuæ, quemadmodum illæ, quæ æstate æquè ac hieme tales existunt. Ponimus enim dispositionem corpori viventi necessariam hieme permanere, secus ac fit in iis, quæ exaruerunt.

446. Confer distinctionem inter id quod potentiâ calidum, uti vinum, & quod actu calidum, ut ignis.

447. At succum etiam hieme in multis plantis apud nos quodammodo interdum commoveri, negari non potest.

448. Tandem observa, quemadmodum alibi inter species contrarias media inveniuntur, Ph. 399. sqq. ita inter Plantas & Animalia existere *Zoophyta* seu Plantanimalia, ut arbor pudica quæ vocatur. At nunc ad Animalium theoriam progrediamur.

XXI. *Animal.*

449. In Animali non modò vitam, quemadmodum in Planta, verùm etiam sensum & motum considerare solemus.

R r

450. In-

450. Incipiamus à *vita* & calore, sicuti in plantis fecimus §. 198. ut quomodo reliqua inde sequantur videamus.

451. Datur autem calor continuus, quamdiu vivunt, in cordibus animalium, qui species est ignis tantum calidi. §. 15.

452. Inde *Cor.* inter omnia animalis membra primum vivens & ultimum moriens appellatur.

453. Istum calorem sanguis venarum nutrit, §. 18. ex alimentorum succis proveniens.

454. Estque is ignis principium corporale omnium, qui in membris animalium inveniuntur, motuum, sive ad vitam, sive ad sensum, sive denique ad motum specialiter in animalibus ita dictum referantur.

455. Primus illius effectus est *dilatare sanguinem*, quo cavitates cordis replentur sunt:

456. Sicuti cunctis liquoribus accidit, quoties guttatim in valde calidum vas stillant.

457. Hinc majorem locum sanguis exigens cum impetu ex corde egreditur. Confer exemplum *Æolippiæ*, Ph. 911.

458. Ac statim novus sanguis cor ingressus ibi rarefit eodem modo, quo præcedens.

459. In quo solo *pulsus* cordis & arteriarum consistit.

460. Qui pulsus reiteratur toties; quoties novus sanguis cor ingreditur.

461. Hoc quoque solum est quod sanguini *motum* dat atque efficit, ut indefinenter ac citissime in omnes arterias & venas fluat.

462. Qua ratione *calorem*, quem sibi in corde comparat, ad reliquas corporis partes defert.

463. Quamvis enim cor ardore ferrum candens æquaret, non sufficeret tamen ad manus & pedes adeo ac sentimus calefaciendum, nisi continuè illuc novum sanguinem mitteret.

464. Considera exemplum simile thermarum in terra.

465. Denique eadem ratione sanguis aliarum partium *nutritioni* inservit, quatenus aliquæ ejus partes, separatis excrementis, subsistunt in membris ad quæ accedunt. §. 119. seqq. 250.

466. At subtiliores ac celeriores omnes partes sanguinis, quas calor in corde rarefecit, indefinenter & maxima copia cerebri cavitates ingrediuntur.

467. Et hæc ibi ab aliis sanguinis partibus crassioribus separatæ *spiritus animales* componunt:

468. Quos

468. Quos instar vaporis tenuissimi è liquore rarefacto ascendentis concipere licet.

469. Spiritus è cerebro in nervos & musculos penetrando corpus *movent* tot ac tam diversis modis, quot moveri potest.

470. (Considera, quòd molæ à vento vel aqua similem ferè in modum agitentur.)

471. Hinc est, quod animalium quorundam capita, paulò post quàm abscissa fuerunt, adhuc moveri ac terram mordere videamus.

472. Causæ verò quæ efficiunt, ut spiritus non semper fluant eodem modo ex cerebro in musculos, & sæpius plures ad hos, quàm ad illos veniant, in corpore animalis duæ sunt.

473. Prior causa est inæqualis ipsorum spirituum & partium, ex quibus constant, agitatio.

474. Quæ inæqualitas provenit vel à diversis dispositionibus cordis, jecoris, stomachi, lienis, aliarumve partium, quæ ad spirituum productionem aliquid conferunt;

475. Vel à diversis materiis, ex quibus spiritus sunt compositi. §. 119. sqq.

476. Sic videmus in hominibus ebriis vapores vini citissimè sanguinem ingressos ex corde ad cerebrum ascendere, ubi in spiritus convertuntur, qui fortiores & copiosiores cum sint aliis ibi discurrere solitis, corpus plurimis miris modis commovere possunt.

477. Posterior causa consistit in varietate motuum, qui excitantur in organis sensuum per ipsorum objecta.

478. Quam externorum objectorum actionem ut intelligas, tria in *nervis* sensuum instrumentis considerabis.

479. Primò eorum *medullam* sive interiorem substantiam, quæ se extendit ad instar tenuium filamentorum à cerebro, unde originem suam habet, usque ad extremitates membrorum, quibus hæc filamenta innectuntur.

480. Deinde *potentes*, quæ filamenta circumdant, & quæ cum sint continuæ cum illis, quæ cerebrum involvunt, parvos tubos componunt, quibus hæc tenuia filamenta includuntur.

481. Denique *spiritus animales*, qui cum ferantur per hos ipsos tubos à cerebro usque ad musculos; efficiunt, ut hæc filamenta planè libera maneant, & tali modo extensa, ut vel minima res, quæ movet partem eam corporis, cujus extremitati aliquod eorum innectitur, movere faciat simul partem cerebri ex qua venit.

482. Sicuti extrema funiculi distanti parte tracta simul alia ei opposita movetur. Ph. § 12.

483. Ita sonus, odor, dolor, fames, ac generaliter omnia objecta tam sensuum externorum, quàm appetituum internorum, localem in nervis morum excitant, qui per ipsos ad cerebrum transit.

484. Qua ratione, etiam absque mentis cogitantis opera, possunt efficere, ut spiritus versus hos potius quàm illos musculos currant, atque ita membra moveant.

485. Ex. gr. si quis citò extenderit manum in oculos nostros tanquam nos verberaturus, quamvis sciamus eum nobis amicum, & non nisi joco id facere, abstenturumque ab omni malo nobis inferendo, vix tamen ab illis claudendis nos cohibere possumus.

486. Quo exemplo ostenditur, oculos tunc non claudi animæ rationalis imperio, cum id fiat contra voluntatem nostram, quæ sola aut saltem præcipua ejus actio est; (Confer §. 652.)

487. Sed quod machina nostri corporis ita composita sit, ut motus illius manus ad oculos nostros, excitet alium motum in nostro cerebro, qui spiritus animales deducit in illos musculos, qui palpebras deprimunt.

488. Ita plurimi dantur in nobis motus, qui nullo pacto à mente pendent, ut pulsus cordis, ciborum coctio, nutritio, convulsiones, respiratio dormientium, atque etiam in vigilantibus ambulatio, cantio & similia, cum fiunt animo non advertente.

489. Cumque ex alto decidentes manus in terram præmittimus, capitis tuendi causâ, nullo id rationis consilio facimus, nisi fortè rarissimè; sed tantum, quia visio impendentis casus ad cerebrum usque pertingens spiritus animales in nervos mittit, eo modo quo necesse est hunc motum vel mente invita & tanquam in machina producendum.

490. Et quoniam hæc in nobis ipsis experimur, non est quod tantopere miremur, si lumen è lupi corpore in ovis oculos reflexum eandem vim habeat ad motum fugæ in ipsa excitandum. Atque ita de alijs.

XXII. *Animans rationis expers.*

491. Sic apparet, quomodo bestiarum actiones per solam spirituum vim & membrorum conformationem explicari possint.

492. Sed obstat huic sententiæ ineuntis ætatis præjudicata & valde in nobis radicata opinio, in eo consistens, quod

493. Vi-

493. Videntes pleraque bestiarum membra figura externa & motibus à nostris non multum differre,

494. Unicumque in nobis esse credentes istorum motuum principium, Animam, quæ simul cogitet, simul corpus moveat;

495. Non dubitavimus, quin aliqua talis anima in bestiis quoque reperiatur.

496. Sed observandum primò est, eodem argumento infantes pupis suis cogitationem & intellectum assignere, quam tamen opinionem falsam esse nemo adultus ambigat.

497. Tum distinguenda sunt duo valde diversa in nobis principia, alterum mechanicum & corporeum, alterum incorporeum & spirituale. (Et modò demonstratum est, quomodo à solo principio mechanico animalium actiones proficisci queant.)

498. Ad quæ principia facilius distinguenda duæ, quæ sequuntur, conducunt regulæ:

499. Prior ista est: omne id quod experimur esse in nobis, & quod videmus etiam posse inesse corporibus planè inanimatis, & quidem in gradu excellentiore, id soli nostro corporitribuendum:

500. Cujusmodi res sunt motus & calor, quæ magis in flamma, quàm in ullo membrorum nostrorum inveniuntur.

501. Posterior hæc est: contrà, id omne quod nobis inest, & quod nullo modo concipimus posse corpori alicui convenire, nostræ animæ tribui debere:

502. Uti cogitare, sive intelligere & velle. Ph. 22.

503. Itaque cum omnia cadavera motus ac proinde caloris deprehendantur expertia, credi non debet, ut vulgo creditur, absentiæ animæ causam esse cur ille motus & calor cessent,

504. Quasi ab anima rationali præsentè hæc producta fuissent, aut revera produci possent;

505. Sed è contrario cogitandum, animam cum morimur non discedere, nisi quod calor ille cessat, & organa, quæ inserviunt motibus corporis, corrumpuntur.

506. Ut igitur hunc errorem evitemus, consideremus mortem nunquam accidere vitio animæ, at solummodo quod quædam ex principalibus partibus corporis corrumpatur;

507. Et judicemus corpus hominis & animalis cujusque viventis differre à corpore mortui, quantum horologium rectè dispositum atque in se habens principium corporale motuum, quorum gratiâ

elaboratum est, differt ab eodem horologio fracto, in quo principium motus agere cessat.

508. Quæ comparatio ut eò minùs paradoxa videatur, considerandum est, quàm varii motus in automatis humana industria fabricatis edi possint, ope quarundam rotularum, aliorumque instrumentorum,

509. Quæ numero sunt paucissima, si conferantur cum multitudine ferè infinita ossium, musculorum, nervorum, arteriarum, venarum, aliarumque partium, quæ in corpore cujuslibet animalis reperiuntur. Ph. 91.

510. Corporis igitur animalis machinamentum inspiciendum est tanquam automatum quoddam manibus Dei factum, quod infinitis melius sit ordinatum, motusque in se admirabiliores habeat, quàm ulla quæ arte humana fabricari possint.

511. Equidem cùm ars, quæ tamen naturæ, ut perfectioris agentis imitatrix tantùm est, Ph. 94. ejusmodi automata fabricare queat, in quibus absque ulla cogitatione motus existit,

512. Si quis neget, Deum automata arte factis longè præstantiora in natura producere posse, is parum attendit quæ Ph. 42. l. sq. annotavimus.

513. Cumque mens & corpus ad duo rerum genera omnino contraria pertineant, Ph. 22. sqq. ac nulla inter animum cogitantem & organa corporea naturalis connexio deprehendatur,

514. Mirandum quidem est, quomodo istæ tam diversæ naturæ conjungi potuerint in Homine: ac quomodo revera sejunctæ sint in Bestia, admirandi causam non habet.

515. Atqui è contrario naturalis & omnino necessaria inter mentem cogitantem & immortalitatem connexio intelligitur.

516. Nam ut corpus omne, quippe partes habens, dividuum est; ita mens omnis, utpote partium expert, individua.

517. Unde sequitur, cum qui mentem cogitantem bestiis attribuit, eisdem immortalem seu corruptionis expertem animam adscribere.

518. Hoc verò utrùm cum animæ humanæ prærogativa consistere queat, & quàm exigua veri similitudine non modò de vermibus, culicibus, erucis & muscis quotannis morientibus, sed etiam de perfectioribus animantibus assermetur, considerari velim.

519. Quamvis autem bestiarum anima ab ejus assertoribus non dica-

dicatur *rationalis* vel intelligentia & voluntate prædita ;

§ 20. Verùm cognitione tantùm, sensu & appetitu donetur ;

§ 21. Si tamen attendatur, quis clarus ac distinctus earum rerum, quæ istis nominibus designantur, animi nostri conceptus sit, quomodo posteriora à prioribus differant, aut illis inferiora sint, explicari nequeat.

§ 22. Præterea, si bestię vident atque audiunt uti nos, quæ vulg est opinio, quoniam oculos & aures habent nostris similes ;

§ 23. Cur non & loquuntur more nostro, quia non minus habent linguam, labia, dentes & alia organa sermonis elementis formandis apta, & quidem à nostris parum diversa ?

§ 24. Neque enim majore vi cognoscendi opus est ad loquendum, quàm ad videndum atque audiendum. Confer cap. XXXV.

§ 25. Utrobique sufficit exigua, cujusmodi vel in stupidissimis, amentibus ac deliris invenitur.

§ 26. Ac licet picas & pſittacos easdem, quas nos, voces proferre audiamus, non tamen loquuntur, ut nos, hoc est, ut ostendant se intelligere quidnam dicant :

§ 27. Cùm tamen homines à nativitate surdi & muti soleant propria industria signa quædam invenire, quibus mentem suam aperiant iis quibuscum versantur. Exemplum muti & surdi à nativitate cum sorore æquè ab utero nata & surda scitè legentis, scribentis, rationes computantis, & alia audientium ac loquentium munia præstantis, vide apud Camerar. op. subcif. part. 1. cap. 37.

§ 28. Hic autem distinguendæ sunt voces & motus animalium, qui ab eorum impetu naturali, ira, fame & similibus proficiuntur, à vero usu loquelæ, cùm aliquid voce aut motibus indicatur, quod ad solam cogitationem referri possit.

§ 29. Denique singulari animadversione dignum est, quod quamvis multa sint animantia, quæ plus industria quam nos in quibusdam suarum actionum patefaciant ;

§ 30. Eadem tamen nullam omnino in maleis aliis demonstrare conspiciantur.

§ 31. Ita ut id quod melius nobis faciunt, non probeat ipsa esse ratione prædita ;

§ 32. (Nam inde sequeretur majorem in illis inesse rationem, quàm in ullo nostrum, & quod eadem nos in omni etiam alia re superaretur sint ; cùm ratio sit instrumentum universale, quod in omni occasione usui esse potest.)

§ 33. Sed

533. Sed potius probat, ipsa ratione esse destituta, & naturam in iis secundum organorum dispositionem agere, quæ pro actionum varietate varia est, & ubi talis est qualis esse debet, idem semper opus æquè perfectum producit.

534. Sic videmus horologium ex rotis tantum & ponderibus compositum, æqualius quàm nos omni nostra prudentia, horas numerare & tempora meriri.

535. Ad quam similitudinem §. 508. sqq. cum relabamur, observa, tam facile animalia quædam mortua reviviscere, quàm facile horologium corruptum reficitur.

536. Imò non esse difficilius intellectu, quomodo muscæ hieme mortuæ, & quiescentes æstate reviviscant & volent, quàm quomodo aqua frigore congelata, igne iterum lique scat & ferveat.

537. Et quemadmodum artificialium constitutio non in puncto consistit, sed magnam habet latitudinem; ut ecce horologium, aut rectius, aut minùs rectè horas admetitur:

538. Ita dispositio partium corporis animalis actionibus rectè obeundis aut satis apta est, aut contrà: unde *Sanitas & Morbus*.

539. Quamvis autem hæc omnia de bestiis examinanda proponamus, non tamen ii sumus, qui vitam & sensum ipsiis adimant.

540. Sed vitam illam in cordis calore sitam esse, & sensum ab organo corporeo, non ab anima cogitante pendere arbitramur.

XXIII. *Animalium differentia.*

541. Bestiarum, haut secus ac Plantarum, genera sunt innumera: ne jam dicam de singulis individuis.

542. Adeo ut utrumque Viventium genus materiæ in infinitum divisæ nobis illustre specimen exhibeat. Ph. 407.

543. Distinguuntur autem animalia cum aliunde, tum à loco, in quo potissimum vivunt, & motu quo ibi feruntur.

544. Atque ita sunt volatilia, aquatilia, aut terrestria.

545. *Volatiles* animantes sunt Aves seu volucres, quarum Aquila regina est acutè cernens.

546. Harum alis celeriter agitatæ dum aër resistit, Ph. 219. vim gravitatis superant, qua corpora earum aliàs deorsum feruntur:

547. Ut patet in avibus deplumatis, vel iis etiam, quarum alæ de-
current.

548. *Aquatiles* animantes sunt Pisces, & quæ iis annumerantur, ut
can-

cancrī & monstra, quæ vocantur marina, cujusmodi hippopotamus, &c.

549. Natant pisces agitatione pinnarum in aquis ac directione caudæ, quæ id pisci est, quod navi clavus.

550. Cum autem aqua multò sit crassior aëre, adeoque magis resistat, patet cur facilius homo pisces imitari possit natando, quàm aves volando.

551. Ut etiam patet cur aviculæ crassiore aëre volent expeditiùs :

552. Item, cur natatio nobis facilior in aquis marinis quàm fluvialibus. Ph. 1070. sq.

553. Porro cum avium & piscium motus dirigantur in anteriora, mirum non est quod plumas, pennas, pinnas versus posteriora inflexas habeant. Vide Ph. 285. 313. 973. ubi exemplum sagittæ pennatæ.

554. Aves maximè vocales, pisces muti: quod consonum est iis, quæ de aëris ad sonum aptitudine & aquæ ineptitudine diximus Ph. 1003. &c.

555. Aliis quoque animantibus sua vox peculiaris est, qua inter nosci solent, cujusmodi est boatus & mugitus boum & vaccarum, rugitus leonum, latratus canum, hinnitus equorum.

556. Bestiæ *terrestres* sunt, tum quadrupedes, ut elephas; tum reptiles, ut vermes.

557. Quadrupedes progrediuntur alternatione pedum, ut alia quoque animalia, quibus bini vel quaternis plures sunt pedes.

558. Reptilia corpus nunc intendunt, nunc laxant, ita ut altera ejus parte innitentes, progrediantur altera. Ph. 80.

559. Ultimo inter animantia loco habentur *Insecta*, quorum tamen contemplatio homine digna, cum in minimis bestiolis ars divina vel maximè eluceat.

560. Nam in tantula mole, quantula verbi gratiâ est pulicis aut chironis, Germ. *Silren* / tantam partium, figurarum, motuum ponere diversitatem solius Dei est. Ph. 91.

561. Et ista animantia magnitudine virtutis, quàm molis censeri sæpius debent. Sic plura miramur in ape, quàm bove; plura in formica, quàm asino.

562. Qui tamen muscam Soli præferre audent, eo quod vitales actus exerceat, illi corporeæ vitæ in solo calore seu fermentatione consistentis atque à Sole pendentis naturam non assequuntur.

563. Alioquin enim è particularibus effectibus minimum aliquem universali causæ multò maximæ nollent anteferre.

564. Insectorum alia sunt *volatilia*, ut apes & musca, de quibus diximus; alia *terrestria*, ut araneæ, bombyces; alia *aquatilia*, ut tulpæ.

565. *Saltare* homini cum pluribus animantibus commune est: quod qua ratione fiat, ostensum Ph. 205.

566. Unde etiam liquidum esse potest, quare saltum facturi prius ex aliquo intervallo accurrant: nempe ut eò vehementius terram pedibus concutiant, atque inde validius ascendant.

567. Intuitu generationis animalia sunt *vivipara* vel *ovipara*. §. 235. sqq.

568. Ovipara sunt aves & pisces, quorum ideo major est fecunditas, quàm quadrupedum viviparorum.

569. Ova enim facilius utero augentur, quàm foetus.

570. E generationis depravatione oritur *Monstrum*, id est, animal à recta & solita generis sui dispositione, & quidem deformitate aliqua notabili, degenerans.

571. Ratione loci motusque localis animalia etiam in *mansueta* & *fera* distinguuntur.

572. Cujusmodi divisio non modò generaliter animali, verùm etiam pluribus animalium speciebus, uti gallinis, anseribus, &c. imò & plantis quodammodo applicatur.

573. *Fera* vocatur quodvis animal, cui à naturâ vis insita est liberè vagandi in terra, mari, aëre.

574. Non igitur septo ullo vel custode servatur, uti animal *cicur*.

575. Quamvis autem bestię valde ferę consuetudine cicurari possint, facile tamen ad naturam redeunt. Confer §. 337. sqq.

576. *Mansuetas* interim bestias inter ferarum & naturâ cicures quasi medias possis existimare.

577. Sed & inter alia opposita animalium genera *participia* inveniuntur. Confer §. 448.

578. Veluti *Vespertilio* inter aves & quadrupedes.

579. *Piscis volans* inter aves & pisces.

580. Et generaliter *Amphibia* inter ea, quę vel in aqua vel in terra solùm versantur, ut rana.

581. At *Homo* participationis medium est non inter certā animalium, sed inter prima & summa rerum contrariarum genera. De quo deinceps latius nobis agendum est.

XXIV. Ho-

XXIV. *Homo.*

582. Homo *μικρόκοσμος* vel parvus Mundus dicitur,
 583. Quoniam corpore quidem suo rerum corporearum;
 584. Se autem toto rerum omnium creaturarum universitatem representat, Ph. 362. sqq.
 585. E duabus enim constat substantiis, toto genere diversis, Mente & Corpore, Ph. 22. sqq.
 586. Nec datur ei simile compositum in Universo. Vide Corp. & Anim. in Hom. Conjunct. cap. IV.
 587. Itaque natura ejus tali definitione bene declaratur:
 588. *Res composita ex mente finita & corpore organico.*
 589. Vulgaris definitio, *animal rationale*, minus bona. Vide Log. IV. 56. sqq.
 590. Mentem nostram *finitam*, id est, non omnino perfectam esse, vel ex eo patet, quod sæpe dubitat & optat.
 591. Quæ duæ operationes veri & boni alicujus absentiam in animo demonstrant: ad quas perfectiones consequendas non modò passivam potentiam, sed etiam activam propensionem ipse in se experitur.
 592. Corpus animo junctum, non est simplex & uniforme quiddam, ut aqua vel aurum (Repete Viventium & non viventium differentias cap. 11.)
 593. Sed variis *organis instructum*, quo Homo multas ac diversas functiones exercet.
 594. Verumenimvero ut natura Hominis plenius intelligatur, primò quidem separatim Animum & Corpus, deinde conjunctionem utriusque contemplantur. Confer Ph. 361.
 595. Qua ratione attributa Hominis triplicia inveniemus.
 596. Nam alia solius mentis, alia solius corporis, alia partis utriusque habito respectu ipsi adscribuntur.

XXV. *Mentis humana natura.*

597. Mentis naturam investigantibus primò quidem occurrere solent illa attributa, *insensibile* atque *invivibile*:
 598. Quæ cum non modò negativa, sed corporeis quoque rebus communia sint, Ph. 28. sqq. 412. propriam Mentis essentiam haudquaquam explanant.

599. Occurrunt deinde illa, quæ formantur per negationem corporis & materiæ, *incorporeum*, *inhmateriale*, quæ etiam, quid non sit Animus, tantummodo declarant.

600. Tertio loco sunt qui *Spiritus & rei spiritualis* nomine Mentis naturam explicare conantur.

601. Atqui illud etiam nomen commune rebus esse corporeis §. 467. sqq. vidimus: nec aliò id nos ducere solet, quàm ut subtilis ac tenuis materiæ participem Animum concipiamus, cum tamen omnis materiæ expertem fateamur.

602. Quarto loco sunt qui *formam* vel *actum corporis organici*, aut *principium quo vivimus*, Animum definiunt.

603. Quæ attributa nimis generalia, Logica & respectiva sunt, non specialia, Physica & absoluta, cujusmodi in præsentia quærimus.

604. Adde quod isti inhærens definitioni in eum faciliè labitur errorem, ut plures effectus putet ab Animo pendere, quæ à causis tantum corporeis oriuntur, §. 485. sqq.

605. Denique si nihil aliud est Anima, quàm forma aut actus, seu operatio vel potiùs agitatio corporis viventis organici, quomodo percunte corpore ipsa non intereat quis explicet?

606. Quinto igitur loco optimum factu videatur, si Mens à sensibus ac rebus corporeis communibusque vocabulis aliquantisper abstracta semetipsam sola intueatur,

607. Intus revera experiendo se intelligere, velle, dubitare, optare, affirmare, negare, cogitare, numerare, ratiocinari, amare, odisse, &c. quorum omnium actuum sibi intimè conscia est.

608. Et quoniam cuncta illa brevi definitione exprimi nequeunt, quodnam ex iis primum & potissimum sit, investigandum.

609. Id autem *cogitationem* esse deprehendimus.

610. Mens enim si intelligit cogitat, si vult cogitat, si non vult cogitat, si admiratur cogitat, si ratiocinatur cogitat, si numerat cogitat, si affirmat cogitat, si negat cogitat, judicans cogitat, dubitans cogitat, rectè sentiens cogitat, errans cogitat, &c. atque ita in qualibet ejus functione cogitatio inest.

611. At non è contrario si cogitat etiam affirmat, si cogitat etiam dubitat, si cogitat etiam numerat, etiam admiratur, &c. Vide Log. I. 102.

612. Definiatur igitur Mens seu Animus, quod sit *res cogitans*.

613. Utque ad humanam Mentem, quæ à divina atque angelica distinguenda est, restringatur definitio, addantur illa: *finita corporis*

orga-

organico mutuo quasi fœdere conjuncta. Confer Corp. & An. Conjunct. cap. XVIII. sq.

614. Ex tali explicatione levi negotio colliguntur reliqua, quæ de Anima quæri solent.

615. Quando enim res cogitans est, non extensa, Ph. 22. sqq.

616. Utrique nec dividi potest vel dissolvi, nec tangere vel rangi,

617. Nec ab ulla vi corporea produci, conservari vel destrui.

618. Nec denique alio quocunque modo corporis instar affici, moveri aut figurari.

619. Addeo ut omnes illæ rerum materialium affectiones, quas Physicorum pars communis generaliter explicat, à natura Animæ rationalis prorsus alienæ sint.

XXVI. *Mentis immortalitas, propagatio & unitas.*

620. Speciatim verò inde concludatur, Animam nostram esse revera *immortalem* & naturâ suâ incorruptibilem :

621. Non solum ea ratione, qua Materia seu corpus in genere spectatum generationis & corruptionis expers esse affirmatur, Ph. 149.

622. Verum etiam, quod nullas in partes sit unquam dividua : quæ corporis perpetua est proprietas. Ph. 56.

623. Concludatur etiam, Animam rationalem haudquaquam *propagari per traducem*, quasi semen corporeum sit vehiculum, per quod anima à parentibus soboli communicetur,

624. Haut aliter ac ramusculus arboris (id enim est *tradux*) avulsus, retinendo vitam suam, in alium truncum vel terram traducitur. §. 299. sq.

625. Neque animam ab animo produci, ut lumen à lumine accenditur :

626. Neutrum enim sine extensione ac divisione, quæ in animum nulla cadunt, intelligi queat.

627. Et novam prorsus substantiam, cujusmodi mens est in homine qui nascitur, efficere, non Mentis finitæ, sed infinitæ opus est.

628. Necessum itaque est, animam cujuscunque hominis à Deo immediatè creari, utpote à quo solo etiam conservatur.

629. Hoc verò non obstat quò minus per generationem à parentibus ad liberos peccatum originale propagari statuamus.

630. Nam (ut alia mittam) bonitati & justitiæ divinæ non magis repugnat animam reatui obnoxiam creare, quàm talem conservare :

cum nil nisi continuata creatio sit quod conservationem dicimus.

631. Nec sanè potest humanum genus aliter, quàm continuâ novarum creatione animarum, in orbe conservari.

632. Μετεμψύχως enim, q. d. *transanimatio*, sanæ rationi & fidei adversatur. Sed illud de peccato argumentum non Physico, sed Theologo accuratiùs enodandum.

633. Quamvis etiam Deus animam creet, & corpori, ut loquuntur, infundat, homo tamen generare hominem dici queat:

634. Quoniam sic disponit corpus, ut ipsi jungatur anima: quemadmodum hominem occidere dicitur, qui sic disponit corpus, ut anima ab eo separetur. Ad corporis enim seu materiæ convenientem, & proximam seu ultimam dispositionem, quam homo generans inducit, anima infallibili Dei ordinatione consequitur. Quæ *lex* quædam *natura* specialis est, divinæ testis constantiæ, qua semel ita cum Creaturis suis concurrere decrevit. Nec alia ratio est Legum naturæ, de quibus in Phys. generali, Ph. 148. sqq.

635. Præterquam quod argumentum illud adversus animæ creationem allatum, cum in solo loquendi modo fundetur, parum roboris in Philosophia habet,

636. Præsertim apud eum, qui è Metaphysicis didicerit, non res, sed modos rerum esse totum illud, quod à vi & operatione Creaturæ pendet.

637. E dictis quoque ad illam quæstionem, *an plures in Homine dentur Anima*, persfacile respondetur, magis eam de nomine esse quàm de re.

638. Unica namque in Homine quolibet *Anima* existit, quæ *rationalis* cognominatur, ac rectiùs *Mentis* & *Animi* vocabulis denotatur.

639. Neque actiones ullæ verè *humana* censendæ sunt, nisi ab hoc principio, saltem dirigente, pendeant.

640. Vires autem vegetandi & corporis movendi, quæ in plantis & bestiis *Anima vegetativa* & *sensitiva* vulgo nuncupantur, sunt quidem etiam in Homine, sed *Hominis Anima* in eo non debent appellari.

641. Neque fortassis in plantis & bestiis eo velut communi nomine insignitæ essent, nisi aliquid humanæ Menti simile illis etiam Viventibus nominum inventor vulgus affinxisset.

642. Hoc saltem certum est, non posse Animam vel Vitam, ceu genus in vegetativam, sensitivam & rationalem dividi, cum duo illa priora cum tertio nihil habeant commune, ut expositum Log. I V. 45. sqq.

643. Quam-

643. Quamobrem planè ab iis dissentimus, qui unicam homini animam, quæ rationalis est, tribuentes, existimant eam talis esse naturæ, ut vegetativam & sentientem virtute comprehendat, quasi eadem præstare in homine, quæ vis præstat vegetativa & motrix in plantis & bestiis.

644. Mens enim humana non potest nisi cogitare: atqui sollicitè quantumvis cogitando ne quidem vel tantillum ad staturam corporis sui adjicere potis est.

645. Multò minùs *sui domicilii architecta*, seu corporis fabricatrix haberi queat.

646. Cum enim non possit corpus sibi junctum ullo modo *conservare* (licet cogitare & velle possit ea quibus conservatur) qui valeat illud *procreare*? Confer §. 631.

647. Nec sanè Anima cogitans cibum coquit in ventriculo, nec sanguinem per corpus distribuit, nec vim prolificam exercet ullam. Repete quæ supra de Animali generatim, & speciatim de eo, quod rationis expertus est, tradidimus.

XXVII. Cogitationum genera.

648. Nempe longè sunt aliæ Mentis humanæ functiones, quas communi Cogitationum vocabulo complectimur, uti vidimus §. 608. sqq.

649. Quando verò permultæ illæ sunt ac variæ, ut in certa genera distinguantur operæ pretium erit.

650. Videntur autem cogitationum aliæ actiones animi nostri, aliæ ejus passionēs potiùs existimandæ. Animus enim Hominis est actus impurus seu mixtus, agendi simul & patiendi facultate præditus: quo ipso quidem à Deo, qui actus est purissimus, nihil habens potentia passivæ admixtum, apertè satis distinguitur, §. 591. 614.

651. Actiones voco omnes nostras *voluntates*, quia experimur eas directè ab animo venire.

652. Passionem generaliter appello omne genus *perceptionis*, quæ in nobis invenitur, quia sæpe accidit, ut animus noster eam talem non faciat, qualis est, & semper eam recipimus ex rebus, quæ cognoscendo repræsentantur.

653. Si quid simile his animi proprietatibus quæris in natura corporea, nihil utique invenies revera tale.

654. Poteris tamen (dum in Physicis versaris, & ad exempla corporea

poreā perpetuū inclināt animus) aliquo modo cogitare, voluntatem ita se habere in animo , uti se habet motus, actīva significatiōe , in corpore. Ph. 129. sq.

655. Ad perceptiōes autem suas ita se habere mentem humanam, uti cera se habet ad varias, quas recipit, figuras.

656. Adeo ut voluntas latio quādam animi esse videatur, tendens ad objectum in idea propositum; perceptiō autem quādam ejus figuratiō vel in varias formas conversiō, veniens ab objecto.

657. Quemadmodum verò in corpore figurę variatiō nunquam sine motu existit, Ph. 285. ita nec perceptiō ulla in animo nostro est sine aliqua voluntate. Simul enim ac perceptum est aliquid, voluntas in illud ferri nec assensus inhiberi solet.

658. Quamobrem duę istę facultates difficulter admodum distinguui, dividi quidem ac separari neutiquam possunt.

659. *Volitio* latè sumpta, seu latio cogitationis nostrę versus objectum respicit illud, vel sub notione veri & falsi, quod appellatur *Iudicium*, vel boni aut mali, quod *velle & nolle strictius* dicitur.

660. Adhęc voluntates nostrę vel in ipso animo terminantur, ut cūm volumus amare Deum;

661. Vel terminantur in corpore, veluti cūm ex ambulandi voluntate motus pedum sequitur.

662. Nimirum regere ac gubernare animus potest corporis nostrī motus, licet eos producere atque efficere nequeat.

663. Perceptiōes nostrę vel animam pro causa habent:

664. Veluti cūm percipis te velle, imaginari vel aliud quodcunque cogitare.

665. Vel pro causa habent corpus, unde §. 653 diximus, quod anima sæpe tales eas non faciat, quales sunt (*Causam* intellige, quę excitat vel occasiōem dat).

666. Et hęc perceptiōes vel à *spiritibus* diverso modo agitatīs procedunt:

667. Uti somniorum illusiones & phantasie vigilantium, quoties cogitatio negligenter vagatur, nulli rei se addicens.

668. Vel pendent à *nerviis*, §. 479. sqq. quarum rursus triplex existit differentiā.

669. Nam perceptiōes hęc aut *referimus ad objecta externa*, quę sensus nostros feriunt:

670. Ita dicimus nos videre cereum, audire campanam.

671. Aut

671. Aut referimus eas *ad corpus nostrum* ejusve partes:

672. Ut cum esurimus, sitimus, dolorem, calorem tanquam in membris nostris sentimus.

673. Sic eodem tempore & opera eorundem nervorum sentire possumus frigus nostræ manus & calorem flammæ, ad quam accedit.

674. Aut denique referimus eas *ad animam nostram*:

675. Cujusmodi sunt lætitiæ, iræ similiumque affectuum perceptiones.

676. Atque hæ postremæ passiones animæ specialiter vocantur: Confer §. 653. quod reliquarum nullæ tantopere animam quatiant.

677. Istas omnes perceptiones à nervis pendentes si consideres, non, tanquam effectus corporearum causarum in animo; sed ut compositum quid ex aliquo corporis nostri motu & mentis cogitatione in homine, ad attributa tertiæ generis referes, §. 597.

XXVIII. *Quantitas corporis humani ejusque partium.*

678. Secundi generis affectiones eadem sunt in Homine, quæ in quovis corpore, licet singulæ proprium quid habeant.

679. Nempe primò *magnitudo* totius, quam homo non est nactus instar muscæ exiguam, nec instar elephantis amplam, sed inter animantia quodammodo mediam: quod ad multiplicem organorum apparatus, variamque eorum structuram, crassorumque pariter & subtilium operum tractationem apprimè conveniens esse agnoscimus. Vide §. 594.

680. Magnitudine adultus infantem superare debuit: quod non modò principia rerum parva existant, verùm etiam à matre contineri ac gestari proles nequeat, si ipsam adæquet magnitudine.

681. Ita *pygmeus* à *gigante* differt magnitudine, ut & homuncio quilibet à longurione:

682. Sic tamen ut in humana, perinde ac in omni alia viventium, specie certi magnitudinis & parvitatæ termini dentur.

683. Ejusdem quantitatis intuitu natio à natione discriminatur, ob causam expositam §. 34. sqq.

684. Est & sua partibus singulis magnitudo, qua cunctæ sibi proportionem quadam respondent.

685. A qua proportionem receditur, si magnitudo plus justo augeatur vel minuatur.

686. Partium justo major extuberantia *Tumor* appellatur.

T t

687. Ma.

687. Magnitudo plus iusto aucta quandoque deprehenditur in parte, quæ aliâ debuit contineri, veluti si linguae tanta sit moles, ut ore concludi nequeat. Confer §. 681.

688. Contra diminuta plus iusto magnitudo interdum conspicitur in pedis aut brachii nimia brevitate, in fronte nimis contracta, vel partis alicujus macie.

689. Sequitur *numerus* partium, ex quibus corpus humanum constat, qui certus ferè ac determinatus est, adeo ut hîc, magis etiam quàm in magnitudine, excessus æquè ac defectus in vitio sit.

690. Excessus, ut si quis nascatur biceps, aut pluribus quàm decem digitis præditus.

691. Defectus est si dentes excidant aut pili, unde calvities. Utriusque effectus causas vidimus §. 61. sq. si quis monoculus, aut alia parte mutilus.

692. Partes corporis humani in homogeneas & heterogeneas, vel similes ac dissimiles dividi solent.

693. At ossa, sanguis, &c. non sunt homogenea corpora, nisi ad sensum tantum.

694. Melius autem secundum *Physicam generalem* Ph. 233, partes nostri corporis dividuntur in *fluidas*, uti sunt sanguis & spiritus, §. 467. & *stables*, uti sunt ossa.

695. Vulgo partes corporis humani nomine *carnis* & *ossium* comprehendunt, quasi molles ac duras exprimere vellent.

696. At plenior erit partium integrantium designatio, si dixeris illud ex ossibus, nervis, musculis, venis, sanguine & pollibus esse coagmentatum. Quibus adde *impetum facientes* spiritus.

697. Adhæc partium corporis nostri aliæ separatae sunt, aliæ conjunctæ. Ita labia coalescere non debent.

698. Si membrum, quod unum & continuum est, dividatur, *Solutio continui* dicitur.

699. Hæc manifestior quidem est in vulnere, ulcere, fracturis, &c.

700. Sed datur etiam in pressione ac tensione quacunque.

701. Et omnis dolor proximè à solutione continui proficisci videtur, licet non è contrario quævis continui solutio dolorem inferat.

702. Proximè dico, nam dolor etiam igni, gladio, aliisque rebus, ut causis remotis adscribitur. Confer §. 669. sq.

703. Neque intelligimus alio modo corpus nostrum *aut* vel dolore affici, quàm si illud, quod unum in eo, & continuum est, plus iusto solvatur ac dividatur.

XXIX. *Figura & situs totius ac partium.*

704. Sequitur figura Hominis vel forma externa, cujus in facie, accedente coloris diversitate, pulchritudo ac varietas præcipue notanda est.

705. Hæc varietas eo inservit; ut non modo hominem ab homine dignoscas; sed etiam animi affectus ex oculis & vultu, ejusve pallore aut rubore, livore, aliisque accidentibus colligas.

706. Ratione situs, quo erectum ad sidera vultum tollit Homo, non modo à bestiis, quarum pleræque pronæ terram spectant, discernitur, verum etiam cum planta inversa comparatur, §. 333.

707. Figuram igitur & situm convenientem non modo totum corpus habet, sed etiam partes singulæ.

708. A qua convenientia si recedatur, malæ figurationis vel prævi situs morbus existit.

709. Mala figuratio vel est in superficie, ut in scabie, papularum vestigiis, &c. vel in cavitatibus interioribus, quoties illæ nimis vel dilatatæ, vel angustatæ. Confer Ph. 306. 314.

710. Mala quoque figuratio est, cum recta sunt membra, quæ curva esse deberent, aut contra. Considera varos, gibbos, &c.

711. Prævus partium situs est ex. gt. in luxatione ossis, &c.

712. Situ & ordine partium stabilium considerato corpus humanum dividitur in Truncum & Artus, qui sunt brachia & pedes.

713. Truncus distinguitur in tres ventres, id est, cavitates magnas, in quibus princeps aliquod viscus continetur. Confer Ph. 302.

714. Horum supremus est *Caput*, in quo cerebrum, &c.

715. Medium est *Thorax*, in quo cor, &c.

716. Infimus est *Abdomen*, in quo ventriculus, partes genitales, &c.

717. Tandem ad situm totius Hominis pertinet etiam locus ejus in terra, ubi stat; jacet, sedet, &c. prout alia atque alia operatur.

718. Illustre figuræ & situs partium exemplum superioribus declarandis inserviens petamus ab *Oculis*.

719. Hi in sublimi positi hunc nobis usum præstant, ut longius prospectemus.

720. In parte corporis anteriore, ut gressus dirigantur, §. 554.

721. In ossis quod latent recessibus, id securitatem ipsis præstat.

722. Quod prominens aliquantum, id eo facit, ut quæ à latere etiam videantur.

723. Rotundi cum sint, eò plures capiunt luminis radios, quoniam figura ista capacissima est. Ph. 300. Quæ omnia de oculis proferimus, non quasi à priori demonstraturi, eos sic omnino formari debuisse; sed quod eorum ita formarum usum duntaxat indicare velimus. Idem judica de similibus alibi prolatis, ut §. 680. Quare demonstrationes à fine in Physicis non amemus, ex §. 194, & aliunde, discere licet. Vide Ph. 425.

XXX. *Motus, vox, risus, fletus, sudor.*

724. *Motus*, quo totus Homo de loco in locum transfertur, incessus & ambulatio est, quamvis & pisces nando imiteretur, §. 55 1.

725. *Motus* partium humani corporis varii existunt,

726. Quorum alii nullo modo pendent à nostro arbitrio, §. 662. uti tussis, vomitus, oscitatio, sternutatio, singultus, motus cordis, &c.

727. Alios moderari quidem aliquantulum & ad breve tempus suspendere, non tamen pro lubitu regere vel diu omittere valeamus, ut ecce somnum & vigiliam, respirationem, apertionem & conclusionem oculorum, alvi & urinæ excretiones, &c.

728. Alii denique, veluti capitis similibumque membrorum voluntarii motus, mentis quidem imperio subjiciuntur; at sæpe tamen non parent,

729. Seu ab internis procedant causis, seu ab externis, quæ sensuum nostrorum vel motuum specialiter ita dictorum organa, voluntate etiam repugnante, afficiunt, §. 487. seqq. Ph. 1.

730. Ita non modò frigus aëris, verum etiam ira, metus & ebrietas tremorem inducunt. Multi etiam senes nolentes volentes capite nutant.

731. Ad motus Hominis etiam spectat *Vox* ejus,

732. Et ea quidem tum *articulata*, quæ sermo;

733. Tum *inarticulata*, qualis in risu & fletu.

734. Ad vocem formandam concurrunt primò pulmo & aliarepirationis organa, aërem suppeditando, Ph. 948.

735. Inde vocis intensio & remissio præcipue pendet.

736. Deinde larynx, quæ fistulæ pulmonariæ caput seu initium est.

737. Hinc vocis acumen & gravitas: prout vel angustior est larynx, ut in junioribus; vel amplior, ut in adultioribus.

738. Ita

738. Ita pueri acutiùs canunt, quorum guttur angustius est. Et latiora crassioraque instrumenta graviùs sonant.

739. Denique ad vocem perficiendam juvant organa, quæ ipsam articulatam ac distinctam reddunt, uti lingua, palatum, dentes, labia.

740. Unde non malè literarum divisionem Grammatici Hebræi petunt.

741. *Risus* alius artificialis & fictus, cujusmodi sæpe comitatur indignationem, alius naturalis, qui comes lætitiæ.

742. Qui ex titillatione est, cum sæpe dolor illico insequitur.

743. Sicuti etiam post multum risum naturaliter ad tristitiam propendemus.

744. *Lacryma* fiunt è vaporibus, qui egrediuntur ex oculis:

745. Uti *sudor* ex iis, qui ex aliis corporis partibus egressi in earum extremitate in aquam coeunt.

746. Quemadmodum autem vapores mutantur in pluviam, quoties vel minus agitantur, vel solito copiosiores sunt:

747. Ita in corpore nostro à priori causa sudores frigidi existunt, ut in ægrotis è debilitate.

748. A posteriori causa proficiuntur illi, qui exercitium comitantur.

749. Tunc autem oculi non sudant, quia maxima parte spirituum ingredientie musculos, qui corpori movendo inserviunt, minor eorum copia per nervum opticum ad oculos venit.

750. Estque eadem omnino materia, ex qua fit *sanguis*, dum est in venis aut arteriis:

751. Et *spiritus*, cum est in cerebro, nervis aut musculis:

752. Et *vapores*, cum inde prodit instar aëris:

753. Ac denique *sudor* aut *lacryma*, cum in aquam condensatur in superficie corporis vel oculorum.

754. Imò, quemadmodum *nebula* ex aëre descendens & plantis adhærens, prout minùs magisve terra refrigerata est, vel in *rorem* abijt ex aquæ guttis compositum, vel in *pruinam* è vaporibus gelatis constantem:

755. Ita *halitus* ex ore viri egressus hiberno tempore barbæ adhæret, pro minori majorive aëris ambientis frigore in *aquam* vel *glaciem* conversus.

XXXI. *Hominis temperamentum, sexus, ætas ac tempus.*

756. Quantum attinet ad temperamentum humani corporis, illud in aliis atque aliis partibus, aliud atque aliud est.

757. Sic pars omnium calidissima est cor, §. 451. humidissima cerebrum, §. 27. frigidissima & siccissima ossa.

758. Ubi conveniente suo temperamento corpus privatur, morbus *intemperiei* existit.

759. Ita febricitantes præternaturalem calorem, frigus & horrorem sentiunt, quæ vulgus pro *Febri* habet.

760. At Physicus in depravata potius sanguinis fermentatione febris essentiam ponat.

761. Temperamento differt *Mas à Fœmina*, quod ille calidior & siccior, hæc frigidior & humidior.

762. Atqui *sexus* diversitas pendet etiam à partium generationi destinatarum conformatione.

763. Unde *Mas* dicitur animal, quod gignit in alio; *Fœmina*, quod in seipso.

764. Inter marem & fœminam participationis mediam est *Hermaphroditus*, ἀνδρόγυνος.

765. A temperamento quoque ætatum discrimina pendent,

766. Quarum, haut secus atque aliarum *Hominis affectionum*, plures in *Homine*, quam in reliquis *Viventibus*, differentiarum numerantur:

767. Nempe infantia, pueritia, adolescentia, juvenus, virilis ætas, senectus.

768. Quoniam autem temperamenti mutationes in aliis hominibus citius, in aliis tardius contingunt,

769. (Sicuti fœmina citius mare pubescit)

770. Ideo ætatum intervalla certo annorum numero vix definire liceat.

771. Corpore quidem infantes humidi, senes sicci, §. 75. seqq.

772. Quod spectat ad animum, juvenum cogitationes ad futura progrediuntur, suntque præcipitæ, ut ipsi calidiores.

773. Senum frigidiorum cogitationes ad præterita regrediuntur, ac tardæ sunt. In quibus exemplis, aliisque id genus, quomodo mores animi sequantur temperamentum corporis, considerare licet.

774. Quod autem imbecillitatis humanæ intuitu *senes bis pueri* dicuntur

cuntur, id pertinet ad circulum ac revolutionem rerum, de quo Ph. 641.

775. Præterea ut *unicuique fermentationi certum tempus præfixum est*, §. 56. sq. ita & in corpore humano se res habet.

776. Exempla dantur in fervore iræ, quæ vix superatur ab anima prius, quàm commotio cordis, sanguinis, & spirituum sedata fuerit.

777. Dantur in paroxysmis febrilibus, §. 216. unde febris intermittens, quotidiana, tertiana, quareana, &c.

778. Dantur in fervore cupiditatis, juvenilis pariter & senilis, honestæ & vitiosæ:

779. Imprimis illius, qua quis fertur in personam alterius sexus. Nam talis cupiditas non nisi certo ætatis tempore hominem incescit, quando confusa quadam cogitatione tanquam ad maximum suum bonum tendit, quod ante & post illud tempus distincto intellectu utrens non tanti facit.

780. Ne jam dicam, quod cibus & potus non sint utiles nobis, nisi quamdiu viger appetitus. Exemplum vitiosi ardoris cum tempore extincti habemus in Amnone pulchram stuprante Thamaram, 2 Sam. 13.

XXXII. *Mentis conjunctio cum corpore, & præcipuè cum cerebro.*

781. De affectionibus tertii generis, quæ Homini respectu corporis & mentis simul tribuuntur, ut agere possimus, quomodo partes illæ toto genere diversæ conjungantur, antè dispiciendum est.

782. Duo corpora juncta dicuntur, cum extensa suis extremitatibus se contingunt, Ph. 65.

783. Duas mentes junctas dixeris, cum altera novit & amat alteram, id est, cum perceptione intellectus & propensione voluntatis ad se mutuo feruntur.

784. Quapropter haut aliter res ullæ conjunguntur, ac per ea, quæ habent, & quibus se contingere aliqua ratione possunt. (Huc refer ex sine capitis præcedentis exemplum conjugum.)

785. Quo fit, ut mens & corpus jungi non possint per fines duarum ad se invicem admodum extensionum, quia mens extensione caret:

786. Neque per duarum cogitationum ad se mutuo relatarum convenientiam, quoniam corpus nulla vi cogitandi præditum.

787. Necessum tamen est aliquid inveniri in mente, quod relatio-

tionem habeat ad corpus, & aliquid vicissim in corpore, quod referatur ad mentem: si quidem inter ea satis arcta sit conjunctio.

788. Atqui in mente inveniuntur perceptiones, quæ se habent ut *passiones*, & quarum plurimæ à corpore nostro pendent, §. 653. 666. sqq.

789. Vicissim in corpore inveniuntur motus, quorum plurimi imperantur & gubernantur ab animi voluntate, quæ se habet ut *actio* versus objecta tendens, §. 662.

790. Quamobrem in ejusmodi actionibus & passionibus mutuis corporis & mentis vitalem conjunctionem ponimus.

791. Neque profectò possibilem aliam vel arctiorem ullam corporis & mentis conjunctionem, seu, ut loquuntur, unionem diligenter indagando hæcenus potuimus invenire.

792. Non tamen omnibus corporis partibus animam æquè arctè conjunctam esse affirmamus;

793. Sed existimamus mediam & intimam esse cerebri partem, quæ certa quædam glandula, de qua consule Anatomicos, ubi anima propius & specialius, quàm in ullo corporis alio organo, functiones suas exerceat, percipiendo & volendo quæcunque vel à corpore veniunt, vel ad corpus tendunt.

794. Quæ proinde cerebri pars *præcipua sedes anima* censeri queat, idque intuitu functionum illarum duntaxat, cum aliàs nullus ei situs aut locus assignari debeat.

795. Ratio, qua potissimum ista probatur sententia, constat quatuor partibus:

796. 1. Quòd duo nobis oculi, duæ aures, duæ manus, atque ita duplicia sint externorum sensuum organa, quemadmodum & cerebri partes omnes geminæ, excepta ea quam diximus glandula, §. 690.

797. 2. Quòd sensus tamen uniuscujusque rei uno tempore tantum sit unus, ex. gr. simplex & una visio canis, quem cernimus, una, non gemina, perceptio latratus, quem audimus.

798. 3. Oportere igitur locum existere, in quo duæ impressiones per duplicia sensuum organa ab unico venientes objecto rursus in unum coeant, antequam perveniant ad animam, ne ipsi loco unius duo objecta repræsentent.

799. 4. Nullum verò in toto corpore humano locum inveniri, ubi ejusmodi coitio fieri possit, nisi in cerebri meditullio.

800. Sicuti enim è colo fila huc illuc trahuntur à netrice, ita è cerebro

rebro nervi in omnes partes corporis nostri protenduntur, §. 480.

801. Cum ergo dolorem aliudve percipis tanquam in pede vel manu tua, ne putes animam cogitantem in istis membris immediatè propria sibi percipiendi ac sentiendi opera defungi; sed potiùs cogites, eam ope nervorum ab istis membris ad cerebrum extensorum talia sentire, §. 482. sq.

802. Cumque in animi perturbationibus alterationem sentis tanquam in corde, §. 777. 779. facile agnosces, hanc ab anima non sentiri nisi operà nervuli, qui ex cerebro ad cor descendit;

803. Nec magis ideo necessum esse, ut anima immediatè suas functiones in corde exerceat, quàm ut in cælo existat, quoties radios & pressionem à Sole venientem percipit. Ph. § 15. sqq.

804. Certè si in oculo dextro videndi actum exerceat anima, simulque exerceat eundem in oculo sinistro, eodem tempore bis idem videbit objectum, perceptionem rei unius & simplicis geminam ac duplicem habitura.

805. Unum adhuc argumentum, quo probatur animam non sentire, nisi quatenus est in cerebro, superioribus adjicio, desumptum à *vertigine*: qui morbus solum cerebrum afficiens sensum perturbat.

806. Ubi nota 1. vertiginem consistere in circulatione spirituum, qui sunt in cerebro, 2. inde esse, quod externa omnia videantur circulariter moveri, 3. cum tamen neque in ipsis objectis motus circularis sit, 4. neque etiam in sensibus externis.

807. Nempe dum spiritus eum in modum agitantur in cerebro, mentem ibi immediatè sentientem afficiunt, quo fit ut ipsa, quomodo res externæ se habeant ignorans, judicet eas moveri circulariter.

XXXIII. *Generalia de sensibus, præsertim externis.*

808. Quamvis autem corporea nostra membra verè non sentiant, sed organa tantùm sint, quibus mens in sentiendo utitur (sicuti baculus instrumentum est, quo cæcus lutum à lapide dignoscit, Ph. 942.)

809. Inde tamen *sensus in externum & internum divisio* petitur.

810. Externus enim appellatur, quatenus externo organo exercetur:

811. Internus, quatenus interno perficitur, quod est in cerebro.

812. Externi sensus vulgo numerantur quinque: Visus, Auditus, Olfactus, Gustus, Tactus:

813. Qui differunt objectis, organis & modis, quibus afficiuntur.

814. Etiam si verò *Tactus* specialiter ita dictus ab aliis sensibus distinguatur, generaliter tamen affirmari debet, ad omnem omnino sensum tactum seu contactum aliquem requiri.

815. Nullum enim corporis nostri organum potest moveri à corpore alio, nisi tangatur. Repete definitionem *Motus* ex Ph. 77.

816. Ex. gr. nili aliquid à Sole usque ad oculum tuum absque ulla contiguitatis interruptione moveretur, aut saltem ad motum incitaretur, Solem cernere non posses. Repete *Physices* caput XIV.

817. Sed antequam speciatim de sensibus agatur, observa generatim, in quolibet sensu tres quasi gradus distinguendos esse.

818. Ita cum ais te videre Solem, uno videndi verbo tria indicas: 1. oculos tuos affici ac moveri à Sole, quem motum inde ad cerebrum operâ nervorum transire diximus.

819. 2. Animam, quæ in cerebro immediatè residet, percipere seu apprehendere aliquod objectum.

820. 3. Eandem animam judicare id, quod oculos radiis suis afficit, atque ita menti sensum sui dat, esse Solem, §. 670.

821. Primus ergo sensus gradus est *motus organi corpori*, ab objecto inchoatus (saltem in sensibus externis) in medio cerebro terminatus.

822. Secundus est *perceptio mentis*: atque ita nec oculus videt, nec auris audit, sed præsens animus, §. 805. 809.

823. Hinc nihil sentimus, quoties mens nostra aut ecstasi, aut aliâ profunda meditatione abstracta vel distracta velut extra corpus ponitur.

824. Tertius gradus est *judicium*, seu animi assensus vel dissensus, §. 660.

825. In hoc solo error locum invenit, non in motu organi corpori, nec in mentis perceptione simplice.

826. Estque sentire tertio hoc gradu actus liber; at prioribus gradibus necessarius.

827. Quoniam *judicium* pro voluntatis nostræ arbitrio suspendere possumus, uti fecerunt Sceptici, & sæpe etiam variare, ut ipsi in nobis experimur, quoties aliud atque aliud de objecto sensibili existimamus.

828. At rerum extra nos positarum in organa nostra incursum & nascentem ex motu nervorum nostrorum perceptionem animus impedire vel mutare nequit. Nam omnibus causis eodem modo habentibus idem sequitur effectus. Causa verò cur sentiamus in secundo gradu

du, est motus nervi alicujus in primo gradu. Ergo quoties ille motus idem est aut similis, toties eundem aut similem inde sensum sequi necesse est, per immutabilem *natura legem*, similem illis, de quibus §. 635.

829. Adde quod nostra semper sponte judicamus id quod judicamus: at sæpe multa percipimus inviti (quia patiendi potius, quam agendo percipimus, §. 651. sqq.) prout etiam corpus nostrum, velimus nolimus, ab objectis afficitur.

830. Ut autem recta, non erronea fiat sensio, tria, ut vulgo quidem docent, requiruntur, organi, objecti & medii debita constitutio.

831. Atqui hæc tria ad solum primum sensus gradum referuntur, præter quæ secundus gradus præsentiam & attentionem mentis postulat; uti vidimus §. 824.

832. A tertio quoque gradu abesse debet præjudicium & præcipitania. Alia huc spectantia à Metaphysicis repete, præsertim ex Paraphrasi Med. VI.

833. *Organum* nisi sanum & integrum fuerit, facile sensus labitur, uti patet in ictericis & febricitantibus.

834. Sed organum non modò externum, verùm etiam internum hic esse intelligendum, evidens est ex iis, quæ de vertigine diximus §. 806. sqq.

835. *Objecti* ab organo justa distantia requiritur, quò movere quidem possit, non tamen vehementer aut leviter nimis moveat.

836. Quomodo igitur non nimis remotum, ita nec parvum nimis esse convenit. Ph. 547. Nervi quippe nostri cum sint alicujus magnitudinis, à corpusculis quantumvis parvis moveri nequeunt. Nam in majori quanto major est virtus minori obnitendi. Ph. 213. §. 69. Hinc particule insensibiles in mundo existunt, Ph. 412.

837. *Medium* denique idoneum ad rectum sensum desiderari liquet exemplo errorum, quos committit visus per aërem nebulosum aut vitrum coloratum, vel partim per aërem, partim per aquam cernens.

838. Objectum sensibile in commune & proprium distingui solet.

839. *Sensibile commune* pluribus sensibus percipitur, uti Phisicos nostræ quinque principia: quantitas, figura, situs, motus, quies.

840. Oculis enim hæc, & auribus & manibus, exposita sunt.

841. *Sensibile proprium*, quod uno tantum sensu cognoscitur, uti lumen à visu, sonus ab auditu, &c.

842. At Physica nos docuit, hæc etiam propria sensibilia in motu, adjunctis aliis quæ diximus principiis, consistere: quamvis ob intimam animi cum corpore unionem alia quadam ratione confusa vulgo à nobis percipiantur, dum sentimus.

843. Quando ergo tam obscuræ & confusæ sunt nostrorum sensuum perceptiones, manifestum est, eos per se non esse datos ad veri contemplationem, quippe quæ ad solam & puram mentem spectat;

844. Sed ad bonum totius compositi, ad cujus unitatem pertinent. Confer §. 779. sqq.

845. Quo fit, ut in cibo, potu & medicamentis assumendis aliquando magis sensui & appetitui naturali, quàm subtili alicujus medici ratiocinationi sit obtemperandum. Paraph. Med. VI. 178. sqq.

XXXIV. *Visus.*

846. Tametsi verò sensus propriè dari non sunt ad naturam rerum intimam ejusque rationes investigandas, sive ad τὸ δῖον; juvant tamen plurimum ad τὸ ὄν inveniendum, suppeditando phænomena & experimenta, de quibus philosophemur.

847. Hunc nobis usum imprimis *Visus* præstat, quippe qui plurimas rerum differentias nobis manifestat, unde *sensum inventionis* nuncupatur. Vide Ph. 428. sqq.

848. Hic sensus omnium latissimè patet, ut & *objectum* ejus proprium & primarium lux: color enim est secundarium.

849. Nec ullus sensuum alius objecto tam nobili ac cælesti gaudet,

850. Nullus etiam velocior est aut certior. Ph. § 20.

851. *Visus organum* est oculus, §. 719. sqq. qui geminus homini naturalis est, licet & monoculi reperiantur.

852. Per hujus partes diaphanas (ubi & consideranda pupilla) ad tunicam retiformem, quæ in oculi fundo est, lumen transit:

853. Ubi quomodo objecta externa repræsententur, exemplo camera optica, aut oculi ex majori aliquo animali evulsi disci potest.

854. Quod oculo vulnerato vibrationes ignium & fulgurum apparent, (Confer quæ de vertigine §. 807.)

855. Et varii colores clausis paulò post conspectum Solem oculis,

856. Inde confirmatur, in locali motu primum visus gradum consistere. §. 822.

857. Ex illorum quoque graduum distinctione patet, quomodo leporino more dormientes videant simul & non videant.

858. Vi-

858. Vident nimirum quadantenus primo gradu, quoniam oculis dormiunt apertis: non vident secundo, quia mens non percipit.

859. Unde novum petes argumentum, quod animus non in aliis organis, verum in solo cerebro, in quo somnus est, sentiat, §. 794. sqq.

860. Quod ictericis omnia flava videntur, id oritur ex præcipientia iudicii, quod gradum sensus tertium facit, §. 833:

861. Quia enim assueti sumus objectis, quæ videmus colorem tribuere, ideo ictero etiam laborantes idem facimus, non considerantes flavæ bilis in oculis effectum. Applica rursus exemplum vertiginis ex §. 808.

862. Similem haut raro errorem committit qui per flavum vitrum objectum quodpiam intuetur.

863. Quod autem sculptores, pictores & aurifabri admodum propinqua acutiùs intueantur, quàm reliqui homines;

864. Venatores & nautæ valde remota;

865. Id à longa consuetudine est, qua illi quidem circa propinqua, hi verò circa remota videndo sese exercuerunt.

866. Tandem ad modum videndi pertinet, quòd visio perficitur *receptione* seu *immissione radiorum* in oculos: quemadmodum ea, quæ de lumine in physicis & paulò ante de primo sensus gradu docuimus, evincunt.

867. Quamvis etiam dentur inter homines & bestias, uti feles, qui radios emittant ex oculis. Ph. 1150.

XXXV. *Auditus & Loquela.*

868. Auditus visui dignitate proximus est, quemadmodum & res, quæ sonum defert, aër nempe, cælestibus vicinior, quàm terrestria reliquorum sensuum objecta.

869. In percipiendis humanis vocibus, quæ cogitationum sunt indices, eximium nobis usum præstat, unde *sensus discipline* appellatur.

870. Atqui naturâ prior sensus hujus usus is esse videtur, ut remotiorum corporum, quæ fortè in nos irruere possent, imperitus cognoscamus ac declinemus, §. 845.

871. Nomine vocis humanæ intelligo tum *loquelam*, tum *cantum*, in quo major est clangor seu tremoris soni magnitudo.

872. Auditus tardior visu est, §. 851. quia aër sonum recipiens ramosas & flexiles habet particulas (vide Phys. Contr. caput XXIV.) quarum una impulsâ non eopse momento alias succedentes impellit,

ni fit in globulis cælestibus inflexibilibus ac solidis, quorum pressione lumen propagatur. Ph. 478. 506. lqq.

873. Itaque celerius fulgur videmus, quàm tonitru audimus, licet superior nubes in inferiorem prius cadat, unde sonus; quàm exhalatio incendatur, unde fulgur.

874. Similiter cùm quis ligna cædit in silva, longiùs inde remoni videmus jam elevatam securim ad ictum alterum, priusquam sonus prioris ad aures nostras pervenerit.

875. Quemadmodum verò oculi convexi sunt, ut radii luminis à quibullibet objecti punctis venientes, qui singuli imbecilles, beneficio talis figuræ congregentur, §. 714. atque ita vis unita fortior evadat. Ph. 216. 221.

876. Ita auris exterior ad modum infundibuli excavata & lata est, ut aër vibratus eò copiosius meatum auditorium ingrediat, nervumque auditorium, è latiori spatio veniens ad angustius, Ph. 135. satis validè afficiat.

877. Istam auris conformationem surdastris etiam juvare solent, cava manu auri admota. Sic visus juvatur adhibitis perspicillis.

878. Porro quemadmodum datur lumen reflexum seu rediens à corpore opaco, Ph. 431. ita sonus interdum à corpore æquali, lævi & concavo repercutitur, reciproca aëris vibratione, quæ *Echo* appellatur.

879. Quando autem linguæ humanæ voces prænobile sunt auditus objectum, notandum hoc loco est, actum loquendi non minùs ex animæ & corporis conjunctione promanare, quàm actum audiendi, §. 525.

880. Qui enim fieri possit, ut animus corpori sit junctus, nisi linguæ, manui vel alii membro valeat imperare motum, quo cogitationem aliquam patefaciat? Hoc enim est *loqui posse*, vocabulo latè accepro. Confer §. 528.

881. Utque in sentiendo gradus aliquot distinguimus: ita pariter in loquendo primus gradus censeri potest perceptio mentis; secundus judicium ac voluntas id alteri significandi quod percepisti; tertius motus organi corporis, veluti linguæ aliorumve membrorum. Ita gradus ultimus loquendi responder primo sentiendi: quoniam illius functionis principium est ab anima, agente in corpus; huius autem, intellige sensus, initium est à corpore agente in animam.

882. Etiam si verò lingua præcipuum sermonis organum esse videretur.

deatur, inventus tamen hoc seculo in Gallia fuit, qui linguam non habens, omnes Alphabeti literas reliquarum oris partium vi potuit pronunciare, de quo vide *Aglossostomographiam* Salmurii editam 1630. Equidem de rei ipsius veritate ibidem vivens oculatis testibus confirmatus fui. Qua observatione uteris ad ea comprobanda, quæ §. 194. generaliter docuimus.

883. Cur autem naturâ surdus etiam sit mutus, aperta ratio est, quia vocum formandarum exemplaria non habet: nam absque imitatione nihil in hoc negotio fieri potest:

884. Quòd hominum cogitationes non quibuscunque indifferenter, at certis duntaxat vocabulorum sonis ex communi instituto alligatæ sint. Qua in re peculiaris quædam inter cogitationes & voces connectio cernitur: quæ licet ab hominum voluntate originem trahat, certam tamen constantiæ legem habet.

885. *Vox viva magis afficit* quàm scripta, §. 870. quoniam illa proximum & immediatum est conceptuum signum, hæc remotum duntaxat & mediatum.

886. Adde quod sonus in crassiore subiecto existens fortius nos movet (Respice §. 837.) quàm subtilior luminis actio:

887. Ideo præsertim, quòd ille à causa præsentem pendens per se auditum afficit, cum pictæ literarum figuræ ab absente aut certè jam non agente profectæ tantum beneficio luminis appareant.

888. Denique cum pluribus intentus minor sit ad singula sensus, qui sensus est in animo, mirum non est quod noctu auditus sit acutior, quod animus pluribus objectis videndis tum non sit distractus.

889. Quæ & causa est, cur cæci diligentius advertant quidnam dicatur, ac dicta fidentiùs memoriæ mandent.

890. Ad priorem effectum etiam nocturna aëris tranquillitas multum confert, Ph. 976. Unde & concentus Musicus tunc auribus gratissimus.

XXXVI. *Olfactus.*

891. Inter olfactum & gustum magna est affinitas, haut secus atque inter odores & sapes, §. 417. seqq.

892. Olfactus tamen in homine hebetior esse videtur, ob cerebri humiditatem, §. 758. Certè sub aquis olfactus aut nullus, aut obscurior. Et catarrho laborantes sæpius nil olfaciunt.

893. Cavitas narium, & quidem initio amplior, eò conducit, ut
hali-

halitus odoriferi collecti ad cerebrum deferantur. Simile annotavi-
mus de auditu, §. 877. atque ut ibi infundibuli, ita hîc camini exem-
plo ad rem declarandam uti licet. Consideretur quoque illud instru-
mentum quo lucubrantēs in Musæis utimur ad fumum candelæ inde
deducendum, cui etiam infundibuli nomen vulgo datur. Confer
Ph. 342.

894. Unde & quibus nares sunt porrectæ, acrius cæteris odorari
solent, quia pluribus halitibus in nares patet ingressus; uti & in lon-
giores asini aures soni major copia intrat.

895. Res odorifera à naribus aliquantùm distare debet, ut parti-
culæ per aërem diffundi & à se mutuò separari possint, §. 426. Simili-
ter enim gladium è vagina, sagittas è pharetra exire necesse est, ut ope-
rationes suas peragant.

896. Sicut autem gladius utcunque evaginatus nihil efficit nisi sic
qui excipiat ictum: ita ad odores percipiendos præter nares apertas
requiritur inspiratio: unde non modò manu nares occludendo, sed
etiam spiritum duntaxat cohibendo spurcum odorem effugere licet.

897. Quibus experimentis confirmatur, odoris sensum proficisci
à particulis in aëre volantibus, quæ cum ipso aëre, quem inspiramus,
ad nares advehuntur.

898. Unde etiam fœtor cadaveris versus eam aëris partem diffun-
ditur, quò vento defertur. Simile de sono vide Ph. 951.

899. Inde & patet, quod suffitibus cerebrum refici & roborari
ac spiritus ejus fovieri possint.

900. Quoniam verò particulæ halituum diversæ sunt parvitate,
figuris, motibus, &c. hinc odorum discrimina pendent. Convenien-
tia in eo est, quod particulæ olfactum afficientes omnes subtiliores
sunt iis, quæ gustum: unde sequitur, nervulos quoque ejus subtilio-
res & mobiliiores esse, adeo ut nimiam huic sensui hebetationem at-
tribuere non oporteat. Quæ limitatio addatur §. 893.

901. Postremò, non ut oculi & aures visui solùm & auditui desti-
nata sunt organa, ita & nares olfaciendi tantùm officio funguntur.

902. Opus enim insuper iis est partim ad respirationem, partim
ut per eas supernè defluant sordes, quas emungimus.

XXXVII. *Gustus.*

903. Pariter linguæ non modò gustandi, verùm etiam loquendi,
canendi, lambendi, aliaque data sunt officia.

904. Est

904. Est autem *lingua gustus instrumentum* carne sua peculiari, molli, rara & spongiosa: quæ ad sapes humore aliquo vectos imbibendos, uti spongia ad liquorem recipiendum, aptissima.

905. Adeo ut quod in auditu atque olfactu præstat una vel altera cavitas major, id in lingua efficiant pori & meatus illi minores innumeri.

906. Sapes autem in humido magis consistere alibi diximus, §. 418. Ph. 1077. sq. Unde etiam fit, ut si corpus sapidum, quod actu humidum non est, linguæ admoveatur, sapor ejus percipi nequeat, nisi saliva humectetur.

907. Ita salem non gustamus nisi prius admota saliva lique scat. Et piper ab eadem saliva humectari necesse est.

908. Atque ita ictero laborantes non falluntur, quod amarum gustare se judicant, quoniam flava bile linguæ saliva est infecta. At falluntur, quod saporem illum cibo tribuunt, cujusmodi errorem iidem icterici circa colorem errant, §. 861. sq.

909. Gustus ergo à Tactu differt ratione organi, & peculiaris, quæ in eo est, dispositionis. Unde & arida lingua res siccas tangit quidem, at non gustat. Idem contingit, si linguæ etiam humidæ prorsus insipida admoveas.

910. Tactus per totum corpus diffusus ab integris ferè & crassis corporibus, Gustus à tenuibus & cominutis particulis afficitur (nam eorum, quæ integra deglutiuntur, ut pilularum, sapor vix percipitur) præsertim ab aliquo modo solidis & rigidis, cujusmodi in salis & acidis reperiuntur, quæ eam ob causam multorum ciborum condimenta & saporum fundamenta sunt.

911. Matutino tempore melius sapes discernimus, quia tum lingua nondum alios imbibit sapes. Recipiens enim denudatum esse debet à natura recepti, quod effatum etiam ad ictericorum oculos & linguam applicare licet. Confer quæ de auditu nocturno acutius dixi §. 889. sqq.

912. Usus gustus hunc obtinet, quod ubi sapes gratos percipimus, ut plurimum intelligamus, commoda nobis fore ea corpora, à quibus procedunt, si ingrati, ea tanquam noxia fugienda esse.

913. Ita saporum gratia ac diversitas facit (varietas enim & hîc, & alibi delectat) ut magis alliciamur ad ea assumenda, quibus corpus nostrum indiget.

914. Nempe Creator optimus voluptates addidit etiam iis actibus,

bus, qui ad vitæ conservationem necessarij sunt, quò lubentiùs eos exerceremus.

915. Commodum quoque est, quod Deus illi voluptati modum & limitem posuit, §. 781. ne nos ingurgitemus. Quod simili ratione de odoratu intelliges. Nidor enim carnum famelicis gratus est, saturis ingratus.

916. Finita gustus perfectio eo etiam detegitur, quod sæpe quis grato cibi alicujus sapore delusus venenum intus latens assumit: item, quod nonnulla sæpe initio voluptatem non afferunt, quæ tamen corpori utilia.

XXXVIII. *Tactus.*

917. Nullus sensus *communior* est Tactu, quippe qui & omni inest animali & per totum cujusque corpus diffunditur, secus ac fit in aliorum sensuum organis.

918. Manus interim vola ad tangenda pleraque corpora externa commodiùs adhibemus.

919. Cumque nobiliores sensus, ex. gr. Visus, tantùm faciat ad bene esse, tactus omnino *ad esse necessarius* est, ad declinanda pericula, quæ ab externis corporibus nostro imminet.

920. *Objectum* ejus uno vel altero nomine proprio, ut reliquorum objecta sensuum, exprimi nequit. Generaliter ergo qualitas tactilis appellatur.

921. Inde quæsitum fuit, utrùm tactus sit unus sensus, an multiplex? Ad quam quæstionem responderetur, etiam visus objectum duobus nominibus, luminis & coloris, efferri, nec tamen propterea visum esse duplicem. Et quamvis objecta tactus varia existant, communi tamen quadam ratione movendi conveniunt, quæ §. 911. expressa. Neque à solis objectis sensuum distinctio pender, ex §. 814.

922. Distingui tamen potest tactus latius sumtus (non strictè pro sensu prorsus externo) in internum, & externum, secundum ea, quæ §. 810. sqq. & maxime §. 672. sqq. habuimus.

923. Ad ejusmodi tactum internum pertinet *voluptas ac dolor*, quæ duo licèt in sensu contrarii sint, parum tamen à se invicem distant in objecto, quemadmodum & calor ac frigus.

924. Qua verò ratione ac diversitate objecta singula tactum afficiant, cognoscere est ex eorum, quæ de calore, frigore, duritie, &c. in *Physica Contracta* docuimus, collatione.

925. Nem-

925. Nempe ubi exiguæ alicujus corporis particulæ variè agitatæ celerius quàm nostri corporis particulæ moventur, percipitur calor; ubi tardius, frigus. Ubi corpora efficacius deorsum tendunt, gravitas; ubi lenius descendunt, levitas sentitur. Ubi partes nostri corporis vehementer quidem moventur, at non læduntur, sentitur quædam titillatio; ubi læduntur, dolor, &c.

926. Multum in hoc sensu, uti in aliis omnibus *consuetudo* potest, exemplo visus, §. 866. Et quantum ad Olfactum, notum est proverbium, suum cuique stercus bene olet.

927. Ita cùm plantæ nostrorum pedum assuetæ sint tactui satis aspero, ob gravitatem corporis quod portant (Confer §. 91.) incendentes quidem parum hunc tactum sentimus: cùm è contrario alius longè mollior & lenior, quo titillantur, nobis ferme intolerabilis sit, ideo solùm quòd nobis ordinarius non est.

928. Similem ob causam vola manus facilius titillatur, quàm latus ejus superius, quod tamen calorem tam intensum, quàm vola quidem potest, perferre nequit.

929. Licet autem satis crassus & confusus hic sentiendi modus sit, quem tactum nominamus, mirandum tamen est, quomodo noctu intermedio baculo tam varia dignoscamus, Ph. 942. præsertim si longiore usu assueti simus: quo quidem sentiendi genere cæci nati toto vitæ tempore uti coguntur.

930. Minime interim diffitendum est, celerrimæ ratiocinationis opus hîc concurrere, uti in aliis quoque sensibus, quantum ad tertium gradum attinet, usu venit.

XXXIX. *Sensus communis, Phantasia & Memoria.*

931. Motum exterioris organi non nisi sensum *inchoatum* esse, qui in cerebro demum *consummatur*, ex antè dictis claret.

932. Quatenus autem in cerebro, ut nervorum prima origine, §. 489. & speciatim in ejus medio, ut communi impressionum omnium centro, §. 794. sqq. perficitur atque absolvitur sensus, præsentibus & per externa quæcunque organa moventibus objectis, *sensus communis* nominatur.

933. Et quoniam externorum sensuum impressiones sæpe currunt, & aliquando satis vehementes sunt, non possunt non in molli & flexili cerebri substantia, ad quam nervorum interventu defer-

X x 2 tur,

tur, aliquod sui vestigium relinquere, uti rotæ currus & pedes animalis vestigia sui in nive & luto relinquunt.

934. Illud externæ impressionis vestigium, quod *species* & phantasma Philosophis appellatur, rerum abentium, quas antea perceperamus, in nobis *Memoriam* conservat, fungiturque vice objecti quoties de eo absente cogitamus.

935. Atque in hoc ipso *Phantasia* seu Imaginatio consistit, quod non ad rem ipsam externo sensui præsentem, sed ad ejus imaginem, id est, præteritæ impressionis vestigium mentis obtutum convertimus.

936. Ita vulgo tres interni sensus numerantur, sensus communis, phantasia & memoria.

937. Etsi autem imaginatio initio non tam vivida & expressa esse soleat, quam ipsæ sensuum exteriorum perceptiones, repetitis tamen aliquoties externis impressionibus, accedente quoque interna meditatione, multum in nobis perficitur & confirmatur.

938. Quomodo eadem à *puro intellectu* differat, & quantam vim habeat, è Med. VI. paraph. initio repete.

939. Cum igitur phantasie operatio in cerebro sit, quomodo in corpora longè remota agere possit non apparet. Quæ opinio & experientie & supra dictis repugnat.

940. Interim in corpore, cui inest, magnam vim habet, quia nervi, per quos spiritus indefinenter currunt, §. 482. à cerebro in universum corpus protenduntur.

941. Et potest aliqua interdum impressio per arterias gravidæ mulieris transire usque ad certum aliquod fœtus, quem utero gestat, membrum, & ibidem malaciæ certas notas producere.

942. Huc pertinet Jacobi patriarchæ artificium, Genes. 30 descriptum, quo fecit ut sibi cederent oves, quæ ex uni coloribus varii nascerentur coloris (Divinæ tamen benedictioni potiores ibi partes tribuimus).

943. Sic adulteræ sæpe maritis similes liberos parere existimantur, quod in furtiva Venere deprehendi metuentes perpetuò maritos imaginationi præsentem habeant.

944. Quæ materiâ abundat mulier, si diu aut vehementer imaginetur caput grande, facile pariet infantem grandi capite præditum.

945. Contrà, si illi, cui deest materia, assidue obversetur, aut præ-

præter expectationem occurrat homo membro quodam mutilatus, sæpe eveniet talem ut producat.

946. Potius autem ejusmodi fatum mulieres tangit simplices ac meticulosas, quam prudentes & animosas, utpote quæ non tam facile commoventur.

947. Et impressiones quidem in cerebro efficaciores illæ semper existunt, quæ statim in principio robur omne suum exserunt, quam illæ, quæ cum initio debiliores sint & paulatim crescant, facilius averti possunt.

948. Et objecta sensuum nova tangunt cerebrum in partibus, quibus tangi non solet: quæ partes teneriores cum sint iis, quas frequens agitatio induravit, id auget effectus motuum, quos ibi excitant.

949. Res nempe hæc in organo interno simili propè modo se habet, quo in externis. Vide §. 86. sqq. 928. sq.

950. Ita qui tenebroso carceri diu fuit inclusus, si inde subito educatur, solis radios, utpote novum ipsi & vehemens objectum, perferre nequeat; sed primò in opacum, paulatim in lucidiorem productus locum solari lumini sensim assuescit. Et nos ipsi simile quotidie in nobis experimur, dum in tenebris diutius versati ad allatæ candleæ lumen primo adspectu cæcutimus.

951. Vestigia verò in cerebro hac in re consistunt, quod post ejus, quibus antea spiritus cursitârunt, propter alicujus objecti præsentiam, acquisiverunt ea ratione facilitatem majorem quam alii, sese rursus eodem modo spiritibus ad eosdem venientibus aperiendi:

952. Adeo ut hi spiritus poros repertos facilius subeant quam alios. Confer Ph. 792. sq.

953. Nempe sicuti charta vel pannus semel plicatus, facilius iterum plicatur secundum eandem plicam.

954. E dictis haud difficulter quivis intelligat, quare objectum quod vel semel fortior sensus movit, vel sæpius iteratum fuit, facile memoriæ infigatur.

955. Quare item ea, quæ juvenili ætate vel tempore matutino apprehendimus, firmius memoriæ inhæreant (Confer §. 912.) quando multa nondum vestigia cerebro sunt impressa.

956. Nam uti in charta plicarum, in nive vestigiorum, in aëre sonorum multitudo confusionem gignit: ita & in cerebro plurimum ærum impressio distinctionem vestigiorum tollit.

957. Cerebrum nimis humidum & molle, quale puerorum, facile quidem recipit, at non custodit impressiones, perinde ut aqua vel lutum plurima aqua maceratum. Hinc ergo limitationem recipit §. 956.

958. Contrà, cerebrum siccus ac durius servat quidem semel recepta vestigia, si profundè impressa fuerint, verùm haut facile nec profundè sibi ea imprimi patitur.

959. Ex quibus omnibus apparet, quamobrem alii magis, alii minùs memoria valeant.

960. Est autem memoria hæc sensualem ab intellectu necessariò distinguenda, haut secus ac phantasia à puro intellectu, §. 939. cùm negari non possit, mentem etiam puram vel à corpore separatam quorundam *reminski*, id est, cogitare de re quapiam priùs cogitata, & quidem sub illa ratione, quod priùs de eadem cogitaverit.

XL. *Vigilia, Somnus, & Insomnium.*

961. Hactenus de Sensu habuimus, qui respectu animi, id est, quoad secundum & tertium gradum, semper internus est, respectu organi corporei partim externus, partim internus.

962. Addendum nunc est, statum illum quo sensus non impediti functiones suas obeunt, appellari *Vigiliam*;

963. *Somnum* verò, quo naturaliter impediti à suis operationibus cessant, unde & quies dicitur.

964. Differunt igitur *vigilia* & *somnus*, ut solutio & ligatio, cuiusmodi differentia inter aquam fluentem & consistentem.

965. Prout autem *somnus* vel profundior est, vel minùs profundus: ita sentiendi facultas magis minusve officio suo fungi desinit.

966. Quæcunque sanguinem attenuando, calefaciendo, &c. spiritus animales augment, aut fortius agitant, *vigilias* inducunt.

967. Contrà, quæ sanguinem incrassando, vel refrigerando, aliove quocunque modo copiam spirituum minuunt, vel motum eorum retardant, *somnum* conciliant.

968. Imaginatio dormientium *Insomnium* appellatur.

969. Varietas somniorum oritur à diversitate 1. vestigiorum cerebro

bro impressorum, de quibus capite præced.; 2. temperamenti, quo spiritus aliter atque aliter figurari & moveri apti, §. 473. sqq; 3. consuetudinis, §. 927.

970. Sive autem somniet homo, sive non, animus ne quidem in profundissimo somno ab omni cogitatione cessat. Sic enim cessans existere desineret, essentiam suam, quæ in cogitando posita est, §. 610. sqq. amittens.

971. Quod autem cogitationum nocturnarum, quas dormientes habuimus, matutino tempore non recordemur, id minimè probat, nullas fuisse. Solemus enim non modò somniorum, sed & cogitationum, quas vigilantes habuimus, haut rarò oblivisci, licèt interim somniassè nos vel cogitassè certi simus.

972. Quoties enim non recordamur cogitationis alicujus præteritæ ad sensum pertinentis, manifestò id argumento est, vestigium ejus distinctum vel profundum satis cerebro non esse impressum. Quorum alterutrum in cerebro dormientis, ut etiam infantis, facile contingit.

XLI. *Appetitus naturalis.*

973. Posteaquam de Sensibus actum est, sequitur ut agamus de *Appetitu naturali*, qualis est, exempli causâ, cibi, potus, Veneris: quæ tria in Temperantia considerantur, dum in abstinentiam, sobrietatem & castitatem dividitur.

974. Ad sensus internos etiam referri posse ejusmodi appetitus, ex ante dictis intelligitur. §. 923. sq. Peculiarem interim considerationem merentur.

975. Cùm enim, haut secus ac reliqui sensus, ratione corporis & animi simul Homini competant; quæ in ipsis ad corpus pertinent, ab iis quæ ad animum, diligenter sunt distinguenda.

976. Ex.gr. in Fame est certa quædam vellicatio ventriculi, in Siti est faucium ariditas, unde oritur primò quidem perceptio doloris (qui vehementissimus & primus in homine qui nascitur sensus esse videtur), deinde judicium de cibi aut potus ad corporis conservationem necessitate.

977. Quoniam verò ejusmodi corporis affectum animique perceptionem & judicium ut plurimum voluntas edendi & bibendi committatur, ideo *Appetitus* dicuntur.

978. Cer-

978. Certum aliàs est, hæc affectiones ad Hominem, tanquam ex corpore & anima compositum, pertinentes, famem & sitim intelligi, à voluntate, quæ solius animi est proprietas, mente esse discernendas.

979. Quid? quod revera interdum separantur: ex. gr. in jejuniò religioso non est voluntas edendi, & tamen sæpe viget appetitus naturalis, dum esurire te vel sitire percipis. Vice versà sæpe quis infirmus vult quidem edere, & tamen caret appetitu, non esurit.

980. Huc spectat illud Medæ, *Video meliora proboque*, quod sine voluntatis aliqua propensione esse non poterat; *deteriora sequor*, naturali desiderio satisfaciens.

981. Contrà rex & propheta David appetitu naturali *desiderabat* aquam è cisterna Berthehemitica: sed allatam *nolebat* bibere. 1 Chron. 11.

982. Naturalia hæc desideria solius corporis utilitatem respiciunt, nec aliò quàm ad salutem & œconomiam vitæ illius vegetativæ, quæ corporis propria est, referuntur, de qua §. 14. & sqq.

983. Præter hæc alia desideria existunt, quæ vel totius compositi vel mentis præcipuè commoda spectant, ut appetitus divitiarum, honoris, potentiae, dominationis, scientiæ. Ad quos appetitus per affectus aliquos maximè excitamur. De affectibus autem nunc agendum.

XLII. *Affectus animi in genere.*

984. Namque inter affectiones, quæ Homini ut ex animo & corpore composito tribuuntur, supersunt illæ, quæ singulari de causa *passiones* §. 677. *affectus* vel *affectiones*, aut *commotiones animi* appellantur:

985. Quòd nullæ aliæ sensuum internæ vel externæ perceptiones tantopere animam agitent: vel tam propinquæ ei existant.

986. Quippe in aliis perceptionibus, quas referimus ad objecta externa aut partes corporis nostri, §. 670. sqq. facile deceptioni locus est, §. 83 1. sqq. quemadmodum & in appetitu naturali, ut paraph. Med. VI. lect. 10. expositum.

987. Non item in hisce passionibus, quia tam propinquæ sunt animæ, ut eas aliter ac sunt persentiscere nequeat.

988. Ita

988. Ita sæpè dormientes, interdum & vigilantes nobis adeo fortiter quædam imaginamur, ut ea coram videre vel in corpore nostro sentire putemus, cum tamen nulla sint.

989. Verumenimvero, licet dormiamus ac somniamus, tristes nos vel alio affectu commotos sentire non possumus, quin verissimum sit, talem in nobis commotionem inesse.

990. Producentur autem affectus in nobis, imò conservantur & corroborantur per aliquem *motum spirituum*.

991. Atque ita differunt à propriis voluntatis nostræ actibus, qui nominari quidem possunt commotiones animæ, & quidem tales, quæ ad animam referuntur, §. 675. sed quæ non à spiritibus, verum ab ipsamet anima efficiuntur.

992. Sic distinguere oportet lætitiā vel tristitiā *intellectualem*, cujusmodi etiam in Angelos cadit, ab iis, quæ passiones, sive à lætitiā & tristitiā *animali* (Confer §. 980. sqq.).

993. Quandoquidem ex ipsa etiam animali tristitiā intellectuale gaudium oriri potest, ut sæpe experimur, dum casus lugubres in theatris vel in concentu Musico nobis repræsentantur.

994. Passiones omnes, excepta admiratione, quæ ad solum cerebrum refertur, cum peculiari *cordis alteratione* conjunctæ sunt: unde totum quoque sanguinem & spiritus commoveri necesse est, §. 451. sqq.

995. Et hujusmodi quidem corporis alteratio pro primo, consequens inde mentis perceptio pro secundo, accedens denique ipsa animi perturbatio, quatenus est præceptus quædam judicii aut voluntatis inclinatio vel aversio, §. 660. pro tertio *affectuum gradu* sumi potest. Congruenter iis, quæ de sensuum gradibus §. 819. & sqq. diximus.

996. Præter istam causam affectuum proximam, quæ est spirituum agitatio, tres aliæ remotiores considerari possunt:

997. Quarum prima est actio ipsius *anima*, quoties sese applicat ad hæc vel illa objecta concipienda, quorum attentione affectus excitantur. Hinc oratores ut affectus ciant, objecta varia cum rationibus & exemplis, auditoribus ob oculos ponunt.

998. Altera est *corporis nostri* temperamentum, aut impressio quædam casu in cerebro occurrens (Confer §. 970.) uti contingit, quoties lætos vel tristes nos esse sentimus, ita ut causam assignare

gnare nequeamus (Hanc enim ab objectis ut plurimum petere solemus).

999. Tertia sunt ipsa objecta, sensus moventia, quae quidem affectuum causa sunt frequentiores & magis principales, iisdemque inter se distinguendis potissimum inserviunt.

1000. Quando igitur affectus in Homine tam multi & variis sunt, & saepenumero adeo inter se permixti, ut vix distingui satis possint;

1001. Quod praecipuum ordinem & numerum inveniamus, operae pretium erit, ut objectorum in sensus nostros agentium, & affectus in nobis eientium varietates consideremus:

1002. Non quidem omnes, quas in se habent, sed eas duntaxat, quibus prodesse nobis aut nocere, vel tanquam novae & insolitae nos afficere possunt. Ex hac enim postrema consideratione affectuum primus existit, qui ad cerebrum spectat, cum reliqui ad eor & sanguinem referantur ex §. 995.

XLIII. Specialis Affectuum enumeratio.

1003. Nam priusquam cognoscamus, utrum objectum sensibus obveniens bonum nobis aut malum sit, contingit ut veluti novum & insolitum nobis exhibeatur.

1004. Hinc oritur *Admiratio*, affectuum primus & qui affectum contrarium habet nullum, ejus excessus est *super*, unde quis attortus dicitur.

1005. Jam quoniam usu venit, ut vel magnitudinem objecti admirabilis suspiciamus, vel parvitatem ejus despiciamus, admirationi jungitur *Existimatio* vel *Contentus*.

1006. Magnitudinem aestimamus vel in nobis ipsis, idque ob causam justam, cujusmodi est bona voluntas, unde *Generositas*; aut injustam, cujusmodi est forma corporis, unde *Superbia*, *Doctrina*.

1007. Vel in aliis personis, quas nobis prodesse vel obesse posse judicamus, unde *Veneratio*.

1008. Parvitatem contemnimus vel in nobis ipsis, idque honeste, unde *submissus animus*, *Demutatio*; aut vitiose, unde *abjectio animi*.

1009. Vel

1009. Vel in alijs personis, quas ita putamus infra nos esse, ut bene vel male facere nequeant, unde *Dedignatio*.

1010. Reliqui omnes affectus ex eo in nobis oriuntur, quod obiectum sensibile nobis offertur ut *bonum vel malum*, id est, congruens aut non congruens nobis, §. 1003.

1011. Hic autem vel nullam temporis differentiam in obiecto consideramus, vel obiectum respicimus sub certa temporis differentia, quatenus *præsens*, *præteritum* aut *futurum* est.

1012. Ubi singularis consideratio temporis non adest, res quæ ut nobis conveniens repræsentatur, *Amorem*, quæ ut noxia, *Odium* gignit.

1013. Estque Amor conjunctionis, Odium separationis affectus.

1014. Intellige conjunctionem ac separationem, quæ fit per voluntatem ejusque consensum ac dissensum.

1015. In Amore amans se considerat ut *partem* unam, obiectum amatum ut partem alteram, ex quibus unum quasi totum conficitur.

1016. At qui odio prosequitur obiectum aliquod, se veluti *totum* considerat, ab obiecto penitus separatum.

1017. *Tempus* quod attinet, homo affectibus suis magis in *futuri*, quam in *præsentis* aut *præteriti* considerationem fertur. Applica hoc ad juvenes, qui magis affectibus obnoxii sunt, §. 773. sq.

1018. *Futurum* obiectum spectant vel tantum ut possibile, vel insuper ut obtemperabile facile aut difficile.

1019. A priori consideratione existit *Cupidum*, quæ appetitur non solum *boni* absentis *præsentia* & *præsentis* conservatio; sed etiam *absentia mali*, tum *præsentis*, tum ejus quod creditur eventurum.

1020. Ita ergo cupiditas vel desiderium, malitiam *fugant* vel aversionem complectitur: cum unus idemque sit animi motus, quo eodem tempore agitur, bonum; veluti divitias, querendo; & malum ei contrarium, veluti paupertatem, vitando.

1021. Si obiectum non modo ut possibile, sed etiam ut obtemperabile facile repræsentatur, excitat *Spem*, ejus gradus summus *Fiducia* vel *Securitas* appellatur.

1022. Sin proponatur ut difficile, parit *Timorem* seu *Morem*, cujus gradus summus *Desperatio* est.

1023. Timoris species est *Zelotypia*, cum quis sola suspitione ductus bonum aliquod se perditurum metuit.

1024. Porro difficultas circa res à nobis pendentes, posita est vel in electione mediorum, vel in ipsa executione.

1025. Difficultas in agendi mediis eligendis parit *animi fluctuationem*, Gall. *irresolution*.

1026. Qua hæsitazione nondum deposita si agas vel egeris, oritur *Morsus conscientia*, qui præsens aut præteritum respicit.

1027. Difficultas in ipsa actione seu executione vel superatur à nobis, vel superat nos.

1028. Superatur à nobis *Animositate*, quæ ubi circa res majoris periculi versatur, *Audacia* dicitur.

1029. Et ubi pro causa externa habet exemplum, *Æmulatio* est.

1030. Superat nos agendi difficultas in *Pusillanimitate*, quæ ubi stuporem, §. 1005. adjunctum habet, *Consternatio* vocatur.

1031. Adhæc præsens objectum quod attinet, id offertur sensibus vel tanquam ad nos spectans;

1032. Atque ita bonum in nobis *Letitiam* & gaudium, malum *Tristitiam* & mœrorem excitat:

1033. Vel ut spectans ad alios, quos bono vel malo dignos aut indignos existimamus.

1034. Si digni habentur, id parit in animo lætitiâ, aut seriam, aut cum irrisione conjunctam, quod pertinet *emphaſi*.

1035. Si judicantur indigni, bonum quod ipsis obtingit, in nobis excitat *Invidiam* seu livorem, §. 706. & malum *Commiſerationem* seu misericordiam.

1036. Atque ambo hi affectus species sunt tristitiæ, cui ibi quidem odium, hic amor conjungitur.

1037. Porro in objecto præterito vel etiam præſente possumus considerare tum *causam* boni aut mali, tum utriusque *durationem*.

1038. Causam intellige, à qua bonum aut malum illud præstitum est: quæ causa sumus aut ipsi nos, aut alii.

1039. Quod à nobis ipsis præstitum est, id vel ad opinionem nostram, vel ad opinionem aliorum referimus.

1040. Bonum à nobis præstitum atque ad nostram opinionem sub notione boni relatum, producit *Acquiescentiam interiorem*, quæ passionum omnium dulcissima est.

1041. Ma-

1041. Malum à nobis præstitum atque ad nostram opinionem sub notione mali relatum, excitat *Pœnitentiam*, quæ passionum omnium acerbissima est.

1042. Bonum à nobis præstitum atque ad aliorum opinionem, quam de eo concipere possunt, relatum, parit in nobis *Gloriam*; malum contrà *Pudorem* seu Erubescentiam, §. 706.

1043. Qui duo affectus partim ab amore nostri, partim à spe laudis aut metu vituperationis proficiuntur.

1044. Si bonum quid alius fecerit, ei *savemus*; si fecerit nobis, etiam *grati* sumus, quod amplius quiddam est.

1045. Sin malum egerit alius, *indignamur*; si nobis, etiam *irascimur*, quod vehementius quiddam est; quia vim in ciendis affectibus majorem semper habet illud quod nosmetipsos tangit.

1046. Atque hi affectus indignationis & iræ, species odii vel aversionis sunt, §. 1014. 1021.

1047. Duratio boni diuturnior in nobis, qui vicissitudini subiecti sumus, quandoque parit *Satietaatem* seu Fastidium, §. 781.

1048. Uti è contrariò mali duratio minuit Tristitiam.

1049. Denique ex bono præterito dum lætitiæ inde perceptæ recordamur ac de recuperando eo desperamus, remanet *Desiderium*, quod species tristitiæ est.

1050. At ex malo jucundè superato relinquitur *Hilaritas*, quæ lætitiæ species.

1051. Quæ omnia si accuratiùs expendantur, patebit affectus primarios seu primitivos & simplices esse sex, Admirationem, Amorem, Odium, Cupiditatem, Lætitiam, Tristitiam.

1052. Reliquos esse secundarios, & vel ex pluribus eorum componi, vel eorundem esse species.

1053. *Quemadmodum enim motus in mundo corporeus, quatenus peculiarem quandam naturam sibi junctam habens certarum rerum fit proprius, varia nomina sortitur: ita commotiones animi nostri certis definitæ ac restrictæ circumstantiis varias denominationes habent. Quæ observatio generalis est, §. 679.

XLIV. *Occulta certorum Hominum qualitates.*

1054. Reperiuntur verò in certis hominibus affectus quidam peculiare, veluti, quod cibo quopiam mirifice capiantur, vel ab eo abhorreant, ut abstemii à vino, multi à casco vel butyro.

1055. Quod multi etiam perferre nequeant præsentiam hujus vel illius animantis, ex. gr. felis, aut hujus illiusve rei odorem, uti rosardum.

1056. Hujusmodi individuales, uti vocantur, proprietates vulgo ad qualitates occultas referuntur, & *sympathia* atque *antipathia* nominibus insigniuntur.

1057. Insunt autem vel ab ipso ortu, sive in parentibus fuerint sive non, vel post ortum superveniunt.

1058. Possunt item vel ætatis progressu, vel aliis de causis mutari, ut si puer abstemius qui fuit, vir factus vinum non aversetur; vel non mutantur unquam.

1059. Horum affectuum origo non aliunde derivanda est, quàm ex animæ corporisque natura, unde cuncti sensus, appetitus & affectus reliqui pendunt.

1060. De quo nexu duæ res hoc loco nobis observandæ sunt:

1061. Prior est hæc, ubi semel junximus quandam actionem corpoream cuidam cogitationi, neutra earum unquam se postea offert, quò altera se quoque exhibeat.

1062. Posterior est, non semper easdem esse actiones corporis, quæ eisdem cogitationibus junguntur.

1063. Utroque exemplo varietatis, quæ in linguis est, illustrari queat. Nempe conceptus nostros certis verbis alligamus, omnes quotquot loquendi atque audiendi facultates hæc impediunt exorcismus: at alius, uti Germanus, talem animi cogitationem conjungit cum tali sono; alius, uti Gallus, eandem cogitationem cum alio vocali sono, qui ore profertur & aurem ferit, copulat.

1064. Eisdem iteratis conceptibus cum voluntate ipsos explicandi, sua quisque verba iterat. Idem verbum audiens eandem quam antè cum illo cogitationem nexuerat, repetit.

1065. Equidem vel ab unico actu, dummodo satis intensus fuerit.

fuerit, ejusmodi nexus primùm oriri, vel semel ortus mutari potest.

1066. Ita cùm ex inopinato res quædam valde sordida reperitur in cibo, qui magno cum appetitu comedebatur antea, inopinatus ille casus tantopere dispositionem cerebri mutare valet, ut postea talis cibus nisi cum horrore adspici nequeat, licet antea cum delectatione comederetur.

1067. Et notum vulgo est, quomodo infantes ablactari soleant, dum sinapi vel simili re lactentibus ingrata ubera inunguntur.

1068. Aversiones itaque certarum rerum in certis hominibus, quarum origo vulgo ignoratur, haut rarò inde oriuntur, quod principio vitæ suæ à talibus rebus valde læsi fuerint.

1069. Sic odor rosarum potuit infanti magnum capitis dolorem attulisse, cùm adhuc in cunis esset; aut felis potuit eum valde perterrefecisse, nemine animadvertente.

1070. Ipso quidem infante nullam illius casus memoriam postea conservante, quòd vestigia satis distincta molli & humido ejus cerebro, aut impressa non sint, aut non retenta, §. 958. 973.

1071. Quamvis idea aversionis, quam tum illarum rosarum, aut illius felis intuitu infans conceperat, impressa manserit ejus cerebro usque ad finem vitæ.

1072. Oriuntur etiam aversiones certarum rerum in certis hominibus, quod nondum in lucem editi unà sunt passi cum matribus suis, quæ gravidæ ab ejusmodi objectis læsæ fuerunt. Confer §. 942. sqq.

1073. Datur enim talis relatio inter omnes matris motus, & motus infantis, quem gestat in utero, ut quod uni contrarium est, alteri etiam noceat.

1074. Ita contigit aliquando, ut, cùm gravida mulier brachium fregisset, filii, quem enixa est, brachium eodem modo fractum esset. Cumque brachio infantis eadem sunt applicata remedia, quæ matris, utrumque sanatum fuit.

1075. Quæ autem de certis aversionibus dixi, simili ratione de amore, desideriis, aliisque affectibus intelligenda sunt.

1076. Accidit ut cognati recens defuncti viduam gravidam & partui vicinam quotidie inviserem, omniaque ei honestatis officia præstarem, adeo ut inter compellantes & præsentis amicos nemo tunc

tunc temporis inveniretur, cujus gratior ei adpectus aut suavius al-
loquium esset. Nascitur viduæ filiola, quæ post triennium, cum
antea me nunquam conspexisset, in consortium plurium virorum &
mulierum à nutrice ducitur, & quamvis ibi ab aliis magis, quàm à
me, verbis amicis ac bellariis, demulceretur, averfata tamen omnes
(: eramus autem ei cuncti æquè peregrini), ad me solum iterum ite-
rumque accurrebat, ludendo infantium more & arridendo. Causam
ego illius erga me propensi affectus hanc in infante esse putavi, quod
in matris gravidæ utero existens, ejusdem sensus & commotionis par-
ticeps olim fuisset.




COR.

CORPORIS ET ANIMÆ IN HOMINE CONJUNCTIO

Pleniùs descripta.

C A P. I.

Quare natura Conjunctionis hujus cognoscenda.

1.  On solùm per se consideratu dignissimum est, utpote ad illud *Nosce Teipsum* perti-
nens, quidnam ex anima & corpore unum to-
tum faciat, quod Hominem appellamus; verùm
etiam quæ de sensibus internis & externis, appe-
titibus & affectibus humanis, manifestis pariter
& occultis, quos sympathiam & antipathiam
vocat, in *Physicis* cognoscenda sunt, eo ignorato satis intelligi ne-
queunt.

2. Multum lucis hujusmodi cognitio affert *Medicina* in statu cor-
poris, ex insomniis naturalibus aut ex animi affectibus æstimando,
in explorandis morbis variis, melancholia, mania, phrenitide aliis-
que, item in praxi feliciter gubernanda.

3. Plurima *Theologia* capita, ex. gr. de unione hypostatica dua-
rum in Christo naturarum, de communione Hominis cum Deo, de
gubernatione hujus mundi, de Angelis, quomodo corpora assumant,
inque ea agere, vel ab iis pati possint, &c. hinc illustrantur.

4. Honesti & æqui in rebus humanis principia non pauca ex cor-
poris cum anima conjunctione bene intellecta *Iureconsultus* petet.

5. Civilis ac domesticæ societatis varia officia *Philosophus practicus*
inde demonstrabit. An & quomodo mores animi sequantur tempe-
rumentum corporis, quomodo item infantes tam corporis quam
animi ratione educandi sint, inde discet.

Z z

6. Vir

6. Vir *Logicus* ac *Didacticus* unde pendeat ingeniorum diversitas, & qua methodo in acquirenda rerum cognitione gubernanda sint, ex hac doctrina cognoscat.

7. Ex hac etiam conjunctione bene descripta judicandum, an & quatenus animi morum & passionum in corpore vestigia vel indicia eluceant, & quodnam artis *Physiognomonica* fundamentum sit.

8. Quomodo plures inter se homines per amicitiam, conjugium, fœdera, &c. coalescant, tam fusè in aliis disciplinis ostenditur: & non singularem in Physicis considerationem mereatur, qua ratione quilibet Homo ex anima & corpore ens unum fiat?

9. Turpe sit animum coagmentationem ædium, quas incolimus, nosse, & quomodo ipse corpori, quod inhabitat, connectatur ignorare.

10. Tantò autem diligentius hoc naturæ opus investigandum nobis est, quantò minùs ipsis etiam Philosophis consideratum hactenus fuit aut perspectum.

C A P. II.

Vnde cognitio ista petenda.

1. **I**nitio ponendum est, Mentis & Corporis humani naturam ei esse mediocriter cognitam, qui utriusque compositionem velit indagare. Qui enim ex Philosophia naturali vel aliunde nondum didicit, quid sit Animus, quid Corpus, incassum ad ea, quæ proposita nobis in præsentia sunt, nobiscum investiganda animum applicabit.

2. Nam ex utriusque rei natura & proprietatibus, qualis earum conjunctio possibilis & rationi consentanea sit, æstimandum.

3. Nihil autem de hac materia in medium afferendum erit, quin tale experiamur in nobis ipsis & ratione insuper confirmare possumus, secundùm Physices generalis canona Ph. 16.

4. *Experientia in nobis ipsis* requiritur, quoniam hoc loco non de alieno vel externo quopiam objecto agitur; verùm de eo, quod intus in Homine invenitur ipsumque constituit.

5. Et quoniam similium dissimiliumque rerum inter se comparatio ad occulta detegenda plurimum semper confert, si ingenio Metaphysico varii generis conjunctiones compositionesque in rebus naturalibus, moralibus, logicis, aliisque repertas percurramus, ad eam, quæ

quæ inter corpus & mentem humanam est, clariùs explicandam, minimè à scopo aberrabimus.

6. Quandoquidem enim in Hominis compositione res toto genere diversæ concurrunt, ut plures diversorum generum conjunctiones cum ipsa conferamus, ad eam declarandam, natura rei propositæ non modò faciliè pati, sed etiam exigere quodammodo videtur.

C A P. III.

Posse non modò res similes, verùm etiam dissimiles ac diversi generis inter se jungi.

1. **P** Rincipio manifestum est, nullam esse magis amicam aut faciliorem, vel corporum, vel animorum conjunctionem, quàm cum res omnino similes coalescunt.

2. Id passim in Philosophia morali invenias, ubi simile simili gaudere, & æqualitas mater amicitiae esse perhibetur, ubi præceptum illud matrimonium contracturis inculcatur, *Tu tibi junge parem*. Naturalis quidem scientia idem docet Ph. 222. 534. 799. & alibi:

3. Nec tamen ignotum est, posse quoque res valde dissimiles ac diversi admodum generis ad unum componendum sæpenumero convenire. Ipsæ *Conjunctiones* Grammaticis ita dictæ, ut plurimum quidem similes comparationis gradus, similes verborum modos ac tempora sociant, aliquando tamen etiam dissimiles.

4. Ita Substantia & Accidens res utique diversi sunt generis, saltem illis Philosophis, quos vel in primis animi corporisque unionem præsentis tractatione docere annitar, duo sunt prima & summa rerum genera; & tamen ad album, sapientem, calidum, justum, dominum & similia concreta componenda quotidie concurrunt.

5. Diversi generis metalla & liquores haut rarò confunduntur, Ph. 224. Ferrum & Ignis, quæ magis inter se distant quàm ulla metalla, perfacile conjunguntur.

6. Diverso trunco diversæ arboris ramus inseritur, Theor. Viv. 300. Ad hominis omniumque animantium propagationem diversi sexus conjunctio requiritur.

7. Amicitiam & fœdera etiam inter inæquales locum invenire ex practicis disciplinis & experientia nemini obscurum est. Dominus cum servo in domestica, rex cum subjectis in politica societate jungitur. Deus quoque cum Homine fœdus & amicitiam facit.

8. Divinæ & humanæ naturæ in Servatore nostro Jesu, quam Christiani credimus, personalis unio nisi captum hominis naturalem superaret, exemplum huic loco vel maxime conveniens esse videretur.

C A P. IV.

Nullas dissimiliores magisque diversi generis conjunctas res in Universo inveniri, quam Corpus & Animum.

1. **A** Tqui fortassis non tantopere mirandum est, Deum cum Creatura, causam cum effectu suo conjungi. Quando enim & quamdiu effectum vel procreat vel conservat efficiens causa, ne separata quidem inde esse possit.

2. Magis admirandum, quod Mens humana cum Corpore jungatur, cujus causa neque procreans neque conservans ipsa unquam est vel fuit, Theor. Viv. 646. sq. uti nec corpus est efficiens mentis.

3. Multò minus est quod in Substantiæ & Accidentis conjunctione admireris: quoniam accidens naturalis & necessaria quædam substantiæ appendix est, qua ipsa perficitur & consummatur. Nam, exempli causa, absque figura, situ, motu atque id genus aliis affectionibus, quæ materiæ accidentia sunt, res naturales nihil agunt nec inter se differunt, Ph. 102. sqq. Mentis creatæ nisi habitu præditæ, qui earum est accidens, facile & constanter non operantur. Vicissim accidens à substantia tanquam necessario subiecto sustentatur, nec absque ea existentiam habet.

4. Atqui Mens res est per se existens & absoluta, non mera alterius appendix & modus rei duntaxat. Mens naturâ suâ neque ad existendum neque ad operandum ullo corpore indiget. Ita non modò divinus, verùm etiam angelicus animus distinctam ac separatam à corpore essentiam atque existentiam obtinet.

5. Speciatim ad Mentem humanam quod attinet, eam non modò à corpore separatam existere ac vivere, sed etiam nobilissimas operationes circa objecta nobilissima in tali separationis statu facile & constanter exercere posse, aliunde notum est.

6. Negamus itaque actualement & necessariam cum corpore connectionem ad ullius Mentis propriam naturam, quæ inseparabilis est, atque in cogitatione seu intelligentia & voluntate consistit, pertinere.

Nega-

Negamus tale inter mentem & corpus esse naturæ vinculum, quale inter accidens & substantiam intercedit.

7. Equidem corporis adjunctum animus humanus censerî potest. Attamen tale hoc adjunctum est, quod novam & propriam secum affert entitatem, uti aqua accedens ad spongiam, ignis ad ferrum, atramentum ad chartam. Alia prorsus accidentis ratio est, quod separatam aut separabilem ab omni subiecto entitatem secum non affert, quippe cujus esse est inesse.

8. Vicissim corpus organicum propriam sibi essentiam atque existentiam habet, neque naturâ suâ Mentis ullius creatæ copulationem postulat, licet increatæ Mentis conservatione & concursu semper egeat.

9. Patet illud exemplo bestiarum (ne dicam de machinis arte factis) quæ corporibus humano corpori similibus præditæ existere, vivere, operari absque mentis intelligentis vel animæ rationalis opera & conjunctione possunt. Vide Theor. Viv. cap. XXII.

10. Minimum denique admirationis habet, quod corpus corpori, ut furculus arbori; homo homini, ut mas sæminæ, herus famulo sociatur.

11. Quamvis enim hæc diversi vel generis, vel sexus, vel dignitatis esse dicantur, continentur tamen alio quodam respectu sub eodem genere, si non proximo, saltem propinquo & univoco, suntque res ejusdem naturæ participio colligatæ.

12. Ita furculus cum arbore diversæ speciei sub eodem genere convenit multis modis. Sunt enim ambo corpora, & quidem terrestria, viva, lignea. Sæpe etiam ad idem genus arboris spectant, licet specie differant: quia pomorum, pyrorum, ceraforum, prunorum, diversæ species inveniuntur.

13. At Mens & Corpus primis ac summis generibus disconveniunt, neque ulla inter eas res naturæ affinitas, sed omnimoda proprietatum atque operationum contrarietas existit: quemadmodum & in hisce Physicis & in Metaphysicis, non uno loco, fuit explanatum. Vide inter alia Ontosoph. §. 48.

14. Quando igitur corpus & animus non se habent ut causa & effectus, nec alterum ad alterius perfectionem vel existentiam pertinet, ac denique prorsus heterogenea sunt entia, naturæ proprietate, viribus, actionibus, passionibusque omnino sejuncta, Theor. 620. quæ ratione conjungi, & quidem tam arctè, potuerint, ut unum

animal, quod vocamus Hominem, componerent, cum cura & attentione singulari deinceps inquirendum est.

15. Nec sanè judicarem id fieri potuisse, nisi scirem Deum Optimum Maximum, qui & corpus & mentem creavit, tam esse sapientem, ut vel maximè diversa ad unum redigendi modum invenire, tamque potentem, ut sapientissimè cogitatum effectum dare valuerit.

16. Antequam verò progrediamur ulteriùs, ex jam dictis observetur, inter propria illius conjunctionis vel, ut loquuntur, unionis, qua corpus & anima in Homine connectuntur, primum esse, quod *nulla in rerum natura compositio, quæ quidem adeo arcta sit, extrema tam diversa habeat*: quæ res præclaro divinæ tum sapientiæ, tum potentiae nobis argumento est.

C A P. V.

Non igitur Hominem nimis Unum concipiendum esse.

1. **I**llud quoque ex modò demonstratis addiscatur, non esse nimis cujusdam unitatis conceptu sic totum Hominem cogitandum, ut partium in eo junctarum insignem adeo longeque maximam discrepantiam negligere, & pro duplici seu duùm generum natura, simplicem vel unius generis essentiam animo apprehendere videamur.

2. Vulgo enim dum loquimur de *uno homine*, id vix alia mente accipimus, ac si de una arbore, vel de uno equo sermo foret.

3. At multò aliter res ipsa habet. Namque materialis & immaterialis naturæ diversitas ejusmodi unitatem in Homine neutiquam admittit. Talis est humanæ essentiae unitas, qualem partium componentium diversitas patitur.

4. Quodque Græcarum Ecclesiarum doctores de sublimi Incarnationis agentes mysterio hisce adverbiiis, *ἀτρέπτως καὶ ἀσυνχύτως*, id est, sine mutatione & confusione, olim expressere, illud quoque ad corporis & animæ nostræ conjunctionem, de qua in præsentī agimus, liceat applicare.

5. Etenim ut spiritus in corpus, aut corpus in spiritum seu mentem convertatur, vel alterum id possit & agat, quod est alterius proprium, natura rerum haudquaquam permittit. Ph. 402.

6. Si quis Scholæ terminis assuetus me hoc loco definire jubeat, utrūm

utrū igitur *Homo per se*, an *per accidens unum* quid appellandus sit; cum ad Ontosophiæ caput, quo de Unitate tractatur, ablego. In præsentī quidem à distincta rei explicatione ad intricatam de vocalibus disputationem dilabi nolo.

7. Illud reale & elegantissimum in Physicis thema nobis hīc tractandum est, quomodo Universi Conditor omnipotens & sapientissimus, nihil impediēte tanta naturæ corporeæ & incorporeæ diversitate, unum ex utraque Hominem composuerit.

C A P. VI.

Quomodo corpora inter se conjungantur.

1. **D**UO corpora juncta dicuntur, cū ibi existit unum, ubi alterum.

2. Quod equidem nulla propinquiore ratione fieri queat, quā si extremis partibus suis, absque ullius interpositione mediī, sese contingant. Arctius jungi non possunt, quoniam penetratio dimensionum non datur, Ph. 33. 65.

3. Ejusmodi conjunctio non modò reperitur in duris ac stabilibus corporibus, verū etiam in fluidis & liquidis: imò stabilia cum fluidis eundem in modum permiscuntur.

4. Exempla primi generis, saltem quoad sensuum judicium, habes dum labia comprimis, ligno clavum infigis, terræ arborem, arbori surculum inseris, agros confines adspicis.

5. Alterius generis exempla cernis, quoties plures ejusdem vel diversi generis liquores confundis. Ut enim in multis ligni poris aut foraminibus multi ex ferro clavi inhaerent: ita in plurimis alicujus liquoris meatibus alterius diversi liquoris plurimæ particulæ discurrunt. Licet ob meatuum angustiam & particularum immeantium exiguitatem, oculorum sensu ista non discernantur, Ph. 271. 329.

6. Exempla tertii generis considera in ferro ignito, (Ferrum quippe non tota sua substantia ignem esse, sed in poris tantum ignem continere, Physica neminem ignorare sinunt) spongia aquis intincta, item in atramento, quod stabilium corpusculorum pulvere inspersum chartæ illinitur, & partim quidem ejus poros ingreditur, partim exteriore superficie hæret, Ph. 261. 317.

7. Nunquam ergo patitur natura corporea, quæ in extensione vel partium aliarum extra alias positione consistit, ut aliter ac partibus.

bus quibusdam extremis corpora se contingant atque ita adimētur: partibus reliquis à se invicem satis remota esse possunt, etiam si arctissimè conjuncta dicantur.

8. Quæ enim ex. gr. corporum, saltem durorum, arctior conjunctio sit, quàm furculi & arboris, cui est insitus, eodem quo ipsa succo vegens, eandem vitam vivens? Summitas interim furculi à radice arboris valde distat. Ita calamus mucrone tangens papyrum, dum scribimus, aliis inde partibus remotus est.

C A P. VII.

Quomodo Mentes inter sese.

1. **D**Uæ mentes propiùs jungi nequeunt, quàm si altera alteram intimè nōrit & amet, id est, si percipiendo ac volendo ad se mutuò referantur.

2. Ita ut altera intelligens & volens alterius intelligentis & volentis objectum sit. Sic enim omni virtute sua semetipsas quasi contingunt & complectuntur invicem.

3. Nam si in tertio quodam objecto duntaxat intelligendo ac volendo conveniant, haur absimilis conjunctio videbitur illi corporum, cum non proximè per mutuum contactum, sed remotiùs per interjectionem corporis alicujus tertii, quod ambo tangunt, quodammodo connectuntur.

4. Attamen mentes ita inter se junctæ, ut altera circa alteram intelligendo, judicando, amando, lætando versetur, non possunt non in aliis quoque rebus percipiendis ac volendis consentire. Quod autem pluribus ac potioribus in rebus consentiunt, eò major est earum conjunctio.

5. Talis mentium adunatio multò perfectior & arctior est corporum conjunctio. Quando enim omnia, quæ in Mente sunt, ad perceptionem intellectus ac determinationem voluntatis referuntur, Theor. Viv. 65.1. sqq. si quæ mentes ita jungantur, illæ junguntur in omnibus quæ habent & possunt. Simile de corporibus, quippe quæ nonnullis tantum se partibus tangunt, affirmari non posse vidimus.

6. Exemplum conjunctiois inter mentes habemus in mutua consensione seu adstipulatione, quæ Gr. *ὁμολογία* nuncupatur, ut 2 Cor. 9: 13. quasi dicas, idem sermo, nimirum internus potissimum, qui est ipsa cogitatio, cui accedunt verba & signa externa.

7. Sic

7. Sic idem velle & nolle, intellige confcio alio, amicitia est. Et unanimes, ὁμόθυμοι, vocantur, qui animi sententia & voluntate concordant.

8. Mens humana idem affirmans quod Deus verbo, vel opere, vel naturæ lumine verum esse testatur, idem pro falso habens, quod Deus verum esse negat, eandem veritatem amans, falsitatem odio habens, quam Deus amat aut odit, iis gaudens, quibus Deum gaudere novit, inter quæ divinitas ipsa summum est, hæc juncta Deo censetur.

CAP. VIII.

Neutro modo Corpus menti conjungi.

1. Jam autem è dictis elucet, corpus & animam in Homine non posse conjungi ad instar duorum corporum, quoniam anima extensione & partibus extremis caret.

2. Nec posse conjungi more duarum mentium, quia corpus omnino intellectus & voluntatis expers est.

3. Quamobrem nulla commixtio, qualis in siccis, nulla confusio, qualis in liquidis, hîc locum invenit. Nulla hîc propriè dicta aligatio vel immersio, nullus corporeus contactus vel coherencia cogitanda, Ph. 2.42. Non ut ignis ferro, non ut furculus arbori, ita animus corpori jungitur.

4. Nullus etiam hîc locum habet consensus, nulla verè sic appellata concordia, amicitia, conspiratio, foedus, cujusmodi tantum inter plures res intelligentia præditas intercedunt.

5. Utriusque tamen generis nominibus, agentes de animi & corporis conjunctione, per translationem quandam utimur, propter defectum aliorum.

6. Et quod utrique, tam corporum, quam mentium, conjunctioni commune esse vidimus, id sine erroris periculo etiam in illa reperiri judicabimus, qua corpus menti copulatur: nempe, ut per ea quæ habent & possunt, inter se devinciantur, & aliqua ratione, quæcunque tandem illa sit, sese contingant. Contende Cap. VI. 2. cum cap. VII. 2.

7. Atqui hæctenus, inquires, nihil de corporis animique conjunctione didici, nisi καὶ ὅτι, per negationem, nimirum, quod non jungantur ut causa & effectus, non ut substantia & accidens, non ut

homogenea duo; ac speciatim, non duorum corporum, non animorum in modum.

8. Dicatur tandem κατὰ θεόν & per affirmationem; ecquænam illius conjunctionis propria & vera ratio sit, qua in re ipsa consistat.

C A P. IX.

Conjunctionem hanc non in mentis & corporis absoluta substantia, sed in relativis utriusque actionibus passionibusque consistere.

1. **R**espondeo paucis, rursus tamen negationem affirmationi miscens, conjunctionem hanc non esse sitam in ipsa substantia vel re quapiam absoluta ad mentis corporisve essentiam pertinente;
2. Sed in aliquo relativo, in habitudine & respectu quodam, cuius quidem ratio & fundamentum in ipsarum rerum ad se mutuo relationalarum natura invenitur.
3. Assertionis hujus pars prior è superioribus confirmatur, unde pars ejus posterior sponte quasi fluit. Quod si enim corporis & mentis unio in nullo absoluto posita, necessarium utique est ut in relatione quadam consistat.
4. Si pateris ut paulisper agamus Metaphysicos, attende quod relationum innumera genera ad tria summa capita reducere soleamus, originis, negationis, & affirmationis.
5. Atqui relatio, qua mens & corpus in Homine necantur, non potest esse puræ negationis; hoc est, diversitatis atque oppositionis. Nam secundum ejusmodi relationem tantummodo separata & juncta, non juncta judicantur.
6. Nec potest esse relatio affirmationis seu convenientiæ & similitudinis, cum anima & corpus toto genere differant, uti satis inculcavimus antea.
7. Habent sese, fateor, ut pars ad partem unius totius, ut subiectum & adjunctum. Sed quomodo pars altera alteri juncta sit vel adungi potuerit, id jam in quaestione versatur.
8. Relinquitur ergo corporis & mentis conjunctionem in relatione originis quaerendam esse, quæ omnis omnino relationis fons & origo est. Ontosoph. §. 263.
2. At, inquis, relatio originis est inter causam & effectum. Talis autem

autem inter corpus & animam non intercedit. Cap. IV. 2.

10. *Resp.* Ad relationem istam has inter res fundandam, minime necesse est alteram esse alterius vel causam vel effectum. Satis est si altera aliquid efficiat vel mutet in altera, ita ut actionibus & passionibus ad se mutuò referantur.

11. Observa verò, me affirmare quod corpus & anima actionibus passionibusque suis ad se mutuò referantur, non quod actus similes vel exerceant vel patiantur. Conjunctio corporis & animi non est posita in actionum passionumque *similitudine & convenientia*, qualis est mentium inter sese communio, Cap. VII. sed in earum ad se invicem *relatione, commercio & reciprocatione*.

12. Hujusmodi relationi non repugnat ulla naturæ diversitas, quantacunque sit: cum Deus in rem creatam, accidens in substantiam agere possit, ut multi quidem eorum, contra quos jam disputamus, sentiunt ac loquuntur. Nos potius dicimus corpus agere, quatenus certis accidentibus est præditum.

13. Talis etiam relatio ad corporis animæque conjunctionem omnino requiritur. Requiritur, inquam, ut aliquid ab illo ad hanc, vel ab hac ad illud perveniat, seu, ut altera res alteri aliquid largiatur, vel ab altera quid accipiat.

14. Requiritur aliquis omnino *contactus*, qui cum non possit esse *physicus* vel ipsius essentiae, necessariò est *contactus virtutis*, Ph. 25. sq. Is autem in agendo & patiando vertitur, in actu, inquam, secundo. Actus enim primus seu vis & facultas ad contactum hunc non sufficit: id est, *posse* agere & pati inter se invicem, non alligat animum corpori; sed ipsum agere, ipsum pati. Sic inter præceptorem ac discipulum unio haut nascitur ex eo, quod alter alterum possit docere, alter ab altero possit discere; sed quod revera, seu, ut loquuntur, actu secundo alter quidem doceat, alter verò discat.

15. Actiones passionisque & in Animum & in Corpus cadere manifestum est, cum extensio, cogitatio aliaque in utrumque non cadant. Unionis autem perfectæ fundamentum utrique unito inesse debet.

16. Observa iterum, hîc solummodo affirmari, quod agere atque pati sit & mentis humanæ & corporis conditio; non autem dici, quod eadem sint mentis, quæ corporis, vel actiones vel passionibus: cum mens cogitet, id est, percipiat & velit, corpus autem localiter moveatur.

17. Coniunguntur ergo actionibus passionibusque mens & corpus, quemadmodum è superioribus liquet, non ut pater gignens & filius genitus, quorum alter alterius causa est; sed uti dominus & servus, vel potius ut amici duo, qui mutuis officiis, dando, accipiendo, docendo, discendo, vendendo, emendo inter se devinciuntur: quorum tamen uterque præter commune istud commercium proprias suas functiones habet atque exercet, & quorum neuter ab alio in essendo & subsistendo dependet.

C A P. X.

Coniunctionem itaque vitalem & ætuosam esse.

1. **H**Æc non est potentialis duntaxat, sed actualis & effectiva coniunctio, tota viva ac vegeta, actu secundo & jugi exercitio se exserens. Non iners & otiosa coherentia, qualis est corporum stabilitum mole sua juxta se mutuo quiescentium; at sollers & negotiosus corporis animique secundum virtutum suarum efficaciam concursus.

2. Talis rem Viventem unice decet, cum vita in actu & operatione consistat. Vivit autem Homo totus, quamdiu corpus & anima coniunguntur: moritur cum illa duo prorsus separantur.

3. Igitur ut vita corporis seorsum spectati in actu & motu corporeo, vita animi in cogitatione: ita vita Hominis compositi in mixtis utriusque generis actibus posita est.

4. Atque hoc ipsum erit nobis proprium & præclarum hujus coniunctionis, quæ Hominem facit; alterum, (primum in fine cap. IV. habuimus.) Quod idem divinæ sapientiæ insigne argumentum est, & Hominis ab otio & inertia ad opus & laborem efficax incitamentum.

5. Noli autem fugiente oculo hoc ultimum, quo præcedens caput roboratur, intueri: quod coniunctio animi & corporis in actibus quibusdam vel hanc ob causam debuerit consistere, quia debuit constituere vitam totius, quæ Homini composito tribuitur, à vita partium componentium distincta. Vitam dico, quæ sine actu intelligi nulla potest.

6. Scio inter eos, qui potius modum loquendi vulgo receptum, quàm rerum naturam considerare sunt assueti, quosdam contradicitorios, quoddam absurdum sit triplicem Homini vitam assignare & quasi triplex vivum ex uno fabricare.

7. Qui-

7. Quibus responderetur, talem hîc esse logomachiam, qualis illa de triplici in Homine Anima, Theor. Viv. 638. Rem ipsam quod attinet, cùm triplicia sînt Hominis attributa, Theor. 596, atque inter ea, quæ solum corpus respiciunt, inveniatur organorum motus varius, ad solam verò mentem pertineant intelligendi & volendi actus, denique in Homine toto considerentur attributa mixti generis actuosa; quid absurdi, si & suam corpori & suam menti vitam tribuentes, utramque simplicem, suam etiam tribuamus composito, & quidem compositam? Non esse naturam Hominis nimis unam concipiendam, jam suprà cap. V monuimus.

8. Illi certè, qui triplicem in Homine *naturam* considerant, unam corporis, alteram animæ, tertiam denique ex duabus surgentem & compositam, quæ est humana natura, nihil habent quod triplici, quam in Homine spectamus, vitæ obtendant, quarum quidem postrema sola vita Hominis compositi est ac dicitur.

C A P. XI.

Actus hosce transeuntes esse, non immanentes.

1. JAm vix putem, esse quenquam, quin ex iis quæ depromta sunt, facile colligat, non esse immanentes, sed transeuntes illos *actus* (Hac voce actiones passionisque complector), quorum vitali concursu corporis & animi conjugium consummatur.

2. *Immanentes* enim, cùm in subjecto illo maneat à quo manant, neque extra illud quicquam operentur, possunt quidem subjectum illud suum vivificare; sed animam corporinectere, totum compositum vivum integrumque & unum Hominem efficere nequeunt.

3. Adde quod operationes Mentis immanentes ad ipsius essentiam spectant, quæ quidem essentia nullam ad corpus conjunctionis, sed meram diversitatis atque oppositionis relationem habet.

4. Itaque *transeuntes* tantummodo sunt actus, quibus corpus atque animus in Homine colligantur, dum aliquid fit ab anima quod terminatur ad corpus, aliquid item fit à corpore, quod ad animam terminatur.

5. Ex. gr. ipsum velle, ut actus animæ *elicitus*, non facit illam de qua loquimur conjunctionem; sed velle ut pedes nostri corporis moveantur, ita ut motus pedum, tanquam actus *imperatus*, inde sequatur, id demum est quod corpus animænectit.

6. Similiter ipsum moveri in corpore nostro per se consideratum corpus animæ non jungit : at si ita moveatur aliquod organum (veluti oculus à lumine, auris à sono, manus à calore) ut motus hic novam in animo perceptionem excitet, eum afficiendo, id demum unitatem facit.

7. Quapropter in eo solo conjunctio est, quod corpus movetur ad nutum animæ, & anima aliquid confusè percipit quasi monente corpore.

8. Hæc illustrantur ex Theor. Viv. 3 10. ubi vidimus, quòd arbor cum terra tum demum coaluisse censeatur, cum inde succum recipit, & in ea radices agit. At quamdiu nihil è tellure recipit, nihil in eam emittit, separatum à fundo corpus arbor esse judicatur: licet ipsa interea temporis vegetatione sua non careat.

C A P. XII.

Mentem aliter atque artius cum corpore, in quod agit, à quo patitur, quàm cum objectis, de quibus cogitat, sociari.

1. **H**inc inter illam conjunctionem, qua mens objectis aut objectis menti præsentia sunt; & hanc, qua mens humano corpori sociata est, insigne discrimen elucet.

2. Nempe objecta menti præsentia sunt tantum in imaginibus suis, quatenus per actus immanentes ei repræsentantur.

3. Nulla hinc transiens actio est, qua vel objecta externa in mente, vel mens in ipsis ullam mutationem efficiat. (Quod enim res aliæ corporeæ intercedente nostro corpore in mentem agunt vel ab ea patiuntur, id à præsentis consideratione alienum est.)

4. Et quamvis, exempli causâ, angelus dicatur intelligi, amari, cogitari, passivis verbis, quoties objectum est cogitationis tuæ, revera tamen nihil inde patitur, nullâ mutatione afficitur.

5. At corpus humanum è contrario à mente revera patitur & mutatur, quoties ad ejus arbitrium huc illuc fertur: adeo ut rectè demum hic verba passiva adhibeantur, corpusque dicatur à mente regi, moveri, gubernari, longè alio sensu quàm objecta percipi, intelligi, diligi affirmantur.

6. Est quidem animo corpus nostrum etiam objectivè præsens, quoties de eo cogitat: sed inde nulla immediatè in corpore mutatio existit, sicuti à voluntatis imperio, in quo artior ille nexus consistit.

7. Ob-

7. Obtendet aliquis, si rectè dicatur, *animus saepe magis ibi esse ubi amat, quàm ubi animat*, tunc non videri universè verum esse, quod humano corpori quàm objectis propius anima conjungatur.

8. *Resp.* Sensus illius effati est, quod objecto amabili per ideam representato studiosius quandoque intentus sit animus, quàm curando corpori (Repete definitionem *Amoris* ex Theor. Viv. 1014. sqq.); ita ut præsentia objectiva corporis humani cum præsentia objectiva rei amabilis tanquam arctiore comparètur.

9. Sed præter illam *objectivam præsentiam*, qua corpus nostrum animo nostro jungitur in actu immanente per *effectum*, datur præsentia *realis per effectum* in actibus transeuntibus, quæ semper strictior est præcedente & alterius planè naturæ.

10. Objectiva illa præsentia est inter signum & signatum, imaginem & exemplar, inque sola intentionali & vicaria, imò picta quadam entitate consistit. Realis autem hæc & effectiva præsentia est inter agens & patiens, mutans & mutatum, consistens in reali, propria & viva entitate.

11. Occasione allati proverbii hoc loco etiam discere, quid sit *animare*, quatenus actio animæ in corpus esse dicitur: nempe nihil aliud quàm motus, qui in ipso sunt plurimi, in ipsius commodum excitare, huc illuc flectere, gubernare.

C A P. XIII.

Quin corpus etiam in animam agat, minimè dubitandum.

1. **A**T reperiantur non pauci, qui facile quidem concedunt, animam agere in corpus, superius in inferius; quod autem vicissim corpus agat in animam, inferius in superius, materiale in immateriale, vix ac ne vix quidem admittendum censent.

2. Sed ipsi non videntur, quid agere vel pati sit, rectè comprehendere. Ego quidem in Ontosophicis, §. 228, acutissimos philosophos imitatus *mutationem status* esse dixi actionem, si referatur ad causam mutantem, eandemque esse passionem respectu subjecti mutati, neque meliorem definitionem usquam inveni.

3. Quando igitur prorsus evidens est, corporeos organorum nostrorum motus, quotiescunque aliquid sentimus, mutare statum mentis nostræ, novas ei cogitationes inferendo, (Mentis enim status est cogitare), qui negat corpus agere in mentem, experientiæ, quam cuncti in nobismetipsis habemus, & rationi adversatur, imò Homi-
ne

nes ullos qui videant, audiant, esuriant, sitiant, in rerum natura ex-
istere posse ita opinando revera it inficias.

4. Illud quidem certum est, corpus non posse agere in animam
per contactum physicum, sicuti corpus agit in corpus, trudendo,
secando, dividendo, urendo similemve in modum localiter moven-
do. Talium quippe passionum animus minimè capax est.

5. Sed corpus potest agere in animam, inducendo varietatem &
mutationem efficiendo in illis actibus, qui ad animum pertinent
ipsiusque proprii sunt.

6. Exempli gratiâ, si corpus improbi hominis flammis uratur, ani-
ma quidem simul non incenditur: attamen tristem valde & molestant
perceptionem habet ex tali corporis receptione immediate profectam.

7. Inferius in superius agere non potest emittat se nobiliorem
verè efficiendo: attamen potest ei producenda certam atque vali-
dam occasionem dare, potest incitamentum esse fortissimum. Quan-
doque tam opportuna loquitur olitor, ut philosophus iis ad abstrusæ
alicujus rei scientiam certò provehatur, ad quam nisi fuisset sic ad-
monitus, nunquam pervenisset, quæ tamen olitorem prorsus fugit.

C A P. XIV.

*Actus mentis & corporis nulla cognatione naturali,
at sola Dei voluntate in Homine connecti.*

1. **A**ctus animi & corporis non esse similes, sed inter se planè dis-
similes, sæpius repetitum fuit. Non igitur qua ratione motus
pilæ sequitur è motu manus, nempe simile ex simili: eadem etiam
perceptio animi ex motu corporis, vel motus corporis ab animi vo-
luntate proficiscitur.

2. Potest autem res quoque dissimilis ex alia quodammodo dis-
simili necessaria & naturali quadam consecutione promanare. Di-
versæ sunt ex. gr. corporis affectiones, figura & motus; attamen va-
rius motus circularis aliquantisper continuatus non potest non globo-
sam tandem corpori figuram inducere. Ph. 463.

3. Differt utique simplex animi perceptio à iudicio seu affirma-
tione & negatione, differt à voluntate bonum prosequente. Et ta-
men ex magna perceptionis luce in intellectu, non potest non sequi
magna propensio in voluntate ad illud affirmandum ut verum, & pro-
sequendum ut bonum, quod perceptio clara tale esse ostendit. Theor.
Vix. 658.

4. At

4. At neque tali modo, quo alia affectio corporis ex alia, alius actus animi ex alio distincto manat, passiones corporis ex animi actionibus, aut passiones animi ex corporis actionibus oriuntur.

5. Et quamvis nihil magis naturale sit, quam passionem omnem, ex aliqua actione sequi, non tamen inter functiones animi & corporis talis dari potest consecutio, qualis inter eas, quæ sunt unius ejusdemque naturæ propriæ.

6. Inter has imaginare tibi quasi consanguinitatem & naturalem quandam amicitiam, cujusmodi inter fratres & sorores: inter illas amicum puta esse commercium vel etiam confugium, sapiente & libera Dei voluntate institutum. Conjugium quippe inter proximos consanguineos lex non permittit.

7. Qui prioris generis nexum inter corpus & animam requirunt, naturas & functiones plus toto cælo distantes confundunt, & Hominem, qui tanquam valde compositus animo est concipendus, veluti ens simplex quodammodo sibi repræsentant.

8. Itaque non oportet interrogare, quare tales cogitationes in animo ex talibus corporis motibus consequantur, aut quomodo motus spirituum ab animi voluntate pendeant. Nam illud à nulla naturæ necessitudine vel cognatione ipsis inhærente, qualem hic plerique requirunt; sed à Dei conditoris voluntate existit.

9. Deus pro sapientia & libertate sua diversissimorum generum actus in Homine sicnecti voluit, ut alter ad alterum nulla similitudine intercedente referretur: quem tamen nexum Optimus naturæ Auctor ipsi Homini variis modis formandum dedit. Qua de re suffius infra agetur.

10. Ad hanc ipsam causam, intellige voluntatem Dei ordinantem, ut sacram anchoram, haut raro tum etiam confugere oportet, cum ratio danda est, cur certæ alicujus substantiæ affectio à simili alterius substantiæ affectione producat. Ecce in ea, ubi de corporis & animi conjunctione agitur, nolimus acquiescere?

11. Quare ex motu globi mei sequitur motus globi tui, si meus tuum prius quiescentem tangat? Respondebis fortasse, simile accidens facile effici à simili in subjecto consimili. Sed cur non æquè celeriter pergit moveri globus, postquam alterum loco pepulit, cur non retinet motum, ut præceptor sibi servat scientiam, quam discipulo tradidit? Nempe Dei Creatoris voluntas hinc inprimis respicienda est, qua ipse constituit ut hoc vel illo in hac re posito certum

quid sequeretur in alia. De propagatione & communicatione motuum vide Ph. 166. sqq.

12. Vis addam exemplum petikum à rebus intelligentia præditis? Angelum angelo conceptus suos manifestare non diffiteberis. At quam id ratione fieri possit curiosè scrutando non inuenies, nisi statuas, Deum inter voluntatem illius angeli, qui suas alteri cogitationes vult aperire, atque intellectum alterius, ejusmodi fecisse vinculum, ut posita tali voluntate in illo, talis intellectus in hoc angelo sequatur.

C A P. XV.

Nec tamen eò minùs arctam esse corporis animique conjunctionem.

1. **Q**Uando igitur corporis animique functiones neque similitudinem, neque naturalis ullius consequentiæ necessarium nexum inter se habent, utrùm satis arctam partis utriusque in Homine conjunctionem nihilominus efficere queant, porro dispiciendum.

2. Nos illud affirmare non dubitamus. Et primò quidem posse inter res valde dissimiles singularem unionis relationem esse, ex hoc elucet exemplo: figuræ literarum pictæ, visus objecta, & soni ore prolati, objecta auditus, similitudinem inter se non habent; attamen certæ figuræ certis sonis respondent:

3. Unde dictantis & scribentis conjunctio existit, quandoquidem scriba ad celeritatem vel tarditatem, ad cuncta verba dictantis, hæc & non alia promptè & constanter calamo excipiendo, sese accommodat. Est autem revera Mens dictatrix respectu Corporis imperata facientis.

4. Deinde verò quemadmodum politicæ societatis vinculum rerum dissimilium permutatione aliorumque pro aliis officiorum præstatione magnam partem constat & conservatur: ita in corporis & animæ societate fieri par est.

5. Non, ut in commodato idem numero, in mutuo idem specie redditur, ita etiam in omnibus aliis contractibus. *Talio*, qua quis tale omnino patiatum quale fecit, tale recipiat quale dedit, justitiæ & juris naturam non absolvit. Nam etiam si velis, tamen ob regionum studiorumque diversitatem ac vitæ quotidianæ necessitatem idem pro eodem reddere non possis,

6. Ita

6. Ita quoque mentis & corporis dissimilitudo non patitur, ut mens idem illud corpori præstet, quod corpus menti, vel altera harum partium alteri tale quid reddat quale accipit. Necessitas atque utilitas vitæ, tum ejus quam vivit corpus, tum ejus quam totum vivit compositum, aliud postulat.

7. Neque tamen eò minùs arcta est mentis & corporis conjunctio. Certè enim in republica, ubi alia pro aliis redduntur, honor pro meritis, merces pro labore, panis pro nummo, famulatio pro victu & amictu, longè magis homo homini obstringitur, quàm si eadem cuncti possiderent, paria omnes præstare possent.

8. Simili ratione, si corpus utile imperium ab anima, hæc vicissim utiles admonitiones à corpore expectet atque accipiat, fortiori vinculo constringuntur, quàm si eadem iisdem compensarent. Neque profectò talis eorundem prorsus officiorum ἀντιστοιχίη cum rerum creaturarum indigentia & imperfectione stare potest.

9. Tertium igitur hoc sit ex propriis & præclaris hujus unionis, qua corpus & anima connectuntur, quodd, licet in actibus omnino dissimilibus & mutua natura consequentia à se invicem handquaquam dependentibus conjunctio illa consistat, satis tamen arcta esse non desinat, imò vel illam ob causam arctior censeri mereatur. Quæ res iterum sapientiam & bonitatem Dei Creatoris nobis commendat.

C A P. XVI.

Ad quod genus cause spectet tum anima movens corpus, tum corpus movens animam.

1. **O**stensum est, corpus efficere in mente talem mutationem, cuius ipsa jest capax, vice versa mentem producere in corpore ejusmodi mutationem, quam ipsum facile admittit, hoc est, certis moribus corporis localibus certas animæ perceptiones voluntatesque respondere.

2. Sed quæritur 1. an & quomodo Mens ipsa immobilis corpus movere possit. 2. quomodo corpus cogitationem in animo producere valeat, quam nec formaliter nec emjnenter habet.

3. Resp. ad prius dubium. Deus etiam immotus movet omnia, atque in hoc ipso Dei quædam imago resplendet, quodd, uti ad nutum ejus quælibet pars Macrocosmi, ita ad arbitrium voluntatis nostræ pars aliqua hujus Microcosmi cieatur.

4. Verùm hæc præter alias differentia est, hic à divini perfectione imperii recessus, quòd Deus causa sit omnis motus verè efficiens, procreans & conservans, Ph. 146. sqq.

5. Mens autem humana motuum in Homine corporeorum causa ejusmodi *Physica* non est, sed *Moralis* tantùm, quatenus illorum aliquos duntaxat gubernat ac regit, facitque ut illis motibus, qui jam sunt in corpore, modò hoc, modò illud membrum agiterur.

6. Similem propè in modum auriga currui jungit equum, quem ad motum stimulat, huc illuc flectit, atque ita regit motum currus, quem equus verè producit ut causa *Physica*. Quamvis alia hîc minime sunt paria, ut postea clariùs patebit.

7. Si statuas novum in corpore motum ab anima reapse produci, adversaris principiis *Physicis*, quæ in toto Universo, cujus portiones sunt humana corpora, eandem perpetuò motuum quantitatem existere tradunt, Ph. 147. sqq. 168.

8. Neque à vi & efficacia nostræ voluntatis pendere ipsùm motum inde constat, quòd membra defatigata & spiritibus exhausta, Ph. 208. vel arthritide laborantia non obsequantur. Vide & Theor. Viv. cap. XXI. ubi motum omnem à calore derivavimus.

9. Ad posterius dubium quod attinet, quoniam effectus causâ suâ nobilior esse nequit, apertum est, ideam planè spiritualement, cujusmodi in mente inest, quoties sentit vel percipit aliquid, non posse à corporeo motu proficisci. Ph. 404.

10. Quapropter corporis nostri motus tantummodo sunt causæ *procatartica*, quæ menti tanquam causæ *principali* occasionem dant, has illasve ideas, quas virtute quidem semper in se habet, hoc potius tempore quàm alio ex se eliciendi ac vim cogitandi in actum deducendi. Repete finem cap. XIII.

11. Satis tamen potentes has causas in animo nostro esse vel ex solo doloris sensu claret: quemadmodum & è contrario vis ingens mentis imperantis in corpore multis celerrimorum vehementissimorumque motuum exemplis patescit.

12. Itaque inter admiranda hujusce conjunctionis hoc quartum numeramus, quòd *animus immotus corpus movet, & corpus non cogitans animum plurima cogitare facit*. Nam hac ipsa in re corporis animique conjunctio vertitur,

C A P. XVII.

Quomodo Mens in loco esse localiterque moveri dicatur.

1. **Q**Uærat fortassis hoc loco quispiam, an ergo nullo sensu defendi vel excusari possit vulgaris loquendi modus, quo Mens humana & in loco esse, & è loco in locum transferri dicitur.
2. *Resp.* Quanquam naturâ suâ locum & motum physicum animus non admittat ullum. Theor. Viv. 617. sqq. Ph. 77.
3. Possè tamen dici, ibi esse mentem ubi est corpus quod regit & à cujus motibus afficitur: quæ præsentia non est localis vel ipsius essentia, sed activæ & passivæ virtutis duntaxat.
4. Similiter aliam quamcunque mentem creatam ibi existere dixeris, operativè nimirum, ubi illa est materiæ portio, quam gubernat atque impellit, cumque ipsa quodammodo transferri.
5. Hoc autem fundamentum cum vulgo non attendatur, at locus & motus physicus menti haut secus ac ipsi corpori, si non verbis, saltem cogitatione adscribatur, ad naturam corporis & mentis animum advertendo nos errore isto liberabimus.
6. Jurisconsulti negant, *socii mei socium, meum socium esse*. Quid-ni multò veriùs animus philosophi neget, localem præsentiam, quæ longè arctius, quàm socius ullus socio suo, sociato sibi corpori adheret, sibi tribuendam esse?

C A P. XVIII.

Quomodo corpus anima sit instrumentum.

1. **Q**Uando vidimus cujusmodi causa sit anima in corpus agens, cujusmodi item causa sit corpus agens in animam, non est omittendum, quomodo corpus animæ sit instrumentum.
2. Quin enim anima ut causa principalis utatur corpore tanquam instrumentali, nemo dubitet. Sed quæritur 1. cum instrumentorum varia sint genera, ad quod genus corpus menti serviens pertineat, 2. quid de Platoniorum quorundam opinione, Hominem definientium, *Animam corpore utentem*, sit sentiendum.
3. Respondetur ad quæstionem priorem: Corpus non esse organum animæ passivum, cujusmodi calamus & gladius sunt respectu manus. Hujusmodi quippe instrumenta à causa principali motum omnem

mnem accipiunt. Atqui anima corporis assumti vel potius hypostaticè conjuncti motus tantummodo dirigit, ut paulò antè docuimus.

4. Est ergo corpus instrumentum animæ *activum*, uti equus respectu equitis, navis vento impulsæ respectu naucleri, legatus respectu legantis. Corpus enim nostrum per se est agendi & movendi virtute præditum.

5. Quemadmodum verò equus interdum movetur invito equite, atque ita independenter à causâ principali agens instrumenti rationem habere desinit: ita & corpus nostrum sæpe movetur animo non jubente vel etiam reluctante, Theor. Viv. 485. sqq. 727. sqq. quo intuitu animæ instrumentum non est: sicuti legatus legati personam sustinere cessat, quoties aliquid agit quod à Superiore mandatum non fuit vel etiam prohibitum.

6. Ac sicuti non tribuitur principi vel reipublicæ ableganti quod legatus præter aut contra ejus mandatum agit; & qui petulantem equum, cum vitium ejus ignoraret, cohibere non potuit quò minùs puerum opprimeret, ut verus homicida non tractatur: ita nec animo tribuendum quod corpus ipso nolente agit, nisi quatenus illud antea cum posset non impedivit.

7. Hinc descendunt variz leges de excusandis aut mitiùs puniendis (prout corpus in agendo magis minusve à rationis imperio absolutum) hominibus qui delinquant, cujusmodi sunt infantes, irati, furiosi, ebrii, dormientes & somniantes.

8. Cum ergo corpus hominis, licèt *conjunctum* aliàs animæ instrumentum sit, *separatim* tamen quandoque agat, facile agnoscimus, corpus ejusmodi animale, quale est bestiarum, absque animo posse existere, quemadmodum equus absque equite vivit ac movetur.

9. Ad posteriorem quæstionem respondetur: ut Hominis nomine solum animum intelligamus, qui corpore utatur ut mero instrumento, quod proinde non sit pars Hominis altera, id communi loquendi consuetudini, qua dicimus hominem generari, mori, occidi, quam & Sacræ Literæ sequuntur, multis modis adversari, neque cum iis, quæ de conjunctione hac tam arcta & admirabili diximus ac dicturi sumus, consentire.

10. An verò unum idemque diversa ratione alterius & pars & instrumentum esse possit, uti Legatus Reipublicæ, Logica Philosophiæ secundum aliquos, id nihil attinet hoc loco disputare.

11. Proprium huius conjunctionis quantum è dictis colligatur illud,

illud , quod corpus anima junctum sit non ut passivum , quod ignobilius , sed ut activum instrumentum , quod munere causa principalis haurit rari fungitur , & pars insuper est ejusdem totius , quod Hominem appellamus.

C A P . XIX.

*Conjunctionem anima & corporis in Homine esse
mutuam & reciprocam.*

1. **Q**Uoniam igitur , ut è superioribus constat , & corpus in animam & anima in corpus agit , tamque corpus ab anima , quam anima à corpore patitur , naturæ partis utriusque congruenter , perspicuum est , *conjunctionem hanc esse mutuam & reciprocam*. Id quod inter præclara ejus meritò nobis sextum est.

2. Mutuum hoc & reciprocum non modò ad totum corpus ejusque partes junctim , sed etiam ad easdem separatim se extendit : ex. gr. voluntas linguæ imperat ut cibo , manui ut aquæ calidæ , oculo ut Soli se applicet.

3. Hæc membra isti voluntati obtemperantia animæ , absque hoc adminiculo præsentem rerum extra se positarum statum nescienti , cibi saporem , aquæ calorem , Solis lumen indicant.

4. **Q**uantopere verò personarum & rerum nexus actibus mutuïs ac reciprocis firmetur , ex amicitia , foederibus , obligationibus *διπλεύροις* constat , quibus ultrò citroque homines obligantur.

5. Equidem obredamationis defectum inter hominem & bestiam amicitia non intercedit. Omnisque amicitia vigor perit , nisi mutua officiorum beneficiorumque communicatione identidem susciatur . In societate scholastica frigescit industria præceptoris , nisi discipulus quoque suum faciat officium.

6. In matrimonio , quod inter fortissima societatis humanæ vincula est , consensus contrahentium exigitur mutuus.

7. Contractus voluntarius , ubi ab utraque parte est animus contrahendi , perfectus demum contractus appellari meretur , invitus non item , ubi pars altera non consentit.

8. Eadem ratio à liberis *ἀντιπελαργίαν* flagitat , qua beneficiorum acceptorum memores esse & parentes senio confectos alere tenentur.

9. Et eques , quo exemplo antè usi sumus , regit equum , flectit , instigat , & vice versa equus equitem concutit , agitat , vehit . Unde
arctior.

arctior conjunctio existit, quàm si alterum solum contingeret.

10. Summus inter subjectum & prædicatum connexionis gradus à Logicis inde noscitur, quod axioma terminis constet reciprocis adeoque converti possit. Ex ejusmodi reciprocatione & conversione etiam definitionis ac definiti, divisionis ac divisi æterna atque immutabilis connexio innotescit.

C A P. XX.

Aliam esse conjunctionem non mutuam, qua Mens divina vel angelica corpori necatur.

1. **P**er illud mutuum corporis & mentis humanæ adunatio differt à conjunctione, quam inæteata vel creata quæcunque mens cum aliquo corpore non mutuam habere possit.

2. Intelligibilis quippe ac possibilis est ejusmodi mentis cum corpore quodam copulatio, qua mens quidem agat in corpus, corpus autem vicissim in mentem agere nequeat.

3. Ex. gr. si Deus sibi corpus aptet organicum, illud utique pro arbitrio ejus movebitur, lingua loquetur, manus se extendet, pedes ambulabunt. At corpus vicissim in divinam naturam, quæ propterea immutabilis est, mutationem inducere minimè valebit: novi nihil ei, qui omniscius est, organa corporis mota poterunt nunciare.

4. Quicumque Deum vel Spiritum divinum, qui totum hoc Universum gubernat, *Mundi animam* esse perhibent, quò sensu verum dicant, hinc facile intelligitur.

5. Potest ex adverso Mens quæpiam creata ad aliquod corpus sic alligari, ut corpus, Deo ita ordinante, tantummodo agat in ipsam, varios ei sensus inferendo: mens autem vicissim in corpus agere ullumve ejus motum regere nequitiam possit.

6. Veluti si Deus Spiritum malum vel Animum impium corpori semper ardenti liget, unde se liberare non valens ingentes ille cruciatus perferentiscat (Repete cap. XIII. 119. XVI. 11.); ita ut corpus sibi junctum loco movere vel ab igne separare nequeat.

7. Huc facit non infimæ notæ Theologorum opinio, existimantium Angelos malos præter animi cruciatum, quo ringuntur, etiam affici cruciatu ab igne infernali, tanquam illi alligatos, non secus ac anima alligata corpori patitur à corpore. Quod ipsum quoque S. Augustinus miris quidem, sed tamen veris modis fieri affirmavit. Hæc illi,

illi. Philosophi quidem non est de ipso actu & voluntate Dei, verum de sola possibilitate rei disputare.

8. Est qui obtendar, cum Deus iusto suo iudicio per vermem conscientie nunquam morientem satis possit punire spiritus reprobos, ad quid corpus intermedium? Sed nollem illi talia obducerent, quibus hoc perpetuo in ore est, Deum non propter defectum suæ virtutis, sed propter abundantiam suæ bonitatis causis secundum uti. Simili namque ratione ego facile regeffero, Deum, non quod alii sufficientes puniendi modi ipsum lateant, sed quod Creaturis rationalibus clarius suam velit demonstrare iustitiam, corpore intermedio posse uti ad Spiritum impium affligendum. Hominis quidem improbi corpus cum peccati confors fuerit, simul etiam puniri iustum est, cujus dolores quomodo ad animam penetrent ex dictis ac dicendis patet.

9. Sicuti verò contractus etiam ille juris vinculum est & appellatur, in quo unus tantum obligatur: ita quoque utraque illa non mutua, quam descripsimus, conjunctio mentis & corporis censi queat.

10. Atqui neutrius generis conjunctio verum & perfectum Hominem efficit, utpote in quo corpus & anima plurium actionum passionumque sibi mutuo causæ sunt; dum ultro citroque sibi largiuntur atque à se invicem consequuntur ea, quæ dare atque accipere apta nata sunt.

11. Quamobrem ut Homo mentis & corporis particeps medius inter Creaturas est: ita partis utriusque conjunctio, quæ Hominem constituit, inter duas alias extremas, quas possibiles intelligimus, conjunctiones verè media incedit. At jam de multitudine actionum passionumque in Homine mutuarum nonnihil dicamus,

C A P. XXI.

Conjunctionem corporis & mentis humana consistere in multis & variis actibus, nonnullis etiam praeceptis.

1. **I**Nter propria & præclara conjunctionis hujus illud septimum est, quod anima & corpus, uti ex antecedentibus minimè obscurum est, non in uno & altero tantum, qui vel secundarii vel unius sine generis; sed in quamplurimis, variis ac diversis, imò & præcipuis actibus copulantur.

2. Intellige corporum organorum motus locales innumeros,

Ccc

ab

ab anima imperatos, sensuum externorum & internorum, appetituum, affectuum perceptiones tot ac tam diversas, quas in Viventium Theoria summam perlustravimus. Ubi & alia pleraque in Homine, quàm in reliquis Viventibus, magis varia esse vidimus. Theor. 705. 767.

3. Quid verò plurium, inter se differentium, & quidem præcipuarum rerum concursus ad stabiliendam aut nobilitandam alicujus compositi unitatem faciat, aliarum conjunctionum exempla declarant.

4. Rerum corporearum tantò major unitas, quantò pluribus & potioribus partibus se contingunt. Animorum eò major concordia, quò plura & majoris momenti & magis diversa existunt rerum negotia, in quibus consentiunt. Confer cap. VII. 5.

5. Qui sanguine, virtute, religione, sententiis, vitæ genere, habitatione ac civitate conjuncti sunt, perfectiùs utique juncti, quàm si uno vel altero illorum duntaxat necerentur.

6. Qui linguam aliquam non modo intelligit, verùm etiam loquitur, imò & scribit, arctiùs illam suam fecit, quàm qui unum solum eorum præstare novit.

7. Cuicunque objecto non solum cognitione & intellectu, verùm etiam amore & voluntate adhaeres, ei conjunctior censeris, quàm rebus intellectu solo apprehensis. Et conjunctio mentis cum objectis perceptis eò arctior, quò plura eorum attributa attinguntur.

8. Ac sicuti veri amici si non possint de rebus omnibus & singulis inter se communicare, communicant saltem de potioribus: ita quamvis omnes & singuli corporis nostri ejusque partium motus voluntatis imperio non obtemperent, Theor. Viv. 727. atque eo respectu menti non omnes jungantur:

9. (In quo conjunctio hæc deficit à perfectione ejus, qua Deus Mundo præsens est, quippe cujus pars nulla existit, quin Deo motori & gubernatori suo quovis momento obediat:)

10. Illa tamen membra, quorum motus & plures ac nobiliores sunt & magis variant (quæ tria hoc capite conjungimus) veluti linguæ & oris aliarum partium, oculorum, manuum, ad voluntatis nuntium se mille modis accommodare apta nata sunt.

11. Quæ membra cum in bestiis quoque reperiuntur, cur hæc tam diversos ore sonos non edant, quot homo, præsertim polyglottus.

à solo

à solo Mentis seu principii cognoscentis defectu proficisci conclusimus Theor. Viv. § 24. Quæ etiam causa est cur bestiarum multis adeo non sint obnoxie affectibus, vel potius motibus, cujusmodi nostros affectus comitari solent.

12. Porro cum functiones animi omnes ad duo præcipua capita revocentur, actiones seu voluntates, & passionες seu perceptiones, utroque functionum genere, (loquor de generibus singularum, non de singulis generum, Theor. Viv. 661. sqq.) ipse ad corpus refertur, agentis simul & patientis diverso respectu suscipiens rationem.

13. At inquis, cum in corpore multa sint, magnitudo, figura, situs, motus, quies, non in multis & variis, quod quidem ad ipsum attinet, verum in solo motu conjunctio, de qua nunc agitur, sita est.

14. Resp. 1. Atqui motus est præcipua corporis affectio, & quæ majoris est varietatis capax, quam alia quæcunque.

15. Resp. 2. Motus est illud ipsum, quod ad *vitam* hanc conjunctionem, (repete cap. X.) quantum in corpore situm est, maximum affert momentum.

16. Resp. 3. Per motum ab anima imperatum corporis nostri membra diversas accipiunt *figuras & positiones*, haut secus ac sensuum intervenientibus perceptionibus ad varia appetenda vel averfanda mens humana disponitur.

17. Et quò major ista in re corporis intuitu varietas eluceret, sapientissimus Microcosmi Conditor animæ nostræ tale corpus addidit, quod non una quadam continua mole extensum, sed variis ac discretis organis instructum est, Theor. Viv. 593. sq. (Quò pertinent etiam quæ de magnitudine corporis humani diximus Theor. 680.)

18. Hoc enim apparatu efficitur, ut non modò totum corpus simul, verum etiam separatim hæc & illa organa distinctis motibus agentur ac diversa objecta diversis modis indicent: Repete cap. XIX. 2. & Theor. Viv. 814.

19. Quantum verò illud ad majorem corporis animique unionem conferat, ex hoc intelligitur exemplo: quod major est conjunctio inter linguam & objectum, si non modò tangat, sed etiam gustet, id est, non modò tota mole conjunctim, sed particulis quoque suis separatim illud attingat. Theor. Viv. 911.

20. Quamobrem uti majoris Mundi pulchritudinem in generum ac specierum plenitudine rerumque varietate Creator voluit consi-

stere, Ph. 387. sqq. 458. ita minorem Mundum infinita multitudi-
dine & varietate partium atque actuum exornavit. Theor. Viv. 8.

21. Sic instrumenta Musica quò pluribus disparibus chordis; fistu-
lis, aliisque partibus constant, eò majore cantus varietate auditores
delectari ac Musici peritia demonstrari potest. Ridetur autem qui
chorda semper eadem oberrât.

22. Postremò notandum, quòd major adhuc multitudo ac va-
rietas conjunctionem animi & corporis in genere humano condeco-
ret, dum illa membra quæ vulgò in aliis individuis certos actus exer-
cere non solent, in aliis iis exercendis assuescunt & animi imperio
satisfaciunt.

23. Ita vidimus qui pede literas & figuras elegantiores pingerent,
quàm plerique alii homines manu delineare possunt.

24. Huc faciunt exempla varia mirandæ cujusdam naturæ com-
pensationis, quæ apud Camerarium Op. subc. pluribus locis inven-
nias. Nam, ut illius scriptoris verbis utar, Creatoris mira provi-
dentia ac sollicitudo *membris distortis vel mutilatis aut debilitatis, vel
etiam omnino deficientibus, plerumque aliis membris præter suum officium, ad
quod destinata sunt, tale robur & dexteritatem ex diuturna consuetudine
suppediat, ut dicere aliquis possit, non in distinctione membrorum, sed in con-
tinuo usu perfectionem consistere.* Nos equidem utramque istam perfectio-
nem ad corporis & animi conjunctionem referre non dubitamus,
quamvis posteriorem potiore esse minimè inficiemur. Exempla
specialia quædam leguntur in Theor. Viv. 528. 883. 930.

25. Roscium Comœdum in arte sua, qua res gestas & mores alio-
rum mira gesticulatione ad vivum in scena repræsentare didicerat,
sic excelluisse ferunt, ut cum Cicerone certare ausus sit, uter Ora-
tionem sæpius variare posset, hic verbis, an ille gestibus. Cicero
quidem Oratione pro Archia de Roscio sic loquitur: *qui cùm esset se-
nex mortuus, sæmen propter excellentem artem ac venustatem videbatur omnia
mori non debuisse.*

26. Huc pertinent illi homines, qui sinistra illud peragere norunt
quod alii dextra tantùm; item, qui nummum alium ab alio tactu dis-
cernunt (ut in cæcis quibusdam observavi) quod nos absque visus ad-
miniculo non possumus.

C A P. XXII.

*Non tantum alternis vicibus, sed etiam simul & semel
multos & varios corporis atque animæ actus
in Homine posse concurrere.*

1. **E**Ximum vitæ humanæ decus est, quod multi ac vari dentur actus, quibus anima & corpus conjunguntur, licet eos simul & semel exercere etiam non detur.

2. Sic laudatur Polyglottus, cum tot ac tam diversis hominum linguis cogitationes & intellectum adungere possit, licet eas omnes neque audire simul neque pronunciare valeat.

3. Commendatur vir multæ lectionis & Polyhistor, quamvis omnia eodem tempore neque legere neque memoriæ imprimere potuerit, neque etiamnum promere simul possit.

4. Atqui illud est multò præclarissimum & pro mentis cum corpore adunationis admirando octavo habendum, quod una & eadem vice multos & varios actus in pluribus hominibus conjungere natura valeat: quod ipsum divinæ perfectionis quoddam vestigium esse videtur; cum Deus circa omnia simul versetur, & multum vicinius omni sit quàm unum vel paucum.

5. Tantò autem admirabilior hæc naturæ perfectio est, quantò plura simul corporis organa tum agendo in animam, tum ab ea patiendi exercentur; item quantò major est voluntatum & perceptionum in animo simul operantium diversitas; denique quantò magis distinctæ sunt regulæ, secundum quas corporis animique functiones instituuntur.

6. Exemplo nobis sit Musicus excellens, qui præterquam quod cantui universo mensuram det, simul discantum, ut loquuntur, ex inspecto libro articulata voce canit, & numeros & verba exprimendo, simul bassum, instrumentum pulsans, audiendum offert. Hic motus oculorum, aurium, oris, manuum & pedum diversi, cum pluribus ac distinctis animi perceptionibus ac voluntatibus eodem tempore copulantur.

7. Celebrantur Julii Cæsaris similitumque heroum ingenia, qui aliis pluribus simul dictare atque ipsi interim scribere sufficiunt. Laudantur Oratores, qui vocali eloquio visibiles gestus tam appositi ad-

jungunt, ut aures pariter & oculos auditorum alloqui videantur.

8. Sæpe quis in prælio altera manu tubam tenet, quam ore inflat, altera pugnat cum hoste, simul equum cui insidet regit, motum suorum membrorum voluntarium sentit, quomodo ab equo violenta actione corpus quatiatur percipit, sonum audit, stragem conspicit.

9. His aliisque id genus documentis abundè refelluntur, qui tam angustis mentem humanam limitibus circumscribunt, ut uno tempore non nisi circa objectum unum eam occupari posse opinentur.

C A P. XXIII.

Multitudine tamen & varietate actuum concurrentium, vim singulorum sæpius minui.

1. **Q**uemadmodum verò nihil est in rebus creatis ab omni parte beatum: ita lumen illud perfectionis humanæ umbra quadam imperfectionis limitatur. Quæ res proprium conjunctionis hujus, qua corpus & anima colligantur, nonum exhibet.

2. Nempe quòd plures magisque distincta corporis animique functiones in Homine eodem tempore conjunguntur, eò remissiones ac debiliores minusque accurata solent esse singula: quòd verò pauciores simul exercentur, eò fortiores ac validiores esse possunt. Causa est finita ac limitata partis utriusque natura. Quæ ratio cum generalis sit, ad res merè corporeas etiam extenditur, Theor. Viv. 353. sqq.

3. Hinc illud: pluribus intentus minor est ad singula sensus, Theor. Viv. 889. sq. unde vis imaginationis tanta in noctambulis aliisque somniantibus deprehenditur, quæ inter vigilandum imbecillior est, quoniam externis sensibus una operantibus magnoperè distrahitur. Causam inde Theologi petunt, cur divinæ revelationes prophetis aliisque hominibus plerumque obrigerint inter dormiendum.

4. Hinc Aristoteles, cum re quapiam vehementer capimur, inquit, nihil ferè aliud agere possumus: at cum eà parum delectamur, alia ferè agere solemus. Nam ea actio, quæ propter comitem voluptatem accuratior atque intensior est, alteram elidit atque impedit.

5. Unde prudentes viri optimum in republica factum jam olim judicant, ut unus civis tantum unicuique tractaret artificium, quo aliàs excellere non posset. Quod Germani hoc aut simili proverbio effecerunt: 17 handwerk 18 ungluß.

6. Affine est præceptum illud Politicum, ne uni plures Magistratus

tus commendentur : quod nemo plures res , magnas præferam , uno tempore optimè administrare valeat. Hinc *πολυπραγμονες* vituperantur.

7. Est & alia superioris perfectionis restrictio , quòd , licet diversæ actiones in corporis & animæ conjunctione possint concurrere , non tamen debeant esse nimis diversæ & contrariæ.

8. Contrarietatem intellige vel respectu instrumenti operantis , sicuti nemo potest simul sorbere & flare ; vel respectu objecti , circa quod versatur operatio , ut nemo potest duobus dominis inter se repugnantibus inservire. Quin imò si contingat , ut quis utrumque dominum amet , sit tamen , ut , dum in alterius voluntate exsequenda est intentio , erga alterum se gerat negligentius , secundum ea quæ hoc capite docere proposueramus.

C A P. XXIV.

Conjunctionem animæ & corporis non in quibuslibet , sed in certis ac definitis actibus esse sitam.

1. **Q**Uando verò tam sunt multi ac varii corporis animique actus , qui nullam inter se convenientiam aut consequentiam naturalem habentes in Homine concurrunt , hoc inter præclara & admiranda conjunctionis hujus decimum haberi meretur :

2. Quod inter tot ac tam dissimiles actus non promiscuè & indifferenter quivis quibusvis , sed certi ac definiti duntaxat ad certos ac definitos referuntur , seu , quod certæ duntaxat animæ cogitationes certis corporis motibus respondent , & contra.

3. Exempli causâ , cùm digitorum igni propiùs admoves , motus inde in nervis excitatus , non quidvis , sed calorem duntaxat ac dolorem , & quidem talem ac tantum animo percipiendum præbet.

4. (Quæ animi passio vel perceptio hac ratione necessaria est , non libera : quia cùm non sentiat animus nisi patièdo aliquid à corpore , non potest non eundem habere sensum , quoties à corpore eodem modo afficitur. Repete Theor. Viv. 827. seqq.)

5. Et mox ad voluntatis jussum non quilibet in corpore motus , neque in qualibet parte sine discrimine sequitur ; at ille solum , quod manus ab igne removetur , vel clamor aut stertus excitatur.

6. Quæ actio voluntatis quidem imperantis intuitu libera est , quod sit ut membris dissimilibus similes interdum operationes mandet , uti videtur

vidimus cap. XXI. 22. sqq. at corporis respectu necessaria, cum bene dispositum nec aliunde impeditum imperio illi non possit non parere, utpote cogitationis expers.

7. Ejusmodi certæ ac definitæ rei ad aliam certam ac definitam relatio atque applicatio plurimum ad earum conjunctionem juvat. Hinc de amicitia ista usurpantur effata: ne cuivis dextram injeceris: qui vult omnibus esse amicus, nulli est amicus. In scedere mutuo ab utraque parte certæ conditiones certis respondent. Similiter in Conjugio.

8. Justitia, qua membra cujusque civitatis inter se colligantur, jus suum cuique tribuit. Debetur autem aliis præmium, aliis pœna, aliis honor, aliis pecunia, aliis tutela, &c. ubi proportionem Arithmeticam aut Geometricam observat.

9. Ita cum inferiores debeant superioribus reverentiam, obedientiam, gratum animum, hi vicissim illis benevolentiam, sedulitatem, justitiam præstare tenentur. Quibus exemplis non solum officiorum reciprocatio, verum etiam certorum ad certa relatio demonstratur.

10. Responso nisi congruat interrogationi, alitque alia applicetur, perperam illi conjungitur. Grammaticorum quoque regulæ sunt: interrogatio & responso casu consentiunt: Relativum cum antecedente substantivo convenit in genere & numero.

11. Quam verò pulchrum & concinnum sit, si certa certis respondeant, præ cæteris declarant illi versus, quos Grammatici correlativos vocant, cujusmodi est illud distichon:

Pastor, arator, eques, pavi, colui, superavi,

Capras, rui, hostes, fronde, ligone, manu.

12. Ubi Virgilio triplicem sustinenti personam triplex actio assignatur, ita ut suum cuique actioni objectum & instrumentum respondeat. Et versus quidem ejusmodi relationem tantummodo depingunt, & quæ non existere simul, simul exhibent.

13. At cogita quot & quanta sibi in Homine respondeant, quæ omnia viva sunt & eodem tempore existunt. Ex. gr. in eo qui simul dicat & scribit, animus fungitur officio 1. dictantis, proferendo, sonos, ore: 2. scribentis, pingendo, figuras, manu & calamo: 3. auditoris, percipiendo, sonum, auribus: 4. lectoris, videndo, literas, oculis. Animus imperat motum linguæ, cogitatio versatur circa regulas Grammaticas, ne illæ in sermone negligantur, ipsamque at-

tendit rerum naturam, ne aliter pronuncietur ac res est, neque o-mittit ad captum auditorum dicta accommodare. Hic multiplicibus & miris modis operans, actus, agendi modus, instrumentum, ob-jectum sibi mutuo respondent.

14. Similis venustas observatur quoties quis ad certos instrumenti Musici vel cantilenæ numeros saltat ac tripudiat. Ubi certorum so-norum perceptiones certa producunt voluntatis imperia, quibus certi corporis motus obsequuntur.

15. Præterea ut consequentiæ syllogisticæ vis omnis in eo sita est, quod non ex quibuscumque præmissis quævis conclusio; sed hæc tantum ex illis, alia ex aliis inferri possit:

16. Sic in animæ cum corpore nexu virtus quædam singularis elu-cet, quod occasione certorum, qui in corpore nostro naturâ præce-dunt, motuum, non indifferenter quælibet; at certæ duntaxat in animo perceptiones existant, quodque vice versa ob certum aliquod voluntatis nostræ imperium antecedens, non quilibet promiscuè mo-tus, sed determinati solum ac definiti quidam in corpore oriantur.

17. Sic ad certum ac definitum voluntatis Dei imperium, *esto lux*, fuit lux; *confluant aqua*, fuit ita; *herbascat terra*, fuit ita, &c. quem-admodum creationem rerum nobis describit Moses Genes. I. Ut im-perii illius divini quædam imago in voluntate humana reluceat. Quemadmodum verò inter voluntatem divinam & lucem corpo-ream, vel aquam confluentem vel herbam ex terra pullulantem nulla similitudo est: ita nec ulla requiritur inter voluntatem humanam & motus membrorum. Quæ refer ad confirmandum caput XIV.

18. At limitatio hujus perfectionis in nobis præter alias hæc est, quod non semper tales sunt organorum corporeorum motus, quales volumus: ex. gr. cum lingua præcurrit mentem, ut vulgo dicimus; item, cum id quod perperam excidit correcturi, hæc verba usurpa-mus, illud volui dicere, ubi plerique utuntur verbo, inquam. Ne jam dicam de morbis corporis, quibus fit, ut motus organorum vo-luntati respondere nequeant.

19. Nemo verò putet, ut certæ corporis functiones certis dun-taxat animi cogitationibus respondeant, similitudinem inter eas re-quiri: id enim jam sæpius rejectum fuit. Etiam si certa nomina certa-rum rerum sint propria, non tamen ullam propterea cum ipsis con-venientiam habent. Repete ex Theor. Viv. 885.

CAP. XXV.

*Animam & corpus per actus suos conjungi
proximè atque immediatè.*

1. **P**roprium & præclarum conjunctionis hujus undecimum illud est, quod *corpus & anima nostra connectuntur* per ea, quæ sunt ipsorum propria, non aliena, atque ita *proximè & immediatè*, nullo interveniente alterius natura medio, sive substantia sive accidens esse putetur.

2. Ac similem corporum durorum, quorum partes immediato contactu juxta se mutuo quiescentes cohærent, hac quidem in re esse rationem, ex Physica generali didicimus.

3. Qui contra opinantur, ad corporis & animi in Homine unionem requiri tertium quoddam ab utroque distinctum principium, cujus officium sit naturas illas extremè dissidentes, corpoream, crassam ac terrenam, & incorpoream seu spiritualem ac cælestem, veluti medium quoddam utrique proportionatum, inter se copulare: (sicuti ad partes litigantes conciliandas mediator vel arbiter aliquis inter homines requiri solet;)

4. Illi non modò sine necessitate entia multiplicant, sed etiam aliquid non intelligibile effingunt: quoniam præter corpus & quæ sunt corporis, mentem ejusque functiones nihil animo concipi potest, quod in verorum entium censum veniat.

5. Nec aliud quodcunque corpus, uti spiritum cælestem vel æthereum, quem nonnulli vocant, animæ magis proportionatum, quàm est humanum, intermedium fingere possis: quandoquidem omne corpus naturâ suâ æquè differt à Mente.

6. Et quàm bene corpus organicum, in quo non modò crassæ partes hærent, sed etiam subtiles spiritus currunt, voluntati obsequentes, Theor. Viv. 482. sqq. menti agentis & patienti sit proportionatum, è superioribus liquet. Repete cap. XXI. 17. sqq.

7. Adde quòd ista opinio, de medio ad corporis & animæ conjunctionem necessario, aliis conjunctionis hujus proprietatibus adversatur. Nam qui ad ea quæ diximus ac dicturi sumus animum advertit, perspicuè videt, nullum illius commenticii medii usum vel officium in Homine componendo relinquì.

8. Hic ergo consideretur, quod immediatum illud & proximum,
copu-

copulam inter animam & corpus longè perfectiorem gignat, quàm iis in rebus, quæ interveniente medio quodam alieno remotius cō-
sunt, inveniatur.

9. Sic minùs firma inter homines existit unitas, quæ mediatore eget, quàm quæ in proprio & spontaneo partis utriusque ad invicem accessu atque interiore admissione consistit.

10. Quæ immediata sunt magis se mutuo afficere ac movere possunt & solent, vide Theor. Viv. 886. sqq. Quamobrem & affectus illi vehementiores, qui cientur ab objectis nosmetipsos proximè tangentibus, ibidem artic. 1046.

11. Perfectior est inter facultatem cognoscentem & objectum cognitum adunatio, si hoc ipsum coram intueamur, quàm si per speculum tantùm cernamus, argumento loci 1 Cor. 13: 12.

12. In Logicis definitionis leges differentiam cum genere potius proximo quàm remoto copulant. Inque demonstrationibus causæ & effectus proximi immediata connexio primas tenet. Denique medio carentis propositionis vis in probando potior est, quàm ejus, quæ medio, quo priùs ipsa probetur, indiget.

C A P. XXVI.

*Animam aliis corporibus non tam propinquo nexu sociari:
inde corporis humani prerogativam aliquam existere.*

1. **T**alis immediata connexio inter mentem humanam & alia corpora non datur. Nam corporum externorum, veluti bestiarum homini servientium, armorum, calami aliorumque instrumentorum quietem vel motum anima se sola non gubernat, neque ullam in iis mutationem proximè efficit.

2. Corpus humanum est instrumentum *anima*; alia corpora sunt instrumenta *hominis* ex corpore & anima constantis. Simile est in societate domestica, ubi uxor sola marito immediatè jungitur atque subjicitur, in servos atque ancillas commune est utrique conjugii imperium, cum quibus & vinculo minùs arcto conjunguntur.

3. Quicquid in alia corpora mens nostra agit, humano intercedente corpore agit. Hujus namque solius motum & quietem *ἀνέμους* gubernat variaque partibus ejus mutationes solo voluntatis nutu inducit;

4. Non utique motus in majore aut minore mundo quantitatem

augendo vel minuendo, Theor. Viv. 644. fqq. sed in alias tantùm partes eum convertendo, Ph. 173: fqq.

5. Vicissim à corporis humani variis motibus anima aliter atque aliter, & quidem proximè, nullius alterius interventu rei, affecta alias atque alias perceptiones nanciscitur, voluptatis quidem ac doloris præsertim sensum haut rarè penetrantem admodum.

6. Non sic ab aliis afficitur corporibus, quæ suo demum interjacente corpore videt, audit, tangit. Unde etiam consequitur, mentem arctius humano adesse corpori, quàm nauta navi jungitur. De quo infra pleniùs.

7. Si dicas, animam nostram ista in corpore humano agere vel pati intercurrentibus spiritibus animalibus vel alia parte cerebri peculiari mediante; nobis haudquaquam contradicis, qui immediatam animæ cum corpore nostro ejusque partibus conjunctionem urgemus. Talem ac tantam ei cum aliis corporibus intercedere negamus. Num verò uni corporis nostri parti anima magis præsens sit quàm aliis, suo loco inquiremus.

8. Hic solummodo addatur aliquid de corporis humani prærogativa, quæ in eo est posita, quod animæ reëctrici proximè conjungitur: ob quam causam tantum aliis meretur præferri corporibus, quantum in familia conjux famulis antefertur.

9. Ac sicuti Regis alicujus familiares ac domestici subjectis anteponuntur reliquis: ita corpus humanum propter istam adeo propinquam animæ præsentiam corporibus aliis merito dignius habetur.

10. Haud absimili ratiocinatione Theologi carnis nostræ seu naturæ humanæ prærogativam aliquam inde colligunt, quod à Filio Dei in unitatem personæ sit assumpta.

11. Ex illa corporis nostri dignitate & proxima ad mentem relatione descendunt varia circa corpus humanum, tam mortuum quàm vivum, versandi jura, veluti honesta sepultura cadaveris, &c.

C A P. XXVII.

Corporis atque animi actus eodem tempore in Homine concurrere, adeo ut à multis hominibus ne quidem distinguantur.

I. **Q**uemadmodum verò *res nulla media intercedit*, quæ corpus animæ devinciat; ita inter organorum motus & inde consequen-

quentes animi perceptiones, inter voluntates & imperatos corporis motus *nullum tempus intercurrit* :

2. Hoc volo, quemadmodum *non animadvertimus* ullum subjectum dari, quod in animam nostram agat magis immediatè quàm corpus, cui juncta est: ita *non percipimus* (nam secundùm perceptionem & experientiam, quæ in nobismetipsis est manifesta, hæc meritò judicantur, ex cap. II. 4.) inter actus corporis animique, quibus conjunguntur, ullam interponi moram:

3. Dummodo mens attenta corpori sano præsens existat: quæ consideratio in aliis ad conjunctionem illam, de qua agimus, pertinentibus pariter locum invenit.

4. Sicuti enim Hominis definitio à perfectione ejus petitur; ita hæc, de qua loquimur, compositio secundùm statum Hominis perfectum describenda, non è natura deficiente metienda est.

5. Simul ergo ac nervus opticus afficitur, anima percipit: simul ac voluntas jubet, pes bene dispositus movetur, lingua loquitur: simul atque auris à sono verborum movetur, animus attendens & sermonis gnarus quidnam dicatur intelligit.

6. Hujusmodi consideratio non videbatur hoc loco prætermittenda, quoniam corpus & anima non per essentias absolutas, sed per actiones & passiones respectivas conjunguntur. Actiones autem & passiones *tempori* subjacent.

7. Adeo ut corpus animæ ac vicissim anima corpori satis præsens esse non videatur, nisi actiones illæ passionesque mutæ, in quibus hæc præsentia consistit, tempore simul ponantur. Ecquænam enim hîc *præsentia* erit, si futura tantùm præteritis respondeant?

8. Loquor autem de temporis ordine duntaxat, non de naturæ vel dignitatis. Hoc enim posteriori respectu, quin agere prius & nobilius sit quàm pati, nemo dubitet.

9. Simile occurrit in rebus physicis, ubi quoties corpus unum in aliud motum transfert, inter motum ejus quod confert eum, & motum ejus, cui confertur, nullum temporis intervallum interjicitur. Hæc quoque alia de causâ inter sese contulimus cap. XIV. II.

10. Iste corporis animique functionum eodem tempore concursus non postrema causa est, cur adeo difficulter à nobis discerni valeant. Hæ namque rerum diversissimarum operationes tam prope se invicem excipiunt atque insequuntur, ut pro una & eadem à plerisque mortalium habeantur & simplice uno nomine insigniantur.

11. Ex. gr. quia dum oculus *movetur* à lumine Solis, mens juncta corpori simul aliquid *percipit*, simul *judicat*, tres isti actus, corporis affectio seu receptio, animi perceptio, & judicium, pro uno eodemque reputantur, atque uno Visus nomine exprimuntur. Vide Theor. Viv. 819. 976. 996. & Logicæ Prolegom. §. 70. seqq.

12. Sic dicimus, nos *audire* hominem illum talia jam *affirmantem*, licèt eum non videamus, solo *audiendi* verbo comprehendentes 1. quod aures nostræ moveantur à tremulo ac vibrato aëre. 2. quod ex eo mens aliquid percipiat & intelligat, ac 3. denique judicet certum hunc esse hominem qui ista proferat. Quando enim talis aurem ferit sonus, qualis antea sæpius, ratiocinando colligimus eundem esse hominem qui antea. Quod quidem judicium dianoëticum ad sensum auditus tunc referimus eodemque vocabulo denotamus. Etiam uno *affirmandi* verbo in eodem sermone & oris motum & animi cogitationem, quæ in affirmante concurrunt, significamus.

C A P. XXVIII.

*Ex isto temporis concursu singularem Conjunctionis
hujus excellentiam elucere.*

1. **E**X iis quæ de temporis concursu, quantum ad corporis & animi actus, diximus, conjunctionis hujus admirabilis perfectio nova & attentione dignissima consurgit, quæ nobis duodecima.

2. Nam ut taceam, vestigium quoddam divini imperii in ista mentis humanæ circa corporis membra operatione relucere, (Deo quippe dicente, est quicquid est, ipso præcipiente existit illico quodcunque ab ipso vocatum in mundum venit.)

3. Multò imperfectiorem illam in rebus, quarum præsentia mutua desideratur, esse unitatem, ubi actus aliquis alteri demum post temporis quoddam intervallum respondet, ex pluribus, quibus humana constat & colligatur societas, officiis patescit.

4. Attende nautarum simul remigantium, hominum eandem campanam distinctis funibus trahentium, aut concinentium, aliaque id genus exempla.

5. Quamdiu tardè & cum difficultate intelligis verba quæ proferuntur, ita ut cum sono verborum, quæ audis, eorundem intellectum promptè conjungere non valeas, defectu laborat ista conjunctio.

6. Cui

6. Cui non molestum est, ubi rogat quippiam alterum, si hic respondere vel officium præstare de die in diem differat & procrastinet? Celeritas beneficii magnitudinem auget, cunctatio minuit. Distanti scribentis, docenti discentis tarditas permolesta est.

7. Laudatur servus qui è vestigio se domino vocanti sistit, non ille qui moras nectit. Primi Romanorum reges *Celeres* circa se habebant, & alii hodieque famuli à celeritate cursus nomina sunt adepti: de quibus in Libris de Causis Linguæ Germanicæ fusiùs egi.

8. Nuncii haut secus ac alii servi vel magis etiam ab agilitate & velocitate commendantur. Vide quæ nomina Mercurio, Deorum qui fingitur nuncius, aliisque dentur.

9. Atqui corpus ad animam refertur primò quidem generatim ratione motuum voluntatis imperio parentium, uti *servus* ad dominum; Deinde ratione perceptionum, quas in anima excitat, speciatim ut *nuncius* ad mittentem vel eum, cui non expectanti vel etiam invito nuncius advolat. Quæ ferè mente Augustinus aliique docti viri sensus animæ internuncios appellant.

10. Utrobique autem agendo simul & patiando, serviendo & nunciando, officia ac beneficia pars Hominis altera præstat alteri promissimè ac celerimè. Quid? quod ita assuetus animus per consuetudinem hujus cum corpore commercii similem in aliis, quæ nobis in humana societate conjunguntur, ut modò diximus, personis promittitudinem exigit.

11. Ita ut conjunctio hæc animi cum corpore primam dederit occasionem pluribus morum atque artium præceptis, quibus officiorum atque operum præstandorum promittitudo ac celeritas præscribitur.

12. Corpus cerrè nostrum accipit mandata ab animo, vicissim animo indicat quæcunque agendo vel patiando exsequitur, quin imò antequam perfunctum sit officio, eo tempore quo fungitur momento, quid fiat animo nunciat, ac de præsentis quoque rerum exteriorum statu ocyssimè eum admonet.

13. Si quis cavilletur, *nuncium* intelligere & loqui, non corpus, absurdam igitur comparisonem esse; respondemus, comparisonem non in intellectu, sed in celeritate fuisse institutam. *Index* in horologio horas indicat, quas non intelligit. At quomodo corpus mentem erudiat vel moneat, abundè suprà explicatum est. Nempe quod occasione cogitandi præbeat, seu mentem ad cogitandum hoc vel illud excuscit.

14. Limitatio perfectioni huic, æquè ac aliis, adjuncta est, quoties motus imperatus segnius voluntati respondet, aut motus objecti sensum in nobis ciens tardius ad animam pervenit. Causas ante tetigi. Ita contingit, conversis aliò cogitationibus, uti aures nostræ voce quidem loquentis percutiantur, animus verò paulo post deum sese recolligens, quid indicatum fuerit, percipiat. Simile fit quoties obdormiscimus.

C A P. XXIX.

Quòd conjunctio prima inter corporis animique actus cum altera inde orta, & quandoque plures subordinata tempore simul esse possint.

1. **M**inimè verò prætermittendum esse videtur, quod ea quam descripsimus perfectio latius se extendat ac primo compositionis hujus intuitu apparet.

2. Respeximus enim hæcenus uniuscujusque functionis corporeæ cum intellectuali sibi respondente concursum. Atque ita plures actus *coordinati* alterius partis cum pluribus partis alterius actibus simul esse possunt.

3. Atqui hoc novum & præ cæteris admirandum est, quòd etiam plures actus *subordinati* tempore possint coincidere, hoc est, quod conjunctio quædam orta ex alia, quæ naturâ prior, & aliquando etiam tertia, præsupponens utramque, tempore simul esse queant.

4. Martialis de illorum temporum Notariis ita canit:

Currant verba licet, manus est velocior illis:

Nondum lingua suum, dextra peregit opus.

Hic triplex conjunctio notari potest, in qua sex actus, tres corporis totidemque animi, sine notabili ullo temporis intervallo intercurrente, simul existunt: quorum primi duo naturâ præcedunt duos sequentes, qui porro duobus ultimis occasionem præbent.

5. In prima conjunctione est motus aurium simul cum perceptione animi: in altera, quæ eoque momento inde oritur, est voluntatis imperium junctum cum motu manus & calami: in tertia, quæ itidem eodem momento cum præcedentibus jungitur, licet eas præsupponat, est voluntas præcapiens juncta motui oculorum. Pono enim Notarium non tantum audire & scribere, sed etiam inter scribendum eadem videre & legere.

6. Quin-

6. Quinimò si propius inspiciamus, quinque fortassis hîc conjunctiones sunt, ita ut addenda sit omnium prima, voluntas accommodandi aures dicenti cum aurium obsequio, & omnium ultima, motus oculorum & perceptio eorum quæ scripta sunt.

7. Similia quodammodo exempla habemus in iis, qui canunt aut falant ad instrumentum Musicum, secundum eos numeros, quos antea non noverant.

8. Sunt præclari ingenii adolescentes, qui simul ac præceptor absolvi dictando lingua vernacula, ipsi reddiderunt Oratione Latina, & interdum quidem ligata. Ubi 1. est voluntas audiendi cum aurium obsequio, 2. motus sive affectio aurium cum perceptione soni atque significationis verborum Germanicorum, 3. voluntas illa vertendi in linguam Latinam (ubi rectè loquendi leges & si ligata sit oratio, etiam metrum attendere oportet) juncta cum obsequio intellectus & manus, ac sæpe etiam linguæ, quæ inter componendum interdum submissa voce loquitur: 4. Voluntas præcipiens oculis ut ad ea quæ scripta sunt se convertant cum eorundem obsequio. 5. motio oculorum à literis scriptis cum perceptione animi eorum quæ exarata sunt.

9. Sit hoc è præclaris conjunctionis hujus tertium decimum, quod non modo conjunctio vel conjunctiones coordinata, sed etiam plures subordinata, quarum alia ab alia pendet, in Homine eodem tempore concurrant.

10. Quod si igitur à mente humana, quæ valde finita est, tam multa simul cogitari, percipi & appeti voluntate possunt, quorum tamen aliud ex alio naturæ quodam ordine consequitur; imò si in corpore nostro, quod multò magis finitum est, ejusmodi plures motus concurrunt; vide an non hoc juvare te possit ad melius agnoscendum, quod mens divina, quæ prorsus infinita, omnia simul intelligat & velit: & quamvis more humano de consilio ac decreto Dei ratiocinando & loquendo alia in eo aliis naturâ priora vel posteriora dicamus, omnia tamen in Deo simul existant, omnia simul æterna sint. Putem sanè illa, quæ modò tradidimus de Homine, nos juvare ad illud de Deo facilius credendum, quantum rem ipsam attinet, licet modum rei comprehendere nequeamus.

CAP. XXX.

Actus corporis atque Animi omnes non esse jugi exercitio copulatos, at sæpius interruptos, aliosque aliis succedere.

1. **A**ctiones passionisque rerum creaturarum omnes tempori subiectas esse antea monuimus: quæ causa Grammaticis, quod *Verbo*, præter agendi patiendive significationem primariam, certam temporis connotationem attribuant.

2. Nec minùs in cogitationibus animi nostri, quàm corporis motibus, successio seu prius & posterius invenitur. Ut enim corpus nunquam ciatur omnibus illis motibus simul, quibus diversis vicibus cieri aptum natum est: ita nec animus simul & semel unquam cogitat, quæ aliàs atque aliàs cogitare potest. (Ita scilicet à perfectione divina, quam in calce præcedentis capituli attingebamus, vita nostra deficit.)

3. Quamobrem cùm ista, de qua nobis dudum sermo est, conjunctio in certis corporis motibus animique cogitationibus sit posita, hoc inter propria & admiranda ejus quartum decimum perspiculemus:

4. *Quod vita atque esse totius Hominis, quatenus in certis cogitationibus ac voluntatibus, certis membrorum motibus, certis sensuum perceptionibus consistit, quotidie & in horas mutetur.* Adeo scilicet animal rationale vicissitudini obnoxium est, ut quod de humana voluntate dici solet, eam esse ambulatoriam, id est, inconstantem ac desultoriam, ad totam Hominis vitam extendatur.

5. Semper equidem aliquos corporis animique actus concurrere necesse est, quamdiu vivit Homo (Nam si nulli omnino concurrerent, atque ista intermissio longior foret, Homo revera non esset amplius);

6. Non tamen, quovis tempore simul omnes, qui diversis quidem temporibus, conjungi possunt aut solent; sed aliàs plures, aliàs pauciores, aliàs hi, aliàs illi paribus passibus ambulant.

7. Ex.gr. in eo qui simul dictat & scribit, simul dictata audit & scripta legit: interimque rotam pedibus impellit, plures animi corporisque functiones simul junguntur, quàm in alio, qui unum horum vel alterum duntaxat exsequitur munus.

8. Et

8. Et quoniam, ut dici solet, *cujus quidem dicti ratio ad hunc locum spectat maxime, varietas delectat*, eadem perpetuò agere atque pati haudquaquam amamus. Theor. Viv. 776. sqq. Ita enim facti sumus à natura, ut vicissitudinem diligamus. Quapropter inter affectus humanos *Fastidium* quoque locum invenit, *ibid.* §. 1048.

9. Simile est in eadem Theor. 214. quod calor in plantas agit non actione continua, sed interrupta. Cujusmodi intermissio ratione actuum atque officiorum mutuorum in omni amicitia, conjugio, fœdere locum habet. Sic amicorum cohabitantium alter alteri quotidie quædam officia præstat, sed non semper eadem: quippe quod fieri nec potest nec debet.

10. Quemadmodum igitur corpus nostrum organicum partes habet extra partes, hoc est, ita habet, ut ubi una est, ibi simul non possit esse alia, quæ magnitudo *extensiva* dicitur: ita vita nostra nunquam tota simul existit, at partes habet, quarum alia est extra aliam successione, quæ magnitudo *successiva*.

11. Ac sicuti impossibile est, ut penetratio dimensionum detur: ita fieri non potest, ut omnes illæ corporis animique functiones, quibus vita humana tota, à principio ad finem constat, continuatur atque absolvitur, ullo unquam tempore simul existant. Non magis certè quàm omnes & singuli totius anni dies eodem tempore lucere possint.

12. Itaque vitalium nostrarum functionum concursus multis quotidie partibus interruptus est, nunc inchoans, nunc desinens, nunc perseverans aliquantisper (instar Lunæ crescentis ac decrescents). Ibi intermissio, repetitio, renovatio, hujus actus cum illo commutatio est: unius ejusdemque continuatio nunquam. Idque propter variam corporis & animæ mutabilitatem: quæ omnis creaturæ propria conditio est.

C A P. XXXI.

Hujusmodi mutationem in humana & creata natura quodammodo esse perfectionem.

1. **H**ujusmodi vita Hominis in successione consistens, licet collata ad Deum imperfecta meritò censeatur, uti capite præcedente, §. 2, dicebamus: in creata tamen Universalitate pro quadam perfectione haberi posse videtur.

Ecc 2

2. Quo-

2. Quoniam enim natura entis finiti non patitur, ut functiones ejus eodem tempore ad omnia pariter se extendant, progressu temporis modò his, modò illis actionibus passionibusque perficitur. Haut secus atque animus noster quia rem totam simul uno conceptu capere nequit, pluribus ac distinctis conceptibus paulatim ad aliquam cognitionis plenitudinem promovetur.

3. Imperfecta valde foret vita nostra, si iisdem illis paucis, quibus aliquando potest & solet, perpetuò intenta & occupata esset. Nunc autem cum jam his, jam illis constet atque exerceatur actibus, pluribus certè entitatis rivulis irrigatur. Sic homo qui peregrinando multas regiones perlustravit, antefertur illi, qui uni perpetuò solo affixus fuit.

4. Excurramus hinc iterum ad cognoscendum Deum (neque enim Philosophi esse puto, ullam Numinis cognoscendi occasionem negligere,) ut quàm sit admirabilis ejus sapientia, bonitas & potentia in hoc capite denuò contemplemur.

5. Nulla res creata participat infinitum, cunctæ suo modulo participant. Idcirco plures conditæ, quò Conditoris divinitas latius pervideretur. Idem rerum opifex alias creaturas in suis individuis easdem conservat, veluti angelos, (qua quidem in parte mundo suam ab initio creationis perfectionem simul dedit,) alias propagatione speciei sustentat, uti homines, quorum aliis denascentibus alii nascentes assiduò succedunt: qua ratione mundus plurimorum demum seculorum decursu consummatur.

6. Ac sicuti in genere humano talis à principio orbis conditi ad hanc usque horam durat individuorum successio: ita quoque hominis cujusque individui vita in fluxu consistit, dum aliis actibus cessantibus alii succedunt atque instar fluctuum marinorum vitæ operatio operationem pellit, expulsæ in locum venit.

7. Atqui non modò *successivam* hanc in corporis & animi conjunctione perfectionem Deus posuit, verùm etiam *simultaneâ* quâdam (liceat nunc uti philosophorum verbo) genus humanum exornavit, de qua supra capp. XXII, XXIX, vidimus.

8. Adèò ut in admirationem rapiamur expendentes quomodo Deus Opt. Max. non majorem duntaxat, sed minorem quoque mundum quasi omnibus modis possibilibus decorare studuerit. Pro quo beneficio uti gratias Creatori immortales debemus: ita omnibus vitibus, ut eo rectè utamur, contendendum est.

C A P . XXXII.

*In illa mutatione constantiam quandam elucere, quod
actuum semel conjunctorum altero recur-
rente alter simul resurrat.*

1. **A**T nova insuper in humanæ vitæ, quam demonstravimus, mutatione operationumque vitalium perpetua vicissitudine perfectio se nobis aperit à perfectissimo rerum omnium auctore perfecta.

2. Sicuti enim in ipso vario motu & infinita mutabilitate corporum, quibus universum impletur, constantia quædam relucet, quam primæ lex naturæ his verbis indicat, *quod semel movetur, id, quantum in se est, deinceps semper moveri*: ita corporis animique functiones similem quandam constantiæ legem observant.

3. Quandoquidem *semel juncta & concurrentes, alia vice rursus jungi & concurrere amant*. Quod inter propria & præclara, conjunctionis hujus est quintum decimum.

4. Majori mundo eximium decus conciliat varietati juncta constantia, Ph. 389. Idem in minore mundo usu venire pulcrum & præclarum esse perspicimus. Cujus quidem in Macrocosmo constantiæ exemplum huc maximè faciens petere licet è Theor. Viv. 221. sqq. quod eadem quotannis aëris constitutione redeunte eadem plantæ florent, eadem aves aliunde ad nos advolant, eadem animantia pilos aut cornua sua amittunt, &c.

5. Quantum ista virtus amicitæ, matrimonio, fœderibus, aliisque conjunctionum generibus momentum addat, nemo ignorat. Primarium illud humanæ societatis vinculum *Iustitia* constans & perpetua voluntas definitur.

6. Constantiam, quam in corporis animique conjunctione prædicamus, in eo intelligis consistere, quod, quoties exercetur aliquis actus animi, qui relationem habet ad quendam corporis motum, toties recurrat talis motus, qualis initio concurrere cœpit, non alius.

7. Vicissim, quoties motu quodam ad animum relato corporis aliqua pars efficitur, toties redeat in mentem talis perceptio, qualis antea consimili motui respondebat. Uno dicam verbo: actu altero recurrente non emanet idem qui concurrere solebat. *Idem*, inquam, specie.

8. Ne autem opineris proprium hoc conjunctionis nostræ quintum decimum cum decimo cap. XXIV exposito prorsus unum esse, observa, sicuti aliud est, certam mercem certo semper pretio vānre, quod perpetuum est; aliud, eidem merci idem semper pretium statui, quod rarum est: ita aliud esse, quod certi actus corporis certis mentis actibus respondeant, de qua re cap. XXIV actum; aliud, quod iisdem sæpius repetitis semper iidem conjungantur, de quo in præsentī agimus.

9. Ita differunt inter sese hæc duo: 1. alii atque alii quæstioni aliud atque aliud responsum applicari: 2. ad eandem quæstionem subinde repetitam idem perpetuo responderi. Hic iteratio & repetitio actuum necessariò attenditur, non ibi. Hic relatio identitatis inter actus priores & posteriores consideratur, ibi non item.

10. Instar five exemplum simile laudatæ illius motuum cogitationumque in Homine concurrentium constantiæ sæpe percipitur in concentu Musico, ubi dissimiles soni, acuti & graves, ex artis regulis ita concurrunt, ut cantu semel iterumque interrupto eodemque repetito iidem recurrant ac sibi mutuò respondere pergant, qui antea. Unde grata existit harmonia.

C A P. XXXIII.

Ex ista mentis cum corpore conjunctionis proprietate Universalia orta esse.

1. **E**X hac conjunctionis animæ cum corpore proprietate videntur originem habere Universalia, quæ à Logicis recensentur, genus, species, &c. quatenus conceptum pariter & nomen commune in iis spectamus.

2. Ita primæ ætatis homines, cum fari incipiunt, cum cogitatione de parentibus suis *patris & matris* nomina conjungunt. Postea videntes alios viros & mulieres, patris & matris nomina eisdem similiter attribuunt.

3. Sed adulti cum Hominis conceptu hoc vocabulum *Homo* connectunt, & quoties idem conceptus voce efferendus recurrit, idem nomen repetunt. In quo communi conceptu & nomine tota *Universalis* natura consistit.

4. Huc faciunt verba Philosophi ex prima parte Princip. art. 59. *Fiunt universalia ex eo tantum, quod una & eadem idea utamur ad omnia indivi-*

dividua, quæ inter se similia sunt, cogitanda. Ut etiam nomen & idem nomen omnibus rebus per ideam istam representatis imponimus, quod nomen est universale. Ita cum videmus duos lapides, nec ad ipsorum naturam, sed ad hoc tantum quod duo sint attendimus, formamus ideam ejus numeri quem vocamus binarium; cumque postea duas aves aut duas arbores videmus, nec etiam earum naturam, sed tantum quod duæ sint consideramus, repetimus eandem ideam quam prius, quæ ideo est universalis: ut & hunc numerum eodem universali nomine binarium appellamus.

5. Quibus verbis duo conjunctionis animæ cum corpore, quæ in actibus sibi mutuo respondentibus posita est, exempla continentur. Alterum est, quod, uti cum visione duorum lapidum coniungimus ideam binarii, ita postea cum visione duarum avium vel arborum (intellige primum visus gradum, qui organi corporei motio est) eandem ideam coniungamus. Alterum, quod eandem ideam repetentes idem quoque nomen repetamus.

C A P. XXXIV.

Constantiam illam aliâ rursus inconstantiam limitari, quatenus corporis animique functiones aut per naturam aut per habitum & consuetudinem junguntur.

1. **U**Ti verò conjunctionis hujus aliæ perfectiones imperfectione quadam comite limitatæ sunt, quæ est rerum omnium præter Deum existentium ratio: ita & illi, quam paulò ante descripsimus, constantiæ nova rursus inconstantia adjuncta est.

2. Quod ut intelligatur, observa, functiones illas, quarum ad se invicem relatione, concentu & harmonia corporis & animæ conjunctione in Homine absolvitur, vel per naturam vel per habitum & consuetudinem connecti.

3. *Per naturam* eas connecti dicimus, quæ ab initio vitæ nostræ conjunguntur, à quibus vita hominis sua capit primordia, ita ut antè quàm concurrere incipiant, Homo compositus & factus censeretur nequeat.

4. *Per habitum* eas copulari affirmamus, quæ postea quàm nati sumus, vel repentinè uno quodam actu satis intenso, vel pluribus remissioribus paulatim per assuetudinem conjunguntur.

5. Ita

5. Ita per naturam cum verbis ore humano prolatis & aure nostra receptis nihil aliud conjungimus, quàm perceptionem soni: in quo vocabulorum esse materiale consistit.

6. At per habitum & consuetudinem paulatim cum iisdem eorundem verborum sonis, quibus aures nostræ eodem modo afficiuntur, uti ab initio vitæ affectæ fuerunt, perceptiones rerum significatarum, in quo vocabulorum esse formale situm est, animus noster connectit.

7. Atque hæc posterior conjunctio sæpe priori aliquid addit, sæpe etiam (quod mirabile) actu valde intenso aut longiore usu eam quodammodo obliterat: adeo ut habitus & consuetudinis furcā, ut cum Poëta loquar, naturam expellere liceat.

8. Ex. gr. adulti & linguæ satis periti de sono literarum ad unumquodque vocabulum pertinentium vix amplius cogitamus, soli vocum significationi totiusque orationis sensui intenti.

9. Sic inveniuntur homines, qui adhibitā diligentia, diuturna aliter vivendi consuetudine mores, ad quos corporis sui temperamento disponebantur, multum immutarunt.

10. Sed pluribus quoque aliis exemplis discitur, quomodo actus animi & corporis naturaliter in Homine prius conjuncti, postea per habitum separari possint, & quod ejusmodi habitus vel per unicam actionem acquiri possit. Vide Theor. Viv. cap. ult.

11. Quapropter ex iis, quæ hoc & XXXII capite docuimus, concludendum est, nexum animæ & corporis in eo positum esse, quod, ubi *semel*, seu per naturam seu per habitum, aliquam actionem corpoream certæ alicui cogitationi junximus, altera *deinceps* nunquam se nobis offerat, quin altera se pariter exhibeat.

12. Hujusmodi certè conjunctio tam est rationi consona, quàm illud est consentaneum, ut, ubi semel quæstioni alicui sapienter, bene ac sufficienter est responsum, toties eadem afferatur responsio, quoties eadem quæstio recurrit. Confer cap. XXXII. 9. Sic certæ juris formulæ sunt constitutæ, quæ repetuntur quoties idem negotium peragendum.

13. In tali materialium immaterialiumque actuum ad se invicem habitudine & mutua quasi sympathia, qua semel juncti iterum conjungi amant, semel concurrere assueti rursus concurrere gaudent, sita est conjunctionis hujus constantia:

14. Cui tamen limitatio, quam diximus, seu inconstantia quædam

dam adjuncta est: periade ut in tota Physica localis motus constantia multiplicem variationem perpetuò comitem habet. Ph. 148. sqq.

15. Ita qui æger pharmacum aliquod magna cum aversione hausit, non potest deinceps quippiam ejusdem ferè saporis assumere, quin rursus eandem habeat aversionem. Nec similiter de aversione haberi solitâ circa pharmaca cogitare potest, quin idem sapor ipsi in mentem redeat.

16. Plurimum itaque refert, quam animi cogitationem cui motui corporeo primâ vice jungas. Ab illa enim primâ conjunctione, præsertim si actio efficacior fuerit, singularis cum voluptatis vel doloris sensu copulatâ, pendent reliqua omnia:

17. Nisi alio tempore contrarius habitus vel actus efficaciam superans præcedentem aut consuetudo diuturnior mutationem inducat, quemadmodum docuimus: & exemplo liquet hominum, qui semel ablaetati toto deinceps vitæ tempore lac muliebri averfantur, quo initio vitæ plurimum delectati fuere.

18. Quomodo autem ex hisce principiis occultæ in Homine qualitates explicentur, id repete ex Theor. Viv. cap. ult. Nos ex iisdem proximè secuturis duobus capitibus nonnullas illustres quæstiones resolvemus.

19. In iis, quæ modò diximus, conjunctionis hujus proprietas decima sexta continetur, quod animæ & corporis functiones, cum non possint simul & semel omnes connecti, aliæ statim ab initio vitæ, id est, per naturam, aliæ autem deinceps per habitum & usum conjungantur: adeo ut compositum illud, quod Hominem appellamus, assidue quasi fiat & nascatur, quemadmodum cujuslibet creaturæ conservatio nihil aliud est quàm continuata creatio.

20. Et proprietas decima septima, quod conjunctio *usualis*, ut ita loquar, *originalis*, licet ea ob temporis prioritatem firmiter radicata videatur, tollere possit atque immutare: haut secus atque vocum significatio prima & originalis sæpe alterius cujusdam significationis usu & consuetudine obliteratur. Quam rem atrigi Logicæ meæ part. 3. quæst. 27.

21. Adde proprietatem decimam octavam, non esse in cunctis hominibus eadem, quæ per naturam vel habitum aut consuetudinem conjunguntur. Unde occultæ, quas diximus, qualitates, aliæque individuales, quas vocant, hominum differentiarum pendent: quas

tamen differentias à corpore vel animo secundum spectato magnam quoque partem dependere non imus incipias.

C A P. XXXV.

De conjunctione prima, qua fit in utero matris, quæstiones illustres resolvuntur.

1. **D**E conjunctione prima seu originali corporis animique functionum, initio quæritur, quo tempore fiat. Resp. Animæ cum corpore conjunctionis principium ab ipsa animæ infusione accessimus, quam infusionem, secundum ea quæ hæctenus dicta sunt; non antè fieri intelligimus, quàm corpus organicum ita sit in utero matris dispositum, ut anima in illud agere ac vicissim ab ipso pati valeat. Simile est, quod Deus mundum prius creavit omnibusque rebus necessariis instruxit, quàm Hominem introduceret.

2. Quæritur deinde, quæ causa conjunctionis primæ. Resp. Deus quidem secundum primitivæ benedictionis carmen, *crescite & multiplicamini*, constante decreto se quasi obligasse videtur ad mentis humanæ creationem, simul ac corpus ad eam, quam diximus, perfectionem deductum fuerit. Quod si ita est, quemadmodum probabile quidem autumo, ista lex quædam naturæ fuerit haut secus ac illæ de Motu in Physica generali. Confer cap. XIV. II.

3. Homo verò quid ad primùm nectendas corporis animique functiones conferat, interrogas. Resp. 1. corporis dispositio ab utroque parente pendens multum potest conjunctionem illam primam omnesque sequentes variare. 2. fœtus in utero existens matris sensibus atque affectibus similia patitur, quemadmodum cap. ult. Theor. Viv. ostendimus.

4. Quales igitur corporis animique actus conjungit mater, præsertim cum doloris aut voluptatis sensu efficaciori afficitur, tales facile etiam conjungit proles utero comprehensa. Ex. gr. naturale est, ut ad subitum gravidæ mulieris gaudium fœtus exsultet in utero; ad repentinum ejusdem terrorem exterreatur; eundem cibum & potum aliumve similem aversetur, quem eo tempore mater aversetur, eodem delectetur, quo ipsa, &c.

5. Quæ omnia qui diligenter apud animum suum expendit, quomodo *natus muliere* peccatrice peccatum ab ipsa conceptione sua naturaliter contrahat, non amplius admirabitur. Quod potatu dignissimum

simum confectarium Theologus ulterius trutinandum relinquatur.

6. Non malè igitur Terentianus ille convincit mulierem de filio, quod nihil vitii habeat mater, quin renatum sit in filio. Vide Terent. in Heaut. Neque ineptam conjecturam Diogenes fecit temulento juveni objiciens, quod pater ipsum ebrius genuerit. Nihil enim certius est, quàm parentum, matris præsertim, quæ & plus materiei ad generationem confert (unde causam arcessunt, cur animal ex diversis speciebus maternæ fiat naturæ) vitia & præposteræ cogitationes in liberis sapissime effigiari.

7. Quæris insuper, cujusmodi corporis animique functiones omnium primæ in Homine copulentur. Resp. Illæ, quæ ad vitam vegetativam pertinent. Neque enim alias in utero matris exercet. Quæ ratione defendi possit illud Aristotelis, *Hominem primò vivere animâ vegetante, hinc sentiente, tertio rationalem animam accipere*. Profectò si puras animæ rationalis operationes hîc intelligas, pauci homines ad ultimam istam perfectionem in hac vita deveniunt, de quo mox plenius.

8. Rogas præterea, quis infantis in mundum venientis primus sensus sit. Resp. *Sensu doloris*. Nam ut mater gravissimos in partu dolores percipit: ita proles ex utero egrediens non potest non eorundem esse particeps, dum angustia loci, per quem exit, corpus ejus constringitur, & mox aëre ac lumine repente circumfuso sic alteratur, ut ille qui ex tenebricoso carcere subito in apicum producitur. Itaque lacrymans infans nascitur. Quæ causâ videtur fuisse sapienti Cartesio, cur enarrando sensus infantis dolorem primo loco posuerit Princip. I. 71. Adi eundem Passion. art. 137. Cumque sic in lucem edito tanquam nova & insolita offerantur omnia, primus in eo nasci *admirationis affectus* videtur, quem etiam alia de causâ cunctorum affectuum primum Cartesius statuit Pass. §. 53.

9. Ex his quoque colligitur, Hominem ab initio vitæ suæ puras intellectus operationes nullas exercere, sed tantum sensitivas, seu, ut cum Philosopho loquar, in prima ætate mentem nostram tam arctè corpori esse alligatam, ut non aliis cogitationibus vacet, quàm iis solis, per quas ea sentit, quæ corpus afficiunt. Cujusmodi cogitandi genere solo plerique mortalium universo vitæ tempore utuntur, propter eam, quam explicuimus, conjunctionis hujus proprietatem, quòd initio semel juncta ferè semper in posterum jungantur.

10. Nunquid autem ante lapsum primi homines sinceræ mentis

operationes, intellectum à corpore abstrahendo, exercuerint; & anno-
ideo, quod suafu Diaboli *prima* mater ad fructum vetitum, in oculis
ipſius pulcherrimum, flagrante cupiditate intuendum atque appeten-
dum, avidiſſimè comedendum, tracto in conſortium facinoris ma-
rito, *ſemel* ſeſe convertit, & ipſi protoplaſti & omnes eorum poſteri
corporalibus *deinceps* rebus addiſtos atque affixos animos unà cum
veſtimentis induerint, ut tandem etiam præterito inviſibili Condi-
tore ſolas res conditas ac viſibiles coluerint, neque præter corpo-
ream pulchritudinem ullam uſquam attenderint, id ipſum thema
Theologis haut perfunctoriè tractandum relinquo. Equidem hiſce
de Corporis & Animi conjunctione principiis noſtris iſta omnia ſunt
prorſus conſona.

C A P. XXXVI.

*De conjunctione poſteriore, qua fit per habitum & conſue-
tudinem, quaſtiones aliqua deciduntur.*

1. **E**X eodem principio, quod *ſemel* junctæ corporis animique
functiones facile *iterum* conjungantur, difficulter ſejungantur,
quaſtiones aliæ innumeræ de iis, quæ ad habitum & conſuetudinem
ſpectant, reſolvuntur, quorum ſpecimen aliquod hoc capite produ-
cemus.

2. Quamobrem in præconceptis ab infantia ad intuitum vel ta-
ctum rerum corporearum opinionibus deponendis tantam difficulta-
tem homines experiantur. Nempe cùm organa noſtra à rebus illis
eodem modo, quo antehac, afficiantur, ſimiles in animum conce-
ptus & opiniones aſſiduè redeunt. Qua de re in Prolegomenis Lo-
gicis & alibi fuſius diſſerui.

3. Quare conceptus rerum à conceptibus verborum vix unquam
ſeparare poſſimus: quia nimirum ab ineunte ætate notionες rerum ſi-
mul cum verbis memoriæ mandavimus. Quò ſpectat quarta errorum
cauſa in fine Princip. partis primæ à Cartefio tradita, quam pluri-
bus locis illuſtravi.

4. Cur lingua vernacula perpetuò ſe linguis peregrinis ingerat pro
norma earumque ſe magiſtram conſtituat, ſeu voces ſingulas ſeu phra-
ſes reſpicias. Unde Latinam linguam diſcentes Germani Germa-
niſmos, Galli Galliciſmos vix unquam ſatis evitare poſſunt.

5. Quo jure Timotheus Muſicus duplicem ab iis mercedem po-
ſtula-

stulaverit, qui artem perperam antè didicerant, simplicem ab aliis omnino rudibus.

6. Quare famulus somnambulus nomine proprio vocari atque exinde ad vocantem se illico convertere assuetus, eodem nomine inclamatus, in lecto aut simili loco existens, sese convertat, atque ea, quæ manibus apprehendit mittendo decidat.

7. Cur simus ita à natura comparati, ut ubi semel ad iram aliumve affectum nos commoveri passi sumus, paratiores evadamus ad alia vice similem ob causam irascendum, cupiendum, timendum, &c.

8. Quomodo discamus ab aliis hominibus. Nempe verba eorum, utpote soni quibus aures & cerebrum nostrum afficiuntur, semel iterumque inculcata faciunt nos paulatim iis conjungere certas cogitationes, adeo ut postea iisdem verbis repetitis eadem cogitationes recurrant, & contrà, iisdem cogitationibus repetitis eadem verba rursus efferantur. Apparet hoc inprimis in studio & scientia linguarum.

9. Quæ causa sit, cur illi qui ex natali solo nunquam discesserunt, quicquid à moribus ipsorum abludit statim pro ridiculo atque inepto habeant, & cur vulgo omnes, uti consuevimus, ita judicemus dici oportere, ut rectè observat Aristoteles. Nempe quos semel per habitum & consuetudinem junximus animi corporisque actus, eosdem aut similes postmodum conjungi desideramus, eodem aut simili modo rursus videndo, audiendo, loquendo, aliamve vitæ actionem exercendo.

C A P. XXXVII.

Quod & homo, alius alio & idem seipso, diverso tempore, magis minusve homo censeri possit.

1. **E**A quæ pluribus antea capitibus docuimus, admirandum in hac materia nobis exhibent undevicesimum, nempe, quod corporis animæque talia in homine sit conjunctio, ut per eam modò magis modò minus vivere & homo censeri possit.

2. Et speciatim, quod non solum nascatur homo, sed natus etiam progressu temporis aut magis aut minus homo fiat. Quemadmodum plures aliæ res imperfectiores initio producuntur, veluti aves implumes, quæ paulatim perficiuntur tandemque corrumpuntur.

3. Qui substantias & essentias rerum non recipere magis & minus.

nus in Logicis aut Metaphysicis nos docuere, eos ut Physicorum, & harum imprimis, quas nunc tractamus, rerum ignaros parum hinc moramur. Confer Ph. 117. sqq.

4. Neque generalibus ejusmodi effatis præpropere abstractis hæc specialia ratione & experientia comprobata evertenda sunt; sed è contrario illa ex his corrigenda. Vide Ontosoph. §. 131.

5. Illi tamen ipsi Logici si cognovissent, hanc de qua loquimur conjunctionem in actionibus passionibusque mutuis consistere, intentionem & remissionem ei minimè abjudicassent: quoniam actiones passionisque magis & minus recipere diserte tradunt.

6. Nos autem si non modò propinqua quædam, sed plura etiam remotiora ex iis quæ tractavimus, memoria repetamus, perfacile cognoscemus, quo pacto non omnis homo æquè sit homo existimandus:

7. Quatenus non æquè multa & varia cap. XXI. sq. vel æquè promptè atque expedite cap. XXVII. vel æquè constanter capp. XXXII. XXXIV. in ipso conjuncta sunt ea, propter quorum conjunctionem Homo est & nominatur.

8. Cognoscemus item, quomodo unus idemque homo possit vel magis vel minus homo evadere, quatenus plures vel pauciores, magis minusve inter se differentes, majoris aut minoris momenti corporis animique actus promptius aut seignius, constantius aut inconstantius copulat.

9. Magis utique amici vocari & haberi merentur, qui plurium magisque diversarum rerum, virtutis præsertim officiorum, communione prompta & constante sociati sunt, quàm alii inter quos hæc ea perfectione non reperiuntur.

10. Quapropter etiam Ethici docent, quod amicitia honesta sola per se amicitia sit ac dici mereatur; amicitia verò utilis & jucunda per accidens tantùm hoc nomine digna sit:

11. Additis rationibus rem, de qua in præsentì agimus, confirmantibus, quòd prior amicitia sola sit stabilis & omnia in se amabilia complectatur, posteriores autem inconstantes amabilium partem duntaxat aliquam attingant.

12. Speciatim igitur hinc discatur, quomodo per studia humanitatis, quando plures morus corporei intervenientibus variis sonis, figuris, picturis, aliisque rerum signis & sapientiæ quasi vehiculis (quò spectant Grammatica, Rhetorica, Musica, Optica, Geographia, &c.)

cum

cum animi perceptionibus junguntur, magis homines evadunt.

13. Qua item ratione magis homines judicandi sint qui vigilant quam qui dormiunt; qui membra sua variis quotidie artibus exercent, ita ut plurimi ac diversi corporeorum organorum motus assiduo voluntatis imperio semper accuratè parcant, quam qui ignavia & otio torpescunt & corporis sui pondere terræ adhærent.

14. Non enim in otio & cessatione, non in quiete; sed in negotiis, actione & motu vario vita hominis, sive corporis organici animique humani conjunctio sita est. Certè animus tanquam actus, corpus ut instrumentum sibi junctum habet. Instrumenti autem essentia tota in usu posita est. Repete capp. X. XVIII.

15. Hujusmodi, ut sic dicam, actuositatem Germani sic exprimunt, *es lebt alles was an ihm ist*. Belgis *een lebendig manne* ~~item~~ vividum Hominis ingenium denorat.

16. Denique liquet è dictis, quo pacto magis hujus vitæ animalis dulcedinem gustent, qui pluribus affectibus sæpius commoventur, dummodo rectè iis uti sciant: uti ex adverso plura acerba vividè experiuntur cum illis uti nesciunt.

17. Nempe quò crebrius, attentius, efficacius animus mutationes adjuncti sibi corporis sentit, eò magis vivida est vita hominis ex illis duabus partibus compositi.

18. Ac vicissim, quò frequentius, velocius, rectius atque ad quantum voluntatis accommodatius animi imperia corpus exsequitur, eò magis viget eadem vita.

19. Sic magis vivit rusticus gnavus, licèt idiota, quam suo judicio sapiens Stoicus, *ἀναιδής*, stupidus & *ἀναιδής-Θ*. Magis vivit cursor, histrio vel athleta, quam, cæteris paribus, manibus & pedibus æger clinicus.

C A P. XXXVIII.

Animam non distincta intellectus, sed confusa, quæ tribuitur sensibus, perceptione corpori jungi.

1. **C**Orpus animæ non quarumvis partium ratione, neque cujusvis generis motibus junctum esse ex Theor. Viv. 727. sqq. patet.

2. Vicissim animam corpori non quibuscumque. at certis tantum volun-

luntatibus ac perceptionibus junctam esse, ex eadem Theor. 661. sqq. & hujus libri cap. XI. liquet.

3. Sic anima hominis non tam necitur corpori per voluntatem edendi & bibendi (nisi activè, quatenus membra ad talem voluntatem moventur, quod etiam in angelo corpori juncto locum habet) quàm per famem & sitim aliosque appetitus naturales. Theor. Viv. 979.

4. Non alligatur corpori per amorem, lætitiā, tristitiā intellectualem, sed per animalem sive sensualem & affectus. Theor. 992. sqq.

5. Quæ ergo de intermissione concurrentium animi corporisque actuum, deque vita magis aut minùs vivida suprà diximus, ea ad solam vitam animalem ac sensitivam, vitam totius compositi referenda esse nemo non videt.

6. Nam anima suas sibi cogitationes, corpus suos sibi motus habet, ipsis etiam in homine per mutuam relationem non cooperantibus. Quæ omnia virtute continentur in iis, quæ cap. XI tradidimus.

7. Ita animus suas delectationes separatim habere potest, intelligibilium rerum contemplationi intentus & à corpore abstractus, licet *vita hujus* dulcedinem tunc temporis non percipiamus. Respice capitis proximè antecedentis §. 16.

8. Quantum igitur ad perceptiones attinet, harum aliz in nobis puræ sunt ac distinctæ, quas soli tribuimus intellectui, aliz impuræ & confusæ, quas imaginationis & sensuum esse dicimus. Theor. 843. 939. 961.

9. Anima verò copulatur corpori *non per expressam ac distinctam eorum, quæ in corpore sunt, intellectiōem; sed per confusos & cum ipso corpore quasi permixtos sensus*. Estque hoc proprium conjunctionis hujus vigesimum.

10. Duplex autem in sensibus hisce confusio reperitur (ut distinctè intelligas quæ nunc de confusione philosophamur); altera ratione percipientis subjecti, altera ratione objecti percepti.

11. Prior in eo consistit, quod perceptionis sensualis ipsum corpus nostrum ejusque partes faciamus participes, cum tamen percipere, Germ. *empfinden*/ propria sit mentis functio. Theor. 823.

12. Posterior in eo posita, quod motus locales in corpore nostro, quoties sentimus, non percipimus ut motus, verum ut aliud quid à motu

motu diverſum, quod quale ſit vulgo nescimus. Theor. 843.

13. Nam intima hæc mentis cum corpore conjunctio in cauſa eſt, quare veram ſenſibilium qualitatum ipſorumque ſenſuum naturam multò difficiliùs cognoscamus, quàm figurarum & numerorum rationes, quæ ad Matheseſin puram; vel mentis abſolutas proprietates, quæ ad Metaphyſicam ſpectant. Quæ res diu multumque conſiderari digna eſt.

14. Puri intellectus perceptio ſit per *ſigna formalia*, quæ res verè repræſentant, quatenus earum ſunt imagines mente pictæ.

15. Senſus ſive ſenſualis perceptio ſit per *ſigna materialia*, quæ res quidem indicant, ut hederæ ſuſpenſa monet vinum eſſe vendibile; ſed eas non repræſentant inſtar imaginis. Nam ab illa impreſſione, quam objectum in organo corporeo facit, ſenſus caloris, ſoni, odoris & reliqui proximè pendent. Confer cap. XIII. ſin. XXVIII. 13.

16. At quomodo expreſſum ac diſtinctum rerum intellectum, quem voco, à confuſa ſenſuum perceptione in præſenti diſtinguere oporteat, id ſequenti capite pluſculis exemplis planius faciam. Ac porro oſtendam, quantopere iſta ſenſuum confuſio corpus & animam in homine coarctet, oppoſita illa conjunctio, qua mens noſtra objectis, vel nauta navi, vel angelus corpori præſens exiſtit.

C A P. XXXIX.

Proinde multum differre conjunctionem hanc ab ea, qua mens objectis vel nauta navi adest.

1. **N**auta expreſſè cernit vel intelligit multa, quæ in navi contingunt. Mens ſe ſola utens plurium objectorum naturam & motus diſtinctè contempletur.

2. At corporis ſibi peculiari modo conjuncti læſionem aut commodam quamcunque affectionem ſingulari quodam doloris aut voluptatis ſenſu mens noſtra percipit:

3. Qui ſenſus multò vehementiùs eam afficit, multò profundius in eam quaſi penetrat, veluti tangendo ac pungendo, quàm expreſſus alterius cujuſcunque corporis intellectus.

4. Quotieſcunque propter aridas fauces corpus potu eget, mens humana confuſum ac tristem aliquem ſenſum, quem *ſitim* appellamus, in ſe experitur. Similis eſt perceptio *famis* ob vellicationem ventriculi.

5. Nauta quoque haut rarò vela quidem sicca conspiciat, nec non ratiocinando mox inde colligit, ut navem venti citius propellant, illa humectanda esse. At nihil tamen quod cum sensu sitis conveniat propterea in se animadvertit.

6. Corpus nostrum quoties læditur, uritur, vulneratur, scinditur (saltem in plerisque partibus) id anima *solo interiore contactu*, qui virtutis est intellectualis, non molis corporeæ (vide cap. IX. 14.) statim percipit, ex cap. XXVII.

7. At si quid navis simile patiarur, id nauta vel non percipit, vel aliquo sensu exteriori intercedente demum cognoscit, & sæpe quidem post temporis aliquod intervallum.

8. Anima percipit illud tanquam in suo corpore ejusvè parte aliqua. Theor. 672. Unde illa nomina & phrases existunt, Cephalalgia, Odontalgia, Cardialgia, doleo capite, pes mihi dolet, &c.

9. Dices, hujusmodi sermonem ex illo errore proficisci, quod perceptio ipsis membris corporeis, non soli menti vulgo adscribatur, quemadmodum suprà notavimus.

10. Resp. Id equidem non abnuo: sed inde probo arctiorem illam animæ cum corpore in homine connexionem, quæ quidem hominibus non philosophis in illum errorem incidendi occasionem dedit. Confer cap. XXVII. 10.

11. Nauta navis ejusque partium mutationes non cognoscit tanquam in subiecto, quod ita suum queat judicare. Navigium quippe alienare potest, nec semper ei jungitur.

12. Unde nec vocabula ejusmodi composita sunt ab hominibus reperta, quibus partim animi tristitia & molestus sensus, partim navigii passio notaretur.

13. Anima sentit illud pro suo corpore, id est, non solum commo & utilitate, verum etiam quasi vice & loco ejus.

14. Nauta continui solutionem aut aliam quamcunque affectionem in navi etiam sua, quatenus ejus possessor ac gubernator est ad tempus, ejusmodi utili & quasi vicaria opera non perferentiscit.

C A P. XL.

*Per istam sensuum confusio-
nem, anima corporisque
vinculum multò arctius reddi, quàm per
intellectum purum.*

1. **A** Tque hi confusi sensus sunt vel inprimis illud ipsum, quod corporis animique vinculum adeo forte & arctum, addo etiam, si addere licet, adeo violentum reddit.

2. Quod enim sentis tanquam in alio, cum alio, pro alio, illud profectò strictius te illi necit, quàm quod seorsum & absolutè intelligis.

3. Exemplo utere amici intimi, cum quo & pro quo libenter pateris, quodque ipsi commodi vel incommodi obtingit, id tibi met ipsi accidisse existimas.

4. Nempe quoties te consideras ut partem alteri parti junctam, cum qua unum totum conficias, utique propinquior unitas est, quàm ubi te spectas ut ab alio distinctum & separatum, ubi quidem nulla datur unitas. Exempla pete ab amoris & odii natura. Theor. 1014. sqq.

5. Sapienter autem Microcosmi creator Deus corporis & animi fœdus in ejusmodi confusis sensuum perceptionibus collocavit.

6. Nam si distinctè semper animus intelligeret, uti Medicus & Philosophus id sæpe intelligit, quidnam illud reipsa sit in corpore, unde dolorem aut voluptatem animus percipere solet, ob rei levitatem corporis curam sublimioribus cogitationibus intentus insuper haberet, saltem tanto studio ei non prospiceret:

7. Qua ratione corporis animique conjunctio minùs diu facta tecta foret, quandoquidem sapientiores quidem haberemus animos, non tamen veriores essemus Homines.

8. Hæc sanè causa est cur fortiores & sapientiores animæ minorem corporis sui curam gerant, quàm sensibus prorsus immersæ & corpori mancipatæ, cujusmodi sunt puerorum, scæminarum, barbarorumque hominum, qui in diem vivunt nullisque se rerum perplexarum curis macerant.

9. Etenim ex naturali sensuum instinctu & secundum noticiam experimentalem, præsertim accedente continuo corporis exercitio,

felicius valetudinem suam isti tuentur, aut amissam sibi restitunt, quàm alii, qui ex Medicorum tantum præscripto, secundum notitiam intellectualem & abstractam, diætæ nimis curiosæ se manciantes, vivunt. Quo sensu à vero non abludit illud vulgare: *Medicè vivere, est pessimè vivere.*

10. Prudentis legislatoris esse putatur, leges nullis adjectis rationibus proponere, ne acutioribus ingeniis curiosius in eas inquirendi occasionem præbendo, subjectos minùs habeant morigeros.

11. Res quidem corporeæ tantò certius atque constantius secundum naturæ leges moventur, quòd earum notitiam nullam habentes reluctari nequeant. Quod etiam de corpore nostro verum est. Vide cap. XXIV. 6.

12. Applica utrumque ad confusam sensuum notitiam, & quomodo per eam potius, quàm per distinctam intellectus operationem corpori studeat & alligetur animus, clariùs perspicies.

13. Vel etiam apud animum tuum expende, utrùm distincta magis an confusa cognitio conjugia promoveat & genus humanum propaget. Invenies, confusam pulchritudinis in sensus externos incurrentis apprehensionem, majorem in omnibus ferè hominibus habere vim ad amantem amatæ sociandum, quàm distinctam interiorum virtutum considerationem. Cupiditatis ille fervor, quo quis in alterius sexus personam fertur, haut secus ac ira, impedit animum, ne possit cernere verum. Vide Theor. Viv. 776. sqq.

14. E superioribus etiam causa paret, cur cibi & sapes aliqui non modò à sanis, verùm etiam quandoque ab ægrotis ex appetitu & gustu melius, quàm è judicio rationis dignosci soleant.

C A P. XLI.

Ratione illius per confusos sensus conjunctionis, Homo confertur cum Angelo, & quomodo ἰσάγγελοι futuri simus, expenditur.

1. **A**ngelus puro intellectu atque intuitivè, ut loquuntur, cognoscit quæ fiant in corpore, cui se fortè jungit.

2. Angelus licèt in corpore assumpto fortassis aliquando edere velit & bibere, nunquam tamen esurit & sitit. Et quamvis edat ac bibat, non tamen ejusmodi jucundum inde sensum habet, qualem animus

mus humanus. Ejusmodi certè sensus naturalis esse non videtur mentibus Angelicis. Similis est ratio voluptatis Venereæ, quæ non magis in Angelum cadit, quàm voluptas ex assumpto cibo vel potu percepta.

3. Angeli scientia experimentalis non norunt morborum naturam, timorem mortis, amorem vitæ, seu, diutius vivendi cupiditatem: quid sit tolerare famem & sitim, quid frigus aut calorem intensum perferre, non sunt experti; quoniam morbis doloribus & passionibus ejusmodi corporeis boni saltem angeli non sunt obnoxii.

4. Unde patet, qua ratione Theologi colligant, Christum servatorem nostrum non angelicam, sed humanam assumpsisse naturam, ut majori infirmitatum nostrarum sensu affici atque unà nobiscum pati posset.

5. Quomodo item hominibus conveniat, potiùs homines, quàm angelos habere doctores & consolatores: quoniam illi soli ut communi miseriarum nostrarum sensu tacti nobiscum agere & loqui norunt. Nempe illi ferè soli commoveri misericordiâ solent, qui similitum calamitatum consortes sunt, fuerunt aut certè aliquando esse possunt. Hinc apud Virgil. *Æneid.* 1. Dido *Æneam* his verbis compellat:

*Me quoque per multos similis fortuna labores
Iactatam, hac demum voluit consistere terra.
Non ignara mali, miseris succurrere disco.*

6. Ex his quoque discere quadantenus liceat, quomodo in futura vita ἰσᾱγγελοι, angelis similes evadere possimus. Nam ut omittamus animi nostri seorsum spectati cum angelis similitudinem, quæ hujus loci non est, affirmemus, ratione hujus mentis humanæ cum corpore conjunctionis quibusdam partibus similiorem illis tunc futurum hominem.

7. In resurrectione, inquit Scriptura, neque nubent neque nubentur; sed erunt sicut angeli Dei in celo. Et alibi, *Deus ventrem & escas abolebit.* Ex quibus intelligimus, nubere velle non futurum in altera vita, multò minùs τὸ ὄρι, quod corporis animique vinculum in hac vitâ valde arctum reddit.

8. Intelligimus, sensum famis & sitis tunc desitutum, reliquos item sensus ad appetitus ejusmodi naturales maximè pertinentes, cuiusmodi sunt olfactus & gustus, tunc usum non habituros. Visus quidem atque auditus diversa ratio est.

9. Obtendat aliquis à Theologis 1. si ea quæ vinculum animi & corporis tam firmum reddunt in hac vita, abolitum iri putemus in in altera, necessum esse ut statuamus itidem, minus tum nos futuros esse homines. 2. Conjunctionem animi cum corpore per confusas perceptiones à peccato ortam videri, vel hoc ipso argumento, quod in beatiorè vita talis non sit permansura. Unde 3. etiam sequatur, confusam ejusmodi sensuum perceptionem cum animali desiderio conjunctam non fuisse ante lapsum in primo homine. Ac proinde 4. hîc, ubi naturam hominis ex corpore & anima compositi describimus, inter proprietates illius conjunctionis talia non esse numeranda.

10. *Resp.* ad 1. alia possunt esse tum respectu nobiliorum sensuum, tum respectu animæ in corpus agentis ac velocius illud commoven- tis, quæ non modò supplere quod deesse putaretur, sed perfectius etiam ac firmitus corporis & animæ vinculum in meliore vita efficere valeant. Quæ qualia & quanta sint, mortalium nemini in mentem venit.

11. *Resp.* ad reliqua: Hominem à philosopho describi qualis invenitur, neque ab eo petendum, ut primi atque integri hominis statum explicet. Satis esse, si philosophematis suis consentanea Theologiae esse dogmata occasione data moneat, uti factum in præsentia. Adde, quod sapientiæ divinæ talem animi cum corpore, per confusas sensuum perceptiones, conjunctionem optimè convenire, suprâ docuimus. Num primus homo quamdiu rectus manebat, ea quæ corpus afficiunt per actum immanentem distincto intellectu statim perceperit, atque ita per naturam id potuerit, quod hodie per studium & habitum longâ diligentia acquisitum Philosophi & Medici in quibusdam faciunt, id hujus loci non est inquirere.

12. Certè mali auctorem Deum cum Manichæis non facimus, qui conjunctionem animi cum corpore, quatenus in confusis sensuum perceptionibus consistit, bonam & laudabilem, & huic vitæ, quam vivimus, quamque ad meliorem vitam duntaxat esse viam fide credimus, ostendimus esse congruam. Quod ex capite sequente clariùs innotescet.

C A P . XLII.

Corporis animique conjugium esse amicum ac delectabile.

1. **Q**Uum igitur confusæ sint perceptiones , per quas corpori jungitur anima, nunquid illud naturaliter tristitiam gignat, inquiri possit, cùm nemo gaudeat in obscuro morari carcere, omnes luce & claritate delectemur.

2. Et alia hac eâdem de re dubitandi causa est, quòd naturæ toto genere diversæ non videantur se amore prosequi & consortio mutuo delectari posse, cùm simile tantùm simili sit amicum, contrarium verò à contrario suo odio habeatur.

3. Sed responderetur, non obstantibus illis, quæ in contrarium obijciuntur, argumentis, *corporis & animi conjugium in Homine pluribus modis amicum esse ac delectabile*, respectu animæ, quæ sola diligere & lætari apta est. Id quod inter propria & præclara conjunctionis hujus est vigesimum primum.

4. Hac ipsa sententia ab iis, qui corpus habent pro animæ carcere, ad quem ipsa quasi condemnata sit, magnopere dissidemus. Distinguiamusque conjunctionem hanc ab omni alia coacta & ingrata vel invita: cujusmodi est inter multos sæpe homines, qui scedere aut societate quacunque, ob metum externi hostis, aut commodum aliquod similemve causam, aliquantisper cohærent, non autemullo benevolentiae affectu se invicem prosequuntur.

5. Sed operæ pretium est ut examinemus, quot modis Deus Opt. Max. corporis animique humani conjunctionem suavem. & jucundam effecerit: quam quidem conjunctionem rationi consonam, & utrique parti utilem esse, supra tradita abundè nos docuerunt: adeo ut triplex omnino bonum, honestum seu pulchrum, jucundum & utile in admirabili hac junctura rerum, sapientissimus optimusque Creator spectandum nobis exhibuerit.

6. 1. Quoties conveniens & proportionatum sensui nostro offertur objectum, singularem animus inde voluptatem percipit. Hoc enim illius quasi pabulum est. Huc spectant illa Cartesii initio Compendii Musicæ: *Sensus omnes alicujus delectationis sunt capaces. Ad hanc delectationem requiritur proportio quadam objecti cum ipso sensu, unde fit ut v. g. strepitus scloporum vel tonitruum non videatur aptum ad Musicam,*
quia

quia aures laderet, ut oculos solis adversi nimius splendor.

7. 2. Quoties naturalibus desideriis satisfacimus, Deus voluptates addidit illis actionibus, quæ ad conservationem corporis vel propagationem generis humani necessariæ sunt, ut patet in voluptate, quam quis percipit in edendo, bibendo, &c. Theor. Viv. 914. sqq.

8. Cartes. Pass. §. 94. *Causa propter quam ut plurimum lætitia excitillatione sequitur, est, quod omnis sic dicta titillatio aut jucunda sensatio consistit in eo, quod objecta sensuum excitant aliquem motum in nervis, qui posset ipsis nocere, nisi satis virium haberent ad resistendum illi, aut nisi corpus bene dispositum esset; quod efficit in cerebro impressionem, quæ cum insculta sit à Natura ad testandam hanc bonam dispositionem & robur, eam animæ exhibet ut bonum quod ad ipsam pertinet, quatenus cum corpore juncta est, & ita in ea excitat lætitiæ.*

9. Pergit ibidem, quod in hac nostra consideratione 3 est. Eadem verò ratio est propter quam naturaliter volupe est sentire se commoveri ad omnes species passionum, imò ad tristitiam & odium, quando non aliunde orti sunt illi affectus, quàm à variis eventibus qui in theatris exhibentur aut ab aliis similibus subjectis, quæ cum nobis nullo modo nocere possint, videntur titillare nostram animam eam tangendo.

10. Cum igitur conjunctio animæ cum corpore sita sit in sensibus, appetitibus naturalibus & affectibus, quomodo in omnibus istis voluptatem ac delectationem amabilis supra omnia rerum Conditor poluerit, è dictis & citatis planum est.

11. 4. Ut multa & varia nos objecta afficerent ac varietatem illam in sensibus, appetitibus, affectibus perciperet animus, Deus providit, infinita genera saporum, colorum, sonorum, &c. producendo. Atqui animus noster varietate maximè capi solet. Unde & Musicæ loco citato Cartesius, *varietatem omnibus in rebus esse gratissimam*, inter prænotanda Musica refert. Certè ingrata monotonia est, & mel satietatem gignit. Huc etiam pertinent quæ cap. XXI. & sq. diximus de multitudine ac varietate actuum, in quibus animæ cum corpore nexus consistit.

12. Adde quod ad sensus multiplici varietate oblectandos plurimæ sunt artes inventæ, veluti Musica, Optica, Poëtica, Tinctoria, Coquinaria, &c. Multi ludi instituti, theatra exstructa, horri & viridaria parata, & quæ id genus alia ad animale vitam jucundiùs transigendam ab hominibus excogitata. Nec illud prætereundum, quod corporis nostri membra pluribus ac nobilioribus actionibus pas-

passionibusve exerceri apta, veluti oculos, linguam, dextram, magis etiam reliquis diligamus.

13. 5. Animus non potest odisse corpus suum, à quo varia discit & admonetur de multis, quorum $\pi \delta \pi$ aliàs ignorasset. Licet autem confusa sit admonitio, non ideo grata esse desinit, & animus ipse suis viribus distinctiorem eam cognitionem efficere valet. Causis quoque diligitur, quod furem latratu prodit, quamvis eum distinctè non designet.

14. 6. Ipsa confusio, quæ est in sensuum functionibus, corporis animique vinculum in Homine facit amabilius. Inde enim est, quod naturarum diversitas, operationum dissimilitudo vulgo non advertatur; sed ut pro uno & eodem habeantur, quæ magnopere distant. Primus & musteus amor eò vehementior est, quò magis confusam notitiam conjunctam habet.

15. 7. Quod si dominus servum promptum & alacrem diligit, quid-ni animus corpus sibi junctum amaret, dum jussa ejus promptissime exsequitur? De qua proprietate capp. XXVII. sq.

16. 8. Longa vitæ consuetudo, tot actuum adeo diuturnum commercium, quo intercedente anima fuit hospes comesque corporis, id efficit, ut majore quadam familiaritate corpus & anima inter sese devinciantur, cum præsertim alterum alteri proximum sit, neque re ulla media unquam disjungantur. Capp. XXV. sq.

17. E dictis intelligitur ratio & veritas illius effati Paulini: *nullus unquam suam ipsius carnem odio habuit, sed nutrit ac fovet illam*. Insuper ex eo, quod proximè dicebamus, cognoscitur, cur amor vitæ in ipsis quoque senibus naturaliter perseveret.

18. Denique leges omnes, quæ delictis hominum corporales pœnas irrogant, in iis, quæ de amabili corporis animique consortio in præsentem tradidimus, præcipuè fundantur. Quamvis enim animus propriè sit qui peccat, cum tamen is verberibus castigari vel gladio occidi non possit, punitur in re sibi proxima & charissima, cum qua amoris affectu totque aliis vinculis sic est junctus, ut unum totum componat. Corpus quidem, propterea quod instrumentum est animæ peccantis, justè punitur. Sed ea, quæ modò allata est, hujus justitiæ causa plenior & magis universalis esse videtur.

CAP. XLIII.

*Infantis an adulti, docti an indocti anima
sit arctius corpori alligata.*

1. Jam si quærat, infantis an adulti hominis anima sit magis corpori alligata, facile ex antecedentibus respondebatur.

2. Si confusam illam sensuum perceptionem, de qua proximè multa in medium attulimus, placeat attendere, profundius utique infantis animam corpori immersam dixeris. Vide Proleg. Log. cap. 2.

3. Sensibus enim eorumque voluptatibus magis addicti sunt infantes, modum affectibus & naturalibus suis appetitibus ponere nesciunt: unde esurientes aut sitientes omnis moræ impatientes deprehendimus. Alii sunt adultorum magis proprii appetitus, quos à naturalibus desideriis distinximus Theor. 983. sq. veluti honorum, scientiæ, &c.

4. Si quis tamen inveniatur infans præter solitum ingeniosus, qui puro intellectu in multis utatur, sensuum oblectamenta minoris faciens, id nobis argumento est, ejus animam minùs arctè corpori esse alligatam: unde & brevioris vitæ vulgo creditur.

5. Cumque obscuræ illæ & confusæ sensuum perceptiones maximè ad illos actus pertineant, quos cum aliis *per naturam connecti* diximus antea; natura verò altiores plerumque radices agat, quàm ut facilè evelli possit, inde etiam patescit, quàm sit arcta corporis animæque in infante colligatio. Confer Theor. 576.

6. At si respicias ea, quæ *per habitum & consuetudinem* jungi superius dicebamus, manifestum est, animam & corpus infantis non per tot ac tam varios actus, quasi per totidem diversa vincula colligati, quot quidem hominis adulti.

7. Quando enim pauca nòrunt, pauca didicerunt, vix fari incipiunt, qui possint linguarum & sonorum aliorumque objectorum varietate sic facultatem sentiendi exercere, uti facit adultus in iis dignoscendis longo usu exercitatus? Qui possint multos ac diversos membris corporeis motus imperare, quorum utilitatem, rationem & modum ignorant? Vide cap. XXXVII. 12. sq.

8. Quin imò si scirent corporum suorum organis plurimos motus imperare, hæc tamen ob mollitiem ac teneritudinem suam (Vide Theor. 81. sqq.) obtemperare non possent. Qui enim saltarent aut cance-

canerent, qui ob imperfectionem organorum incedere & loqui necdum didicere? Summum est quod possint conatum quendam ad agendum in nonnullis demonstrare.

9. Adeo ut affirmare liceat, rationem cum corpore quodammodo maturescere, nec ineptè Jureconsultos justam & integram Hominis ætatem hanc esse judicare, qua corpus crescere desinit, conquiescente illa humorum ac corporis perpetua agitatione ac perturbatione, cui adolescentes obnoxii. Neque leges tunc ampliùs tutoribus & curatoribus hominem subjiciunt.

10. Qualis autem infantis ad adultum, talis quodammodo feminae ad marem, indocti ad doctum hac in parte ratio ac relatio est.

11. Ac proinde huc pertinent illi, quos *naturâ servos* dixit Aristoteles, quod ingenio tardi ac stupidi, corpore autem robusti, in hunc finem à natura producti videantur, ut aliis, qui ingenio & ratione valent, famulentur.

12. Plures certè corporis animique actus conjungit, qui non modò sibi ac domesticis suis, verùm etiam publico prospicit, quàm ille, qui ne sibi quidem ipsi prospicere novit.

13. Ex dictis liquet, qua ratione Philosophia *separatio animæ à corpore vel mortis meditatio* Platoni appellata fuerit. Quantò enim profundius ac diutius philosophamur, tantò magis animum à corpore abstrahimus, sentire atque externis affici desuescimus, & gratæ contemplationi indulgentes pedum frigus sedentes, cibi saporem comedentes, assidentium gestus & voces oculis atque auribus instructi ac præsentibus quandoque non percipimus.

C A P. XLIV.

Ingenii dotes ac differentias ex conjunctione mentis cum corpore pendere.

1. **O**ccasione eorum quæ de doctis atque indoctis, stupidis & ingenio præditis modò diximus, de humano *Ingenio* nonnihil differendi locus hic esse videtur.

2. Nam Ingenii nomine non puram atque à corpore abstractam rationem humanam intelligimus; sed eandem quatenus à corporis dispositione quodammodo perficitur vel impeditur.

3. *Dotes ingenii* Cartesius initio Dissert. de Methodo tres recenset, cogitandi celeritatem, distinctè imaginandi facilitatem, memoriæ

capacitatem atque usum. Addit se nullas ab his diversas nosse, quibus ingenium præstantius reddatur. Rectam verò rationem seu *bonam mentem*, id est, vim incorruptè judicandi & verum à falso distinguendi, naturâ æqualem omnibus innatam existimando, ibidem ab ingenio discernit.

4. *Cogitandi celeritas*, contraria tarditati, proficiscitur ab agilitate & promptitudine spirituum. Cujusmodi spiritus quia vino producuntur (vide Theor. Viv. 476.) à vero non abludit vulgare dictum: *vinum acuit ingenium*, intellige modicè haustum. *Facundi calices, quæ non fecere disertum?* De hac ingenii perfectione capp. XXVII. sq. multa disseruimus.

5. Atqui ut nullum commodum est sine incommodo: ita mobilitas spirituum animalium in multis hominibus, inprimis adolescentibus, leves & vagas cogitationes gignit, adeo ut cursim & prope- rantes ea transmittant, quibus examinandis diutius immorandum esset. Quem defectum attingi Log. I. 20.

6. Ego quidem cogitandi celeritate rariuscule me gavisum esse memini, contrariâ verò tarditate in percipiendis iis, quæ tradebantur ab aliis, animum sæpius impeditum fuisse probè recordor. Audi- vi præconem verbi Dei in Gallia, tanta velocitate publicè dicen- tem, vix ut cogitando sequi potuerim. Linguae quidem satis gnarus tunc nondum eram, Sed inde didici tardius agere cum iis quos vel- lem erudire, ut attentiori meditationi discientium animos assuefa- cerem.

7. *Distinctè imaginandi facilitas* ad sensum internum spectat, (ut & memoriæ capacitas) & usu ut plurimum comparatur. Maximè verò juvat in Mathematicis, in Metaphysicis potius nocet. Qua de re verba Cartesii alibi protuli hunc in modum loquentis: *Quod aliqui in Mathesi ingenio valeant, qui tamen in Metaphysicis infeliciores sunt, non contingit ratiocinationis defectu; sed quod Mathesin non ratiocinando, at solummodo tractâ- rint imaginando. Cumque imaginatio in Metaphysicis locum non habeat, inde est quod adeo sunt infelices.* Vide eum volum. 2. epist. 33.

8. *Memoria capacitas* à dispositione cerebri potissimum dependet. *Vsus* ejus haut secus atque imaginandi *facilitas* ad exercitium, habitum & consuetudinem pertinet.

9. Duarum ejusmodi perfectionum exempla elucent in pictori- bus, qui absentes aut vita functos ac sepultos ad vivum delineant, ita ut ipsis phantasia & memoria penicillo imitandum dicent (quem-
admo-

admodum de Apelle aliisque eximiis artificibus constat) quod alii non possunt imitari nisi præsens expositum sit oculis. Vide Theor. Viv. 935. Sic alii nullo labore memoriter dicunt, quæ alii non nisi ex commentario recitare norunt. Ita reperiuntur qui non modò sonum vel rhythmum, sed etiam verba plurium psalmorum aut cantilenarum memoria tenent. At longè plures sunt quibus contingit illud quod Lycidæ apud Virgil. Eclog. 9. *Numeros memini, si verba tenerem.*

10. Ad hæc ingenii dotes, & præcipuè quidem cogitandi celeritatem, spectat illud quod de Archia poëta Cicero narrat, se vidissè cum, *cum literam scripssisset nullam, magnum numerum optimorum versuum de his ipsis rebus, quæ tum agerentur, dicere ex tempore.* Quæ tamen plurimos versus impræmeditatè effundendi promptitudo alioquin parum laudatur à viris eruditis, ab Horatio quidem reprehenditur. Est enim malorum plerumque poëtarum nota. Repete §. 5.

11. *Ingeniorum diversitas* pendet à corporis humani, præsertim à cerebri & spirituum dispositione, quæ dispositio cum infinitis modis variet, fieri nequit ut ingeniorum discrimina cuncta enumeremus.

12. Præ cæteris hîc notanda est in aliis atque aliis hominibus alia atque alia indoles atque ad certum studii genus proclivitas. Unde ingenia Metaphysica, Mathematica, Poëtica, Musica, Mechanica, Militaria nuncupantur.

13. *Maximum verò & velut radicale* (uti judicat Illustris Franciscus de Verulamio Nov. Org. lib. I. aph. 55.) *discrimen ingeniorum, quoad Philosophiam & scientias, illud est; quod alia ingenia sim fortiora & aptiora ad notandas rerum differentias; alia, ad notandas rerum similitudines. Ingenia enim constantia & acuta figere contemplationes & morari; & herere in omni subtilitate differentiarum possunt. Ingenia autem sublimia & discursiva, etiam tenuissimas & catholicas rerum similitudines & agnoscunt & componunt. Virumque autem ingenium facile labitur in excessum, prensando aut gradus rerum aut umbras.*

14. Ex omnibus hoc capite traditis concludatur illud conjunctionis, de qua agimus, proprium secundum & vicissimum, quod Ingenium dotes ac differentia ex anima cum corpore conjunctione pendeant.

CAP. XLV.

Animam unam uni tantum corpori jungi.

1. **C**onjunctionis hujus proprium tertium & viceſimum eſt, quod *anima cujuſque hominis determinata ac reſtriſta eſt ad corpus illud unum, cui Deus illam adjunxit.*

2. Idque hac ratione: 1. ut pluribus corporibus ſimul per actiones & paſſiones mutuas, uti docuimus, immediate præſens eſſe nequeat. Id ita eſſe plenius cognosceretur ex iis, quæ infra de ſede mentis in cerebro diſſeremus. Vide interim Theor. 795. ſqq.

3. Nec 2. pro arbitrio ſe poſſit ad aliud atque aliud corpus per actus tranſeuntes, quemadmodum cap. XI expoſuimus, applicare, priore dereliſto. Nam & μεταμύωσις ſive animarum tranſmigrationem Theor. 633 reſutavimus, & eâ poſt mortem etiam admiſſâ, ſatis hoc loco nobis eſſe debet, quod hanc æquè ac præcedentem aſſertionem experientia in hac vita confirmat.

4. Neque 3 poſſit unum illud corpus individuum, cui juncta eſt, pro lubitu diu deferere, & poſtea ad ſimile conjugium & cõmmercium repetendum eodem reverti.

5. Si poſſet, homo moreretur ac reviviſceret quoties vellet. Annon autem hoc aliquo modo vel gradu contingat interdum, velut in ecſtaſi vel animi deliquio, alibi examinabitur.

6. His tribus de cauſis animi & corporis fœdus reſpectu noſtri eſt *naturale & neceſſarium*, non arbitrarium & libera animi electione inſtitutum: quemadmodum alia quoque ratione idem neceſſarium eſſe didicimus cap. XXIV. 6.

7. Et verò nullum illorum trium eſt, quin ſingularem valdeque arctam illius fœderis rationem luculenter demonſtret.

8. Simili namque pacto ſumma *amicitia* vix niſi inter duos invenitur; & qui jam hunc, jam illum ſibi amicum adſciſcit, eoſe oſtendit, cum nemine ſe firmam ſatis colere; denique amicitiz ſemel inchoatz modò diſſolutio, modò redintegratio, fragilitatis humanæ argumentum eſt.

9. Eodem modo ſe res habet in *matrimonio*, quod eſt unius viri & mulieris individua conjunctio, quæ polygamiã excludit, & multò perfectior judicatur, quando non niſi cum utriuſque conjugis vita

ter-

terminatur, quàm si post alterius mortem alter supervivens ad secunda vota transeat, ac denique per divortia prorsus evertitur.

10. Certè quemadmodum amantium nemo est, qui plures eodem tempore alterius sexus personas sibi jungi optet, quoties suum in illa conjunctione bonum confusè sibi repræsentatum quærit: ita animus humanus non nisi uni alterius naturæ rei, id est, uni corpori, cui per confusum percipiendi modum adest, copulari amet.

C A P. XLVI.

*Hinc iterum ostendi, mentis conjunctionem cum
objectis minùs arctam esse.*

1. **P**er illa tria, quæ diximus, mentis & corporis humani conjunctionis iterum discriminatur à conjunctione mentis cum objectis intellectis & amatis, sic, ut illa multò arctior hac esse cognoscatur.

2. Mens enim 1. circa duo objecta cogitando simul & semel versari potest, veluti cum ejusdem enunciationis subiectum & attributum pariter apprehendit. Vide cap. XXIX.

3. Mens 2. potest ab uno objecto ad aliud pro lubitu attentionem suam convertere: quæ cogitandi varietas ipsi familiaris & naturalis est, adeoque gratissima, ex cap. XXX. 8.

4. Mens 3. potest eidem ex. gr. corpori tanquam objecto, facto illo ac recto, modò applicari, modò rursus ab eo separari. Neque sanè eisdem perpetuò inhærere gaudet, uti diximus.

5. Itaque si quis mentem alicubi esse dicat ratione objectorum, de quibus cogitat, atque ipsius præsentiam inde quodammodo æstimare velit, quemadmodum ille apud Livium lib. 27 ait, *corpus duntaxat summi ad id tempus apud Carthaginienses fuisse, animum jam pridem ibi esse, ubi jus ac fas crederet coli.*

6. Poderit una eademque mens humana suo corpori intimè præsens, in duobus præterea aliis maximè disjunctis locis simul existere, veluti Parisiis ac Duisburgi. Et, si motus localis ideo ei tribuendus, poterit in momento à loco remotissimo ad remotissimum pervenire.

7. Qualia de mente humana, si præsentiam ejus ex actibus transcuntibus, quibus corpori nostro jungitur, metiamur, affirmari non possunt: adeo ut, si velimus locum omnino aliquem Animo assignare, prior illa consideratio Cap. XVII. (quod ibi sit animus ubi immediatè mutationem efficit aut recipit) multò sit certior ac solidior.

Quan-

Quamquam optimum sit & naturæ mentis convenientissimum, quicquid etiam præjudicia & verba obstrepant, nullum ejus locum nec localem motum considerare: quippe quæ corporum sunt affectiones propriæ.

8. At contradicat quis præcedentibus tali utens argumento: Mens semper cogitat, & cogitat de aliquo, hoc aliquid ejus objectum vocatur. Nunquam igitur potest ab objecto separari, quippe quod ad actum ejus immanentem requiritur, licet possit separari à corpore, cui juncta est per actum transeuntem, ac revera separatur, dum homo moritur. Proinde mens humana cum objecto quàm cum corpore suo, ista quidem ratione, arctius necesse videatur.

9. *Resp.* 1. Equidem tam necessarium est, mentem semper habere objectum aliquod, quàm necessarium est, eam semper cogitare. Atqui 2. non est necessum ut objectum hoc aliud sit ac ipsa mens, quæ suimet ipsius contemplatione vivere atque subsistere, absque ullo externo objecto apprehenso, valet. Ac 3. nos minimè affirmamus, mentem arctius corpori necesse, quàm sibi ipsa jungatur. Negamus tantum, aliis eam objectis, præsertim creatis & corporeis tam propinquo nexu copulatam esse, quàm corpori suo copulatur.

10. Aliquod semper objectum animus exigit, at non idem semper: potius identitatem hanc naturâ suâ averfatur & odit, varietate contrâ delectatur. Non similis datur corporis humani cum corpore commutatio, similis ad corpus accessus atque ab eodem discessus. Et hac ipsa in re comparatio instituta fuit superiùs.

C A P. XLVII.

Idem de conjunctione nautæ cum navi, angelî cum corpore assumpto intelligendum. Animam corporis formam nec assistentem, nec informantem esse.

1. **E**X eadem comparatione refelluntur qui putant ea ratione mentem adesse corpori, quo nauta navigio adest, quam *formam assistentem* appellant. Nauta enim à nave abire, iterumque vel ad eandem vel ad aliam pro arbitrio accedere potest & solet.

2. Anima, si quidem à Deo creatur & corpori infunditur, secundum ea, quæ cap. XXXV, 2, habuimus, non est prior corpore suo, multò minùs illud sibi fabricat. vide Theor. 646. At nauta prius existens navem sibi ædificare potest.

3. An -

3. Angelus assumit ac regit corpus, haut secus, ut arbitror, ac nauta navigium, fortassis plura etiam simul corpora assumere ac gubernare valet, certè uno relicto aliud occupare potest.

4. Multos eodem tempore in eodem corpore angelos esse contingit: at mentes humanæ plures in uno corpore nunquam reperiuntur. De malis angelis illud historia testatur Evangelica.

5. Etiam nolenti animæ corpus junctum manet, adeo ut anima magis corpori, quàm corpus animæ in Homine connexum videatur. Sic utique angelus, saltem bonus, non conjungitur corpori quod gubernat, quoniam refragante voluntate nunquam ei adhæret.

6. Si omnia essent paria in mentis nostræ cum nostro corpore, & angeli cum corpore assumpto, in quod agit, conjunctione, (hæc enim nobis, qui angeli non sumus, minùs perspecta est,) differret tamen ab angelo mens humana veluti Rex à Dictatore apud Romanos: quoniam humana mens uni eidemque corpori perpetuò cohæret, uti rex quàm diu vivit eidem regno præest; atqui angelus ad tempus solum alicui corpori gubernator adest, uti summum imperium dictator Romanus jure temporario tantùm habebat.

7. Quamvis autem animam humanam non sic absolvamus à corpore, ut formam ejus assistentem dicamus, quasi non magis corpus ad animam, quàm navis ad nautam, spectaret; non tamen è contrario sic eam corpori alligamus, ut *formam ejus informantem* esse putemus, cujusmodi aliorum corporum formæ vulgo judicantur.

8. Id enim affirmantes corpori nimis immergere & pro ejus tantùm appendice & modo habere Mentem videremur, quæ tamen res est per se existens & in nobilissimis operationibus suis à corpore haudquaquam dependens.

9. Si anima rationalis corporis humani *forma* est, quia motus varios imperando variis illud modis format ac disponit, intuitu situs & positionis partium; (nam alia denominationis illius, quæ quidem verum dicat, ratio afferri nequit;) cur non simili jure corpus dicatur forma animæ, quoniam varias in ea perceptiones producendo eam format ac disponit mille modis? Confer Theor. Viv. 656. sq.

10. Omissis igitur ejusmodi considerationibus affirmemus, revera Hominis formam esse illam, de qua nunc agimus, conjunctionem, ipsissimum illud motuum cogitationumque commercium. Quæ forma cùm recipiat magis & minus, confirmantur hinc quæ cap. XXXVII sunt tradita.

11. Abusus vocabulorum est, unam substantiam alterius formam dicere. Amicus alter alterius forma non est, sed amicitia propriam suam formam habet, quæ definitione ejus exprimitur.

12. Si de forma humani corporis interrogas, eam in totius & partium debita quantitate, figura, situ, motu & quiete consistere, vel ipsa generalis Physica haut procul ab initio te docebit.

13. Quemadmodum forma seu essentia mentis humanæ posita est in eorum, quæ ipsi à Deo tributa sunt, complexione. Vide Phys. 108.

C A P. XLVIII.

Animam esse junctam toti corpori.

1. **P**ostquam ita mentis & corporis intimam conjunctionem inspicimus, ulteriùs investigandum restat, sit-ne anima toti corpori omnibusque & singulis ejus partibus æquè juncta, an verò uni parti magis, propiùs, arctiùs, quàm partibus aliis connectatur. Id enim cap. XXVI. 7. huc rejecit.

2. Qui *animam totam in toto corpore & in singulis partibus totam esse* perhibent, si extensam vel coëxtensam corpori *positivè* intelligant, (quod verbo quidem plerique inficiantur) nihil veri loquuntur; sed illud pronunciant quod cum animi natura omnino pugnat.

3. Sin verba sua *negativè* duntaxat accipi velint, nempe quod anima sit in corpore modo quodam indivisibili, hoc est, non per partes, tum falsi quidem nihil dicunt, sed nihil etiam explicant, & vocabulo *totius* abutuntur. Totum enim est quod partes habet.

4. Nos ad propositam quæstionem sic respondemus: 1. animam esse revera connexam toti corpori omnibusque ejus partibus conjunctim.

5. Quoniam id unum ac peculiari quodam sensu individuum est, siquidem certo numero constat organorum cap. XXI. 17. sqq. Theor. 690. sqq. quæ omnia ita ad se mutuò referuntur, ut vel unorum sublato mutiletur totum.

6. Nec anima nisi ad totam istam organorum compagem relationem habet, cum extensione ac dimensionibus carentis pars nulla sit, quæ ad aliquod corporis membrum referatur, quasi illius quantitatem adæquet, aut cum ipso crescente vel resecto augeri vel minui possit.

7. *Refp.*

7. *Resp.* 2. Animam esse nexam toti corpori atque ita omnibus ejus partibus conjunctim, (Quid enim est *Totum* aliud, quàm omnes partes conjunctim sumtæ?) hoc sensu, quod & mens à toto corpore pati, & vicissim in totum corpus agere possit, illud movendo.

8. Nimirum seu corpus mole magnum seu parvum fuerit, æquè promptè jussà mentis exsequitur, dummodo sanum atque integrum sit.

9. Qua quidem ratione affirmare licet, majorem & perfectiorem inter corpus & animam nostram, quàm inter duo corpora, conjunctionem reperiri.

10. Corpora namque extremis tantùm partibus conjunguntur, ex cap. V I. at mens corpori juncta est toti, eo sensu, quo illud modò explicuimus.

11. Atque hoc inter propria & præclara conjunctionis hujus nobis est quartum & vicissimum, divinæ quoddam vestigium perfectionis, qua ipse non partem duntaxat mundi, sed totum movet. Ita regulus in Microcosmo animus noster Macrocosmi regem, magnum Deum, quodammodo refert.

12. Quibus tamen imperfectionibus hæc animi nostri perfectio rursus limitetur, id alibi diximus, ac ne proximis quidem verbis dissimulavimus. Vide cap. XVI. 3. sqq. Theor. 727. sqq.

C A P. XLIX.

Solitam enim cerebro junctam esse immediatè.

1. **A** Tqui Deus non in omnibus mundi partibus præsentiam & majestatem suam æquè manifestat. Et cælum quidem non Christiana solùm fides, sed omnium ferè gentium opinio pro peculiari quadam Dei sede habet.

2. Similiter in corpore nostro pars suprema, cerebrum intelligo, sola est, in qua peculiarem sedem suam animus noster obtinet. Quod inter conjunctionis hujus propria quintum & vicissimum est, qua præcedens proprium certo modo restringitur.

3. Quando verò de *sede mentis* loquendi more aliis usitato verba facimus, nemo locum ei vel situm aliquem in corpore adscribi opinetur. Hæ namque sunt affectiones solòrum corporum, quatenus ad se invicem referuntur. *Phyl. Contr.* 70.

4. Hoc tantùm volumus, quod pars quædam detur cerebri, quàm glandulam pinealem Anatomici vocant, in qua mens humana proximè

ximè atque immediatè functiones suas exercent, agendo & patièdo, id est, motus corporis alios volèdo & imperando, alios percipièdo ac sentièdo. Hunc enim, nec alium, verba illa de Sede animæ sensum admittunt, quemadmodum tam fusè hæcenus tractata evincunt.

5. Quibus autem argumentis hæc probetur sententia, ex Theoria Viv. 796 repete. Hoc loco respondebimus Viro docto, qui per epistolam rogavit ut sequitur :

6. Quandoquidem divinæ naturæ mens nostra similis est, *quare minùs repugnet indivisibilitati divinæ immediata in toto Macrocosmo omnipræsentia, quàm indivisibilitati mentis nostræ repugnat immediata præsentia in toto Microcosmo ?*

7. Respondi, quæstioni huic falsam inseri vel præmuniri hypothèsin, quasi individua mentis humanæ natura vera sit causa, quare toti corpori immediatè præsens esse, id est, in omnibus & singulis ejus partibus functiones suas proximè exercere nequeat. Quo argumento nos in hac materia non utimur.

8. Nostra verò argumenta desumpta sunt à sensuum perceptione, quod talis ea non possit esse, qualis in nobis esse deprehenditur, nisi in solo cerebro mens residere statuatur. Cujusmodi ratio ad Deum applicari nequit, quoniam is à corpore pati atque ita more Hominis sentire non potest.

9. Argumenta, inquam, nostra, quamvis ad sensuum perceptionem omnia referantur, sic tamen distingui possunt ut petantur 1. à *morbis* variis, veluti delirio, vulneribus cerebri, vertigine, qui solum cerebrum afficientes, omnem sensum tollunt vel perturbant.

10. 2. A *somno*, qui in solo existens cerebro, quotidie nobis magna ex parte sentiendi facultatem adimit, quam vigilia succedens, quæ vitæ nostræ vicissitudo est, restituit.

11. 3. Ex eo, quod cerebro illæso, si tantùm viæ, per quas nervi à membris externis ad illud porriguntur, obstructæ sint, hoc ipso membrorum illorum sensus etiam perit.

12. 4. Ex eo, quòd dolor interdum sentitur, veluti in membro aliquo, in quo nulla tamen est doloris causa, sed in aliis, per quæ nervi transeunt, qui inde ad cerebrum protenduntur. Adi Paraphrasin meam Medit. VI. 212. sqq.

13. Quo quidem argumento quarto præcipua ratio, qua vulgo nobis persuademus, non in cerebro, sed in membris aliis perceptionem sensus fieri, perspicuè refellitur.

14. Illud enim propterea nobis persuademus, quòd voluptatem, dolorem, calorem, frigus, aliaque tanquam in membris nostris percipimus, cap. XXXVIII. 11. XXXIX. 8. sqq. Theor. 802. sqq.

C A P. L.

Reliquis membris animam non ita conjungi.

1. **Q**uandoquidem ergo soli cerebro, & quidem certæ ejus partiduntaxat, proximè atque immediatè mens nostra jungitur, consequens est, eam reliquis corporis nostri partibus tantùm mediatè & remotè conjungi:

2. Nempe spirituum animalium & nervorum beneficio, qui ex cerebro cursitant atque extenduntur in corporis partes reliquas. Theor. Viv. cap. XXI.

3. Quæ tamen inter illas corporis nostri partes nervorum sunt expertes, iis ne quidem hac ratione anima juncta erit.

4. Hæc autem non adversantur iis, quæ suprà de immediata mentis & corporis, & quidem totius, conjunctione docuimus.

5. Omnia namque illa simul consistere possunt hisce modis: 1. quod mens immediatè corpori nostro juncta dicitur, ita ut excludatur corpus aliud intermedium, à nostro corpore, cujus partes sunt spiritus & nervi, diversum:

6. Quemadmodum inter reliqua mundi corpora, quæ videmus, quæ tangimus aliove sensu percipimus, & animam nostram, non aliter quàm interveniente nostro corpore commercium intercedit.

7. 2. Quod illa quoque membra, quæ nervis tantùm intercedentibus animæ conjunguntur, eodem temporis momento, quo partes cerebri, pati ab anima vel agere in eam possunt, sicuti extrema funiculi parte tracta vel baculi altera parte impulsæ, eopse momento trahitur atque impellitur altera.

8. 3. Quoniam partium nostri corporis tanta est cohærentia, tantus consensus, ut alicujus momenti functio plurium partium, & sæpe quidem præcipuarum omnium, concursus requirat, hac etiam ratione toti corpori mens juncta judicatur.

9. Ex. gr. simul ac anima nostra vult crura nostra moveri, totum corpus transfertur. Et sæpe aliquis Musicus ita canit, ut toto corpore tremat: etiamsi sonus aliàs propriè solius tremor sit aëris.

10. Quamvis igitur mens nostra in cerebro residens similis regi

lit, qui in certa regni sui parte peculiarem arcem inhabitans per inter-nuncios cunctis subiectis mandata distribuit & quæ ab iis vel inter eos geruntur cognoscit;

11. In multis tamen dissimilitudo est, & præcipuè quidem duabus in rebus huc spectantibus: 1. quod in remotissimis regni partibus non exsequantur idipsum homines eopse momento, quo rex illud velle cœpit: quoniam ista regis voluntas tam citò subiectis remotioribus innotescere nequit, neque in ipsis tanta ad agendum promptitudo invenitur.

12. Verùm ad nutum voluntatis humanæ corporis organici, ex. gr. manuum & pedum nostrorum, partes quoque extremæ, nulla prorsus mora interposita, commoventur.

13. 2. Quod rex quæ in extremis regni sui oris contingunt eopse quo fiunt momento non animadvertit, uti mens nostra extremorum digitorum affectiones percipit.

14. Nimirum, qui inter regem & regni membra remotiora intercedunt homines, servi vel nuncii, neque cum rege neque cum aliis regni membris tam propè cohærent, quàm corporis nostri partes inter sese: certè continuitatem, qualem nervi nostri, celeritatem, quantam spiritus animales, non habent.

C A P. LI.

*Actus animi simplices interdum repugnare actibus
Hominis compositis, in quibus conjunctio
corporis & animi consistit.*

1. **V**ix ulla tam concors in rebus creatis conjunctio invenitur, quin aliquo interdum dissidio turbetur. Exempla cernere est in amicitiis, in conjugio, in scøderibus. Fratrum quoque gratiam raram esse rectè Poëta dixit.

2. Mirum igitur esset, si nullius unquam pugnæ vel dissensionis inter corpus & animam, quæ in Homine conjuncta sunt, vestigium appareret: quippe cùm humana imperfectio multis quotidie partibus in hac mortalitate se conspicandam præbeat.

3. Quod si autem diligenter nosmetipsos examinemus, multiplicem in nobis pugnam aut certè dissensionem non diu ignorabimus. Nam ut omittam dissidia quæ in solo reperiuntur animo, ut nihil dicam de lucta carnis & spiritus, quæ considerationis est Theologica,

logicæ, multa sunt & varia ad animæ & corporis unionem spectantia, in quibus dissensio & pugna animadvertitur.

4. Et primò quidem *actus animi simplices*, id est perceptio intellectus, judicium aut voluntas, sæpe repugnant actibus *Hominis compositis*, in quibus corporis animique nexus consistit, cujusmodi sunt omnes sensus, appetitus, affectus & motus membrorum cum voluntatis imperio copulati.

5. Talis dissensus est quoties imbecillitate quadam ingenii aliud homines exprimunt verbis, aliud animo apprehendunt, dissonum illud non advertentes. Exemplum exstat apud Philosophum nostrum Principp. II. 9. *Et quamvis forte nonnulli aliud dicant, non puto tamen ipsos aliud ea de re percipere, sed cum substantiam ab extensione aut quantitate distinguunt, vel nihil per nomen substantia intelligunt, vel confusam tantam substantia incorporea ideam habent, quam falsò tribuunt corporea, hujusque substantia corporea veram ideam extensioni relinquunt, quam tamen accidens vocant: atque ita planè aliud efferunt verbis, quam mente comprehendant.* Hic est voluntas, pæxa motui linguæ loquentis, non respondens intellectui.

6. Aliud exemplum petere licet ex Medit. tertia, ubi Philosophus ita loquitur: *duas Solis ideæ apud me invenio, unam tanquam à sensibus habitam, & quæ maximè inter illas, quas adventitias existimo, est recensenda, per quam mihi valde parvus apparet; aliam verdè ex rationibus Astronomia desumptam, hoc est, ex notionibus quibusdam mihi innatis elicitam, vel quocunque alio modo à me factam, per quam aliquoties major quàm terra exhibetur; utraque profectò similis eidem Soli extra me existenti esse non potest, & ratio persuadet illam ei maximè esse dissimilem, quæ quàm proximè ab ipso videtur emanasse.* Hic perceptio intellectus puri repugnat perceptioni cum organi corporei motu connexæ, id est, sensui. Ita in eodem homine ejusdem rei gemina potest esse perceptio; altera confusa & obscura, altera distincta & clara; altera quæ communis hominum vulgo, altera quæ paucorum propria, cap. XL. 6.

7. Cum linguâ quid enuncias ut verum, quod mente judicas esse falsum, simplex animi actus, qui est judicium, adversatur actui *Hominis* è voluntatis imperio & corporis motione composito. Quæ vitiosa plerumque discordia est, quoties nimirum à fallendi voluntate proficiscitur. Verum profitendo, vel etiam falsum dicendo quod dicens putat esse verum, conservatur harmonia, quæ hominem ex corpore & anima compositum decet, mentiendo turbatur atque evertitur.

C A P.

CAP. LII.

*Voluntatem sensibus, affectibus, motibus corporis
sæpe esse contrariam.*

1. **A**liud actuum in homine non consentientium exemplum est, cum quid alicui non advertenti excidit animi proposito contrarium, de quo cap. XXIV. 18. Item, cum organi alicujus motus voluntatis imperio tardiùs paret, de quo cap. XXVIII. 14. aut parere nequit, ut in arthriticis. Vide & Theor. Viv. §. 486. sq. Hic potiùs animi & corporis, quantum ad actus utriusque simplices, quàm simplicium & compositorum actuum dissensio cernitur.

2. Frequentissimum est, ut voluntas aut voluntatis aliqua commotio repugnet affectui animali, appetitui sensitivo aut sensui externo vel interno.

3. Ita Cartesius initio Compend. Mus. Est, inquit, *Musica finis ut delectet, variosque in nobis moveat affectus. Fieri autem possunt cantilena simul tristes ac delectabiles. Nec mirum tam diversa. Ita enim elegiographi & tragædi ed magis placent, quò majorem in nobis luctum excitant.*

4. Rem plenius explicat Passion. §. 147. qui totus legi dignus, ego prolixitatis evitandæ causâ postrema tantum inde excerpo: Cum legimus tragicos aut inusitados casus, vel cum eos representari videmus in theatro, id ipsum in nobis quandoque excitat tristitiam, quandoque letitiam aut amorem aut odium, & in genere omnes affectus, prout diversa objecta se nostra imaginationi offerunt. Sed insuper clanculum gaudemus quod eos in nobis excitari sentiamus. Estque hac ipsa voluptas latitia intellectualis, qua æque facile ex tristitia oriri potest atque ex cæteris omnibus affectibus. Vide suprâ cap. XXXVIII. 4. 7.

5. In patriarcha Abrahamo filium Isaacum, in judice Jephtha filiam suam Deo offerentibus, constantem animi voluntatem contrariam fuisse affectui paterno eundemque vicisse, credere licet.

6. De generosis quidem viris ita Cartesius Passion. art. 187. *Generosiores & qui sunt animo fortiori, ita ut nihil mali sibi metuant & se supra fortune imperium statuunt, non carent commiseratione, cum vident infirmitatem aliorum hominum & eorum querelas audiunt. Pars enim est generositatis bene velle unicuique. Verùm hujus commiserationis tristitia amara non est, sed instat ejus quam produciunt casus tragici, qui in theatro representari videntur, magis est in exteriori & in sensu, quàm in ipsa anima, qua interim fruistur sa-*

tis.

in satisfactione cogitandi se de fungi suo officio dum afflictorum casu afficitur.

7. Martyres naturaliter abhorrent à morte , & tamen sponte eam subeunt, quò refer exemplum S. Petri, de quo Christus Joh. XXI.

18. *cum senueris, extendes manus tuas, & alius te cinget, & ducet quò tu non vis.* In his aliisque id genus exemplis appetitus rationalis, id est voluntas, contrarius est appetitui sensitivo, qui ex animi & corporis actibus est mixtus. Vide Theor. Viv. cap. XLI. ubi & alia exempla huc spectantia leges §. 980. sqq.

8. Ita refragante naturali carnem suam fovendi desiderio (vide cap. XLII. 17.) lubenter, quoad interiorem animi voluntatem, quis patitur sibi abscindi brachium, ne totum corpus gangræna invadat. Cujusmodi actus voluntarius potius quàm invitus dicitur ei, qui voluntati recto & constante animi judicio nixæ primas in Homine partes atque in reliquos actus dominium competere noverit. Ex quibus omnibus ea, quæ Philosophi morales de principiis actionum humanarum, spontaneo atque invito, & speciatim de mixtis actionibus differunt, haut parum illustrantur.

9. Rem totam ex instituto tractavit Cartesius *Passion. §. 47.* unde quædam necessariò sunt excerptenda. *Nec in alio, inquit, quàm in repugnantia, quæ est inter motus quos corpus per suos spiritus, & anima per suam voluntatem, simul excitare annititur in glande, consistunt omnes conflictus, quos vulgo imaginantur inter partem inferiorem anima, quæ sensitiva nominatur, & superiorem, quæ rationalis est, aut inter appetitus naturales & voluntatem, &c.* Sic lucèta observatur inter conatum, per quem spiritus impellunt glandem, quæ est in medio cerebri, ad inducendum anima cupiditatem cujusdam rei, & illum per quem anima eam repellit, voluntate qua vult eandem rem fugere, &c. *Potest adhuc quidam conflictus concipi in eo, quod sæpe eadem causa, quæ excitat in anima aliquam passionem, excitet etiam quosdam motus in corpore, ad quos anima nihil confert, & quos sistit aut sistere conatur quam primum eos observat. Ut experientià constat, cum id quod excitat metum, efficit quoque ut spiritus ingrediantur musculos, qui inserviunt movendis cruribus ad fugiendum, & ut voluntas audacia exercenda eos sistat.*

10. Denique sæpe voluntas adversatur iis, quæ sunt aut fiunt in sensibus externis vel internis: Ex. gr. cum quid animo recusante phantasiæ obversatur: cum quid nolens audis vel cernis, unde Cartesius *Med. sexta, sæpe etiam, inquit, me invito idea ista producuntur:* quo argumento ibidem, ut & Princip. II initio materialium rerum existentia demonstratur.

11. Ita voluntati adversatur memoria, quando meministi eorum quæ non vis, oblivisci non potes quæ vis, quod Arheniensis ille Themistocles de se affirmabat. Hinc pendet altera errorum nostrorum causa, quam tractat Philosophus Princ. I. 72.

C A P. LIII.

Oppositionis illius distincta magis explicatio.

1. **E**X iis, quæ proximis duobus capitibus dicta sunt, Conjunctionis hujus, quæ est inter animam & corpus, proprium & admirandum sextum & vicesimum cognoscitur. Quamvis enim duæ istæ substantiæ tam arctè copulatæ sint, ut arctius non possint, (id quod è superioribus facile ostenditur,) non raro tamen actus exercent sibi invicem repugnantes, saltem exercere possunt. Et sæpe actus animi simplex, Hominis actui composito adversatur, aut certè adversari potest, non obstante conjunctionis necessitudine.

2. Quemadmodum verò rerum quarumlibet *oppositio* alia est *formalis* tantum, quæ in diversitate naturæ insigni consistit, cujusmodi est inter curvum & rectum; alia insuper *effectiva*, quæ virium & operationum pugnam naturæ diversitati addit, cujusmodi est inter frigidum & calidum: ita quæ in Homine contraria sunt sub utroque genere continentur.

3. Nam inter alia conflictus & lucta deprehenditur manifesta, quorum exemplum habuimus cap. LII. 9. inter alia non item, quorum exempla capp. LI. 6. LII. 11.

4. Conflictus illius, qui ad hunc locum præcipuè spectat, fundamentum esse diximus, quod & corpus per suos spiritus, & anima per suam voluntatem, motum excitare possit in cerebri glandula, cui soli proximè conjuncta est.

5. Observandum quippe est, eundem effectum à diversis causis posse proficisci, vide Theor. Viv. 194. & alibi. Sic ab igne, si uratur, pedem removet canis solo corporeo motus localis principio: at homo idem facit voluntatis interveniente jussu: quamvis interdum quoque per solum impetum corporeum faciat, quæ aliàs per rationem. Vide Theor. 490. Quæ homo facit cum ratione & jure, eadem sæpe bestias, impetu naturali facere, etiam Jureconsulti nos docent. Duo cum faciunt idem, non semper idem est.

6. Hoc

6. Hoc autem in præfenti negotio maximè admirandum est, quòd, cùm in fœderibus, conjugio, amicitia & conjunctionibus id genus aliis, quantò majus inter partes conjunctas diffidium viget, quantò est acrior pugna, tantò citiùs omnis earum dissolvatur conjunctio, *conjugium tamen anima & corporis in Homine ne per ardentissimam quidem pugnam unquam evellatur.* Quod inter propria connubii hujus mirifici vigesimum septimum numerari potest.

C A P. LIV.

Actus etiam Hominis compositos alios aliis interdum adversari.

1. **P**roprium conjunctionis ejusdem vigesimum octavum est, quod etiam *actus illi mixti, qui partim corporis, partim sunt animi, sibi quandoque in Homine adversantur.* Atque illud quoque permirum est, eorum quæ constituunt & componunt Hominem, alterum alteri repugnare; Hominem esse & manere, qui modò hac modò contrariâ formâ informatur, imò qui eodem tempore totales formas contrarias in se persentiscit.

2. Dissensus enim illi mixtarum corporis animique functionum vel diversis temporibus vel eodem prorsus tempore in Homine composito sentiuntur.

3. Quando corporis & animi actus alios Homo jungit nunc, alios antea conjunxerat, de quo cap. XXXIV egimus, veluti si in præfenti averfetur cibus, quem olim cupidè appetiit, licet intervallum temporis accedat, meritò tamen judicatur esse oppositio: quemadmodum sibi contradicere perhibetur, qui idem aliàs ait, aliàs negat.

4. Unde colligere est, si alii prorsus actus jungantur in meliore vita, quam in hac mortalitate juncti fuere, non ideo alium fore hominem: quoniam hæc hominis forma magnam habet latitudinem. Ita tamen *alios* actus intellige, ut animi & corporis naturæ non repugnent.

5. At nobis hîc maximè spectanda est discordia, quæ in idem aut prope idem tempus incidit. Ita verò sensuum externorum alius alii nonnunquam adversatur: ex. gr. cùm visus baculum vel remum in aqua fractum ac divisum judicat, quem tactus integrum atque indivisum deprehendit. Sic patriarcha Isaac Genes. 27. eundem filium suum ex tactu Esavum, & voce Jacobum esse judicabat.

6. Sæpe affectus unus alteri reluctatur, veluti cùm metus homini mortem repræsentat ut summum malum, & quod evitari non possit nisi fugâ; ambitio verò contra repræsentat infamiam illius fugâ, ceu malum ipsa morte pejus. Ita nonnunquam, ut rectè S. Augustinus, *apertissima vitia vitis aliis vincuntur occultis*. Si, ut Poëta ait, *timor primus in orbe Deos fecit*, affectus hic pravis hominum cupiditatibus se opposuit.

7. Haut rarò voluntas actioni nexa corporeæ repugnat affectui, veluti cùm quis vultus aut oculorum actionibus utitur vel abutitur ad significandos affectus contrarios iis, quibus revera tunc animus agitur. Ita enim fit quoties homo volens occultare suum affectum fortiter sibi imaginatur contrarium. *Passion. 113. Quò spectat illud Ciceronis: Frons, oculi, vultus persæpe mentiumtur, oratio verò sapissime*. Illud item Virgilii de Ænea Lib. 1 *Æneid.*

Talia voce refert, curisque ingentibus ager

Spem vultu simulat, premit alium corde dolore.

8. Ejusmodi affectuum occultatio etiam cadit in homines virtute præditos. Ita Josephus in Ægypto iratum & austerum se fratribus ostendebat, quos intimo amore complectebatur. *Genes. 42.*

C A P. LV.

*In corporis animique conflictu victoriam
sapius esse penes corpus.*

1. **C**onflictus in homine ex eo pendere, quod motum alium corpus per suos spiritus, alium animus per suam voluntatem excitare conetur in ea cerebri parte, quæ sedes animi præcipua est, ex ante dictis constat.

2. Eventum talis pugnæ si ratione solâ æstimare velis, facile affirmabis, animum, utpote longè potiolem hominis partem & actum fortiolem, victoriam reportare. Virtus quippe mentis omni vi corporeâ major est. Mentem vincere, quoties in humano composito dissidium est, decorum & conveniens esse exemplo matrimonii patet, ubi nisi maritus dominetur, ordo domesticus violatur. Idem liquet exemplo benevolentiae seu amoris illius, quo voluntas se jungit objecto amabili, quod minoris æstimat semetipsa amante, de quo vide *Cartes. Passion. §. 83.*

3. Atqui *experientia* nos docet contrarium. Sæpius enim sensus
nostros,

nostros, affectus & appetitus animales rationi & voluntati dominari animadvertimus. Quod quidem duobus modis contingit: 1. si corpus animusque jam nunc conflixerint: 2. si etiam ante ullam pugnam institutam animus victas quasi manus porrigat, quod semel jam subjugatus sit.

4. Quamobrem exempla illorum hominum, qui affectus & appetitus suos debellarunt, ut rara & extraordinaria, recensentur in historiis; eorum verò, qui appetitui potius & sensibus, quam rationi obtemperarunt, nulla peculiaris sit mentio, quod obvia quotidie sint omnibus.

5. Ex. gr. Josephi servientis in Ægypto, Scipionis & Alexandri, Davidis. quoque temperantia ex 2 Sam. 23 laudatur. Admiramur belli duces, qui graviter vulnerati suorum prius salutem prospectum voluere, quam sibi ipsis. Mirandum patientiæ exemplum Anaxarchus præbuit, dum quæstioni & tormentis subjectus linguam indicii sperdentibus præcidit atque in os tyranni exspuit. Hæc omnia rara sunt admodum. Exempla contraria frequentissima.

6. Quando igitur omnia in mutuo corporis animique humani fœdere ita se habent, ut sana ratio jubet, ut pulcherrimæ conjunctionis venustas exigit; quamobrem in ista, quam diximus, animi corporisque pugna contrarium eveniat, (nempe ut superius illud evadat, quod perpetuò subjici deberet,) Philosophus fortè diu ambigat, nisi juvetur atque erudiatur à Theologo.

7. Adde hoc miseræ in anima nostra imbecillitatis exemplum, quod voluntas directè neque concitare neque eximere possit animæ passiones; sed indirectè tantum per excitationem affectuum contrariorum. Nam sicuti bestiam bestiâ capimus, leporem cane, murem cato: ita affectum alio affectu debellamus.

8. Necessum igitur est, ut anima sibi repræsentet res tales, quales jungi solent passionibus, quas voluntas optat, & quæ adversantur passionibus, quas vult repellere. Sic ad concitandam in se audaciam, & metum eximendum, non sufficit illud velle, sed incumbendum præterea est considerationi rationum, objectorum aut exemplorum, quæ persuadent periculum non esse tantum, majorem utique in defensione quam in fuga securitatem esse. Et hac quidem in re fundamentum artis oratoris in affectibus concitandis videtur consistere.

CAP. LVI.

Quæ causa sit illius in corporis animique conjunctione anomalia.

1. **Q**ui nodus cap. præced. §. 6. ut solvatur, cogitandum est, si animus possit pati à corpore, non tantopere mirandum, si possit etiam superari. At pati cum posse cap. XIII docuimus. Illustris quidem de Verulam. lib. 3. de augm. scient. cap. I. sic de hoc argumento scribit: *Si quis iudicio infirmior existimet, istas corporis in animam impressiones, aut immortalitatem anima in dubium revocare, aut imperio anima in corpus derogare; levi dubitationi leve responsum suffecerit. Exempla petat vel ab infante in utero matris, qui cum matris affectibus compatitur, & tamen è corpore matris suo tempore excluditur, vel à monarchis, qui licet petentes, à servorum impetu quandoque flectuntur, salvâ interim majestate suâ regiâ.* Hæc ille,

2. Sed repetatur è superioribus, quod is, qui per longam consuetudinem certæ rei se junxit, admodum difficulter inde se abstrahi & alteri rei dissimili conjungi patiatur. Quæ causa est, cur vidua prioris mariti moribus diutius assueta, alterius viri, cujus dissimiles mores, minus apta conjux esse putetur.

3. Ita noster animus semel addictus atque assuetus corpori, difficulter vel nunquam se jungit incorporeis, semel assuetus sensibus, difficulter audit sejunctam ab omni corporeo motu rationem. Posteaquam affectio corporea matrem primam in consortium traxit, in omnibus ex ipsa naturali generationis lege prognatis similis elucet indoles.

4. Si quæras, cum Eva se junxerit fructui arboris, quomodo inde sequatur conjunctio 1. in aliis *subjectis*, nempe liberis & posteris Evæ: 2. cum aliis *objectis* corporeis, quæ non sunt fructus arborum; Ad prius jam sæpius in superioribus est responsum. Posterius hoc simili innotescit, quod majoris ego (credo & alios) feci sexum sæmininum, ab illo tempore, quo semel mihi unam sexus illius conjunxi. Item, quod is, qui ducit uxorem, toti deinceps ejus familiæ & stirpi jungitur. Atque ut Eva se junxit toti generi corporum, quando uni se corpori sensu, affectu atque appetitu conjunxit: ita totum genus hominum junctum est objectis corporeis, quando prima cunctorum parens iisdem animum conjunxit.

5. Ad-

5. Adhæc specialis ratio datur in corpore, quare ratio & voluntas non possint illico sensus atque affectus pro lubitu superare. Nam affectus nostros perpetuò ferè comitatur aliqua commotio cordis & consequenter rotius sanguinis & spirituum, adeo ut pergat anima iisdem agitari affectibus tantisper dum ista commotio cessat: perinde & objecta sensilia menti præsentia manent, quamdiu in corporis nostri organa satis fortiter agere perseverant. Quæ quidem, ut alia multa, quæ hoc libro tractamus, pulchrè explicantur à Renato Des Cartes, in aureolo *Passionum Anima* libello.

6. Cum enim lex prima Naturæ sit, *unumquodque manere in suo statu*, &c. Phys. Contr. §. 150. Iqq. motus etiam ille, quem diximus in corde nostro, sanguine & spiritibus existere, aliquantisper perseverat, ubi semel cœpit. Hinc Athenodorus Augusto Imperatori hoc dabat consilium, ne iratus diceret aut faceret quicquam, priusquam omnes literas Alphabeti ordine recensuisset. Et Poëta, *ne frena*, inquit, *animo permitte calenti, da spatium tenuemque moram*. Inde regula Juris 48 ita sancit: *Quicquid calore iracundia vel fit vel dicitur, non prius ratum est, quam si perseverantiâ apparuit, iudicium animi fuisse*. Ideoque brevi reversa uxor, nec divertisse videtur.

7. Jam autem facile demonstratur è dictis, anomalix ejus, qua corpus animæ dominatur, culpam non Deo, sed Homini adscribendam esse. Nam 1. primi nostri parentes illius perversæ conjunctionis & sibi & posteris auctores fuere, similiterque nos ipsi præcedentibus actibus, quibus anima suapte sponte se corpori subjicit, sequentium jugum sponte nobis attrahimus. Repete cap. 32.

8. Et 2. ne quidem post lapsum Deus homini rationem & iudicium rectum de multis rebus omnino denegavit. Saltem novit homo, rationi potius quàm appetitui obtemperandum esse. Hoc esse hominis officium naturæ lumen docet. Contrarium vivendi modum ratio damnat, etiamsi homo eam sequatur.

9. Cumque 3. in genere hominum inveniantur, qui affectus quosdam suos ratione à cordis & sanguinis motu secreta vincunt, pater justam hanc & pulchram conscientiam teste victoriam, non ita simpliciter esse homini impossibilem, ut corporis & animi dator optimus præposterius alicujus ordinis in Homine stabiliti autor & fautor haberi debeat. Quamvis idem, ut justissimus iudex, peccato genus humanum subjicere potuerit. Quam peccati vim & justitiæ divinæ rigorem Theologia clarius exponit.

10. Adde

10. Adde 4. quod etiam vigente commotione cordis, uti monuimus, hanc benignus Creator voluntati nostræ dedit facultatem, ut possit non indulgere commotionis illius effectibus, & cohibere plurimos ex motibus, ad quos eadem ipsa commotio corpus nostrum disponit. Ex. gr. si ira faciat ut manus erigatur ad percutiendum, voluntas ut plurimum eam abstinere potest, (unde Plato ad famulum conversus, vapulares, inquit, si iratus non essem;) si metus incitet crura ad fugam capeffendam, voluntas plerumque illa sistere potest, atque ita in aliis.

11. Denique 5. cùm ea sit natura conjunctionis animæ cum corpore, ut actiones corporis eadem aliis atque aliis animi functionibus per certam industriam aliamve causam jungi possint & soleant, quemadmodum cap. 34. §. 6. sqq. explanavi, potest Homo mente à corpore abstracta summoque studio diutius adhibito, eò pervenire, ut corporis motus & alterationes propriis rationis armis vincat. Passion. §. 49. 50. Quæ fusiùs diducere & magis Theologicè vel etiam Ethicè declarare, alterius omnino loci est. Hic anomalix illius, qua affectus de ratione triumphant & corpus animæ dominatur, quadantenus attigisse, satis esto.

C A P. LVII.

Conjunctio anima & corporis quomodo dissolvatur.

1. **P**osteaquam de corporis animique conjunctione tam multa differuimus, vidimusque ex quibus actibus constet, quando incipiat, quomodo continuetur, quos gradus, quas differentias ac mutationes tum in uno homine tum in diversis admittat, qua ratione ad totum corpus, qua item ad partes ejus referatur, quibus imperfectionibus, pugnis atque dissidiis sit obnoxia; tandem quomodo dissolvatur inquirendum est.

2. Quando verò nihil tam naturale est, quàm unumquodque eorum genere solvi quo colligatum est, patet corporis animique conjunctionem solvi cùm utriusque partis actus sibi invicem respondere & concurrere desinunt: quoniam per mutuum certorum actuum concursum & responsum colligantur.

3. Et quemadmodum amicitia vel paulatim dissuitur, vel repente discinditur: ita etiam corporis animique conjunctio dirimitur, mu-
tuis

tuis actibus aut sensim ac gradatim deficientibus, aut subito omnibus & singulis simul ac semel concurrere desinentibus.

4. Ex. gr. paulatim corpus & anima separantur in multis ægrotantibus sensimque morientibus, naturali præsertim morte. Simul & semel ista separatio contingit in iis, qui morte repentinâ & violentâ extinguuntur. Tota conjunctio simul tollitur in eo qui uno ictu decollatur; gradatim eadem evertitur in eo qui sic occiditur ut mori sentiat: quod præceptum erat Caligulæ crebris & minutis ictibus in homines animadverti jubentis.

5. Porro sicuti vinculum matrimonii rumpitur ubi vel alter conjugum moritur, & societas vel unius renunciatione dissolvitur: ita ad corporis & animi consortium tollendum satis est, ut vel alterutrius partis actus more solito concurrere cessent.

6. Proinde causâ dissolutionis (loquor de dissolutione generatim, non speciatim de morte) est vel in anima, quò pertinet Ecstasis omnisque profunda meditatio; vel in corpore, quò inter alia pertinent animi deliquium & mors ipsa.

7. Quantum ad profundas meditationes attinet, repetantur quæ suprâ de Philosophiæ definitione Platonica & consimilibus rebus diximus capp. XL. 6. sqq. XLIII. 13.

8. Status autem ille mentis, in quo existit dum profundissimè contemplatur, à sensibus & imaginatione prorsus abstractâ, *Ecstasis* appellatur: cujus gradus quidam est omnis Metaphysic contemplatio attentior solito.

9. Quemadmodum & ipsa Ecstasis diutius perseverans in veram quandoque mortem terminatur.

10. Similiter à morte non multum distat *animi deliquium*, *λειπω θυμῳ*.

11. Morimur enim cùm ignis, qui in corde est, Theor. 451, planè exstinguitur.

12. Sed in Lipothymiam incidimus; cùm ignis ille ita suffocatur, ut aliquid residui caloris maneat, quo postea rursus accendi potest.

13. Utere hîc exemplo candelæ, quæ flatu oris interdum sic exstinguitur, ut eodem repetito accendi nequeat; aliquando verò ita extincta est, ut flatu mox repetito rursus accendatur.

14. Et videmus haut rarò lampades vel toras prorsus exstingui, vel resumtis viribus aliquid olei lambendo quasi reviviscere. Ac simile in multis cernitur morientibus.

15. Somnus quoque non malè *mortui imago* dicitur, quia sensus-
 lium functionum concursus, qui maximè vitam Hominis format,
 tunc majorem partem cessat. Et propter istam perbellam mortis cum
 somno comparationem S. Scripturæ familiarem, loca in quibus hu-
 mana cadavera sepeliuntur *κοιμητήρια*, quasi dicas *dormitoria*, nuncu-
 pantur.

16. At præter hanc quotidianam in sanis hominibus mortis ima-
 ginem plures extraordinariæ occurrunt in epilepsia, apoplexia atque
 id genus morbis laborantibus.

C A P. LVIII.

In quo Mors hominis consistat.

1. **V** Erùm de morte hominis investigandum est ulteriùs, in quo
 consistat. Vulgo quidem definitur, *separatio animæ à corpore*,
 quæ definitio uberiore explicatione indiget.

2. Primò enim non quævis quorumvis animi corporisque actuum
 aliàs concurrentium intermissio, atque eo respectu corporis & animæ
 separatio, pro vera morte simpliciter haberi debet.

3. Nisi velis affirmare, *Hominem viventem quotidie mori*, quoniam
 aliquorum actuum concursus quotidie interruptitur, ex cap. XXX.
 adeo ut enunciaturum illud secundùm quid admitti possit, eo ferè sen-
 su, quo Metaphysici Hominem ex ente & non ente compositum esse
 aiunt.

4. Deinde si contingat ut pariter omnes & singulæ corporis ani-
 mique functiones, quæ Hominem faciunt, ad tempus concurrere
 desinant, ne tum quidem verè ac simpliciter Hominem esse mor-
 tuum dixerò; dummodo corpus interim sic maneat dispositum, ut
 animæ agentis & patienti porro inservire queat, non planè ineptum
 ad eum præstandum usum reddatur.

5. Cùm enim nec vita humana nec ulla res physica prorsus in in-
 dividuo consistat (qua de re actum cap. XXXVII. & alibi) non mi-
 nùs vel magis etiam corporis animique conjunctioni videatur appli-
 cari posse quod Aristoteles de virtute pronunciavit: *Non reprehendi-
 eum, quasi à virtute divortium fecisset, qui paululum deflectit à perfectio-
 ne, sed qui longè.*

6. Atque ut Jureconsulti *Uxorem* fortè calore iracundiæ à marito
 digres-

digressam quidem, sed *brevi* tamen *reversam*, ne *divertisse* quidem censent, ne quis tam citò, tam leviter forte conjugii vinculum dirumpi arbitretur, quippe quod ex primo contrahentium voto & proposito, uti par est, perpetuum atque individuum est:

7. Ita nolim existimare (nisi Deus id mihi revelet) tot partibus admirabilem, tot modis arcum corporis animique in Homine nexum, qui ex prima Dei institutione indissolubilis & quodammodo immortalis existimandus est, omnimodâ morte solutum ac diremtum esse, nisi separatio quam diximus longiore tempore dureret, adeo ut corpus idoneum inhabitantis animæ domicilium prorsus esse desinat.

8. Si aliter statuas, ecstáticos, epilepticos, deliquium animæ similiaque patientes in verè mortuorum catalogum statim referes.

9. Sanctus Paulus raptus in tertium cælum nescivit utrùm anima sua eo tempore in corpore, an extra corpus fuerit. Ipsum verò interea mortuum fuisse nemo affirmaverit. Vide 2 Cor. 12.

10. *Mors* igitur Hominis tum demum rectè appellabitur, cùm animæ & corporis separatio totalis & finalis est, ut liceat uti aliorum in alia materia receptis vocabulis.

11. *Totalem* appello separationem, ubi nullæ prorsus utriusque partis functiones ampliùs concurrunt.

12. *Finalem* voco, ubi intermissus atque interruptus ille concursus post exiguum temporis intervallum non repetitur ac renovatur.

13. Quod equidem temporis intervallum certis horarum mensuris definire nec ratio nec experientia patitur.

14. Non ratio, propter eam quam indicavimus vitæ humanæ latitudinem ac divisibilitatem. Cui adde corporum humanorum multiplicem varietatem aliorumque præ aliis dispositionem meliorem firmioremque, aut contrà deteriore atque infirmiore.

15. Neque experientiâ, quoniam ecstasin, defectionem animi similesque passiones aliàs diutius, aliàs minus diu continuare deprehendimus. Et novimus pro verè mortuis habitos ac sepultos esse, qui paulò post resurgendo sepultores suos erroris convicere ipsosque & alios in admirationem rapere. Unde Medicorum præceptum, ne citò sepeliantur qui apoplexia similive affectu videntur extincti.

16. Obducatur aliquis, allatam Mortis explicationem talem esse, ut patrocinium in ea facile inveniant profani homines, Christi & Prophetarum miracula eludentes. Dicent enim in illis hominibus;

quos Christiani virtute divinâ resuscitados credunt, animam à corpore totaliter ac finaliter necdum fuisse separatam.

17. *Resp.* Non esse philosophi hoc argumenti genus fustus tractare. Verbum unum hoc loco sufficiat. Ne sic eluderentur miracula Dei S. Scripturam jam providisse, notato exemplo resuscitati Lazari, quem sætentem & quatuor jam dies in monumento habentem Christus invenit. Joh. 11.

C A P. LIX.

Mortis causam proximam esse in corpore.

1. **E**X quibus eum in modum explicatis facilè solvuntur plures quæstiones, quarum nonnullæ circa ea, quæ hætenus tractata sunt, lectorum animos dubitare faciunt.

2. Et primò quidem interrogatur, utrùm in corpore, an in anima causa mortis quærenda sit?

3. *Resp.* *Causam mortis remotam* posse poni in anima, quando hæc ita meditationibus assuescit, ut corporis curam insuper habeat: quò spectant superiùs tradita capp. XL. 6. sqq. XLIV. 13.

4. Ne jam dicam de aliis, qui non itæmentem à sensibus abduciendo corpus curare omittunt; sed qui talia circa corpus suum committunt, quibus ad mortem disponitur.

5. At *proxima causa mortis* est mala corporis dispositio ex cap. LVIII. 4. Theor. Viv. 504. sqq. Qui ejusmodi in corpus dispositionem, id est, divisionem aut figuræ mutationem inducit, *occidere* dicitur: contrà, qui corpus proximè sic disponit, ut idoneum sit mentis domicilium atque organum, dicitur *generare*, Theor. 635.

6. Et quando legimus 2 Reg. 20. quod Deus Ezechix diebus quindecim annos addiderit, hoc ita capimus, quod corpus illius regis jam viribus defectum adeoque respectu causarum secundarum morti vicinum, novo & singulari robore Deus firmaverit, (quæ nova corroboratio resuscitationi alicujus mortui quodammodo æquipollet,) quo ad præstitutum à divina providentia vitæ terminum perveniret.

7. Solâ animi *voluntate* nemo moritur, cap. XLV. 3. seqq. Neque in *perceptione mentis* quicquam est quod mortem inducat. Nec ulla in *Mentem* divisio vel corruptio cadit, Theor. 617. sqq.

8. *Cum*

8. Cùm igitur triplicem in Homine vitam consideraverimus, unam animæ propriam, alteram propriam corporis, tertiam totius compositi, cap. X. 5. Solâ corporis vitâ deficiente deficit etiam vita compositi, hoc est, corpore sic vitiatò, ut suo sibi naturali modo movere & moveri amplius nequeat, cessat nutui obtemperare animæ, cessat eam de statu suo rerumque externarum admonere.

9. Abit itaque à corpore anima, haut secus ac navim fractam nauata, domum ruentem habitator deserit, quoniam usum, ad quem comparatum erat, ei non amplius præstare valet. Quantiisper enim corpus sartum tectum manet, licet anima paulisper abesse quandoque videatur, non tamen illud deseruisse censetur. Ecquis enim putet hominem dereliquisse suum habitaculum, eo quod aliquo fortè tempore domo ad commodè habitandum instructâ absuerit?

10. Nimirum ut copulata enunciatio tota falsa judicatur, cujus vel una pars est falsa: ita *totus homo* mori dicitur ob mortem solius corporis, quo vineulum partis utriusque solvitur, licet altera pars immortalis sit, ac proinde *totum hominis* moriatur nunquam.

11. Sic abitus animæ respondet ejus accessui. Non accedit ad corpus, nisi eo bene disposito ex cap. XXXV. 1. non discedit à corpore, nisi eo vitiatò.

12. Quando igitur conjugia, scœdera, amicitia etiam suo modo perfecta, aliaque conjunctionum genera, non solâ morte conjunctæ partis alterutrius, verùm etiam pluribus aliis de causis dissolvuntur; *anima rationalis cum humano corpore conjunctio solâ hujus morte divimetur*; quod est præclarum conjunctionis illius trigesiumum, quo singularis ejus stabilitas demonstratur.

13. Adde hoc tanquam novum præclarum, & quidem trigesiumum primum, quod *à parte Hominis nobiliori dissolutionis causa non datur, sed à parte ignobiliore duntaxat*. Contrà fit in conjugio, ubi prior sæpe maritus diem suum obit. Repudiare certè solus olim poruit maritus, non uxor. Denique in aliis societatibus contingit, ut pars perfectior dissolvendi mutui commercii causam præbeat.

CAP. LX.

*An homo magis vivens aequè facile moriatur,
ac is, qui minus vivit.*

1. **Q**Uæritur etiam, nunquid homo eo tempore & statu, quo minus homo est vel minus vivit, ex. gr. infans, dormiens, fatuus, naturâ servus, faciliùs è medio tolli possit, quàm homo eo tempore & statu, quo magis vivit, uti adultus, vigilans, doctus ac prudens, generosus imperator? Vide cap. XXXVII.

2. *Resp.* Quia non ex animi, quæ hîc nulla locum invenit, sed ex corporis corruptione mors sequitur, si tantummodo vitalium functionum principium unicum vel unica pars principalis destruat, æquè facile multa quàm pauca inde dependentia pereunt. Confer cap. L. 8.

3. Sicuti funiculo, qui alicubi suspensus erat, abscisso simul & semel cadunt omnia, seu pauca seu multa fuerint, quæ ipsi alligata. Nec refert, an fortius alligata sint, an minus fortiter. Et pari ratione, dummodo pars corporis principalis aliqua destruat, moritur homo, sive corporis animique functiones intensius sive remissius in eo concurrant.

4. Minimè interim negamus, quin homo corpore valido & robusto à natura donatus plura adversa sustinere possit, antequam morte naturali aut violentâ exstinguatur, quàm alius infirmiore corpore præditus. Et hîc tamen insuper cogitandum, aliud esse vitam longam, aliud vitam sanam, (qua de re postea) unde Germ. proverbium: *Die trachende wagen gehen am längsten.*

CAP. LXI.

Num anima possit esse in corpore hominis mortui.

1. **A**Tque ita quidem nos mortis illius, qua desinit esse homo compositus, naturam explicamus, ac separationem animæ & corporis à morte, tanquam genus à specie, seu latius ab angustiore distinguimus.

2. Videamus autem, quanam alii vulgo explicatione utantur. Separationem illam, in qua mors consistit, monent intelligendam esse non ratione situs & loci, sed ratione conjunctionis personalis.

3. Nam

3. Nam utcumque, inquirunt, *anima in corpore sit*; si tamen non amplius *informet*, jure dicitur *separata*, quia non *vivificat corpus*. Atque ita capienda sunt verba Pauli *Actor. 20.* cum de Eutycho jam mortuo ait, *animam ejus in ipso esse*. Nec enim illa corpore *excefferat*: duntaxat *dissolutum erat vinculum ejus cum corpore*.

4. Quæ cum principiis nostris suprà expositis quomodo conveniant aut non conveniant, paucis annotabimus.

5. 1. Anima corpus revera non *vivificat*, cum illud propriam sibi vitam habeat, quam anima ei neque dare neque adimere potest.

6. 2. *Informare corpus* non alio sensu, qui vero sit consentaneus, anima dicitur, quàm quod membris ejus motum imperat aut vicissim etiam, qui in corpore accidunt, motus percipit.

7. 3. Quando utroque modo corpus *informare desinit*, hoc est, quando nec regit ullum corporis membrum amplius, nec quicquam veluti in membris corporis percipit, tum à corpore quidem *separatam animam*, (neque enim alio pacto ipsi *conjuncta erat*), sed non illico mortuum esse hominem putamus.

8. 4. Quoties autem sic à corpore *separata est anima*, ratione loci vel situs in corpore nihilominus *existere dici nequit*, cum ejusmodi affectiones in eam prorsus non cadant, nec alia quàm activæ & passivæ virtutis præsentia ei adscribi possit.

9. 5. Speciatim verba Scripturæ, *animam in ipso esse*, nisi velimus cum Theologis potius explicare hoc modo, quod Paulus ea pronuntiaverit vel in ipso editi miraculi momento, vel quod de re mox *secutura certissimus esset*;

10. Possemus principiis nostris congruenter affirmare, quod *vita quidem corporis actu etiamnum in Eutycho fuerit*, saltem non diu abfuerit, cum illud nondum sic destructum esset, ut commodum animæ habitaculum & instrumentum, accedente præsertim singulari Dei virtute (Confer cap. LIX, 6.) esse desierit: vitam autem totius compositi saltem in ipso fuisse *potentiâ*, quippe quæ non nisi corrupto corpore omnino *extinguitur*.

C A P. LXII.

Mensem aliquando adesse corpori cum putatur abesse.

1. **E**X iis, quæ hæcenus exposita sunt, etiam solvenda objectio, quæ totam nostram de corporis & animæ conjunctione tra-

Ratio

ctionem suspectam reddere posset apud eos, qui potius modum loquendi quam rem ipsam attendere consueverunt.

2. Hunc enim in modum argumentari licet: si corporis animæque conjunctio ac proinde vita totius Hominis in utriusque generis actuum concursu sita est, tunc utique mortuus homo censebitur, quoties illæ duæ partes per actus transeuntes concurrere cessant.

3. Atqui, ut omittamus morbos varios, defectionem animi, ecstasin, &c. quæ extraordinaria sunt, potest quotidie contingere, ut mens alicujus hominis philosophi tam intenta sit vel sui vel Dei alteriusve objecti intelligibilis contemplationi, ceu actui suo immanenti, ut nullo actu transeunte aliquid à corpore pariatur neque in corpus actionem exerceat ullam.

4. (Notum est Mathematicorum excellentissimi Archimedis exemplum, de quo Livius memoriæ proditum esse testatur, in tanto tumultu, quantum capta urbs Syracusarum in discursu diripientium militum ciere poterat, intentum formis, quas in pulvere descripserat, ab ignaro milite quis esset interfectum.)

5. Tunc igitur temporis aut mortuus erit aut certè desinet esse homo, qui tamen actum eo ipso exercet homine dignissimum. Quod cum absurdum sit, conjunctionis illius, qua corpus & anima connectuntur, genuina explicatio hætenus tradita esse non videtur, Huc usque objectio.

6. *Respond.* Possè remissos aliquos & languidiores si non exteriorum, saltem interiorum sensuum actus aut voluntatis operationem quandam in corpus segniorem interea temporis concurrere. Quas quidem functiones si parum attendat anima, multo jucundioribus cogitationibus efficacius intenta, non magis esse mirandum, quam quod lumine Solis diurno minorum stellarum lumina offuscantur. Confer cap. XXIII.

7. Vis autem cognoscere, quomodo anima alteri cuidam objecto valde attenta non planè corpus humanum dereliquerit, adverte, quod parvum quidem strepitum non audiat nec parvum dolorem sentiat tunc temporis; sed audiat tamen repentinum ac sonorum tonitru, & sentiat ignem, quo pes aut manus comburitur, ac statim imperet membris motum quo periculum evitetur. Adeo ut similis hîc ferè sit ratio, qualis est in somno profundo, à quo non nisi magno clamore vel concussionē validā excitamur.

8. Simile contingit in illa conjunctione, quam amicitiam vocamus,

mus, ubi sæpe amicus ab amico derelictus videtur, dum officia consueta præstare negligit. At cum summa necessitas urget, cum exitiale periculum imminet, tunc opem ferendo revera se amico præsentem atque addictum esse ostendit.

9. Meretur hoc præclarum conjunctionis hujus trigesimum secundum numerari, quod *anima sic nexa sit corpori, ut quamvis illud aliquando deseruisse ac neglexisse putetur, necessitate tamen urgente se adesse ejusque commodo studere demonstret.*

10. Sic Deus ipse solet agere cum piis, quibus gratiâ & amore singulari conjunctus est, ut putent quidem aliquando se ab eo esse derelictos, at mox tamen extremis ingruentibus calamitatibus præsens ipsius auxilium sentiant. Cum duplicantur lateres, venit Moyses.

C A P. LXIII.

Non illico mortuum censendum esse hominem, cum nulli corporis animique actus concurrunt.

1. **P**ræterea uti arborem hieme etiam asperrimâ, cum nullæ vitales ejus operationes apparent, non judicamus esse emortuam, quasi nullâ omnino re differret ab ea, quæ exaruit, (quandoquidem vivi corporis dispositionem nondum prorsus in illa mutatam fuisse supponimus, Theor. Viv. 445.) ita in re præsentem judicare par est.

2. Cujus hominis mens, lingua, manus per habitum vel consuetudinem sonis harmonicis aut rebus militaribus conjunguntur, (intellige eo modo quo facultates objectis suis jungi solent) eum nominamus bonum Musicum, bonum Militem, licet actus musicos aut militares nullos exerceat, atque etiam dormiat, modò non amittat propensionem, facilitatem & constantiam, quæ ad ejusmodi functiones obeundas requiruntur.

3. Idem quodammodo de corporis animique unionem putandum est, in qua certi quidam actus aut per naturam aut per habitum & consuetudinem copulantur: ita ut non dicamus eam penitus sublatam esse, quamdiu in corpore manet omne id, quod à parte ipsius ad conjunctionem desideratur, id est, idonea dispositio, atque ita in animo perseverat mox redeundi voluntas, & maxime ; in Deo

M m m con-

continuat illa duo juncta conservandi voluntas, quæ cum libera sit, mentis à corpore absentiz intervallum longius aut brevius potest statuere.

4. Lampadem non arbitramur prorsus extinctam quantisper flammula subinde recurrens nonnihil olei lambendo pergit absumere. Cur ergo mortuum existimemus hominem, in quo animam agendo, & patiendo ad corpus, à quo discesserat, per vices quasi recurrere animadvertimus?

5. Jureconsultorum sententia est, columbas & similia animalia, quæ ex consuetudine abire & redire solent, eo usque nostra manere, donec animum revertendi habent, nec ante nostra esse desinere, quam revertendi consuetudinem deseruerint.

6. Idem statuamus de ecstacticis, epilepticis, meditationi profundiori assuetis atque id genus hominibus, in quibus anima alternis vicibus velut evolare ac revolare consuevit: nempe animum corpori manere conjunctum quàm diu revertendi animum non abiecit. Hunc verò non abjicit, nisi corpus notabili ratione vitiatum fuerit.

7. Corollarium hujusce doctrinæ illud est, quòd ubi Deus Opt. Max. defunctorum corpora extremo die suscitaverit rursusque aperiverit in mentis olim conjunctæ usum, tum ex lege naturæ primitus ab ipso Creatore statuta non posse non mentem humanam ad suum quamque corpus informandum reverti.

8. Exempla materiæ, de qua agimus, propinquiora sunt, quæ à conjugio & amicitia petuntur. De conjugio aliquid attigimus cap. LVIII. 6. cui nunc addo, quod sicuti sponsalia propterea non infirmantur, quod arrhæ nullæ datæ sunt: ita nec vitam homini dene-gandam eo quod corporis animique actuum concurrentium exter-num indicium nullum eluceat. Et quemadmodum separatio quoad torum & mensam divortium non est: ita nec separatio corporis & animæ quælibet pro morte habenda.

9. Amici aliquando sic locis disjungi possunt, ut omnis inter eos conversatio cesset, salvâ manente lege amicitiz, modò disjunctio non sit longior, sic ut interim alter amittat virtutes, propter quas amabatur, vel alter propensam voluntatem deponat.

10. Quæ omnia cum ita sint, haudquaquam nostrum esse puto, præcipiti nimis sententiâ homini vitam abjudicare & pronunciare mortuum simul ac corpus & anima in eo cooperari desistunt vel desistere videntur. Collegium si in pluribus firmatum fuerit, etiam in

uno

uno servari docent Politici. Ita corpore facto recto, compositum, quod vocamus Hominem, servari intelligimus.

11. Equidem actiones exercet homine dignissimas (repete cap. LXII. 5.) si mentem solam respicias, qui rerum divinarum contemplationi & amorì totus immersus est. (sicuti S. Paulus in Paradisum raptus ineffabilia verba audit, 2 Cor. 12.) sed facile accidit ut interea non exerceat eas, quæ pertinent ad compositum, quæ vitam totius, vitam animalem faciunt.

12. Cumque pagina sacra pronunciet hominibus statutum esse *semel mori*, Hebr. 9. non est cur tantopere à communi loquendi ratione deflectamus, ut mori toties hominem existimemus, quoties corpus & anima per actus transeuntes in eo cooperari cessant. Ad mortem veram non totalem solum, verum etiam finalem cooperationis ejusmodi intermissionem pertinere arbitramur, quemadmodum antea exposuimus.

13. Proinde certi sumus, *minimum illud sub quo vita atque essentia totius hominis salva potest consistere*, etiam in iis reperiri, quorum animus ecstasi vel alrà contemplatione distractus velut extra corpus ponitur: quamvis in conjunctione mentis cum corpore describenda non illud minimum vel *pervitatis internum terminum*, uti vocant Scholastici, sed potius maximum aliquid, id est, florentissimum conjunctionis illius statum nos unicè respicere debuerimus. Repete cap. XXVII. 4.

14. Commodè mihi hîc incidit quod à Medicis didici, pernam esse sanitatis latitudinem, ut alia quidem optima, alia medicis, alia inclinans vel morbo vicina adeoque ambigua sit. Et quamvis scopo suo convenienter inter sanitatem & morbum statum quandam neutrum ponant, alterum incidentiæ in morbum, alterum convalescentiæ ex morbo; utrumque tamen propter istam quam diximus latitudinem ad sanitatem referunt.

15. Simile nos de vita hominis iudicium faciamus, cogitando aliam quidem magis, aliam esse minùs vividam, aliam inclinantem & mortì sæpe tam vicinam, vix ut ab ea discerni possit. Morbum utique cum morte, ut mortis prodromum, non ineptè confestimur.

16. Neque proinde patiamur nos ejusmodi deinceps contradictionibus ab illa corporis animique conjunctione, quam explicuimus, intelligibili, facili, verà, pulchrà agnoscendâ dimoveri, ut

M m m 2

aliam

aliam illius fœderis rationem excogitandam aut omnem nobis ignorandam esse opinemur.

C A P. LXIV.

*Cur vel tantillâ morâ interpositâ solvatur continuus
motus, vita humana non item.*

1. **N**on possum tamen quin satisfaciam rerum naturalium studioso rogaturo, cùm in Physicis tam parci ac restricti simus, ut vel tantillâ morâ intercedente motum sic dividi statuamus, ut is, qui sequitur, prorsus alius & novus cenferi debeat (Ph. 182. sq. Disp. XX. 17. sq.).

2. Cur hîc tam largi ac liberales simus, ut vitæ humanæ unitatem tolli non putemus, licet aliquod intercurrat temporis interval- lum, quo non exerceatur, cùm ipsa illa vita in animi corporisque motibus concurrentibus tota consistat?

3. Quoties enim vita hæc eo quo dictum est modo interrumpitur, illud quod sequitur, novam atque aliam facere vitam non censetur, quasi homo prius mortuus jam revivisceret: sicuti res mobilis post interpositam semel quietem novo & à præcedente distincto motu rursus moveri affirmatur.

4. *Resp.* 1. Motum localem per se spectatum esse aliquid simplex, hominem verò rem esse valde compositam, totque ac tantis mutationibus vitam ejus obnoxiam, ut compositionis hæc unitas ad illam simplicitatis exigi non debeat.

5. Equidem humanæ vitæ tam laxam ferè unitatem assignare posse videmur, qualem alicui cantilenæ, quæ tamen pausas suas habeat, nihilominus una judicatur. In cantilena harmonica modò voces omnes, modò paucæ, modò etiam nullæ exaudiuntur. Interim una cantilena est ac vocatur.

6. Cujus unitatis hæc sunt fundamenta: 1. quod choragus pergit interim ipsum quoque mensurare silentium: 2. quod reliqui concin- nentes parati sunt ac dispositi ad continuandum cantum, simul ac signum datur.

7. Sic in vita humana, quæ est corporis animique conjunctio, jam plures actus, jam pauciores, aliquando forè nulli concurrunt: Attamen manet eadem vita. Cujus identitatis fundamentum est, 1. Dei, ut vitæ magistri, voluntas, qua continuari vult illam conjun-

ctio.

tionem, mensurans interim animæ à corpore absentiae, si qua sit, quasi Musici cujusdam silentii, intervallum: 2. corporis dispositio, de qua diximus, & animi humani talis conditio, qua secundum primitivam naturæ legem ad corpus humanum bene dispositam se non potest non applicare, saltem diu illud destituere nequit.

8. Eâdem ratione vita hominis eleganter assimilari potest Comœdiæ, in qua personæ visuntur modò plures, modò paucae vel una tantum, aliquando & nulla apparet, eâdem interim durante Comœdiâ.

9. Et quâ possint intermissiones istæ tantopere vitæ nostræ adversari, cum ipsa sui naturâ in varias omnino partes scissa sit, uti capite XXX vidimus?

10. Annon vita hominis universa veluti in motum & quietem, in vigiliam & somnum, in laborandi & cessandi, &c. tempora distributa est? Quam vitæ mutabilitatem Ecclesiastes cap. 3 his verbis depingit: *Omnia tempus habent, tempus est tacendi & tempus loquendi, tempus belli & tempus pacis, &c.*

11. Resp. 2. Motus illi corporis animique nostri licet quandoque sibi invicem respondere vel ad se mutuò referri desinant, ipsi tamen interim perseverant, pergunt esse immanentes etiamsi transeuntes effluerent.

12. Sicuti rivus motum suum persequitur, etiamsi ad molæ rotam circumagendam non applicetur, & ventus in aëre flare pergit, licet alas molæ ventosæ non moveat. Quo simili etiam discis, ubi motus ille fuerit antea, quem anima in corpore excitat & regit: quod pertinet ad superiora cap. XVI, 5, sqq. explicanda. At quomodo motu salvo via seu determinatio motus variari possit, in Physica generali didicimus.

13. Multa sæpe fiunt in domestica, scholastica & aliis societatibus, quæ non observatis, qui actionum inspector alias constitutus erat, dum attentionem suam aliò convertit. Manet nihilominus ipse sociis aliis conjunctus. Similiter in corpore humano se habet animus.

14. Resp. 3. Res corporea postquam semel motum perdidit, suis viribus eundem recipere nequit, quia materia est principium tantummodo passivum. Atqui mens humana, quæ naturâ suâ actus est, potest se corpori ad tempus quodammodo derelicto rursus applicare, cum percipiendi ac volendi facultates, quibus ei conjungitur, amittat nunquam.

15. Sit ergo hoc inter propria & admiranda conjunctionis huius trigésimum tertium, quòd, cum omnis in rebus physicis motus vel tantilla quiesce interposita dividatur & continuus esse desinat; illi tamen motus, quibus concurrentibus homo vivit, morâ aliquâ intercedente vita continuitatem non tollant.

C A P. LXV.

Quomodo vita humana perpetua, aut certe longa & sana esse possit.

1. **D**icamus adhuc, an & quomodo vita humana perpetua esse possit. Si enim possit, magnam illud corporis & animæ conjunctioni perfectionem addet.

2. Et perfectissima quidem conjunctio est inter ea, quæ necessarid simul existunt perpetuò, hoc est, quorum neutrum ullo tempore & loco esse potest, ubi non sit alterum. Tanta verò inter corpus & animam ob ingentem naturarum diversitatem intercedere nequit.

3. At cadit in corporis & animæ conjunctionem perfectio illi proxima, uti videbimus, in eo consistens, quod partes illæ sociæ perpetuò simul esse & cohabitare possunt.

4. Quin imò longa etiam vita, hoc est, diuturna mentis sanæ in corpore sano commoratio, quæ in partis utriusque functionibus concurrentibus posita, conjunctionem illam perficit: quemadmodum longa conversatio amicitiam firmat.

5. Temporis longinquitate surculus cum trunco, cui insitus, arbor cum terra, sparsis latè radicibus, magis magisque coalescit. Vide Theor. Viv. cap. XV.

6. Si obtendas, quò magis homo senescit, eò magis laxari corporis animique vinculum; respondeo, id non esse perpetuum & vitio tantùm corporis contingere. Moïsis centum & viginti annos nati, cum moreretur, oculus non caligaverat nec vigor ejus exaruerat. Deuteron. ult.

7. Quin autem vita totius hominis non modò diuturna, verùm etiam perpetua esse possit, facile intelligemus, si observato principio antea demonstrato, non animi sed corporis vitio hominem mori, sequentia dari cognoscamus:

8. Primum est, ut sufficientem habeamus notitiam corporis humani, cui mens conjuncta est.

9. Al-

9. Alterum, ut perspectæ nobis sint causæ, quæ morbos, debilitatem & senectutem corpori nostro inducunt.

10. Tertium, ut non ignoremus remedia, quibus natura nos instruxit ad morbos arcendos.

11. Quartum est, ut causas quidem istas evitare, remedia verò hæc adhibere omni industriâ quotidie studeamus.

12. His quatuor rebus positis intelligimus fieri posse, ut homo nunquam moriatur. Quamvis ut illa omnia simul ponantur in homine, agnoscamus longè esse difficillimum, nisi fortè singularis Numinis ductus ac revelatio ejus infirmitati in illis cognoscendis ac volendis ipsum juvet.

13. Simili propemodum ratione, quia novimus quid ignem extinguat, quid nutriet, si illis amovendis, his adhibendis assiduam demus operam, flammam habituri sumus perennem.

14. Quapropter inter præclara conjunctionis hujus, qua corpus & anima copulantur, trigésimum quartum numerare licet, *quod optimus natura Auctor tam stabilem ac perfectam eam fecerit, ut perpetuare valeat, nisi ipsius hominis ignorantia, negligentia aut malitia obset.*

15. Quorum defectuum cum nullum videamus in primum hominem rectum & integrum cadere potuisse, nullam etiam causam perspicimus, quamobrem ei immortalitatem derogemus aut ipsum potuisse non mori inficias eamus.

16. Quum verò scientiâ Physicâ ad tria priora magis magisque promoveamur, quantus ejus diligenter excultæ sit fructus vel hinc æstimare licet. Quartum enim facile factu esset dummodo priora tria non deficerent.

17. Neque ad vitam duntaxat longam, sed etiam ad sanam vendam ista scientia conducit. Inter quæ duo differentia est, cum valetudinarii quidam possint esse longævi. Respice cap. LX.4.

18. *Sunt enim, ut Vir Illustis loquitur, nonnulla, quæ ad spirituum alacritatem, & functionum robur, & morbos arcendos prosunt, quæ tamen de summa vita detrahunt & atrophiam senilem absque morbis accelerant.* Confer quæ de infantibus & equis vinum largius bibentibus dicta sunt Theor. Viv. 71.

19. *Sunt & alia, pergit idem, quæ ad prolongationem vitæ & atrophiam senilem longius summovendam juvant; sed tamen non usurpantur absque periculo valetudinis.*

20. Sic multa sunt, quæ ignem conservare possunt, carbonem fossi-

les,

les, cespites, corium, stramen, salices, ligna querna, &c. sed omnia æquè puram & luculentam flammam non efficiunt, nonnulla etiam fœtore & fumo molesta sunt.

C A P. LXVI.

Cur hominum post diluvium vita quidem brevior, sed ingenium acutius.

1. **Q**Uætere hîc licet, ubi de vita longa & perpetua sermo fuit, cur post diluvium minùs diu vivant homines quàm antea.

2. E scriptore alibi citato rem illam hunc ad modum explicare licet: 1. vi diluvii tellurem longè frigidiorē & sicciorē evasisse.

3. *Frigidiorē* quidem, quòd tanta moles aquarum tanto tempore eam non solùm texerit & compresserit; sed in ipsa ejus viscera penetraverit. Confer quæ de vernis noctibus ob hiemem præcedentem frigidioribus diximus Ph. 899.

4. *Sicciorē* verò, prout elixa sicca redduntur subducto naturali per coctionem humore; & ligna à silvicidis in undas projiciuntur, ne insitus humor in cariem & vermes exuberet, & post debitum tempus educuntur sicciora; & distillatores, ut humorem herbarum eliciant, aquâ vel alio proportionato liquore plantas perspergunt, &c. Vide Theor. Viv. 68. sq.

5. Ita nimirum cùm bene digesto humore redundaret tellus, non fuisse potiorē exsiccandi rationem, quàm addito alio humore separabiliore reddere eum qui inerat & simul utrumque exprimere.

6. 2. Ex illo telluris frigore & siccitate provenire, quòd plantæ & animalia maligniorē inde succum & alimentum recipiant, cùm vegetatio in calore & humore consistat. Theor. cap. III.

7. 3. Ex eo quòd siccior evaserit terra, etiam aërem, qui hominem ambit & ab ipso inspiratur, puriorē ac tenuiorē factum. Sunt enim vapores ex locis humidis ascendentes crassiores, Ph. 891. sq. 916.

8. Ac proinde tam ex alimento (vide Theor. Viv. cap. VIII.) quàm ex aëre corpus humanum ut non æquè vastum ac durabile, ita subtilioribus præditum spiritibus ad subjiciendum se animæ redditum esse aptius.

9. Compara Gallos & Italos cum populis septentrionalibus tam corporis quàm animi ratione, Theor. Viv. 35. sqq. Et nescio quæ
lin.

lingua melius hoc exprimat quàm Germanica isto proverbio: *was wohl seibet / seeler übel.*

10. 4. Acutioris itaque ingenii atque ad scientias & artes magis idoneos evalisse homines, &c. Quæ omnia conveniunt cum iis, quæ suprà de mentis cum corpore connexionem magis aut minùs arcta in infantibus, adultis, doctis, indoctis, deque Ingenii humani dotibus ac differentiis exposuimus capp. XLIII. sq.

11. Ita ut vir aliquis quadragenarius solâ ratione naturali utens (patriarchas enim & prophetas, qui olim vivere, excipimus) qui ante diluvium in orbe terrarum fuit, ingenio & prudentiâ nunc fortè superetur à viginti annorum adolescente.

12. Ad quæ illustranda pertinent exempla eorum, qui post asumptum cibum aut potum, præsertim largiorem, ineptos ad studia se esse sentiunt, jejuno autem stomacho aptiores. At vino modicè hausto, quod spiritus gignat subtiliores & agiliores, plurium ingenia acuuntur. Nimiâ verò humiditate cerebrum obtunditur. Unde & Heraclitus animam siccam esse sapientissimam affirmavit.

13. Homines præ iracundia interdum non sunt apud se, quoniam isto fervore spiritus turbantur, sicuti etiam usu venit in corpore nostro quoties cibus in ventriculo coquitur. Et generaliter exemplo fermentationis patet, quomodo ratio magis composita & tranquilla sit (Repete ex Phisicis §. 967. quid in aëre vel aqua *tranquillitas* appelletur) cùm homo crescere, cibum concoquere, irasci, fervidè cupere vel amare desinit. Repete cap. XLIII. 9. In vino ac cerevisia defæcatis omnia magis ordinata meliusque digesta sunt. Ph. 800.

C A P. LXVII.

*Conjunctionis anima cum corpore proprietates triginta
quatuor è superioribus repetita simul contem-
planda oculis subjiciuntur.*

1. **Q**Uando corporis & mentis in homine conjunctionem multis adeo capitibus descripsimus, operæ pretium esse videtur, ut propria, admiranda & præclara ejus in superioribus latius explicata tandem in unum contrahamus, quò accuratiori judicio inter se conferri memoriæque faciliùs mandari possint.

N n n

I. Nulla

I. Nulla in Universo compositio reperitur, in qua partes componententes tantopere diversæ, *Mens* intelligens & volens, *Corpus* extensum & mobile, tam arctè conjungantur.

II. Conjunguntur autem virtutum suarum per actus transeuntes, quibus se invicem afficiunt, vivo exercitio.

III. Quorum actuum disparitas corporis animique vinculum non laxius, sed arctius efficit.

IV. Et animus quidem immotus corpus movet, excitando ac gubernando spirituum animalium cursum: vicissim corpus non cogitans animum plurima cogitare facit, novis ac variis perceptionibus producendis validè occasionem dando.

V. Corpus animæ conjunctum instrumentum patiendo agit & causæ etiam principalis munere fungitur.

VI. Conjunctio mentis cum corpore mutua est & reciproca, sic ut mens in corpus & contrà corpus in mentem agat, mens à corpore & contrà corpus à mente patiatur.

VII. Atque illæ vitæ humanæ functiones, quibus utriusque partis conjunctio absolvitur, sunt numero plurimæ, generis varii, dignitate præcipuæ.

VIII. Quæ functionum varietas & multitudo in unum quoque hominem viventem simul & semel cadere potest.

IX. Attamen quò pauciores earum copulantur, eò fortiores atque accuratiores solent esse. Multitudo enim singularum vires minuit.

X. Nec quilibet motus corporis quibuscumque actibus animi, sed certi duntaxat certis respondent.

XI. Quorum actuum tam propinqua est in homine connexio, ut inter corpus & animum res alia nulla intercedat media.

XII. Eorundemque promptus adeo concursus est, ut inter actus animi & corporis sibi mutuò respondentes nullum tempus intercurrat.

XIII. Etiam tempore simul esse possunt complures animi corporisque actus, quorum alii sunt aliis naturæ ordine posteriores.

XIV. Nec tamen ullo vitæ tempore actus illi omnes, qui in totam hominis ætatem cadunt, simul concurrere possunt: at modò hi modò illi continuâ quâdam successione jungi gaudent:

XV. Et quidem hac lege, ut certo mentis actu recurrente constanter etiam recurrat motus corporeus, qui semel ei conjunctus fuit, & vice versâ.

XVI. Fit

XVI. Fit autem utriusque generis actuum conjunctio partim in principio, partim in progressu vitæ nostræ :

XVII. Ita quidem ut posterior priori sæpius aliquid addat, interdum quoque detrahat, vel eam vertat in contrariam.

XVIII. Neque in cunctis hominibus eadem sunt corporis animique functiones quæ initio vitæ, multò minùs quæ in progressu connectuntur.

XIX. Conjunctio hæc propter actuum numerum, tempus aliasque ad hærentes qualitates intensioris ac remissionis capax est, adeo ut non omnes æquè sint homines existimandi, & unus idemque nunc magis nunc minus vivere dicendus.

XX. Non sunt actus mentis intelligentis distincti, at sensuum operationes confusæ quæ mentem corpori alligant.

XXI. Eoque magis amicum ac delectabile partis utriusque conjugium est.

XXII. Ingeniorum dotes ac differentię ex animæ cum corpore nexu pendent.

XXIII. Mens humana una corpori solùm uni copulatur :

XXIV. Et quidem toti corpori organico ;

XXV. Proximè tamen solius cerebri certæ parti :

XXVI. In quam cerebri partem cum & corpus per suos spiritus, & anima per suam voluntatem agere possit, contingit interdum ut inter se pugnent & conflant.

XXVII. Quæ pugna quantumvis ardens existat, corpus & animam non diffociat.

XXVIII. Ipsi quoque actus hominis mixti, qui partim sunt corporis partim animi, sibi invicem adversari possunt.

XXIX. Et quod majus est, ea mortalis hujus vitæ conditio deprehenditur, ut corpus oppugnans animam victoriam reportare valeat.

XXX. Nec tamen hac ipsa vel ulla alia de causa, at sola morte seu corruptione corporis, ejus cum anima conjunctio dissolvitur.

XXXI. Ita pars hominis ignobilior unica & proxima mortis humanæ causa, pars autem nobilior per se sola nunquam.

XXXII. Quin imò tam studiosa hæc est corporis sui, ut ommissis etiam propriis iisdemque jucundissimis intellectualis vitæ functionibus, quibus interdum abstracta indulget, ad commoda ejus promovenda se per vices applicet, atque imminente periculo citissimè quoque advolet.

N n n 2

XXXIII. Ta-

XXXIII. Tametsi verò motus rerum tantùm corporearum vel tantillâ quiete interpositâ continuus esse desinat, vita tamen hominis eadem judicatur, licet ejus actus brevi temporis intervallo per ecstasin similemve causam interrupti cessent concurrere.

XXXIV. Denique optimus rerum Opifex tam stabile fecit corporis animique conjugium, ut quò minus perpetuum vel diuturnum sit, sola ipsius hominis ignorantia, negligentia aut malitia obster.

2. Hæc sunt admiranda conjunctionis illius, qua mens humana corpori necitur organico, quæ partim quidem eam constituunt, partim consequuntur: quibus plures aliæ proprietates addi possent, ut illæ ex. gr. dissimilem huic nexui esse corporum, dissimilem animorum inter se conjunctionem; dissimilem angeli cum corpore, naturæ cum navi, facultatum cum objectis connexionem. Verùm illas & alias omnes in superioribus contineri mihi persuadeo.

3. Nobis in præsentia satis fuit tot numerò conjunctionis illius proprietates distinxisse, quot Magnetis proprietates Principp. parte quartâ Philosophorum princeps enumerat, quarum ab aliis curiosè observatarum causas ipse solus & primus detexit. Eiusdem ego principis, ut face latè fulgente, viam ostendentibus raram hanc & præclaram de corporis & animi conjunctione materiam curiosius examinate pleniusque describere conatus sum: quos quidem conatus prudentiorum iudiciis lubens meritoque submitto.

C A P. LXXVIII.

In Mentis & corporis conjunctione, partis utriusque functionibus, quibus se invicem afficiunt, nihil esse prius quarendum.

1. **N**on dubito autem fore plerosque, qui actus inter corpus & animam nostram intercedentes facile quidem agnoscant esse aliquid ab utriusque partis unione haudquaquam alienum, attamen affirmant, omnes eos ex ipsa unione consequi, hanc verò in alia quadam re priore & principali consistere.

2. Ita namque ratiocinari solent omnes: quod agit existit, quod ibi agit vel patitur, ibi existat necesse est. Unde colligunt animam prius esse corpori præsentem & conjunctam (loquor de naturæ, non temporis ordine) quàm vel agat in illud vel ab eo patiatur. Atque

ita

ita mentem non connecti corpori organico per ipsas sensuum perceptiones; sed, quia corpore nexa est, ideo eam quæ in ipso sunt percipere vel sentire.

3. Et videntur objectionem hanc, quæ in hac materia fortassis omnium præcipua est, exemplis conjugii, amicitiae, foederum, quibus nos identidem uti sumus, posse stabilire. Quemadmodum enim officia ac beneficia, quæ conjux conjugii, amicus amico, foederatus foederato præstat, in alia priore conjunctione fundantur: sic actiones passionisque, quibus corpus & animus ultrò citroque ad se invicem feruntur, partis utriusque connexionem aliam præsupponere videantur.

4. Verum enimvero quicumque ea, quæ hucusque tradita sunt à capite ad calcem cum attentione aliqua perlustraverit, ejusmodi objectionem parum movebitur, certè à veritate explicationis nostræ sibi per omnia consentiente semel agnita non dimovebitur.

5. Novimus enim eorum, qui sinceræ philosophiæ ritè necdum initiati sunt, hunc esse morem, ut in aliis quoque rebus, eo quod clarum & intellectu facile est, & ex quo multa alia pendere vident, non contenti semper aliquid prius & potius quærant.

6. Ita cùm in extensione corporis essentiam collocamus, ipsi hanc esse accidens à substantia corporea distinctam affirmant. Cùm in cogitatione naturam animi positam esse docemus, ipsi ad Actionis categoriam hanc referentes, ut merum accidens, aliud substantiale quid in animo reperiri contendunt.

7. Considerent autem ea, quæ de mentis cum corpore nexu scripsimus, non modò perspicua ipsis esse, sed etiam multa atque inter se coherentia deprehendi. Quod si ergo præsupponerent aliquid corporis animique functionibus prius & potius, quo partes illæ colligarentur, quo pacto fieri posset ut illud non detegerent? Quomodo tot rivi, quos intruemur, ad communem fontem & scaturiginem nos non deducerent? Tot rami virentes & surculi radicem non ostenderent?

8. Si quid actibus transeuntibus prius esset in hac unionem, eam constitutens, illud aut aliunde adveniret, aut à corporis vel animi natura penderet. Prius dici nequit. Repugnant enim quæ de immediata conjunctione docuimus cap. XXV. Neque posterius verum est: quoniam cùm extensio, figura, situs partium & quæ sunt ejusmodi, nullam relationem habeant ad mentem, nihil remanet in cor-

pore, quo animo jungatur, nisi motus. Motibus verò corporis respondent animæ cogitationes; cumque anima naturâ suâ actus sit, nihil in ea prius actibus est quærendum.

9. Sed unicum hoc argumentum abundè sententiam nostram firmat, quod omnia aut saltem prima & potissima ad mentis cum corpore conjunctionem pertinentia, quæ explicuimus, demonstrantur tanquam ex animæ cogitantis & corporis organici mobilis natura proximè, & nullo intercedente medio, fluentia.

10. Si quis obtendar, existere aliquid in hac conjunctione prius, sed quod cum expositis à nobis actionibus & proprietatibus non sit necessariò connexum, nec fons & principium earum debeat haberi: respondeo, hanc opinionem naturalium proprietatum veritati ipsiusque naturæ definitioni prorsus adversari. Naturales enim cujusque rei proprietates nexum inter se habent, & Natura definitur, quod principium & radix sit actionum & proprietatum, quæ rei conveniunt.

11. Quantum ad objectiones initio capitis hujus prolatas attinet, mentem non posse alicubi esse nisi agendo & patièdo satis antea demonstratum est. In conjugio præcedit consensus matrimonialis reliqua officia, quibus conjugium constat & conservatur, sed consensus ipse actus est. Eodemque modo non nisi actus sunt, quibus fœdus & amicitia inter homines contrahuntur. Neque aliud quàm actus mutuos in corporis & animæ conjunctione quærendum esse contendimus.

C A P. LXIX.

Defensio totius de corporis & animi conjunctione tractationis nostræ, quantum ad comparationes à rebus moralibus petitas.

1. **S**ed erunt qui obducant, quod vitiosum de genere in genus transitum commiserimus, saltem à terminis physicis longiùs quàm par est evagati fuerimus, in tota explicatione nostra tot affèrendo comparationes à rebus non physicis, præsertim à matrimonio, fœdere, amicitia aliisque rebus moralibus desumtas.

2. Addent, vel hoc nomine comparationes istas à re præsentè alienas videri, quod Homo sit ens per se unum, conjugia verò & similia composita faciant unum per accidens; adeo ut ejusmodi rerum laxa unitas corporis & animæ strictam in Homine unionem non possit multum illustrare.

3. Re-

3. Respondeo primò quidem ad posterius: neque ipsius hominis tam simplicem ac vulgo putatur esse unitatem, sed existere in eo manifestè compositum rerum toto genere diversarum conjugium. Quod initio hujus de conjunctione libri diligenter inculcavimus.

4. Ad mirabile illud corporis animique conjugium explicandum similibus ac dissimilibus conjunctionum exempla plurimum lucis attulisse vidimus. Nec potuimus reprobaturum in hac materia saltum facere (ut respondeam ad prius) cum talis ea sit, ut res maximè heterogeneas junctim contemplandas nobis exhibeat.

5. Possunt autem exempla uberius explanationis causa à nobis in medium allata à pluribus virtutibus huc spectantibus commendari. Conjugia enim, amicitia, fœdera, & talia, sunt res veræ, certæ & notæ, verà ratione subnixæ & quotidianâ experientiâ probatæ, quibus idcirco ad magis abstrusam, quantumvis naturâ ac tempore in mundo priorem, animi cum corpore conjunctionem declarandam rectè uti potuimus.

6. Mallent fortassis alii, nos inhæsisse vulgari de formis substantialibus in Physica doctrinæ. Sed formæ illæ nobis haut majorem in Physicis usum præstant, quàm numeri Platonici in Politicis. Quod in limine Physices dissimulantes nunc apertè profiteamur, postquam ad hujus scientiæ metam perducti tot ac tantarum rerum naturalium arcana, absque formæ ullius substantialis adminiculo, tam perspicuè nobis detecta vidimus.

7. Adhæc cum in plerisque exemplis conjunctionis ejus, quæ hominem facit, illustrandæ gratiâ productis homo vel aliquid hominis inveniatur, non possunt ab instituta tractatione aliena judicari. Nisi etiam alienum putes esse in Theologia, ad unionem duarum in Christo naturarum declarandam exemplum conjunctionis animæ cum corpore afferre, quod Theologi facitant.

8. Præterea si advertis animum ad ea, quæ cap. XXXIV, & sqq. tradita fuere, nimirum quod non modò per naturam; verùm etiam per habitum vel consuetudinem plurimi corporis animique actus connectantur, non merè naturalem, sed partim quoque moralem nexum hunc esse agnosces, eoque minùs exempla, quæ attulimus, moralia heterogenea existimabis.

9. Novi inter Theologos & Jurisconsultos esse qui adulterum æquè ac homicidam capite plectendum arbitrantur, hac usi comparatione, quòd sicut hic occidendo corporis animique vinculum solvit ;

solvit: ita ille mœchando rumpit vinculum conjugii, quod non minùs firmum atque arctum Deus esse voluit, quàm illud alterum, secundum effatum Christi: *quod Deus conjunxit, homo ne separet.* Quæ si attendas, utrique objectioni capitis hujus initio prolata satisfactum esse cernes.

10. Adde quod conjunctiones illæ politicæ & æconomicæ in actionibus & passionibus mutuis, in officiis certis ac definitis, quæ promptè & constanter alter alteri præstare tenetur, consistunt, multasque alias habent proprietates, quibus mentis & corporis conjunctioni rectè assimilari possunt. Ex. gr. uti maritus & uxor proximè atque immediatè, nullâ aliâ intercedente personâ, copulantur in matrimonio: ita corpus & anima absque ulla re media neantur in homine. In amico, in conjuge sæpe unum aliquod bonum invenitur, propter quod ei præcipuè adhæremus: ita pars una corporis humani est, cui mens præcipuè conjungitur. Non quælibet promiscuè, at certa quædam officiorum genera in conversatione Christiana certis hominum necessitatibus præstanda sunt, esurienti cibus, sitienti porus dandus, nudus amiciendus, ægrotus visitandus, &c. Matth. 25. Similis est actuum corporeorum ad certas animi functiones relatio & applicatio in humano composito. Vide cap. XXIV.

11. Ipse Aristoteles materiæ & formæ conjunctionem in Physicis contulit cum maris & fœminæ conjugatione, affirmans à materia appeti formam, sicuti à fœmina appetitur mas. Et nobis non liceat corporis & mentis in homine nexum cum conjugio, veriore & propinquiore ratione, conferre?

12. Denique S. Scriptura in explicanda Christi & Ecclesiæ viva & arctissima conjunctione non modò similitudinibus utitur physicis, capitis & reliqui corporis, verùm etiam æconomicis sponsi & sponsæ, patris & filii, heri & famuli, nec non politicis regis & monarchæ, &c. Adeo ut nobis vitio verti nequeat, quod vivam & firmam multisque modis admirandam corporis animique in homine conjunctionem pluribus diversi generis exemplis & similibus declarare studuimus. Quæ omnia si diu multumque mente agitaveris, istam conjunctionem, qua constituitur homo, plurium aliarum in societate civili, domestica, scholastica conjunctionum regulam & mensuram esse intelliges.

1
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51
52
53
54
55
56
57
58
59
60
61
62
63
64
65
66
67
68
69
70
71
72
73
74
75
76
77
78
79
80
81
82
83
84
85
86
87
88
89
90
91
92
93
94
95
96
97
98
99
100

